

新會梁啟超任公著

專集第三冊

飲冰室合集

上海中華書局印行

飲冰室專集之四

新民說

目次

- 第一節 敘論
- 第二節 論新民爲今日中國第一急務
- 第三節 釋新民之義
- 第四節 就優勝劣敗之理以證新民之結果而論及取法之所宜
- 第五節 論公德
- 第六節 論國家思想
- 第七節 論進取冒險
- 第八節 論權利思想
- 第九節 論自由

第十節 論自治

第十一節 論進步（一名論中國羣治不進之原因）

第十二節 論自尊

第十三節 論合羣

第十四節 論生利分利

第十五節 論毅力


第十六節 論義務思想

第十七節 論尙武

第十八節 論私德

第十九節 論民氣

第二十節 論政治能力



飲冰室專集之四

新民說

第一節 敘論

自世界初有人類以迄今日。國於環球上者何啻千萬。問其巋然今存。能在五大洲地圖占一顏色者。幾何乎。曰百十而已矣。此百十國中。其能屹然強立。有左右世界之力。將來可以戰勝於天演界者。幾何乎。曰四五而已矣。夫同是日月。同是山川。同是方趾。同是圓顛。而若者以興。若者以亡。若者以弱。若者以強。則何以故。或曰。是在地利。然今之亞美利加。猶古阿美利加。而盎格魯撒遜英國人種之名也。民族何以享其榮。古之羅馬。猶今之羅馬。而拉丁民族何以墜其譽。或曰。是在英雄。然非無亞歷山大。而何以馬基頓。今已成灰塵。非無成吉思汗。而何以蒙古。幾不保殘喘。嗚呼噫嘻。吾知其由。國也者。積民而成。國之有民。猶身之有四肢五臟筋脈血輪也。未有四肢已斷。五臟已瘵。筋脈已傷。血輪已涸。而身猶能存者。則亦未有其民。愚陋怯弱。渙散混濁。而國猶能立者。故欲其身之長生久視。則攝生之術不可不明。欲其國之安富尊榮。則新民之道不可不講。

第二節 論新民爲今日中國第一急務

吾今欲極言新民爲當務之急。其立論之根柢有二。一曰關於內治者。二曰關於外交者。

所謂關於內治者何也。天下之論政術者多矣。動曰某甲誤國。某乙殃民。某之事件。政府之失機。某之制度。官吏之溺職。若是者。吾固不敢謂爲非然也。雖然。政府何自成。官吏何自出。斯豈非來自民間者耶。某甲某乙者。非國民之一體耶。久矣夫。聚羣盲不能成一離婁。聚羣聾不能成一師曠。聚羣怯不能成一烏獲。以若是之民。得若是之政府官吏。正所謂種瓜得瓜。種豆得豆。其又奚尤。西哲常言。政府之與人民。猶寒暑表之與空氣也。室中之氣候。與針裏之水銀。其度必相均。而絲毫不容假借。國民之文明程度低者。雖得明主賢相以代治之。及其人亡。則其政息焉。譬猶嚴冬之際。置表於沸水中。雖其度驟升。水一冷而墜如故矣。國民之文明程度高者。雖偶有暴君汗吏。虔劉一時。而其民力自能補救之。而整頓之。譬猶溽暑之時。置表於冰塊上。雖其度忽落。不俄頃則冰消而漲如故矣。然則苟有新民。何患無新制度。無新政府。無新國家。非爾者。則雖今日變一法。明日易一人。東塗西抹。學步效顰。吾未見其能濟也。夫吾國言新法數十年。而效不覩者何也。則於新民之道。未有留意焉者也。今草野憂國之士。往往獨居深念。歎息想望曰。安得賢君相。庶拯我乎。吾未知其所謂賢君相者。必如何而始爲及格。雖然。若以今日之民德民智民力。吾知雖有賢君相。而亦無以善其後也。夫拿破侖曠世之名將也。苟授以旗幟之惰兵。則不能敵黑蠻。哥倫布航海之大家也。苟乘以朽木之膠船。則不能渡溪沚。彼君相者。非能獨治也。勢不得不任疆臣。疆臣不得不任監司。監司不得不任府縣。府縣不得不任吏胥。此諸級中人。但使其賢者半。不肖者半。猶不足以致治。而況乎其百不得一也。今爲此論者。固知泰西政治之美。而欲吾國之效之矣。但推其意。得毋以若彼之政治。皆由其君若相獨力所製造耶。試與一游英美德法之都。觀其人民之自治何如。其人民與

政府之關係何如。觀之一省。其治法儼然一國也。觀之一市一村。其治法儼然一國也。觀之一黨會一公司一學校。其治法儼然一國也。乃至觀之一人。其自治之法。亦儼然治一國也。譬諸鹽有鹹性。積鹽如陵。其鹹愈濃。然剖分此如陵之鹽爲若干石。石爲若干斗。斗爲若干升。升爲若干顆。顆爲若干阿屯。無一不鹹。然後大鹹乃成。搏沙按粉而欲以求鹹。雖隆之高於泰岱。猶無當也。故英美各國之民。常不待賢君相而足。以致治。其元首則堯舜之垂裳可也。成王之委裘亦可也。其官吏則曹參之醇酒可也。成瑨之坐嘯亦可也。何也。以其有民也。故君相常倚賴國民。國民不倚賴君相。小國且然。況吾中國幅員之廣。尤非一二人之長鞭所能及者耶。

則試以一家譬一國。苟一家之中。子婦弟兄各有本業。各有技能。忠信篤敬。勤勞進取。家未有不淳然興者。不然者。各委棄其責任。而一望諸家長。家長而不賢。固闔室爲餓殍。藉令賢也。而能蔭庇我者幾何。卽能蔭庇矣。而爲人子弟。累其父兄。使終歲勤動。日夕憂勞。微特於心不安。其母乃終爲家之累耶。今之動輒責政府望賢君相者。抑何不恕。抑何不智。英人有常言曰。That's your mistake. I couldn't help you. 譯意言。君誤矣。吾不能助

君也。此雖制己主義之鄙言。而實鞭策人自治自助之警句也。故吾雖日望有賢君相。吾尤恐卽有賢君相。亦愛我而莫能助也。何也。責望於賢君相者深。則自責望者必淺。而此責人不責己。望人不望己之惡習。卽中國所以不能維新之大原。我責人人亦責我。我望人人亦望我。是四萬萬人。遂互消於相責相望之中。而國將誰與立也。新民云者。非新者一人。而新之者又一人也。則在吾民之各自新而已。孟子曰。子力行之。亦以新子之國。自新之謂也。新民之謂也。

所謂關於外交者何也。自十六世紀以來。約三百年前。歐洲所以發達。世界所以進步。皆由民族主義 Nationalism

所磅礴衝激而成。民族主義者何。各地同種族同言語同宗教同習俗之人。相視如同胞。務獨立自治。組織完備之政府。以謀公益而禦他族是也。此主義發達既極。馴至十九世紀之末。近二三十年乃更進而爲民族帝國主義。

National Imperialism 民族帝國主義者何。其國民之實力。充於內而不得不溢於外。於是汲汲焉求擴張權力於他地。以爲我尾閭。其下手也。或以兵力。或以商務。或以工業。或以教會。而一用政策以指揮調護之是也。近者如俄國之經略西伯利亞。土耳其德國之經略小亞細亞。阿非利加。英國之用兵於波亞。美國之縣夏威夷。古巴。攘非律賓。皆此新主義之潮流。迫之不得不然也。而今也。於東方大陸。有最大之國。最腴之壤。最腐敗之政府。最散弱之國民。彼族一旦窺破內情。於是移其所謂民族帝國主義者。如羣蟻之附羶。如萬矢之向的。雖然而集注於此一隅。彼俄人之於滿洲。德人之於山東。英人之於揚子江流域。法人之於兩廣。日人之於福建。亦皆此新主義之潮流。迫之不得不然也。

夫所謂民族帝國主義者。與古代之帝國主義迥異。昔者有若亞歷山大。有若查理曼。有若成吉思汗。有若拿破侖。皆嘗抱雄圖。務遠略。欲蹂躪大地。吞并弱國。雖然。彼則由於一人之雄心。此則由於民族之漲力。彼則爲權威之所役。此則爲時勢之所趨。故彼之侵略。不過一時。所謂暴風疾雨。不崇朝而息矣。此之進取。則在久遠。日擴而日大。日入而日深。吾中國不幸而適當此盤渦之中心點。其將何以待之。曰。彼爲一二人之功名心而來者。吾可以恃一二之英雄以相敵。彼以民族不得已之勢而來者。非合吾民族全體之能力。必無從抵制也。彼以一時之氣。驟進者。吾可以鼓一時之血勇以相防。彼以久遠之政策漸進者。非立百年宏毅之遠猷。必無從倖存也。不見乎瓶水平。水僅半器。他水卽從而入之。若內力能自充塞本器。而無一隙之可乘。他水未有能入者也。故今日

欲抵當列強之民族帝國主義。以挽浩劫而拯生靈。惟有我行我民族主義之一策。而欲實行民族主義於中國。舍新民末由。

今天下莫不憂外患矣。雖然。使外而果能爲患。則必非一憂之所能了也。夫以民族帝國主義之頑強突進。如彼其劇。而吾猶商榷於外之果能爲患與否。何其愚也。吾以爲患之有無。不在外而在內。夫各國固同用此主義也。而俄何以不施諸英。英何以不施諸德。德何以不施諸美。歐美諸國何以不施諸日本。亦曰有隙與無隙之分而已。人之患瘵者。風寒暑溼燥火。無一不足以侵之。若血氣強盛。膚革充盈者。冒風雪。犯暴曠。衝瘴癘。凌波濤。何有焉。不自攝生。而怨風雪暴曠波濤瘴癘之無情。非直彼不任受。而我亦豈以善怨而獲免耶。然則爲中國今日計。必非恃一時之賢君相。而可以弭亂。亦非望草野一二英雄崛起。而可以圖成。必其使吾四萬萬人之民。德民智。民力。皆可與彼相埒。則外自不能爲患。吾何爲而患之。此其功雖非旦夕可就乎。然孟子有言。七年之病。求三年之艾。苟爲不蓄。終身不得。今日舍此一事。別無善圖。寧復可蹉跎蹉跎。更閱數年。將有欲求如今日而不可復得者。嗚呼。我國民可不悚耶。可不勗耶。

第二節 釋新民之義

新民云者。非欲吾民盡棄其舊以從人也。新之義有二。一曰。淬厲其所本有而新之。二曰。採補其所本無而新之。二者缺一時。乃無功。先哲之立教也。不外因材而篤。與變化氣質之兩途。斯卽吾淬厲所固有。採補所本無之說也。一人如是。衆民亦然。

凡一國之能立於世界。必有其國民獨具之特質。上自道德法律。下至風俗習慣文學美術。皆有一種獨立之精神。祖父傳之。子孫繼之。然後羣乃結。國乃成。斯實民族主義之根柢源泉也。我同胞能數千年立國於亞洲大陸。必其所具特質。有宏大高尚完美。釐然異於羣族者。吾人所當保存之。而勿失墜也。雖然。保之云者。非任其自生自長。而漫曰我保之我保之云爾。譬諸木然。非歲歲有新芽之茁。則其枯可立待。譬諸井然。非息息有新泉之湧。則其涸不移時。夫新芽新泉。豈自外來者耶。舊也而不得不謂之新。惟其日新。正所以全其舊也。濯之拭之。發其光晶。鍛之鍊之。成其體段。培之濟之。厚其本原。繼長增高。日征月邁。國民之精神。於是乎保存。於是乎發達。世或以守舊二字爲一極可厭之名詞。其然豈其然哉。吾所患不在守舊。而患無真能守舊者。真能守舊者何。卽吾所謂淬厲其固有而已。


僅淬厲固有而遂足乎。曰不然。今之世非昔之世。今之人非昔之人。昔者吾中國有部民而無國民。非不能爲國民也。勢使然也。吾國夙巍然屹立於大東。環列皆小蠻夷。與他方大國。未一交通。故我民常視其國爲天下耳目所接觸。腦筋所濡染。聖哲所訓示。祖宗所遺傳。皆使之有可以爲一箇人之資格。有可以爲一家人之資格。有可以爲一鄉一族人之資格。有可以爲天下人之資格。而獨無可以爲一國國民之資格。夫國民之資格。雖未必有以遠優於此數者。而以今日列國並立弱肉強食優勝劣敗之時代。苟缺此資格。則決無以自立於天壤。故今日不欲強吾國則已。欲強吾國。則不可不博考各國民族所以自立之道。彙擇其長者而取之。以補我之所未及。今論者於政治學術技藝。皆莫不知取人長以補我短矣。而不知民德民智民力。實爲政治學術技藝之大原。不取於此而取於彼。棄其本而摹其末。是何異見他樹之蓊鬱。而欲移其枝以接我槁榦。見他井之汨湧。而欲汲其流。

以實我智源也。故採補所本無以新我民之道，不可不深長思也。

世界上萬事之現象，不外兩大主義。一曰保守，二曰進取。人之運用此兩主義者，或偏取甲，或偏取乙，或兩者並起而相衝突，或兩者並存而相調和。偏取其一，未有能立者也。有衝突則必有調和，衝突者，調和之先驅也。善調和者，斯為偉大國民。盎格魯撒遜人種是也。譬之躡步，以一足立，以一足行，譬之拾物，以一手握，以一手取。故吾所謂新民者，必非如心醉西風者流，蔑棄吾數千年之道德學術風俗，以求伍於他人，亦非如墨守故紙者流，謂僅抱此數千年之道德學術風俗，遂足以立於大地也。

第四節 就優勝劣敗之理以證新民之結果而論及取法之所宜

在民族主義立國之今日，民弱者國弱，民強者國強，殆如影之隨形，響之應聲，有絲毫不容假借者。今請將地球民族之大勢，列為一表，而論其所以迭代消長之由。



凡地球民族之大別五。聞其最有勢力於今世者誰乎。白色種人是也。白色民族之重要者三。白種不止此三派

派此不過舉其要者耳此文非考據種族不必鯁鯁也其最有勢力於今世者誰乎。條頓人是也。條頓民族之重要者二。其最有勢力於今

世者誰乎。盎格魯撒遜人是也。當其始溝分而居。不相雜廁也。則無論若何之民族。皆可以休養生息於其部分之內。然天演物競之公例。既驅人類使不得不接觸。不交通。不爭競。一旦接觸。交通。爭競。而一起一仆之數。乃立見。不觀於鬪蟀者乎。百蟀各處一籠。各自雄也。并而一之。一日而死十六七。兩日而死十八九。三日而所餘者僅一二焉矣。所餘之一二。必其最强者也。然則稍不强者殆而已矣。黑紅棕之人與白人相遇。如湯沃雪。瞬即消滅。夫人而知矣。今黃人與之遇。又著著失敗矣。若夫觀白人之自競也。彼斯拉夫民族。常為阿士曼黎之專制政府與盧馬納及哈菩士卜之條頓人王家所軛縛。至今罕能自伸。拉丁民族。雖當中世時代。曾臻全盛。及其與條頓人相遇。遂不可支。自羅馬解紐以來。今日歐洲之建國。無一不自條頓人之手而成。如皮士噶人之於西班牙。士埃威人之於葡萄牙。郎拔人之於意大利。佛蘭克人之於法蘭西。比利時。盎格魯撒遜人之於英吉利。士康的拿比亞人之於丹麥。瑞典。那威。日耳曼人之於德意志。荷蘭。瑞士。奧大利。凡此皆現代各國之主動力也。而一皆自條頓人發之。成之。是條頓人不啻全世界動力之主人翁也。而格頓人之中。又以盎格魯撒遜人為主中之主。強中之強。今日地球陸地四分之一以上。被其占領。人類四分之一以上。受其統制。而勢力範圍之布於五洲各地者。且日進而未有已焉。今試就百年來各國用語之人數變遷。列為一表。而知盎格魯民族之進步。有令人驚絕者。

用語比數表

一八〇一年		百分比比較		一八九〇年		百分比比較		
葡語	七、四八〇	四·七	葡語	一三、〇〇〇	三·二	法語	三一、四五〇千	一九·四
意語	一五、〇七〇	九·三	意語	三三、〇〇〇	八·三	英語	三〇、七七〇	一九·〇
英語	二〇、五二〇	一二·七	班語	四二、八〇〇	一〇·七	德語	三〇、三二〇	一八·七
西班牙語	二六、一九〇	一六·二	法語	五一、二〇〇	一二·七	俄語	二六、一九〇	一六·二
			俄語	七五、〇九〇	一八·七			
			德語	七五、二〇〇	一八·八			
			英語	一一一、一〇〇千	二七·七			

由兩表比較之。則此九十年間。英語之位置。由第五躍至第一。由二千〇五十二萬躍至一萬一千一百萬。由百分之十二有奇。躍至百分之二十七有奇。駭然遂有吞全球括四海之勢。盎格魯撒遜人之氣。誰能禦之。由此觀之。則今日世界上最優勝之民族。可以知矣。五色人相比較。白人最優。以白人相比較。條頓人最優。以條頓人相比較。盎格魯撒遜人最優。此非吾趨勢利之言也。天演界無可逃避之公例。實如是也。使日耳曼人能自新。以優勝於盎格魯撒遜。則他日能代之以興。亦未可知。使斯拉夫人拉丁人能自新。以優勝於條頓人。使黃人能自新。以優勝於白人。則其他日之結果亦然。要之現在之地位。則其優劣之數。實如上所云云矣。然則吾所謂博考民族所以自立之道。彙擇其長而取之。以補我所未及者。援取法乎上之例。不可不求諸白人。不可不求諸白人之中之條頓人。不可不求諸條頓人之中之盎格魯撒遜人。

白人之優於他種人者何也。他種人好靜。白種人好動。他種人狃於和平。白種人不辭競爭。他種人保守。白種人進取。以故他種人只能發生文明。白種人則能傳播文明。發生文明者恃天然也。傳播文明者恃人事也。試觀泰西文明動力之中心點。由安息埃及而希臘。由希臘而羅馬。由羅馬而大西洋沿岸諸國。而徧於大陸。而飛渡磅礪於亞美利加。今則回顧而報本於東方焉。其機未嘗一日停。其勇猛果敢活潑宏偉之氣。比諸印度人何如。比諸中國人何如。其他小國更不必論矣。然則白種人所以雄飛於全球者非天幸也。其民族之優勝使然也。

條頓人之優於他白人者何也。條頓人政治能力甚強。非他族所能及也。如彼希臘人及斯拉夫人。雖能立地方自治之制。而不能擴充之。其能力全集注於此最小之公共團體。而位於此團體之上者。有國家之機關。位於此團體之下者。有個人之權利。皆非彼等所能及也。以故其所生之結果。有三缺點。人民之權利不完。一也。團體與團體之間。不相聯屬。二也。無防禦外敵之力。三也。故希臘人一軛於羅馬。再軛於土耳其。三軛於條頓人。數千年不見天日。而斯拉夫人今猶呻吟於專制恣暴政體之下。而未有已也。至如迦特民族。羅馬一統前之部兒人及今之愛爾蘭人與蘇格蘭

之高地人皆屬於此族。雖其勇敢之氣冠絕一時。而政治思想更薄弱。故惟知崇拜一二膂力之英雄。而國民不能獨立團

結。雖能建無數之小軍國。而無統一之之道。能創大宗教。而不能成大國家。至於拉丁人。則遠優於彼等矣。能建偉大之羅馬帝國。統一歐陸。能製完備之羅馬民法。垂型千年。雖然。其思想太大而不能實施。動欲統制宇內。而地方自治之制被破壞焉。個人權利被蹂躪焉。務張國力而不養人格。故及羅馬之末葉。而拉丁之腐敗卑劣聞天下。雖及今日。而其沿襲之舊質。猶不能除。好虛榮。少沈實。時則傾於保守。抱陳腐而不肯稍變。時則馳於急激。變之不以次第。若法蘭西人。其代表也。百年之內。變政體者六。易憲法者十四。至今名爲民主。而地方自治與個

人權利。毫不能擴充。此拉丁人所以日蹙於天演之劇場也。若夫條頓人。則其始在日耳曼森林中爲一種蠻族時。其個人強立自由之氣概。傳諸子孫而不失。而又經羅馬文化之薰習鍛鍊。兩者和合。遂能成一特性之民族。而組織民族的國家。National state 創代議制度。使人民皆得參預政權。集人民之意以爲公意。合人民之權以爲國權。又能定團體與個人之權限。定中央政府與地方自治之權限。各不相侵。民族全體得應於時變。以滋長發達。故條頓人今遂優於天下。非天幸也。其民族之優勝使然也。

盎格魯撒遜人之尤優於他條頓人者何也。其獨立自助之風最盛。自其幼年在家庭。在學校。父母師長。皆不以附庸待之。使其練習世務。稍長而可以自立。不倚賴他人。其守紀律循秩序之念最厚。其常識 Common sense

最富。常不肯爲無謀之躁妄舉動。其權利之思想最強。視權利爲第二之生命。絲毫不肯放過。其體力最壯。能冒萬險。其性質最堅忍。百折不回。其人以實業爲主。不尙虛榮。人皆務有職業。不問高下。而坐食之官吏政客。常不爲世所重。其保守之性質亦最多。而常能因時勢。鑒外羣。以發揮光大其固有之本性。以此之故。故能以區區北極三孤島。而孳殖其種於北亞美利加澳大利亞兩大陸。揚其國旗於日所出入處。鞏其權力於五洲四海衝要咽喉之地。而天下莫之能敵也。盎格魯撒遜人所以定霸於十九世紀。非天幸也。其民族之優勝使然也。

然則吾之所當取法者可知已。觀彼族之所以衰所以弱。此族之所以興所以強。而一自省焉。吾國民之性質。其與彼召衰召弱者異同若何。與此致興致強者異同若何。其大體之缺陷在何處。其細故之薄弱在何處。一一勘之。一一鑒之。一一改之。一一補之。於是乎新國民可以成。今請舉吾國民所當自新之大綱小目。條分縷析。於次節詳論之。

第五節 論公德

我國民所最缺者。公德其一端也。公德者何。人羣之所以爲羣。國家之所以爲國。賴此德焉。以成立者也。人也者。善羣之動物也。此西儒亞里士多德之言人而不羣。禽獸奚擇。而非徒空言高論曰羣之羣之。而遂能有功者也。必有一物焉。貫注而聯絡之。然後羣之實乃舉。若此者謂之公德。

道德之本體一而已。但其發表於外。則公私之名立焉。人人獨善其身者謂之私德。人人相善其羣者謂之公德。二者皆人生所不可缺之具也。無私德則不能立。合無量數卑污虛僞殘忍愚懦之人。無以爲國也。無公德則不能團。雖有無量數束身自好廉謹良愿之人。仍無以爲國也。吾中國道德之發達。不可謂不早。雖然。偏於私德。而公德殆闕如。試觀論語孟子諸書。吾國民之木鐸。而道德所從出者也。其中所教。私德居十之九。而公德不及其一焉。如皋陶謨之九德。洪範之三德。論語所謂溫良恭儉讓。所謂克己復禮。所謂忠信篤敬。所謂寡尤寡悔。所謂剛毅木訥。所謂知命知言。大學所謂知止慎獨戒欺求慊。中庸所謂好學力行知恥。所謂戒慎恐懼。所謂致曲。孟子所謂存心養性。所謂反身強恕。凡此之類。關於私德者。發揮幾無餘蘊。於養成私人。私人者對於公人而言。謂一個人不與他人交涉之時也。之資格。庶乎備矣。雖然。僅有私人之資格。遂足爲完全人格乎。是固不能。今試以中國舊倫理。與泰西新倫理相比較。舊倫理之分類。曰君臣。曰父子。曰兄弟。曰夫婦。曰朋友。新倫理之分類。曰家族倫理。曰社會倫理。即人倫理。曰國家倫理。舊倫理所重者。則一私人對於一私人之事也。一私人之獨善其身。固屬於私德之範圍。即一私人與他私人交涉之道義。仍屬於私德之範圍也。此可以法律上公法私法新倫理所重者。則一私人對於一團體之事也。以新倫理之分類。兄弟也。夫婦也。關於社會倫理者。一者三父子也。

朋友也。關於國家倫理者一君臣也。然朋友一倫。決不足以盡社會倫理。君臣一倫。尤不足以盡國家倫理。何也？凡人對於社會之義務。決不徒在相知之朋友而已。即絕跡不與人交者。仍於社會上有不可不盡之責任。至國家者。尤非君臣所能專。有若僅言君臣之義。則使以禮事以忠全屬兩個私人。感恩效力之事。耳於大體無關也。將所謂逸民不事王侯者。豈不在此倫範圍之外乎？夫一人必備此三倫。理之義務。然後人格乃成。若中國之五倫。則惟於家族倫理稍為完整。至社會國家倫理不備。滋多此缺憾之必當補者也。皆由重私德輕公德。所生之結果也。夫一私人之所以自處。與一私人之對於他私人。其間必貴有道德者存。此奚待言。雖然。此道德之一部分。而非其全體也。全體者。合公私而兼善之者也。私德公德。本並行不悖者也。然提倡之者。既有所偏。其末流或遂至相妨。若微生畝譏孔子以爲佞。公孫丑疑孟子以好辨。此外道淺學之徒。其不知公德。不待言矣。而大聖達哲。亦往往不免。吾今固不欲撫拾古人片言隻語。有爲而發者。搥之以相詬病。要之吾中國數千年來。東身寡過主義。實爲德育之中心點。範圍既日縮日小。其間有言論行事。出此範圍外。欲爲本羣本國之公利公益有所盡力者。彼曲士賤儒。動輒援不在其位。不謀其政等偏義。以非笑之。擠排之。謬種流傳。習非勝是。而國民益不復知公德爲何物。今夫人之生息於一羣也。安享其本羣之權利。即有當盡於其本羣之義務。苟不爾者。則直爲羣之蠹而已。彼持東身寡過主義者。以爲吾雖無益於羣。亦無害於羣。庸詎知無益之即爲害乎。何則。羣有以益我。而我無以益羣。是我逋羣之負而不償也。夫一私人與他私人交涉。而逋其所應償之負。於私德必爲罪矣。謂其害之將及於他人也。而逋羣負者。乃反得冒善人之名。何也。使一羣之人。皆相率而逋焉。彼一羣之血本。能有幾何。而此無窮之債客。日夜蠶蝕之。而瓜分之。有消耗無增補。何可長也。然則其羣必爲逋負者所拽倒。與私人之受累者同一結果。此理勢之所必然矣。今吾中國所以日即衰落者。豈有他哉。東身寡過之善士太多。享權利而不盡義務。人人視其所負於羣者。如無有焉。人雖多。曾不能爲羣之利。而反爲羣之累。夫安得不日蹙也。

父母之於子也。生之育之。保之教之。故爲子者有報父母恩之義務。人人盡此義務。則子愈多者。父母愈順。家族愈昌。反是則爲家之索矣。故子而逋父母之負者。謂之不孝。此私德上第一大義。盡人能知者也。羣之於人也。國家之於國民也。其恩與父母同。蓋無羣無國。則吾性命財產無所託。智慧能力無所附。而此身將不可以一日立於天地。故報羣報國之義務。有血氣者所同具也。苟放棄此責任者。無論其私德上爲善人爲惡人。而皆爲羣與國之蝥賊。譬諸家有十子。或披剃出家。或博弈飲酒。雖一則求道。一則無賴。其善惡之性質迥殊。要之不顧父母之養。爲名教罪人則一也。明乎此義。則凡獨善其身以自足者。實與不孝同科。案公德以審判之。雖謂其對於本羣而犯大逆不道之罪。亦不爲過。

某說部寓言有官吏死而冥王案治其罪者。其魂曰。吾無罪。吾作官甚廉。冥王曰。立木偶於庭。並水不飲。不更勝君乎。於廉之外一無所聞。是卽君之罪也。遂炮烙之。欲以束身寡過爲獨一無二之善德者。不自知其已陷於此律而不容赦也。近世官箴最膾炙人口者三字。曰情慎勤。夫情慎勤豈非私德之高尙者耶。雖然。彼官吏者受一羣之委託而治事者也。既有本身對於羣之義務。復有對於委託者之義務。曾是情慎勤三字。遂足以塞此兩重責任乎。此皆由知有私德。不知有公德。故政治之不進。國華之日替。皆此之由。彼官吏之立於公人地位者且然。而民間一私人更無論也。我國民中無一人視國事如己事者。皆公德之大義未有發明故也。

且論者亦知道德所由起乎。道德之立。所以利羣也。故因其羣文野之差等。而其所適宜之道德。亦往往不同。而要之以能固其羣。善其羣。進其羣者爲歸。夫英國憲法以侵犯君主者爲大逆不道。各君主法國憲法以謀立君主者爲大逆不道。美國憲法乃至以妄立貴爵名號者爲大逆不道。凡違憲者皆其道德之外形相反如此。至其

大逆不道也

精神則一也。一者何？曰爲一羣之公益而已。乃至古代野蠻之人，或以婦女公有爲道德。一羣中之男子所公有物無
婚姻之制也。古代斯或以奴隸非人爲道德。視奴隸不以人類古賢柏拉圖阿里士多德皆不以爲
巴達尙不脫此風。或以奴隸非人爲道德。非南北美戰爭以前歐美人士多德皆不以爲。而今世哲學
家猶不能謂其非道德。蓋以彼當時之情狀所以利羣者，惟此爲宜也。然則道德之精神，未有不自一羣之利益
而生者。苟反於此精神，雖至善者，時或變爲至惡矣。如自由之制，在今日爲至美，然移之於野蠻未開化之羣，則爲
爲至惡也。是故公德者，諸國之源也。有益於羣者爲善，無益於羣者爲惡。無益而有害者爲小惡，此理放諸四海
而準，俟諸百世而不惑者也。至其道德之外形，則隨其羣之進步以爲比例差。羣之文野不同，則其所以爲利益
者不同，而其所以爲道德者亦自不同。德也者，非一成而不變者也。本原其本原固亘萬古而無變者也。讀非德之
勿誤會本原惟何。非數千年前之古人所能立一定格式以範圍天下萬世者也。公德之條目變遷尤多，然則吾
輩生於此羣，生於此羣之今日，宜縱觀宇內之大勢，靜察吾族之所宜，而發明一種新道德，以求所以固吾羣善
吾羣進吾羣之道，未可以前王先哲所罕言者，遂以自畫而不敢進也。知有公德，而新道德出焉矣。而新民出焉
矣。蓋以爲道德者，日月經天，江河行地，自無始以來，不增不減，先聖昔賢盡揭其奧，以詔後人，安有所謂新焉舊
焉者？殊不知道德之爲物，由於天然，復起其不能人事者，亦半有發達有進步，一循天演之大例，前哲不接於今日
安能制定悉合今日之道德？使孔孟復起，其不能有所損益也。亦明矣。今日正當過渡時代，青黃不接，前哲深
微之義，或湮沒而彰，而流俗相傳，吐棄則橫流之禍，曷其有極？今此禍已見端矣。將有厭其陳腐，而一切吐棄之
者，吐棄陳腐，猶可言也。若並道德而吐棄，則橫流之禍，曷其有極？今此禍已見端矣。將有厭其陳腐，而一切吐棄之
持宋元之餘論，以過其流，豈知優劣收固無可逃，捧坏之吾恐，今後智育愈盛，則德育愈衰。泰西物質文明，盡
不及今，愈餘論，以過其流，豈知優劣收固無可逃，捧坏之吾恐，今後智育愈盛，則德育愈衰。泰西物質文明，盡
輸入中國，而四萬萬人，且相率而爲禽獸也。嗚呼！道德革命之論，吾知必爲舉國之所詬病。願吾特恨吾才之不
逮耳。若夫與一世之流俗人，挑戰決鬪，吾所不懼。吾所不辭，世有以熱誠之心，愛羣愛國，愛真理者乎？吾願爲之
執鞭以研究。公德之大目的，既在利羣，而萬千條理，卽由是生焉。本論以後各子目，殆皆可以利羣二字爲綱。以
此問題也。

一貫之者也。故本節但論公德之急務，而實行此公德之方法，則別著於下方。

第六節 論國家思想

人羣之初級也。有部民而無國民，由部民而進爲國民，此文野所由分也。部民與國民之異，安在？曰羣族而居，自成風俗者，謂之部民。有國家思想，能自布政治者，謂之國民。天下未有無國民而可以成國者也。

國家思想者何？一曰對於一身而知有國家，二曰對於朝廷而知有國家，三曰對於外族而知有國家，四曰對於世界而知有國家。

所謂對於一身而知有國家者何也？人之所以貴於他物者，以其能羣耳。使以一身孑然孤立於大地，則飛不如禽，走不如獸，人類翦滅亦既久矣。故自其內界言之，則太平之時，通功易事，分業相助，必非能以一身而備百工也。自其外界言之，則急難之際，羣策羣力，捍城禦侮，尤非能以一身而保七尺也。於是乎國家起焉。國家之立，由於不得已也。即人人自知僅恃一身之不可，而別求彼我相團結，相補助，相捍救，相利益之道也。而欲使其團結永不散，補助永不虧，捍救永不誤，利益永不窮，則必人人焉知吾一身之上，更有大而要者存。每發一慮，出一言，治一事，必常注意於其所謂一身以上者。此兼愛主義也。雖然，即謂之爲我主義亦無不可。蓋非利羣則不能利己。天下之公例也。苟不爾，則團體終不可得成。而人道或幾乎息矣。此爲國家思想之第一義。

所謂對於朝廷而知有國家者何也？國家如一公司，朝廷則公司之事務所，而握朝廷之權者，則事務所之總辦也。國家如一村市，朝廷則村市之會館，而握朝廷之權者，則會館之值理也。夫事務所爲公司而立乎？抑公司爲

事務所而立乎。會館爲村市而設乎。抑村市爲會館而設乎。不待辨而知矣。兩者性質不同。而其大小輕重。自不可以相越。故法王路易第十四『朕卽國家也』一語。至今以爲大逆不道。歐美五尺童子。聞之莫不唾罵焉。以吾中國人之眼觀之。或以爲無足怪乎。雖然。譬之有一公司之總辦。而曰我卽公司。有一村市之值理。而曰我卽村市。試思公司之股東。村市之居民。能受之否耶。夫國之不可以無朝廷。固也。故常推愛國之心。以愛及朝廷。是亦愛人及屋愛屋及鳥之意云爾。若夫以鳥爲屋也。以屋爲人也。以愛屋愛鳥爲卽愛人也。浸假愛鳥而忘其屋。愛屋而忘其人也。欲不謂之病狂。不可得也。故有國家思想者。亦常愛朝廷。而愛朝廷者。未必皆有國家思想。朝廷由正式而成立者。則朝廷爲國家之代表。愛朝廷卽所以愛國家也。朝廷不以正式而成立者。則朝廷爲國家之蝨賊。正朝廷乃所以愛國家也。此爲國家思想之第二義。

所謂對於外族而知有國家者何也。國家者。對外之名詞也。使世界而僅有一國。則國家之名不能成立。故身與身相並而有我身。家與家相接而有我家。國與國相峙而有我國。人類自千萬年以前。分孳各地。各自發達。自言語風俗。以至思想法制。形質異。精神異。而有不得不自國其國者焉。循物競天擇之公例。則人與人不能不衝突。國與國不能不衝突。國家之名。立之以應他羣者也。故真愛國者。雖有外國之神聖大哲。而必不願服從於其主權之下。寧使全國之人流血粉身靡有孑遺。而必不肯以絲毫之權利讓於他族。蓋非是則其所以爲國之具先亡也。譬之一家。雖復室如懸磬。亦未有願他人入此室處者。知有我故。是故我存。此爲國家思想第三義。所謂對於世界而知有國家者何也。宗教家之論。動言天國。言大同。言一切衆生。所謂博愛主義。世界主義。抑豈不至德而深仁也哉。雖然。此等主義。其脫離理想界而入於現實界也。果可期乎。此其事或待至萬數千年後。吾

不敢知。若今日將安取之。夫競爭者文明之母也。競爭一日停。則文明之進步立止。由一人之競爭而爲一家。由一家而爲一鄉族。由一鄉族而爲一國。一國者團體之最大圈。而競爭之最高潮也。若曰並國界而破之。無論其事之不可成。卽成矣。而競爭絕。毋乃文明亦與之俱絕乎。況人之性非能終無競爭者也。然則大同以後。不轉瞬而必復以他事起競爭於天國中。而彼時則已返爲部民之競爭。而非復國民之競爭。是率天下人而復歸於野蠻也。今世學者。非不知此主義之爲美也。然以其爲心界之美。而非歷史上之美。故定案以國家爲最上之團體。而不以世界爲最上之團體。蓋有由也。然則言博愛者。殺其一身之私以愛一家可也。殺其一家之私以愛一鄉族可也。殺其一身一家一鄉族之私以愛一國可也。國也者。私愛之本位。而博愛之極點。不及焉者野蠻也。過焉者亦野蠻也。何也。其爲部民而非國民一也。此爲國家思想第四義。

耗矣哀哉。吾中國人之無國家思想也。其下焉者。惟一身一家之榮瘁是問。其上焉者。則高談哲理以乖實用也。其不肖者。且以他族爲虎。而自爲其俚。其賢者亦僅以堯跖爲主。而自爲其狗也。以言乎第一義。則今日四萬萬人中。其眼光能及於一身以上者。幾人。攘而往。熙而來。苟有可以謀目前錙銖之私利者。雖賣盡全國之同胞以圖之。所弗辭也。其所謂第一等人者。則獨善其身。鄉黨自好者流也。是卽吾所謂道羣負而不償者也。夫獨善之與私惡。其所以自立者雖不同。要其足以召國家之衰亡一也。以言乎第二義。則吾中國相傳天經地義。曰忠曰孝。尙矣。雖然。言忠國則其義完。言忠君則其義偏。何也。忠孝二德。人格最要之件也。二者缺一。時曰非人。使忠而僅以施諸君也。則天下之爲君主者。豈不絕其盡忠之路。生而抱不具人格之缺憾耶。則如今日美法等國之民。無君可忠者。豈不永見屏於此德之外。而不復得列於人類耶。顧吾見夫爲君主者。與爲民主國之國民者。其應

盡之忠德更有甚焉者也。人非父母無自生，非國家無自存。孝於親，忠於國，皆報恩之大義，而非為一姓之家奴。走狗者所能冒也。而吾中國人以忠之一字為主，僕交涉之專名，何其慎也。君之當忠更甚於民何也？民之忠也，兼有不負付託之義務，安在其忠德之可以已耶？夫孝者子所對於父母之責任也，然為人父以言乎第三義，則者何嘗可以缺孝德？父不可不孝而君顧可以不忠乎？僅言忠君者，吾見其不能自完其說也。吾國歷史彌天之大辱，而非復吾所忍言矣。計自漢末以迄今日，凡一千七百餘年間，我中國全土為他族所占領者，三百五十八年，其黃河以北，乃至七百五十九年。今列其種族及時代為表如左。

國名	國祖	種族	都	今地	興起年代(西歷)	滅亡年代(西歷)
漢	劉淵	匈奴	平陽	山西平陽府	三〇四年	三二九年
成	李雄	巴氏	成都	四川成都府	三一〇四年	三四七年
後趙	石勒	羯	鄴	直隸順德府	三一八年	三五一年
燕	慕容皝	鮮卑	鄴	直隸順德府	三三七七年	三七〇年
代	拓跋猗盧	鮮卑	盛樂	山西大同府	三〇九年	三七六年
秦	苻健	氏	長安	陝西西安府	三五一年	三九四年
後燕	慕容垂	鮮卑	中山	直隸定州	三八三年	四〇八年
後秦	姚萇	羌	長安	直隸定州	三八四年	四一七年
西燕	慕容沖	鮮卑	長子	山西潞州府	三八四年	三九四年
西秦	乞伏乾歸	鮮卑	苑川	甘肅鞏昌府	三八五年	四三一年
後涼	呂光	氏	姑藏	甘肅涼州府	三八六年	四〇三年

南燕	慕容德	鮮卑	廣固	山東青州府	三九八年	四一〇年
南涼	秃髮傉檀	鮮卑	廉川	甘肅西寧府	四〇二年	四一四年
北涼	沮渠蒙遜	匈奴	張掖	甘肅甘州府	四〇二年	四三九年
大夏	赫連勃勃	匈奴	統萬	甘肅寧夏府	四〇七年	四三一年
後魏	拓跋珪	鮮卑	平城	山西大同府	三八六年	五六四年
契丹		五代時燕雲十六州				
金	完顏阿骨打	女真	汴	河南開封府	一一二六年	一二三四年
元	成吉思	蒙古	北京	直隸順天府	一二七七年	一三六七年

嗚呼。以黃帝神明華胄所世襲之公產業。而爲人紆而奪之者。屢見不一見。而所謂黃帝子孫者。迎壺漿若崩厥角。紆青紫臣妾驕人。其自嚙同類以爲之盡力者。又不知幾何人也。陳白沙崖山弔古詩有云。『鑄功奇石張宏範。不是胡兒是漢兒。』嗟夫。嗟夫。晉宋以來之漢兒。其豐功偉烈與張宏範後先輝映者。何啻千百。白沙先生。無乃所見不廣乎。國家思想之銷亡。至是而極。以言乎第四義。則中國儒者。動曰平天下治天下。其尤高尚者。如江都繁露之篇。橫渠西銘之作。視國家爲眇小之一物。而不屑厝意。究其極也。所謂國家以上之一大團體。豈嘗因此等微妙之空言。而有所補益。而國家則滋益衰矣。若是乎吾中國人之果無國家思想也。危乎痛哉。吾中國人之無國家思想。竟如是其甚也。

吾推其所以然之故。厥有二端。一曰知有天下而不知有國家。二曰知有一己而不知有國家。其誤認國家爲天下也。復有二因。第一由於地理者。歐洲地形山河綺錯。華離破碎。其勢自趨於分立。中國地形平原磅礴。阨塞交通。其勢自趨於統一。故自秦以後。二千餘年中。間惟三國南北朝三百年間。稍爲分裂。自餘則皆四海一家。卽偶有割據。亦不旋踵而合併也。環其外者。雖有無數蠻族。然其幅員其戶口其文物。無一足及中國。若葱嶺以外。雖有波斯印度希臘羅馬諸文明國。然彼此不相接。不相知。故中國之視其國如天下。非妄自尊大也。地理使然也。夫國也者。以對待而成。中國人國家思想發達。所以較難於歐洲者。勢也。第二由於學說者。戰國以前。地理之勢未合。羣雄角立。而國家主義亦最盛。顧其敝也。爭地爭城。殺人盈野。塗炭之禍。未不知所極。有道士。惄然憂之。矯枉過正。以救末流。孔子作春秋。務破國界。歸於一王。以文致太平。孟子謂天下惡乎定。定於一。其餘先秦諸子。如墨翟宋輕老聃關尹之流。雖其哲理各自不同。至言及政術。則莫不以統一諸國爲第一要義。蓋救當時之敝。不得不如是也。人心之厭分爭已甚。遂有嬴政劉邦諸梟雄接踵而起。前此書生之坐論。忽變爲帝者之實行。中央集權之勢。遂以大定。帝者猶慮其未固也。乃更燔百家之言。錮方術之士。而務刺取前哲緒論之有利於己者。特表章之。以陶冶一世。於是國家主義遂絕。其絕也。未始不由孔墨諸哲消息於其間也。雖然。是固不可以爲先哲咎。彼其時固當然。而扶東倒西。又人類之弱點而不能避者也。佛以說法度衆生。而法執者謂泥於法也。卽由法生惑焉。後人狃一統而忘愛國。又豈先聖之志也。且人與人相處。而不能無彼我之界者。天性然矣。國界旣破。而鄉族界身家界反日益甚。是去十數之大國。而復生出百數千數無量數之小國。馴至四萬萬人爲四萬萬國焉。此實吾中國二千年來之性狀也。惟不知有國也。故其視朝廷。不以爲國民之代表。而以爲天帝之

代表。彼朝廷之屢易而不動其心也。非忽也。蒼天死而黃天立。白帝殺而赤帝來。於我下界凡民有何與也。稟受於地理者。既若彼。熏習於學說者。又若此。我國人之無國家思想也。又何怪焉。又何怪焉。

雖然。知有天下而不知有國家。此不過一時之謬見。其時變。則其謬亦可自去。彼謬之由地理而起者。今則全球交通。列強比鄰。閉關一統之勢破。而安知殷憂之不足以相啓也。謬之由學說而起者。今則新學輸入。古義調和。通變宜民之論昌。而安知王霸之不可以一途也。所最難變者。則知有一己而不知有國家之弊。深中於人心也。夫獨善其身。鄉黨自好者。畏國事之爲己累而逃之也。家奴走狗於一姓而自詡爲忠者。爲一己之爵祿也。勢利所趨之若蟻。而更自造一種道德以飾其醜而美其名也。不然。則二千年來與中國交通者。雖無文明大國。而四面野蠻。亦何嘗非國耶。謂其盡不知有對待之國。又烏可也。然試觀劉淵石勒以來。各種人之入主中夏。曾有一焉無漢人以爲之佐命元勳者乎。昔嵇紹生於魏。晉人篡其君而戮其父。紹靦顏事兩重不共戴天之仇敵。且爲之死而自以爲忠。後世盲史家亦或以忠許之焉。吾甚惜乎至完美至高尙之忠德。將爲此輩污蟻以盡也。無他。知有己而已。有能富我者。吾願爲之吮癰。有能貴我者。吾願爲之叩頭。其來歷如何。豈必問也。若此者。其所以受病。全非由地理學說之影響。地理學說雖萬變。而奴隸根性終不可得變。嗚呼。吾獨奈之何哉。吾獨奈之何哉。不見乎聯軍入北京。而順民之旗。戶戶高懸。德政之傘。署衙千百。嗚呼痛哉。吾語及此。無背可裂。無髮可豎。吾惟膽戰。吾惟肉麻。忠云忠。忠於勢云爾。忠於利云爾。不知來。視諸往。他日全地球勢利中心點之所在。是卽四萬萬忠臣中心點之所在也。而特不知國於此焉者之誰與立也。

嗚呼。吾不欲多言矣。吾非敢望我同胞將所懷抱之利己主義。剷除淨盡。吾惟望其擴充此主義。鞏固此主義。求

如何而後能真利己。如何而後能保己之利使永不失。則非養成國家思想不能爲功也。同胞乎。同胞乎。勿謂廣土之足恃。羅馬帝國全盛時。其幅員不讓我今日也。勿謂民衆之足恃。印度之土人。固二百餘兆也。勿謂文明之足恃。昔希臘之雅典。當其爲獨立國也。聲明文物甲天下。及其服從他族。萎靡不振。以至於澌亡。而吾國當胡元時代。士大夫皆習蒙古文。廿二史劄記而文學幾於中絕也。惟茲國家。吾儕父母兮。無父何怙。無母何恃兮。兢兢淒淒。誰憐取兮。時運一去。吾其已兮。思之思之兮。及今其猶未沫兮。

第七節 論進取冒險

天下無中立之事。不猛進。斯倒退矣。人生與憂患俱來。苟畏難。斯落險矣。吾見夫今日天下萬國中。其退步之速。與險象之劇者。莫吾中國若也。吾爲此懼。

歐洲民族所以優強於中國者。原因非一。而其富於進取冒險之精神。殆其尤要者也。今勿徵諸遠。請言其近者。當羅馬解紐以後。歐洲人滿爲憂。紛競不可終日。時則有一窶人子。孑身萬里。四度航海。舟人失望。睨怒之極。欲殺之而飲其血。而顧勇撓不屈。有進無退。卒覓得亞美利加。爲生靈開出一新世界者。則西班牙之哥倫布士。

Columbus 其人也。當羅馬教皇威力達於極點。各國君主俯伏肘下。時則有一介僧侶。天主教之教士不娶妻故日本假佛教僧字以名之

今從悍然揭九十六條檄文於大府。鳴舊教之罪惡。倡新說以號召天下。教皇率百數十王侯。開法會拘而訊之。使更前說。而顧從容對簿。侃侃抗言。不屈不撓。卒能開信教自由之端緒。爲人類進幸福者。則日耳曼之馬丁路得 Martin Luther 其人也。扁舟繞地球一周。凌重濤。冒萬死。三年乃還。卒開通太平洋航路。爲兩半球鑿交通。

之孔道者。則葡萄牙之麥志倫 Magellan 其人也。隻身探險於亞非利加內地。越萬里之撒哈拉沙漠。與瘴氣戰。與土蠻戰。與猛獸戰。數十年如一日。卒使全非開通。爲白人殖民地。則英國之立溫斯敦 Livingstone 其人也。十六七世紀間。新舊教之爭正烈。日耳曼勦滅新教徒。殆無遺類。時則有波羅的海岸一蕞爾國。奮其螳臂。爲人類請命。爲上帝復仇。卒以萬六千之精兵。橫行歐陸。拯民塗炭。犧牲一身而不悔者。則瑞典王亞多法士 Adolphus 其人也。俄羅斯經蒙古蹂躪之後。元氣新復。積弱蠻陋。無足比數。時則有以萬乘之尊。微服外游。雜伍傭作。學其文明技術。傳與其民。使其國爲今日世界第一雄國。駸駸乎有囊括宇內之觀者。則俄皇大彼得 Peter the Great 其人也。英國自額里查白英女皇名以後。積勝而驕。立憲美政。漸以墜地。時則有一窮壤牧夫。攘臂以舉義旗。與國會軍血戰八年。卒俘獨夫。重興民政。使北海三島。爲文明政體之祖國。國旗輝於大地者。則英吉利之克林威爾 Cromwell 其人也。美受英軛。租稅煩重。人權蹂躪。民不聊生。時則有一穹谷俠農。叩自由之鐘。揭獨立之旗。毫無憑藉。以抗大敵。卒能建雄邦於新世界。今日幾爲廿世紀地球之主人翁者。則美總統華盛頓 Washington 其人也。法國大革命後。風潮迅激。大陸震懼。舉國不寧。時則有一小軍隊中一小將校。奮其功名心。征埃及。征意大利。席捲全歐。建大帝國。猶率四十萬貔貅。臨強俄。逐北千里。雖敗而其氣不挫。則法皇拿破侖 Napoleon 其人也。荷爲班屬。宗教壓制。虐政憔悴。緹騎徧國。時則有一亡命志士。集勁旅於日耳曼。歸圖恢復。血戰三十七年。卒復國權。身斃於鉏麕之手而不悔者。則荷蘭之維廉額們 William Egmont 其人也。美國當數十年前。奴政盛行。人道滅絕。南北異趣。國幾分裂。時則有一舟人之子。以正理爲甲冑。以民義爲戈矛。斷然排俗情。興義戰。犧牲少數。以活多數。草芥一身。以獻國民。卒能實行平等博愛之理想。定國憲以爲天下法。則美總統林

肯 Lincoln 其人也。羅馬云亡。遺烈久沫。寄息他族。奴畜禽視。時則有弱冠翩翩一少年。投秘密結社。傾僞政府。不能得志。逋竄異域。專務青年教育。喚起國魂。卒能使其國成獨立統一之功。列於世界第一等國者。則意大利之瑪志尼 Mazzini 其人也。若此者。不過聊舉數賢以爲例耳。其他豪傑之類。此者。比肩接踵於歷史。臚其事實。則五車不能容。卽算其姓名。亦更僕不能盡。於戲。何其盛哉。後世讀史者。挹其芬。汲其流。崇拜而歌舞之。而不知其當時道天下所不敢道。爲天下所不敢爲。其精神有江河學海不到不止之形。其氣魄有破釜沈舟一瞑不視之概。其徇其主義也。有天上地下惟我獨尊之觀。其向其前途也。有鞠躬盡瘁死而後已之志。其成也。涸腦精以買歷史之光榮。其敗也。迸鮮血以贖國民之沈孽。嗚呼。曷克有此。曰惟進取故。曰惟冒險故。

進取冒險之性質何物乎。吾無以名之。名之曰浩然之氣。孟子釋浩然之氣曰。其爲氣也。配義與道。無是餒也。又曰。是集義所生者。非義襲而取之也。行有不慊於心。則餒矣。故此性質者。人有之則生。無之則死。國有之則存。無之則亡。而所以養成之發現之者。其根柢甚深厚。而非器性薄弱之人所能假借。試推其所原。有四端焉。

一曰生於希望。『亞歷山大之親征波斯也。瀕行舉其子女玉帛。悉分予諸臣。無一餘者。諸臣曰。然則王更何有乎。』王曰。吾有一焉。曰希望。』甚哉希望之於人如此其偉大而有力也。凡人生莫不有兩世界。其在空間者。曰實跡界。曰理想界。其在時間者。曰現在界。曰未來界。實跡與現在。屬於行爲。理想與未來。屬於希望。而現在所行之實跡。卽爲前此所懷理想之發表。而現在所懷之理想。又爲將來所行實跡之券符。然則實跡者理想之子孫。未來者現在之父母也。故人類所以勝於禽獸。文明人所以勝於野蠻。惟其有希望故。有理想故。有未來故。希望愈大。則其進取冒險之心愈雄。越王勾踐之栖會稽。以薪爲葦。以膽爲糧。彼其心未嘗一日忘沼吳也。摩西率頑冥。

險躁之猶太人民。彷徨於亞刺伯沙漠四十餘年。彼蓋日有一葡萄滋熟。蜜乳芬郁之迦南樂土。來往於其胸中也。王陽明詩云。人人有路透長安。坦坦平平一直看。豈惟吳會。豈惟迦南。蓋丈夫之所以立於世者。莫不有第二之世界。以爲其歸宿之一故鄉。各懷希望。以奔於無極之長途。此世運所以日進步也。以此希望。故其於現在界。於實跡界。不惜絞其腦。滴其汗。胼胝其手足。甚乃獻其血。蛻其骸。豈徒然哉。其將有所易也。西哲有言。『上帝語衆生曰。汝所欲之物。吾悉畀汝。但汝當納其代價。』進取冒險者。希望之代價也。彼禽獸與野蠻人。飢則求食。飽則嬉焉。知有今日而不知有明日。人之所以爲人。文明之所以爲文明。亦曰知明日而已。惟明日能繫我於無極。而三日焉。而五日焉。而七日焉。而一旬焉。而一月焉。而一年焉。而十年焉。而百年焉。而千萬年焉。而億兆京垓無量數。不可思議年焉。皆明日之積也。保守今日。故進取之念消。媿安今日。故冒險之氣亡。若此者。是棄其所以爲人之具。而自儕於羣動也。吾乃知進取冒險之不可以已如此其甚也。

二曰生於熱誠。吾讀史記李將軍列傳。至『廣出獵。見草中石。以爲虎。射之。中石。沒羽。視之。石也。因復更射之。終不能復入石矣。』未嘗不歎人生之能力。無一定界限。無一定程度。而惟以其熱誠之界限程度爲比例。差其動機也。希微其結果也。殊絕而深知。夫天下古今之英雄豪傑。孝子烈婦。忠臣義士。以至熱心之宗教家。政治家。美術家。探險家。所以能爲驚天地泣鬼神之事業。震宇宙而昭蘇之者。其所得皆有由也。西儒姚哥氏有言。『婦人弱也。而爲母則強。』夫弱婦何以能爲強母。唯其愛兒至誠之一念。則雖平日嬌不勝衣。情如小鳥。而以其兒之故。可以獨往獨來於千山萬壑中。虎狼吼咻。魍魎出沒。而無所於恐。無所於避。大矣哉。熱誠之愛之能易人度也。朱壽昌之棄官行乞。跋涉風雪。愛其親也。豫讓之漆身爲厲。被髮爲奴。愛其君也。諸葛武侯之扶病出師。洒一掬

之淚於五丈原頭而不辭者。愛知己也。克林威爾冒弑君之大不韙。且兩度解散國會。受專制之嫌而無憚者。愛國民也。林肯不顧國內之分裂。不恤戰爭之塗炭。而毅然布放奴令於南美者。愛公理也。十六七世紀之間。新教徒抵抗教皇者二百餘年。死者以千數百萬計。而未嘗悔者。愛上帝愛自由也。十九世紀。革命風潮徧於全歐。擲無量數之頭顱血肉。前者仆而後者繼。亦以其民之愛國而自愛也。彼男女之相悅。則固常背父母。犯輿論。千回百折以相從矣。甚者乃相爲死矣。夫人情孰不愛生而惡死。顧其所愛有甚於生者。故或可以得生而不用也。戰國策言。有攫金於齊市者。士官拘而鞠之。其人曰。吾攫金時。只見金。不見人。彼夫英雄豪傑。孝子烈婦。忠臣義士。以至熱心之宗教家。政治家。美術家。探險家。當其徇其主義。赴其目的。何一非見金不見人之類也。若是者。莫之爲而爲。莫之致而至。豈惟不見有人。並不見有我焉。無以名之名。名之曰『烟士披里純』(Inspiration)『烟士披里純』者。熱誠最高潮之一點。而感動人。驅迫人。使上於冒險進取之途者也。而此熱誠。又不惟於所愛者有之。乃至哀之極。怒之極。危險之極。亦常爲驅發熱誠之導線。處火宅者。弱女能運千鈞之筈。臨敵陣者。疲馬亦作突圍之想。故曰。不搏不躍。不激不行。可愛者而不知愛。可哀者而不知哀。可怒者而不知怒。可危者而不知危。此所謂無人性也。吾乃知進取冒險之不可以已如此其甚也。

三曰。生於智慧。凡人有所畏縮也。必其於事理見之未明者也。孩童婦嫗最畏鬼。暮夜則不敢出也。蠻野民族最畏禳祥。龜筮不從則不敢動作也。日食彗見則恐懼潛藏也。禮拜五日不宜出行也。十三人不敢共膳也。二者皆西俗此皆知有所蔽而行。遂有所怯也。灘石錯落。河流激湍。非習水性者不敢渡焉。大雪漫野。坑谷皆盈。非識地勢者不敢凌焉。見之不審。則其氣先餒。餒則進取之精神萎地矣。故王陽明以知行合一爲教義。誠得其本也。哥倫

布之敢於航大西洋而西也。蓋深信地圖之理。而知彼岸必有極樂世界也。格蘭斯頓之堅持愛爾蘭自治案也。蓋深信民族主義自由平等主義。知非此而英愛不能相安也。猛虎躡於後。則越澗穿林如平地。大火燎於棟。則飛簷走壁如轉蓬。知虎與火之能殺人。而不得不冒次險以避最險也。若乳嬰之子。不知虎之暴而火之烈。則嬉然安之而已。故進取冒險之精神。又常以其見地之淺深高下爲比例差。欲養氣者必先積智。非虛言也。而不然者。爲教宗之奴隸。爲先哲之奴隸。爲習俗之奴隸。爲居上位有權勢者之奴隸。乃至自爲其心之奴隸。其心又爲四支百體之奴隸。重重縛軛。奄奄就死。無復生人之趣矣。吾乃知進取冒險之不可以已如此其甚也。

四曰生於膽力。拿破侖曰：「難」之一字。惟愚人所用作字典爲有之耳。」又曰：「不能」二字。非佛蘭西人所用也。」納爾遜曰：「吾未見所謂可畏者。吾不識「畏」之爲何物也。」納爾遜英國名將。即掃盪拿破侖海軍者也。當五歲時常獨游山野。遇迅

雷風烈入夜不歸。其家遣人覓得之。則危坐於山巔。一破屋也。其祖母責之曰：「噫。異哉。何物怪童。此可怖之現象。竟不能驅汝歸家耶。」則答曰：Fear I never saw Fear I do not know what it is。即此文是也。譯爲華言不能得其精神於萬一。嗚呼。至今讀此言。神氣猶爲之王焉。豈偉人之根器。固非吾輩所能企乎。抑自有之而自不用也。拿破侖

所歷至難之境。正多。納爾遜所遇可畏之端亦不少。而拿破侖若行所無事者。無他。其氣先足以勝之也。佛說三界惟心。萬法唯識。吾以爲不能焉。以爲可畏焉。斯不能矣。斯可畏矣。吾以爲能焉。以爲無畏焉。斯亦能矣。斯亦無畏矣。此其理真非鈍根衆生之所能悟也。雖然。猶有二義焉。凡人之有疾病者。雖復齒痛鼻眩之微末。而其日之精神志氣。輒爲之萎縮。蓋氣力與體魄常相依而爲用者也。此一說也。又莊敬日強。安惰日偷。生理之大經也。曾文正曰：「身體強弱。卻不宜過於愛惜。精神愈用則愈出。陽氣愈提則愈盛。若存一愛惜精神的意思。將前將卻。奄奄無氣。決難成事。」此又一說也。若是乎體魄之不可不自壯。而膽力亦未嘗不可以養成也。若拿破侖。若納爾

遜若曾國藩。皆進取冒險之豪傑。永爲後輩型者也。曾文正最講踏實地步。謹慎小心。然其中自有冒險之精神。細讀全集。自能見之。吾乃知進取冒險之不可以已如此其甚也。

危乎微哉。吾中國人無進取冒險之性質。自昔已然。而今且每況愈下也。曰知足不辱。知止不殆。曰知白守黑。知雄守雌。曰不爲物先。不爲物後。曰未嘗先人。而常隨人。此老氏之調言。不待論矣。而所稱誦法孔子者。又往往遺

其大體。撫其偏言。取其「狷」主義。而棄其「狂」主義。取其「勿」主義。而棄其「爲」主義。勿主義者。懲忿窒慾之學也。如

非禮勿視。四句等義。是爲主義者。開物成務之學也。如天下有道。某不與易等義。是取其「坤」主義。而棄其「乾」主義。地道妻道。臣道此坤主義也。取

「命」主義。而棄其「力」主義。命兩者皆孔子所常言。知命之訓。力行之教。昭昭然矣。其所稱道者。曰樂則

行之憂則違之也。曰無多言。多言多患。無多事。多事多敗也。曰危邦不入。亂邦不居也。曰孝子不登高。不臨深也。

夫此諸義。亦何嘗非孔門所傳述。然言非一端。義各有當。孔子曷嘗以此義盡律天下哉。而末俗承流。取便利己。

遂蒙老馬以孔皮。易尼郁以聘莒。於是進取冒險之精神。漸滅以盡。試觀一部十七史之列傳。求所謂如哥倫布

立溫斯敦者有諸乎。曰無有也。求所謂如馬丁路得。林肯者有諸乎。曰無有也。求所謂如克林威爾。華盛頓者有

諸乎。曰無有也。藉有一二。則將爲一世之所戮辱。而非笑者也。不曰好大喜功。則曰亡身及親也。積之數千年。浸

之億萬輩。而霸者復陽芟之。而陰鋤之。務使一國之人。鬼脈陰陰。病質奄奄。女性纖纖。暮色沈沈。嗚呼。一國之大。

有女德而無男德。有病者而無健者。有暮氣而無朝氣。甚者乃至有鬼道而無人道。恫哉。恫哉。吾不知國之何以

立也。君夢如何。我憂孔多。撫絃慷慨。爲少年進步之歌。歌曰。

Never look behind, boys,

When you're on the way;
Time enough for that, boys,

On Some future day.

Though the way be long, boys,

Face it with a will;

Never stop to look behind

When climbing up a hill.

First be sure you're right, boys,

Then with courage strong

Strap your pack upon your back;

And tramp, tramp along.

When you're near the top, boys,

Of the rugged way,

Do not think your work is done,

But climb, climb away.

Success is at the top, boys,

Waiting there until

Patient, plodding, plucky boys,

Have mounted up the hill.

第八節 論權利思想

人人對於人而有當盡之責任。人人對於我而有當盡之責任。對人而不盡責任者。謂之間接以害羣。對我而不盡責任者。謂之直接以害羣。何也。對人而不盡責任。譬之則殺人也。對我而不盡責任。譬之則自殺也。一人自殺。則羣中少一人。舉一羣之人而皆自殺。則不啻其羣之自殺也。

我對我之責任奈何。天生物而賦之以自捍自保之良能。此有血氣者之公例也。而人之所以貴於萬物者。則以其不徒有『形而下』之生存。而更有『形而上』之生存。形而上之生存。其條件不一端。而權利其最要也。故禽獸以保生命爲對我獨一無二之責任。而號稱人類者。則以保生命保權利兩者相倚。然後此責任乃完。苟不爾者。則忽喪其所以爲人之資格。而與禽獸立於同等之地位。故羅馬法視奴隸與禽獸等。於論理上。誠得其當也。以論理學二段法演之。其式如下。無權利者禽獸也。奴隸者無權利者也。故奴隸即禽獸也。故形而下之自殺。所殺者不過一人。形而上之自殺。則舉全社會而禽獸之。且禽獸其苗裔以至於無窮。吾故曰直接以害羣也。嗚呼。吾一不解吾中國人之甘於自殺者。何其多也。

權利何自生。曰生於強。彼獅虎之對於羣獸也。會長國王之對百姓也。貴族之對平民也。男子之對女子也。大羣

之對於小羣也。雄國之對於孱國也。皆常占優等絕對之權利。非獅虎酋長等之暴惡也。人人欲伸張己之權利而無所厭。天性然也。是故權利之爲物。必有甲焉先放棄之。然後有乙焉能侵入之。人人務自強以自保吾權。此實固其羣善其羣之不二法門也。古代希臘有供養正義之神者。其造像也。左手握衡。右手提劍。衡所以權權利之輕重。劍所以護權利之實行。有劍無衡。是豺狼也。有衡無劍。則權利者亦空言而卒歸於無效。德儒伊耶陵

Jhering 所著權利競爭論。原名爲 *Der Kampf ums Recht* 英譯爲 *Battle Rights* 伊氏爲私法學大儒。生於一八一

國重版九回。他國文繙譯者二十一種。其書之價值可知矣。去年譯書彙編同人曾以我國文繙譯之。僅成第一章。而其下闕如余。亟欲續成之。以此書藥治中國人。尤爲對病也。本論要領大率取材伊氏之作。故述其崖略如

此云：「權利之目的在平和。而達此目的之方法。則不離戰鬪。有相侵者。則必相拒。侵者無已時。故拒者亦無盡期。質而言之。則權利之生涯。競爭而已。」又曰：「權利者。不斷之勤勞也。勤勞一弛。而權利即歸於滅亡。」若是乎權利之爲物。其所以得之與所以保之者。如此其不易也。

藉欲得之。藉欲保之。則權利思想。實爲之原。夫人之有四肢五臟也。是形而下生存之要件也。使內而或肝或肺。外而或指或趾。其有一不適者。孰不感苦痛而急思療治之。夫肢臟之苦痛。是即其身內機關失和之徵也。是即其機關有被侵焉之徵也。而療治者。即所以防禦此侵害以自保也。形而上者之侵害。亦有然。有權利思想者。一遇侵壓。則其苦痛之感情。直刺焉激焉。動機一撥而不能自制。亟亟焉謀抵抗之。以復其本來。夫肢臟受侵害而不覺苦痛者。必其麻木不仁者也。權利受侵害而不覺苦痛。則又奚擇焉。故無權利思想者。雖謂之麻木不仁可也。

權利思想之強弱。實爲其人品格之所關。彼夫爲臧獲者。雖以窮卑極恥之事。廷辱之。其受也泰然。若在高尙之

武士則雖擲頭顱以抗雪其名譽。所不辭矣。爲穿窬者。雖以至醜極垢之名。過毀之。其居也恬然。若在純潔之商人。則雖傾萬金以表白其信用。所不辭矣。何也。當其受侵受壓受誣也。其精神上無形之苦痛。直感覺而不能自已。彼誤解權利之真相者。以爲是不過於形骸上物質上之利益。斷斷計較焉。嘻。鄙哉。其爲淺丈夫之言也。譬諸我有是物而橫奪於人。被奪者奮然抗爭於法廷。彼其所爭之目的。非在此物也。在此物之主權也。故常有訴訟之先。聲言他日訟直所得之利益。悉以充慈善事業之用者。苟其志而在利也。則此胡爲者。故此等之訴訟。可謂之道德上問題。而不可謂算學上之問題。苟爲算學上之問題。則必先持籌而計之。曰吾訴訟費之所損。可以償訟直之所得乎。能償則爲之。不能則已之。此鄙夫之行也。夫此等計算者。對於無意識之損害。可以用之。譬如墜物於淵。欲傭人而索之。因預算其物值與傭值之相償。是理之當然也。其目的在得物之利益也。爭權利則不然。其目的非在得物之利益也。故權利與利益。其性質正相反對。貪目前之苟安。計錙銖之小費者。其勢必至視權利如弁髦。此正人格高下垢淨所由分也。

昔藺相如叱秦王曰。臣頭與璧俱碎。以趙之大。何區區一璧是愛。使其愛璧。則碎之胡爲者。乃知璧可毀。身可殺。敵可犯。國可危。而其不可屈者。別有在焉。噫。此所謂權利者也。伊耶陵又言曰。『英國人之游歷歐洲大陸者。或偶遇旅館輿夫。有無理之需索。輒毅然斥之。斥之不聽。或爭議不決者。往往寧延遲行期數日數旬。所耗旅費視所爭之數。增至十倍。亦所不恤焉。無識者莫不笑其大愚。而豈知此人所爭之數。喜林。英國貨幣名一喜林。實所以使堂堂英吉利國屹然獨立於世界之要具也。蓋權利思想之豐富。權利感情之敏銳。即英人所以立國之大原也。今試舉一奧大利人。伊氏著書教授於奧大。與此英人地位同財力同者相比較。其遇此等事。則所以處置者

何如。必曰：此區區者，豈值以之自苦而滋事也。直擲金拂衣而去耳。而烏知夫此英人所拒，奧人所擲，數片喜林之中，有一絕大之關係隱伏焉。即兩國數百年來政治上之發達，社會上之變遷，皆消息乎其間也。嗚呼！伊氏之言，可謂博深而切明矣。吾國人試一自反，吾儕之權利思想，視英人奧人誰似也。

論者或疑此事爲微末而不足道乎。請言其大者。譬有兩國於此，甲國用無理之手段，以奪乙國礪礪不毛之地一方里。此被害國者，將默而息乎。抑奮起而爭，爭之不得而繼以戰乎。戰役一起，則國帑可以竭，民財可以盡，數十萬之壯丁，可以一朝暴骨於原野之中。帝王之瓊樓玉宇，窶民之筆門圭竇，可以同成一燼。馴至宗社可以屋，國祀可以滅，其所損與一方里地之比較，何啻什伯千萬。就其得之，亦不過一方里石田耳。若以算學上兩兩相衡，彼戰焉者，可不謂大愚哉。而豈知一方里被奪，而不敢問者，則十里亦奪，百里亦奪，千里亦奪，其勢不至以全國委於他人而不止也。而此避競爭貪安逸之主義，即使其國喪其所以立國之原也。故夫受數喜林之欺騙，屈辱而默然忍容者，則亦可以對於本身死刑之宣告自署名而不辭者也。被奪一方里之地而不發憤者，則亦可以舉其父母之邦之全圖獻賣於他人，而不以動其心者也。此其左證，豈在遠。反觀我國，而使吾慚悚無地矣。盎格魯撒遜人不待言矣。條頓人不待言矣。歐洲之白種人不待言矣。試就近比照之於日本，日本當四十年前，美國一軍艦始到，不過一測量其海岸耳。而舉國無論爲官爲士爲農爲工爲商爲僧爲俗，莫不瞋目切齒，攘臂扼腕，風起水涌，遂以奏尊攘之功，成維新之業。而我中國以其時燔圓明園，定南京條約，割香港，開五口，試問我國民之感情何如也。當八年前，俄德法三國逼日本還遼，不過以其所奪人者歸原主耳。而舉國無論爲官爲士爲農爲工爲商爲僧爲俗，莫不瞋目切齒，攘臂扼腕，風起水涌，汲汲焉擴張軍備，臥薪嘗膽，至今不忘。而我中國

以其時割膠州旅順等六七軍港。定各國勢力範圍。寢假而聯軍入京。燕薊塗炭。試問我國民之感情何如也。彼其智寧不知曰。此我之權利也。但其有權利而不識有之之爲尊榮。失權利而不知失之之爲苦痛。一言蔽之曰。無權利思想而已。

吾中國先哲之教。曰寬柔以教。不報無道。曰犯而不校。曰以德報怨。以直報怨。此自前人有爲而發之言。在盛德君子偶一行之。雖有足令人起敬者。而末俗承流。遂藉以文其怠惰。惟怯之劣根性。而誤盡天下。如所謂百忍成金。所謂唾面自乾。豈非世俗傳爲佳話者耶。夫人而至於唾面自乾。天下之頑鈍無恥。孰過是焉。今乃欲舉全國人而惟此之爲務。是率全國人而爲無骨無血無氣之怪物。吾不知如何而可也。中國數千年來。誤此見解。習非成是。並爲一談。使勇者日卽於銷磨。怯者反有所藉口。遇勢力之強於己者。始而讓之。繼而畏之。終而媚之。弱者愈弱。強者愈強。奴隸之性。日深一日。對一人如是。對團體亦然。對本國如是。對外國亦然。以是而立於生存競爭最劇最烈之場。吾不知如何而可也。

大抵中國善言仁。而泰西善言義。仁者人也。我利人。人亦利我。是所重者常在人也。義者我也。我不害人。而亦不許人之害我。是所重者常在我也。此二德果孰爲至乎。在千萬年後大同太平之世界。吾不敢言。若在今日。則義也者。誠救時之至德要道哉。夫出吾仁以仁人者。雖非侵人自由。而待仁於人者。則是放棄自由也。仁焉者多。則待仁於人者亦必多。其弊可以使人格日趨於卑下。歐西百年前以施濟貧民爲政府之責任。而貧民日以多。後悟此理。釐而裁之。而民反殷富焉。君子愛人以德。不聞以姑息。故使人各能自立。而不倚賴他人者。上也。若曰。若是乎。仁政者。非政體之至焉者也。吾中國人惟日望仁政於吾。舉天下人而仁之。毋乃降斯人使下己一等乎。若是乎。仁政者。非政體之至焉者也。吾中國人惟日望仁政於其君上也。故遇仁焉者。則爲之嬰兒。遇不仁焉者。則爲之魚肉。古今仁君少而暴君多。故吾民自數千年來。祖宗

之遺傳。即以受人魚肉爲天經地義。而權利二字之識想。斷絕於吾人腦質中者固已久矣。

楊朱曰：『人人不損一毫。人人不利天下。天下治矣。』吾疇昔最深惡痛恨其言。由今思之。蓋亦有所見焉矣。其

所謂人人不利天下。固公德之蝨賊。其所謂人人不損一毫。抑亦權利之保障也。列于楊朱篇記楊徒孟孫陽與

孫陽難禽子曰有侵若肌膚獲萬金者爲之乎曰爲之孟孫陽曰有斷若一節得一國子爲之乎禽子默然有問

孟孫陽曰一毛微於肌膚肌膚微於一節省矣然則積一毛以成肌膚積肌膚以成一國子爲之乎禽子默然有問

一物奈何輕之乎此語與前所引英人爭數喜林之事及爲一方里地而構兵之事正同一理蓋哲學開派一

大師之言其持論必有所根據非徒放誕縱樂而已不然其言何以能盈天下而與儒墨鼎足爲三也然則楊朱

者實主張權利之哲學家而亦中國救夫人雖至鄙吝至不肖亦何至愛及一毫而顧斷斷焉爭之者非爭此一

時一良方也不過其論有雜駁焉者耳 是推權利思想充類至義之盡者也。一部分之權利。合之卽爲全體之

權利。一私人之權利思想。積之卽爲一國家之權利思想。故欲養成此思想。必自個人始。人人皆不肯損一毫。則

亦誰復敢撓他人之鋒而損其一毫者。故曰天下治矣。非虛言也。西哲名言曰人人自由而以他人之自由爲界

不完雖然。楊朱非能解權利之真相者也。彼知權利當保守而勿失。而不知權利以進取而始生。放佚也。媿樂也。

任運也。厭世也。皆殺權利之劊子手也。而楊朱日昌言之。以是求權利。則何異飲鳩以祈永年也。此吾中國所以

雖盛行楊學。而惟熏染其人人不利天下之流毒。而不能實行其人人不損一毫之理想也。權利思想薄弱使然

也。權利思想者。非徒我對於我應盡之義務而已。實亦一私人對於一公羣應盡之義務也。譬之兩陣交綏。同隊之

人。皆賭生命以當公敵。而一人獨貪安逸避競爭。曳兵而走焉。此人之犧牲其名譽。不待言矣。而試思此人何以能幸保首領。且其禍仍未延及於全羣者。毋亦恃同隊之人。有代己而抗敵者耳。使全軍將卒。皆與此怯夫同流。

望風爭逃。則此怯夫與其羣。非悉爲敵所屠而同歸於盡不止也。彼一私人自拋棄其權利者。與此逃亡之弱卒。何擇也。不寧惟是。權利者常受外界之侵害而無已時者也。故亦必常出內力之抵抗而無已時。然後權利始成立。抵抗力厚薄。卽爲權利強弱比例差。試更以前喻明之。夫以千人之隊。則其間一卒之去就。微末亦甚矣。然使百人乃至數百人。脫隊而逃。則其結果如何。其所餘不逃之卒。必不可不加數倍之苦戰。代此逃者而荷其負擔。雖復忠勇義烈。而其力亦有所不逮矣。是何異逃者親搃不逃者之胸而刺以刃也。夫權利之競爭。亦若是則已耳。爲國民者協力各盡其分內競爭之責任。則侵壓自不得行。設有苟免倖脫而避其衝者。是不啻對於國民全體而爲叛逆也。何也。是使公敵增其力。而跳梁暴肆之所由行也。彼淺見者。以爲一私人之放棄權利。不過其本身之受虧被害。而影響不及於他人。何其慎也。

權利競爭之不已。而確立之保障之者。厥恃法律。故有權利思想者。必以爭立法權爲第一要義。凡一羣之有法律。無論爲良爲惡。而皆由操立法權之人制定之。以自護其權利者也。強於權利思想之國民。其法律必屢屢變更。而日進於善。蓋其始由少數之人。出其強權以自利。其後由多數之人。復出其強權相抵制。而亦以自利余所。冰室自由書論權利思想愈發達。則人人務爲強者。強與強相遇。權與權相衡。於是平和善美之新法律乃成。雖然。當新法律與舊法律相嬗之際。常爲最劇最慘之競爭。蓋一新法律出。則前此之憑藉舊法律以享特別之權利者。必受異常之侵害。故倡議制新法律者。不啻對於舊有權力之人而下宣戰書也。夫是以動力與反動力相搏。而大爭起焉。此實生物天演之公例也。當此時也。新權利新法律之能成就與否。全視乎抗戰者之力之強弱。以爲斷。而道理之優劣不與焉。而此過渡時代。則倚舊者與倡新者。皆不可不受大損害。試一讀歐美諸國法律

發達史。如立憲政。廢奴隸。釋傭農。勞力自由。信教自由等。諸大法律。何一不自血風肉雨中薰浴而來。使倡之者有所媮有所憚有所姑息。而稍稍遷就於其間乎。則此退一步。而所謂新權利者。亦必終歸於滅亡而已。吾中國人數千年來不識權利之爲何狀。亦未始不由迂儒煦煦之說階之厲也。質而言之。則權利之誕生。與人類之誕生略同。分娩拆剖之苦痛。勢所不免。惟其得之也艱。故其護之也力。遂使國民與權利之間。其愛情一如母子之關係。母之生子也。實自以其性命爲孤注。故其愛有非他人他事所能易者也。權利之不經艱苦而得者。如飛鴻之遺雛。猛鷗狡狐。時或得而攫之。若慈母懷中之愛兒。雖千百狐鷗。豈能褫也。故權利之薰浴於血風肉雨而來者。既得之後。而永不可復失焉。謂余不信。請觀日本人民擁護憲法之能力。與英美人民之能力相比較。其強弱之率何如矣。若是乎專言仁政者。果不足以語於立國之道。而人民之望仁政以得一支半節之權利者。實含有亡國民之根性明也。

夫專言仁政。猶且不可。而虐政更何論焉。大抵人生之有權利思想也。天賦之良知良能也。而其或強或弱。或隱伏或漸亡。至不齊者何也。則常緣其國家之歷史政治之浸潤以爲差。孟子牛山之喻。先我言之矣。非無萌蘖。牛羊又從而牧之。是以若彼濯濯也。歷覽東西古今亡國之史乘。其始非無一二抵抗暴制以求自由者。一鋤之。三四鋤之。漸萎廢。漸衰頹。漸銷鑠。久之而猛烈沈醞之權利思想。愈制而愈馴。愈沖而愈淡。乃至回復之望絕。而受羈受軛。以爲固然。積之數十年數百年。每下愈況。而常至漸亡。此固由其人民能力之薄弱。而政府之罪。又烏可追也。夫此等政府。豈嘗有一焉能嗣續其命脈以存於今日者。卽有一二。亦不過風燭殘年。旦夕待死而已。政府以此道殺人。毋乃適爲自殺之利刃乎。政府之自殺。已作之而已受之。其又奚尤。顧所最痛者。其禍乃延及於國。

家全體而不能救也。國民者一私人之所結集也。國權者一私人之權利所團成也。故欲求國民之思想之感覺之行爲，舍其分子之各私人之思想感覺行爲而終不可得見。其民強者謂之強國，其民弱者謂之弱國，其民富者謂之富國，其民貧者謂之貧國，其民有權者謂之有權國，其民無恥者謂之無恥國。夫至以無恥國三字成一名詞，而猶欲其國之立於天地，有是理耶？有是理耶？其能受閹宦差役之婪索一錢而安之者，必其能受外國之割一省而亦安之者也。其能現奴顏婢膝昏暮乞憐於權貴之間者，必其能懸順民之旗，簞食壺漿以迎他族之師者也。譬之器然，其完固者，無論何物不能滲也。苟有穴焉，有罅焉，我能滲之，他人亦能滲之。夫安知乎虐政所從入之門，乃卽外寇所從入之門也。挑鄰婦而利其從我，及爲我婦，則欲其爲我冒人，安可得也。平昔之待其民也，鞭之撻之，敲之削之，戮之辱之，積千數百年霸者之餘威，以震蕩摧鋤天下之廉恥。既殄既獮，一旦敵國之艘艦麇集於海疆，寇仇之貔貅迫臨於城下，而後欲藉人民之力以捍衛是而綱維是，是何異不胎而求子，蒸沙而求飯也。嗟夫，嗟夫，前車之覆者，不知幾何矣。而獨不解丁茲陽九者，曾一自審焉否也。

重爲言曰：國家譬猶樹也。權利思想譬猶根也。其根既撥，雖復榦植崔嵬，華葉蓊鬱，而必歸於槁亡。遇疾風橫雨，則摧落更速焉。卽不爾，而旱暵之所暴炙，其萎黃彫敝，亦須時耳。國民無權利思想者，以之當外患，則槁木遇風雨之類也。卽外患不來，亦遇旱暵之類。吾見夫全地球千五兆生靈中，除印度非洲南洋之黑蠻外，其權利思想之薄弱，未有吾國人若者也。孟子有言：逸居而無教，則近於禽獸。若取羅馬法之法理，而以論理解釋之，則豈惟近法而已。一國之大，而僅有四萬萬禽獸居焉。天下之可恥，孰過是也。我同胞其恥之乎？爲政治家者，以勿摧壓權利思想爲第一義。爲教育家者，以養成權利思想爲第一義。爲一私人者，無論士焉農焉工焉商焉男焉女焉。

各以自堅持權利思想爲第一義。國民不能得權利於政府也。則爭之。政府見國民之爭權利也。則讓之。欲使吾國之國權與他國之國權平等。必先使吾國中人人固有之權皆平等。必先使吾國民在我國所享之權利與他國民在彼國所享之權利相平等。若是者國庶有瘳。若是者國庶有瘳。

第九節 論自由

『不自由毋寧死』斯語也。實十八九兩世紀中。歐美諸國民所以立國之本原也。自由之義。適用於今日之中國乎。曰。自由者。天下之公理。人生之要具。無往而不適用者也。雖然。有真自由。有僞自由。有全自由。有偏自由。有文明之自由。有野蠻之自由。今日自由云自由云之語。已漸成青年輩之口頭禪矣。新民子曰。我國民如欲永享完全文明真自由之福也。不可不先知自由之爲物果何如矣。請論自由。

自由者。奴隸之對待也。綜觀歐美自由發達史。其所爭者不出四端。一曰政治上之自由。二曰宗教上之自由。三曰民族上之自由。四曰生計上之自由。即日本所謂經濟上自由政治上之自由者。人民對於政府而保其自由也。宗教上之自由者。教徒對於教會而保其自由也。民族上之自由者。本國對於外國而保其自由也。生計上之自由者。資本家與勞力者相互而保其自由也。而政治上之自由。復分爲三。一曰平民對於貴族而保其自由。二曰國民全體對於政府而保其自由。三曰殖民地對於母國而保其自由。是也。自由之徵諸實行者。不外是矣。以此精神。其所造出之結果。厥有六端。(一)四民平等問題。凡一國之中。無論何人不許有特權。特別之權利是與齊民異者是平民對於貴族所爭得之自由也。(二)參政權問題。凡生息於一國中者。苟及歲而卽有公民之資格。可以參與

一國政事。是國民全體對於政府所爭得之自由也。(三)屬地自治問題。凡人民自殖於他土者。得任意自建政府。與其在本國時所享之權利相等。是殖民地對於母國所爭得之自由也。(四)信仰問題。人民欲信何教。悉由自擇。政府不得以國教束縛干涉之。是教徒對於教會所爭得之自由也。(五)民族建國問題。一國之人。聚族而居。自立自治。不許他國若他族握其主權。並不許干涉其毫末之內治。侵奪其尺寸之土地。是本國人對於外國所爭得之自由也。(六)工羣問題。日本謂之勞働問題或社會問題凡勞力者。自食其力。地主與資本家。不得以奴隸畜之。是貧民對於素封者所爭得之自由也。試通覽近世三四百年之史記。其智者敝口舌於廟堂。其勇者塗肝腦於原野。前者仆。後者興。屢敗而不悔。弗獲而不措者。其所爭豈不以此數端耶。其所得豈不在此數端耶。試一述其崖略。昔在希臘羅馬之初政。凡百設施。謀及庶人。共和自治之制。發達蓋古。然希臘純然貴族政體。所謂公民者。不過國民中一小部分。而其餘農工商及奴隸。非能一視也。羅馬所謂公民。不過其都會中之拉丁民族。而其攻取所得之屬地。非能一視也。故政治上之自由。雖遠濫觴於希臘。然貴族之對平民也。母國之對屬地也。本國人之對外國也。地主之對勞力者也。其種種侵奪自由之弊。亦自古然矣。及耶穌教興。羅馬帝國立。而宗教專制政治專制乃大起。中世之始。蠻族猖披。文化蹂躪。不待言矣。及其末也。則羅馬皇帝與羅馬教皇。分司全歐人民之軀殼。靈魂兩界。生息於肘下而不能自拔。故中世史者。實泰西之黑暗時代也。及十四五世紀以來。馬丁路得興。一抉舊教藩籬。思想自由之門開。而新天地始出現矣。爾後二三百年中。列國或內爭。或外伐。原野糜肉。谿谷填血。天日慘淡。神鬼蒼黃。皆爲此一事而已。此爲爭宗教自由時代。及十七世紀。格林威爾起於英。十八世紀。華盛頓興於美。未幾而法國大革命起。狂風怒潮。震撼全歐。列國繼之。靈滄水湧。遂使地中海以西。互於太平洋東岸。無一

不為立憲之國。加拿大澳洲諸殖民地無一不為自治之政。直至今日。而其機未止。此為爭政治自由時代。自十六世紀。荷蘭人求脫西班牙之軛。奮戰四十餘年。其後諸國踵興。至十九世紀。而民族主義磅礴於大地。伊大利匈加利之於奧大利。愛爾蘭之於英倫。波蘭之於俄普奧三國。巴幹半島諸國之於土耳其。以至現今波亞之於英。菲律賓之於美。所以死亡相踵而不悔者。皆曰非我種族不得有我主權而已。雖其所向之目的。或達或不達。而其精神一也。此為爭民族自由時代。民族自由與否大半原於政治故此二者其界限常相混前世紀九以來。美國布禁奴之令。俄國廢農傭之制。生計界大受影響。而廿卅年來。同盟罷工之事。所在紛起。工廠條例。陸續發布。自今以往。此問題遂將為全地球第一大案。此為爭生計自由時代。凡此諸端。皆泰西四百年來改革進步之大端。而其所欲以去者。亦十之八九矣。噫嘻。是遵何道哉。皆『不自由毋寧死』之一語。聳動之。鼓舞之。出諸壤而升諸霄。生其死而肉其骨也。於戲。璀璨哉。自由之花。於戲。莊嚴哉。自由之神。

今將近世史中爭自由之大事。列一年表如下。

一五三二年	舊教徒與新教徒結條約許信教自由	宗教上之自由
一五二四年	瑞士信新教諸市府始聯合行共和政	同
一五三六年	丁抹國會始定新教為國教	同
一五七〇年	法國內訌暫熄新教徒始自由	同
一五九八年	法國許新教徒以參政權	同
一六四八年	荷蘭與西班牙積四十年苦戰始得自立	民族上之自由亦因宗教
一六一八至一六四八年	西班牙佛蘭西瑞典日耳曼丁抹等國連兵不止卒定新舊教同享平等權利	宗教上之自由

一六四九年	英民弑其王查理士第一行共和政	政治上之自由
一七七六年	北美合衆國布告獨立	同(殖民地之關繫)
一七八九年	法國大革命起	同(貴族平民之關繫)
一八二二年	墨西哥獨立	同(殖民地之關繫)
一八一九至一八一三年	南美洲諸國獨立	同
一八三二年	英國改正選舉法	同
一八三三年	英國布禁奴令於殖民地	生計上之自由
一八四八年	法國第二次革命	政治上之自由
同年	奧國維也納革命起	同
同年	匈加利始立新政府次年奧匈開戰	民族上之自由
同年	意大利革命起	同
同年	日耳曼謀統一不成	同
同年	意大利瑞士丁抹荷蘭發布憲法	政治上之自由
一八六一年	俄國解放隸農	生計上之自由
一八六三年	希臘脫土耳其自立	民族上之自由
同年	波蘭人拒俄亂起	同
同年	美國因禁奴事南北相爭	同
一八六七年	北德意志聯邦成	民族上與政治上之自由
一八七〇年	法國第三次革命	政治上之自由
一八七一年	意大利統一功成	民族上與政治上之自由
一八七五至一八七八年	土耳其所屬門的內哥塞爾維亞赫斯戈偉訥等國皆起倡獨立	民族上與宗教上之自由

一八八一年	俄皇亞歷山大第二將布憲法旋爲虛無黨所弑	政治上之自由
一八八二年	美國大同盟罷工起此後各國有之歲歲不絕	生計上之自由
一八八九年	巴西獨立行共和政	政治上之自由(殖民地之關係)
一八九三年	英國布愛爾蘭自治案	民族上之自由
一八九九年	菲立賓與美國戰	同
同	波亞與英國戰	同
一九〇一年	澳洲自治聯邦成	政治上之自由

由此觀之。數百年來世界之大事。何一非以自由二字爲之原動力者耶。彼民之求此自由也。其時不同。其國不同。其所需之種類不同。故其所來者亦往往不同。要其用諸實事而非虛談。施諸公敵而非私利一也。試以前所列之六大問題。覆按諸中國。其第一條四民平等問題。中國無有也。以吾自戰國以來。即廢世卿之制。而階級陋習。早已消滅也。其第三條屬地自治問題。中國無有也。以其無殖民地於境外也。其第四條信仰問題。中國更無有也。以吾國非宗教國。數千年無教爭也。其第六條工羣問題。他日或有之。而今則尙無有也。以其生計界尙沈滯而競爭不劇烈也。然則今日吾中國所最急者。惟第二之參政問題。與第四之民族建國問題而已。此二者事本同源。苟得其乙。則甲不求而自來。苟得其甲。則乙雖弗獲。猶無害也。若是夫吾儕之所謂自由。與其所以求自由之道。可以見矣。

自由之界說曰。人人自由。而以不侵人之自由爲界。夫既不許侵人自由。則其不自由亦甚矣。而顧謂此爲自由之極則者。何也。自由云者。團體之自由。非個人之自由也。野蠻時代個人之自由勝。而團體之自由亡。文明時代

團體之自由強而個人之自由滅。斯二者蓋有一定之比例。而分毫不容忒者焉。使其以個人之自由爲自由也。則天下享自由之福者。宜莫今日之中國人若也。紳士武斷於鄉曲。受魚肉者莫能抗也。鬮商逋債而不償。受欺騙者莫能責也。夫人人皆可以爲紳士。人人皆可以爲鬮商。則人人之自由亦甚矣。不寧惟是。首善之區。而男婦以官道爲閭閻。何其自由也。市邑之間。而老稚以鴉片爲菽粟。何其自由也。若在文明國。輕則罰鍰。重則輸城。且矣。諸類此者。若悉數之。則更十僕而不能盡。由是言之。中國人自由乎。他國人自由乎。顧識者揭櫫自由之國。不於此而於彼者何也。野蠻自由。正文明自由之蝨賊也。文明自由者。自由於法律之下。其一舉一動。如機器之節。其一進一退。如軍隊之步武。自野蠻人視之。則以爲天下之不自由。莫此甚也。夫其所以必若是者何也。天下未有內不自整。而能與外爲競者。外界之競爭無已時。則內界之所以團其競爭之具者。亦無已時。使濫用其自由。而侵他人之自由焉。而侵團體之自由焉。則其羣固已不克自立。而將爲他羣之奴隸。夫復何自由之能幾也。故真自由者。必能服從。服從者何。服法律也。法律者。我所制定之。以保護我自由。而亦以箝束我自由者也。彼英人是已。天下民族中。最富於服從性質者。莫如英人。其最享自由幸福者。亦莫如英人。夫安知乎服從之卽爲自由母也。嗟夫。今世少年。莫不囂囂言自由矣。其言之者。固自謂有文明思想矣。曾不審夫泰西之所謂自由者。在前此之諸大問題。無一役非爲團體公益計。而決非一私人之放恣桀驁者所可託以藏身也。今不用之。向上以求憲法。不用之。排外以伸國權。而徒耳食一二學說之半面。取便私圖。破壞公德。自返於野蠻之野蠻。有規語之者。猶敢覲然抗說曰。「吾自由。吾自由。」吾甚懼乎自由二字。不徒爲專制黨之口實。而實爲中國前途之公敵也。

「愛」主義者。天下之良主義也。有人於此。汲汲務愛己。而曰我實行愛主義可乎。「利」主義者。天下之良主義也。有人於此。孳孳務利己。而曰我實行利主義可乎。「樂」主義者。亦天下之良主義也。有人於此。媿媿務樂己。而曰我實行樂主義可乎。故凡古賢今哲之標一宗旨以易天下者。皆非爲一私人計也。身與羣校。羣大身小。誦身伸羣。人治之大經也。當其二者不兼之際。往往不愛己不利己不樂己。以達其愛羣利羣樂羣之實者有焉矣。佛言我不入地獄。誰入地獄。佛之說法。豈非欲使衆生脫離地獄者耶。而其下手必自親入地獄始。若是乎有志之士。其必悴其形焉。困衡其心焉。終身自棲息於不自由之天地。然後能舉其所愛之羣與國而自由之也。明矣。今世之言自由者。不務所以進其羣其國於自由之道。而惟於薄物細故。日用飲食。斷斷然主張一己之自由。是何異箠豆見色。而曰我通功利派之哲學。飲博無賴。而曰我循快樂派之倫理也。戰國策言。有學儒三年。歸而名其母者。吾見夫誤解自由之義者。有類於是焉矣。

然則自由之義。竟不可行於個人乎。曰惡。是何言。團體自由者。個人自由之積也。人不能離團體而自生存。團體不保其自由。則將有他團焉。自外而侵之。壓之。奪之。則個人之自由更何有也。譬之一身。任口之自由也。不擇物而食焉。大病浸起。而口所固有之自由亦失矣。任手之自由也。持挺而殺人焉。大罰浸至。而手所固有之自由亦失矣。故夫一飲一食一舉一動。而皆若節制之師者。正百體所以各永保其自由之道也。此猶其與他人他體相交涉者。吾請更言一身自由之事。

一身自由云者。我之自由也。雖然。人莫不有兩我焉。其一與衆生對待之我。昂昂七尺。立於人間者是也。其二則與七尺對待之我。瑩瑩一點。存於靈臺者是也。孟子曰。物交物。則引之而已矣。皆我之對待也。上物指衆生下。物指七尺。即耳目之官。要之皆物而非我也。我者何。心之官。

是已先立乎其大者則其小者不能奪也。惟我爲大，是故人之奴隸，我不足畏也。而莫痛於自奴隸於人，自奴隸而兩界之物皆小也。小不奪大，則自由之極軌焉矣。於人猶不足畏也。而莫慘於我奴隸於我。莊子曰：哀莫大於心死，而身死次之。吾亦曰：辱莫大於心奴，而身奴斯爲末矣。夫人強迫我以爲奴隸者，吾不樂焉。可以一旦起而脫其絆也。十九世紀各國之民變是也。以身奴隸於人者，他人或觸於慈祥焉，或迫於正義焉，猶可以出我水火而蘇之也。美國之放黑奴是也。獨至心中之奴隸，其成立也，非由他力之所得加，其解脫也，亦非由他力之所得助。如蠶在繭，著著自縛，如膏在釜，日日自煎。若有欲求真自由者乎？其必自除心中之奴隸始。

吾請言心奴隸之種類，而次論所以除之之道。

一曰：勿爲古人之奴隸也。古聖賢也，古豪傑也，皆嘗有大功德於一羣。我輩愛而敬之，宜也。雖然，古人自古人，自我，彼古人之所以能爲聖賢爲豪傑者，豈不以其能自有我乎哉？使不爾者，則有先聖無後聖，有一傑無再傑矣。譬諸孔子誦法堯舜，我輩誦法孔子，曾亦思孔子所以能爲孔子，彼蓋有立於堯舜之外者也。使孔子而爲堯舜之奴隸，則百世後必無復有孔子者存也。聞者駭吾言乎？蓋思乎世運者進而愈上，人智者濬而愈瑩，雖有大哲，亦不過說法以匡一時之弊，規當世之利，而決不足以範圍千百萬年以後之人也。泰西之有景教也，其在中國，曷嘗不爲一世文明之中心點？逮夫末流，束縛馳驟，不勝其敝矣。非有路得、倍根、笛卡兒、康德、達爾文、彌勒、赫胥黎諸賢起而附益之，匡救之，夫彼中安得有今日也？中國不然，於古人之言論行事，非惟辨難之辭不敢出於口，抑且懷疑之念不敢萌於心。夫心固我有也，聽一言受一義，而曰我思之，我思之，若者我信之，若者我疑之，夫豈有刑戮之在其後也？然而舉世之人，莫敢出此，吾無以譬之。譬之義和團，義和團法師之被髮仗劍，踴步念念

有詞也。聽者苟一用其思索焉，則其中自必有可疑者存，而信之者竟徧數省，是必其有所懼焉，而不敢涉他想者矣。否則有所假焉，自欺欺人以逞其狐威者矣。要之爲奴隸於義和團一也。吾爲此譬，非敢以古人比義和團也。要之四書六經之義理，其非一一可以適於今日之用，則雖臨我以刀鋸鼎鑊，吾猶敢斷言而不憚也。而世之委身以嫁古人，爲之薦枕席而奉箕帚者，吾不知其與彼義和團之信徒果何擇也。我有耳目，我物我格，我有心思，我理我窮，高高山頂立，深深海底行，其於古人也。吾時而師之，時而友之，時而敵之，無容心焉。以公理爲衡而已，自由何如也。

二曰：勿爲世俗之奴隸也。甚矣人性之弱也。城中好高髻，四方高一尺；城中好廣袖，四方全幅帛。古人夫既謠之矣，然曰鄉愚無知，猶可言也。至所謂士君子者，殆又甚焉。當晚明時，舉國言心學，全學界皆野狐矣。當乾嘉間，舉國言考證，全學界皆蠹魚矣。然曰歲月漸遷，猶可言也。至如近數年來，丁戊之間，舉國慕西學若羶，己庚之間，舉國避西學若厲，今則厲又爲羶矣。夫同一人也，同一學也，而數年間可以變異若此，無他，俯仰隨人，不自由耳。吾見有爲猴戲者，跳焉則羣猴跳，擲焉則羣猴擲，舞焉則羣猴舞，笑焉則羣猴笑，鬩焉則羣猴鬩，怒焉則羣猴罵，諺曰：一犬吠影，百犬吠聲。悲哉！人乘天地清淑之氣以生，所以異於羣動者，安在乎？胡自污衊以與猴犬爲倫也？夫能鑄造新時代者上也，卽不能而不爲舊時代所吞噬所汨沈，抑其次也。狂瀾滔滔，一柱屹立，醉鄉夢夢，靈臺昭然，丈夫之事也，自由何如也。

三曰：勿爲境遇之奴隸也。人以一身立於物競界，凡境遇之圍繞吾旁者，皆日夜與吾相爲鬪而未嘗息者也。故戰境遇而勝之者則立，不戰而爲境遇所壓者則亡。若是者，亦名曰天行之奴隸。天行之虐，逞於一羣者有然，逞

於一人者亦有然。謀國者而安於境遇也。則美利堅可無獨立之戰。匈加利可無自治之師。日耳曼意大利可以長此華離破碎爲虎狼與之附庸也。使謀身者而安於境遇也。則賤族之的士禮立。英前宰相與洛蘭斯頓齊名者本猶太人猶太人在英視爲最賤之族。何敢望挫俄之偉勳。蛋兒之林肯。前美國大總統漁人子也少極貧何敢企放奴之大業。而西鄉隆盛當以患難易節。瑪志尼當以竄謫灰心也。吾見今日所謂識時之彥者。開口輒曰。陽九之厄。劫灰之運。天亡中國。無可如何。其所以自處者。非貧賤而移。則富貴而淫。其最上者。遇威武而亦屈也。一事之挫跌。一時之潦倒。而前此權奇磊落不可一世之概。銷磨盡矣。咄。此區區者。果何物。而願使之操縱我心如轉蓬哉。善夫。墨子非命之言也。曰。『執有命者。是覆天下之義。而說百姓之諱也。』天下善言命者。莫中國人若。而一國之人。奄奄待死矣。有力不庸。而惟命是從。然則人也者。亦天行之芻狗而已。自働之機器而已。曾無一毫自主之權。可以達己之所志。則人之生也。奚爲哉。奚樂哉。英儒赫胥黎曰。『今者欲治道之有功。非與天爭勝焉不可也。固將沈毅用壯。見大丈夫之鋒穎。彊立不反。可爭可取。而不可降。所遇善。固將寶而維之。所遇不善。亦無懼焉。』陸象山曰。『利害毀譽。稱譏苦樂。名曰八風。八風不動。入三摩地。』邵堯夫之詩曰。『卷舒一代興亡手。出入千重雲水身。』眇茲境遇。曾不足以損豪傑之一脚指。而豈將入其笠也。自由何如也。

四曰。勿爲情慾之奴隸也。人之喪其心也。豈由他人哉。孟子曰。『嚮爲身死而不受。今爲宮室之美。妻妾之奉。所識窮乏者得我而爲之。是亦不可以已乎。』夫誠可以已。而能已之者。百無一焉。甚矣情慾之毒人深也。古人有言。心爲形役。形而爲役。猶可癒也。心而爲役。將奈之何。心役於他。猶可拔也。心役於形。將奈之何。形無一日而不與心爲緣。則將終其生。趑趄瑟縮於六根六塵之下。而自由權之萌蘗。俱斷矣。吾常見有少年嶽嶽犖犖之士。志

願才氣皆可以開拓千古。推倒一時。乃閱數年而餒焉。更閱數年而益餒焉。無他。凡有過人之才者。必有過人之欲。有過人之才。有過人之欲。而無過人之道。德心以自主之。則其才正爲其欲之奴隸。曾幾何時。而銷磨盡矣。故夫泰西近數百年。其演出驚天動地之大事業者。往往在有宗教思想之人。夫迷信於宗教而爲之奴隸。固非足貴。然其藉此以克制情慾。使吾心不爲頑軀濁殼之所困。然後有以獨往獨來。其得力固不可誣也。日本維新之役。其倡之成之者。非有得於王學。卽有得於禪宗。其在中國近世。勳名赫赫在人耳目者。莫如曾文正。試一讀其全集。觀其困知勉行。厲志克己之功。何如。天下固未有無所養而能定大艱成大事業者。不然。日日恣言曰。吾自由。吾自由。而實爲五賊佛典亦以五賊名五官所驅遣。勞苦奔走以藉之兵。而齎其糧耳。吾不知所謂自由者何在也。孔子曰。克己復禮爲仁。己者對於衆生稱爲己。亦卽對於本心而稱爲物者也。所克者己。而克之者又一己。以己克己。謂之自勝。自勝之謂強。自勝焉。強焉。其自由何如也。

吁。自由之義。泰西古今哲人。著書數十萬言。剖析之。猶不能盡也。淺學如余。而欲以區區片言單語發明之。烏知其可。雖然。精義大理。當世學者。旣略有述焉。吾故就團體自由。個人自由兩義。刺取其淺近直捷者。演之以獻於我學界。世有愛自由者乎。其慎勿毒自由以毒天下也。

第十節 論自治

治者何。不亂之謂。亂者何。不治之謂。此訓詁其誰不能解。雖然。吾有味乎其言。吾有惕乎其言。行其庭。草樹凌亂然。入其室。器物狼藉然。若是者。雖未見其閭牆諍帚。吾知其家之必不治。不治斯謂亂家。過其

野。有闕於墟者而莫之或解。適其邑。有洩於途者而莫之或禁。若是者。雖未見其干戈疾癘。吾知其國之必不治。不治斯謂亂國。飲食起居無定時。手足眉眼無定容。言語舉動無定規。若是者。雖未見其失德敗行。吾知其人之必不治。不治斯謂亂人。

天下事亂固不可久也。己不能治。則必有他力焉起而代治之者。不自治則治於人。勢所不可逃也。人之能治禽獸也。成人之能治小兒也。文明人之能治野蠻也。皆其無自治力使然也。人而無自治力則禽獸也。非人也。藉曰人矣。而小兒也。非成人也。藉曰成人矣。野蠻之成人。非文明之成人也。

今天下最龐大最壯活之民族。莫如盎格魯撒遜人。彼嘗自誇曰。使吾英國國民百人。與他國民百人。同時徙居於一地。不十年後。而英國之百人。粲然成一獨立國。他國之百人。渾然如一盤散沙。受轄治於英人矣。又曰。彼半開在文野之間野蠻之國土。雖其土著之民數百千萬。吾英族但有一二人足跡踏其地。不數十年。即為英藩矣。吾者謂之半開徵諸實事。吾信其所誇之不誣。不見夫北美一洲。南洋羣島。其始本為西班牙荷蘭人所開闢。而今之享其利者。皆盎格魯撒遜族乎。不見今日之印度。英人居者不及萬。而使二萬萬之印人。戢戢如羣羊乎。不見中國十八行省中。英人官商教士。統計來者不過四千人。而徧布要隘。儼若敵國乎。其所以如是者何也。世界上最富於自治力之民族。未有盎格魯撒遜人若者也。

書曰。節性惟日其邁。荀子曰。人之性惡也。其善者偽也。節者何。制裁之義也。偽者何。人為之義也。偽從人從為。楊注云。矯其本性也。謂凡非天性而人為之者也。故夫人之性質。萬有不齊。駁雜而無紀。苟順是焉。則將橫溢亂動。相觸相鬪。而不可以相羣。於是不可不以人為之力。設法律而制裁之。然此法律者。非由外鑠也。非有一人首出。制之以律羣生也。蓋發於人。

人心中良知所同然。以爲必如是乃適於人道。乃足保我自由而亦不侵人自由。故不待勸勉。不待逼迫。而能自置於規矩繩墨之間。若是者謂之自治。自治之極者。其身如一機器然。一生所志之事業。若何而預備。若何而創始。若何而實行。皆自定之。一日之行事。某時操業。某時治事。某時接人。某時食。某時息。某時游。皆自定之。稟氣之習慣。嗜欲之薰染。苟覺爲害吾事業。戕吾德性者。克而治之。不少假借。一言一動。一嘖一笑。皆常若有金科玉律以爲之範圍。一人如是。人人如是。於是乎成爲羣之自治。羣之自治之極者。舉其羣如一軍隊然。進則齊進。止則齊止。一羣之公律罔不守。一羣之公益罔不趨。一羣之公責罔不盡。如是之人。如是之羣。而不能自強立於世界者。吾未之聞也。不如是焉。而能自強立於世界者。吾未之聞也。

或曰。機器者。無精神之物也。軍隊者。專制之體也。子乃以比於是者爲美德何也。且中國風俗。他事或不如人。至於規行矩步。繩尺束縛。正中國人受用最慣受病最深之處。數千年來。霸者絜之。儒者坊之。人奄奄無生氣久矣。而子猶欲揚其毒以毒將來。不亦甚乎。應之曰。不然。機器死物也。而有主其動力者。古哲曰。天君泰然。百體從令。夫能使其一身之起居動作如機器者。正其天君活潑自由之極者也。軍隊之形式專制也。而有其精神焉。一羣如一軍隊。其軍隊之將帥。則羣中人人之良心所結成的法律是也。故制則制矣。而不可謂之專。以其法律者出自衆人。非出自一人。是人人爲軍隊中之小卒。實無異人人爲軍隊中之主帥也。故夫自治云者。與彼霸者之所束縛。儒者之所矜持。固有異焉矣。何也。彼則治於人。而此則自治也。且中國人何規矩繩尺之與。有。人人言奉法。然國家有憲令。官吏且勿守。無論民氓也。人人言尊敬。然聖賢有條訓。士夫且勿遵。無論雜流也。堯典曰。天敍有典。天秩有禮。秩敍者。一羣所以團治之大原也。今試觀我中國。朝野上下。其所謂秩敍者。安在乎。望其官府。則嚮

魅罔兩所出沒，黑闇詭僻，無復人道也。察其民間，則盜賊之藪，貪詐之府，與野蠻時代未立政府者，無以異也。何以故？以不能自治故。不能自治而待治於人，未能真能治焉者也。

然則吾人今日所當務者可知矣。一曰：求一身之自治。凡古來能成大事者，必其自勝之力甚強者也。泰西人不必論，古人不必論，請言最近者。曾文正自其少年有吸菸及晏起之病，後發心戒之，初常倔強，不能自克，而文正視之如大敵，必拔其根株而後已焉。彼其後此能殲十餘年盤踞金陵之巨寇，正與其前此能殲十數年盤踞血氣之積習，同一精神也。胡文忠在軍，每日必讀通鑑十葉，曾文正在軍，每日必填日記數條，讀書數葉，圍棋一局，李文忠在軍，每日晨起必臨蘭亭百字，終身以爲常。自流俗人觀之，豈不以爲區區小節，無關大體乎？而不知制之有節，行之有恆，實爲人身品格第一大事。善觀人者必於此覘道力焉。口口口論陳蕃云：蕃不能掃除一室，而欲廓清天下，吾知其無能爲矣。此語適忘爲誰氏之言，讀者諸君如能記憶，望順教，我著者附識。雖似過刻之言，實則中正之論也。泰西通例，凡

來復日必休息，每日八點鐘始治事，十二點而小憩，一點復治事，四五點而畢，憩舉國上自君相官吏，下至販夫屠卒，莫不皆然。作則舉國皆作，息則舉國皆息，是豈所謂如軍隊如機器者耶？於文經緯整列曰理，條段錯紊曰亂。誠以中西人之日用起居相比較，其一理一亂相去何如矣。毋曰薄物細故，夫豈知今日之泰西，其能整然秩然，舉立憲之美政者，皆自此來也。孟德斯鳩云：『法律者無終食之間而可離者也。凡人類文野之別，以其有法律無法律爲差。於一國亦然，於一身亦然。』今吾中國四萬萬人，皆無法律之人也。羣四萬萬無法律之人而能立國，吾未之前聞。然則豈待與西人相遇於硝雲彈雨之中，而後知其勝敗之數也。

一曰：求一羣之自治。國有憲法，國民之自治也。州郡鄉市有議會，地方之自治也。凡善良之政體，未有不從自治

來也。一人之自治其身。數人或十數人之自治其家。數百數千人之自治其鄉其市。數萬乃至數十萬數百萬數千萬數萬萬人之自治其國。雖其自治之範圍廣狹不同。其精神則一也。一者何。一於法律而已。管子曰。鄉與朝爭治。又曰。朝不合衆。鄉分治也。西人言政者。謂莫要於國內小國。國內小國者。一省。一府。一州。一縣。一鄉。一市。一公司。一學校。莫不儼然具有一國之形。省府州縣鄉市公司學校者。不過國家之縮圖。而國家者。不過省府州縣鄉市公司學校之放大影片也。故於其小焉者能自治。則其大焉者舉而措之矣。不然者。則不得不仰治於人。仰治於人。則人之撫我也聽之。人之虐我也亦聽之。同族之豪強者據而專也聽之。異族之橫暴者紕而奪也亦聽之。如是。則人之所以爲人之具。其塗地矣。抑彼西人之所以得此者何也。曰。有制裁。有秩序。有法律。以爲自治之精神也。真能自治者。他人欲干涉焉而不可得。不能自治者。他人欲無干涉焉而亦不可得也。此其事固有絲毫不容假借者。我國民仰治於人。數千年矣。幾以此爲天賦之義務。而莫敢萌他想。曾亦思本身之樂利。豈旁觀者所能代謀。而當今之時局。又豈散漫者可以收拾也。

抑今士大夫言民權言自由言平等言立憲言議會言分治者。亦漸有其人矣。而吾民將來能享民權自由平等之福與否。能行立憲議會分治之制與否。一視其自治力之大小。強弱定不定。以爲差。吾民乎。吾民乎。勿以此爲細碎。勿以此爲迂腐。勿徒以之責望諸團體。而先以之責望諸個人。吾試先舉吾身而自治焉。試合身與身爲一小羣而自治焉。更合羣與羣爲一大羣而自治焉。更合大羣與大羣爲一更大之羣而自治焉。則一完全高尚之自由國平等國獨立國自主國出焉矣。而不然者。則自亂而已矣。自治與自亂。事不兩存。勢不中立。二者必居一。於是。惟我國民自認之。惟我國民自擇之。

第十一節 論進步（一名論中國羣治不進之原因）

泰西某說部載有西人初航中國者聞羅針盤之術之傳自中國也。又聞中國二千年前即有之也。默忖此物入泰西不過數紀而改良如彼其屢效用如彼其廣則夫母國數千年之所增長更當何若。登岸後不遑他事先入市購一具乃問其所謂最新式者則與歷史讀本中所載十二世紀時亞刺伯人傳來之羅盤圖無累黍之異其人乃廢然而返云。此雖諷刺之寓言實則描寫中國羣治濡滯之狀談言微中矣。

吾昔讀黃公度日本國志好之以爲據此可以盡知東瀛新國之情狀矣。入都見日使矢野龍谿偶論及之龍谿曰。是無異據明史以言今日中國之時局也。余怫然叩其說龍谿曰。黃書成於明治十四年我國自維新以來每十年間之進步雖前此百年不如也。然則二十年前之書非明史之類如何。吾當時猶疑其言。東游以來證以所見良信。斯密亞丹原富稱元代時有意大利人瑪可波羅游支那歸而著書述其國情以較今人游記殆無少異。吾以爲豈惟瑪氏之作即史記漢書二千年舊籍其所記載與今日相去能幾何哉。夫同在東亞之地同爲黃族之民而何以一進一不進。霄壤若此。

中國人動言邇治之世在古昔而近世則爲澆末爲叔季。此其義與泰西哲學家進化之論最相反。雖然非譎言也。中國之現狀實然也。試觀戰國時代學術盜起或明哲理我闡技術而後此則無有也。兩漢時代治具粲然宰相有責任地方有鄉官而後此則無有也。自餘百端類此者不可枚舉。夫進化者天地之公例也。譬之流水性必就下。譬之拋物勢必向心。苟非有他人焉從而搏之有他物焉從而吸之則未有易其故常者。然則吾中國之反

於彼進化之大例。而演出此凝滯之現象者。殆必有故。求得其故而討論焉。發明焉。則知病而藥於是乎在矣。論者必曰。由於保守性質之太强也。是固然也。雖然。吾國中人保守性質。何以獨強。是亦一未解決之問題也。且英國人以善保守聞於天下。而萬國進步之速。殆莫英若。又安見夫保守之必爲羣害也。吾思之。吾重思之。其原因之由於天然者有二。由於人事者有三。

一曰大一統而競爭絕也。競爭爲進化之母。此義殆既成鐵案矣。秦西當希臘列國之時。政學皆稱極盛。洎羅馬分裂。散爲諸國。復成近世之治。以迄於今。皆競爭之明效也。夫列國並立。不競爭則無以自存。其所競者。非徒在國家也。而兼在個人。非徒在強力也。而尤在德智。分途並趨。人自爲戰。而進化遂沛然莫之能禦。故夫一國有新式鎗礮出。則他國棄其舊者恐後焉。非是不足以操勝於疆場也。一廠有新式機器出。則他廠亦棄其舊者恐後焉。非是不足以求贏於鬪鬪也。惟其然也。故不徒恥下人。而常求上人。昨日乙優於甲。今日丙駕於乙。明日甲還勝丙。互相傲。互相妒。互相師。如賽馬然。如鬪走然。如競漕然。有橫於前。則後焉者自不敢不勉。有躡於後。則前焉者亦不敢卽安。此實進步之原動力所由生也。中國惟春秋戰國數百年間。分立之運最久。而羣治之進。實以彼時爲極點。自秦以後。一統局成。而爲退化之狀者。千餘年於今矣。豈有他哉。競爭力銷乏。使然也。

二曰環蠻族而交通難也。凡一社會與他社會相接。則必產出新現象。而文明遂進一步。上古之希臘殖民。近世之十字軍東征。皆其成例也。然則統一非必爲進步之障也。使統一之於內。而交通之於外。則其飛躍或有更速者也。中國環列皆小蠻夷。其文明程度。無一不下我數等。一與相遇。如湯沃雪。縱橫四顧。常覺有上天下地。唯我獨尊之概。始而自信。繼而自大。終而自畫。至於自畫。而進步之途絕矣。不寧惟是。所謂諸蠻族者。常以其牛羊

之力。水草之性。來破壞我文明。於是所以抵抗之者。莫急於保守我所固有。中原文獻。漢官威儀。實我黃族數千年來戰勝羣裔之精神也。夫外之既無可師法。以爲損益之資。內之復不可不兢兢保持。以爲自守之具。則其長此終古也亦宜。

以上由於天然者。

三曰言文分而人智局也。文字爲發明道器第一要件。其繁簡難易。常與民族文明程度之高下爲比例。差列國文字。皆起於衍形。及其進也。則變而衍聲。夫人類之語言。遞相差異。經千數百年後。而必大遠於其朔者。勢使然也。故衍聲之國。言文常可以相合。衍形之國。言文必日以相離。社會之變遷日繁。其新現象新名詞必日出。或從積累而得。或從交換而來。故數千年前一鄉一國之文字。必不能舉數千年後萬流匯沓羣族紛拏時代之名物意境而盡載之。盡描之。此無可如何者也。言文合。則言增而文與之俱增。一新名物新意境出。而卽有一新文字以應之。新新相引。而日進焉。言文分。則言日增而文不增。或受其新者而不能解。或解矣而不能達。故雖有方新之機。亦不得不窒。其爲害一也。言文合。則但能通今文者。已可得普通之智識。其古文之學。如泰西之希臘羅馬文字待諸專門名家者之討求而已。故能操語者卽能讀書。而人生必需之常識。可以普及。言文分。則非多讀古書。通古義。不足以語於學問。故近數百年來學者。往往瘁畢生精力於說文爾雅之學。無餘裕以從事於實用。夫亦有不得不然者也。其爲害二也。且言文合而主衍聲者。識其二三十之字母。通其連綴之法。則望文而可得其音。聞音而可解其義。言文分而主衍形者。則蒼頡篇三千字。斯爲字母者三千。說文九千字。斯爲字母者九千。康熙字典四萬字。斯爲字母者四萬。夫學二三十之字母。與學三千九千四萬之字母。其難易相去何如。故泰西日本。婦孺可以

操筆札，車夫可以讀新聞，而吾中國或有就學十年，而冬烘之頭腦如故也。其爲害三也。夫羣治之進，非一人所能爲也。相摩而遷善，相引而彌長，得一二之特識者，不如得百千萬億之常識者。其力逾大，而效逾彰也。我國民既不得不疲精力以學難學之文字，學成者固不及什一，卽成矣，而猶於當世應用之新事物，新學理，多所隔閡。此性靈之濬發，所以不銳，而思想之傳播，所以獨遲也。

四曰專制久而民性漓也。天生人而賦之以權利，且賦之以擴充此權利之智識，保護此權利之能力，故聽民之自由焉。自治焉，則羣治必蒸蒸日上。有桎梏之戕賊之者，始焉窒其生機，繼焉失其本性，而人道乃幾乎息矣。故當野蠻時代，團體未固，人智未完，有一二豪傑起而代其責任，羣之利也。過是以往，久假不歸，則利豈足以償其弊哉。譬之一家一廬之中，家長之待其子弟，廬主之待其伴傭，皆各還其權利而不相侵，自能各勉其義務而不相佚。如是而不淳焉，以興吾未之聞也。不然者，役之如奴隸，防之如盜賊，則彼亦以奴隸盜賊自居，有可以自逸可以自利者，雖犧牲其家，其廬之公益以爲之所不辭也。如是而不萎焉，以衰吾未之聞也。故夫中國羣治不進，由人民不顧公益使然也。人民不顧公益，由自居於奴隸盜賊使然也。其自居於奴隸盜賊，由霸者私天下爲一姓之產，而奴隸盜賊吾民使然也。善夫立憲國之政黨政治也。彼其黨人，固非必皆秉公心稟公德也。固未嘗不自爲私名私利計也。雖然，專制國之求勢利者，則媚於一人，立憲國之求勢利者，則媚於庶人，媚一也。而民益之進不進，於此判焉。政黨之治，凡國必有兩黨以上，其一在朝，其他在野，在野黨欲傾在朝黨而代之也。於是自布其政策，以掙擊在朝黨之政策。曰使吾黨得政，則吾所施設者如是如是，某事爲民除公害，某事爲民增公益，民悅之也。而得占多數於議院，而果與前此之在朝黨易位，則不得不實行其所布之政策，以副民望而保大。

權而羣治進一級焉矣。前此之在朝黨既幡而在野，欲恢復其已失之權力也，又不得不勤察民隱，悉心布畫，求更新更美之政策而布之。曰：彼黨之所謂除公害增公益者，猶未盡也。使吾黨而再爲之，則將如是如是。然後國家之前途愈益向上，民悅之也。而復占多數於議院，復與代興之在朝黨易位，而亦不得不實行其所布之政策。以副民望而保大權，而羣治又進一級焉矣。如是相競相軋，相增相長，以至無窮。其競愈烈者，則其進愈速。歐美各國政治遷移之大勢，大率由此也。是故無論其爲公也，卽爲私焉，而其有造於國民固已大矣。若夫專制之國，雖有一二聖君賢相，徇公廢私，爲國民全體謀利益，而一國之大，鞭長難及，其澤之真能徧逮者，固已希矣。就令能之，而所謂聖君賢相者，曠百世不一遇，而桓靈京檜，項背相望於歷史。故中國常語稱一治一亂，又曰治日少而亂日多，豈無萌蘖。其奈此連番之狂風橫雨何哉。進也以寸，而退也以尺；進也以一，而退也以十。所以歷千百年而每下愈況也。

五曰學說隘而思想窒也。凡一國之進步，必以學術思想爲之母，而風俗政治皆其子孫也。中國惟戰國時代，九流雜興，道術最廣，自有史以來，黃族之名譽，未有盛於彼時者也。秦漢而還，孔教統一，夫孔教之良固也。雖然，必強一國人之思想，使出於一途，其害於進化也莫大。自漢武表章六藝，罷黜百家，凡非在六藝之科者，絕勿進。爾後束縛馳驟，日獲一日。虎皮羊質，霸者假之以爲護符，社鼠城狐，賤儒緣之以謀口腹。變本加厲，而全國之思想界銷沈極矣。敍歐洲史者，莫不以中世史爲黑闇時代，夫中世史則羅馬教權最盛之時也。舉全歐人民，其軀殼界則糜爛於專制君主之暴威，其靈魂界則匍伏於專制教主之縛軛。故非惟不進，而以較希臘羅馬之盛時，已一落千丈強矣。今試讀吾中國秦漢以後之歷史，其視歐洲中世史何如。吾不敢怨孔教，而不得不深惡痛絕。夫

緣飾孔教利用孔教誣罔孔教者之自賊而賊國民也。

以上由於人事者。

夫天然之障非人力所能爲也。而世界風潮之所簸蕩所衝激。已能使吾國一變其數千年來之舊狀。進步乎。進步乎。當在今日矣。雖然。所變者外界也。非內界也。內界不變。雖日烘動之鞭策之於外。其進無由。天下事無無果之因。亦無無因之果。我輩積數千年之惡因。以受惡果於今日。有志世道者。其勿遽責後此之果。而先改良今日之因而已。

新民子曰。吾不欲復作門面語。吾請以古今萬國求進步者獨一無二不可逃避之公例。正告我國民。其例維何。曰破壞而已。

不祥哉。破壞之事也。不仁哉。破壞之言也。古今萬國之仁人志士。苟非有所萬不得已。豈其好爲俶詭涼薄。憤世嫉俗。快一時之意氣。以事此事而言此言哉。蓋當夫破壞之運之相迫也。破壞亦破壞。不破壞亦破壞。破壞既終。不可免。早一日則受一日之福。遲一日則重一日之害。早破壞者。其所破壞可以較少。而所保全者自多。遲破壞者。其所破壞不得不益甚。而所保全者彌寡。用人力以破壞者。爲有意識之破壞。則隨破壞隨建設。一度破壞。而可以永絕第二次破壞之根。故將來之樂利。可以償目前之苦痛。而有餘。聽自然而破壞者。爲無意識之破壞。則有破壞無建設。一度破壞之不已。而至於再。再度不已。而至於三。如是者。可以歷數百年千年。而國與民交受其病。至於魚爛而自亡。嗚呼。痛矣哉。破壞。嗚呼。難矣哉。不破壞。

聞者疑吾言乎。吾請與讀中外之歷史。中古以前之世界。一膿血世界也。英國號稱近世文明先進國。自一千六

百六十年以後。至今二百餘年無破壞。其所以然者。實自長期國會之一度大破壞來也。使其憚破壞。則安知乎。後此之英國。不爲十八世紀末之法蘭西也。美國自一千八百六十五年以後。至今五十餘年無破壞。其所以然者。實自抗英獨立放奴戰爭之兩度大破壞來也。使其憚破壞。則安知乎。後此之美國。不爲今日之祕魯智利委內瑞辣亞爾然丁也。歐洲大陸列國。自一千八百七十年以後。至今三十餘年無破壞。其所以然者。實自法國大革命以來綿亙七八十年空前絕後之大破壞來也。使其憚破壞。則安知乎。今日之日耳曼意大利不爲波蘭。今日之匈加利及巴幹半島諸國。不爲印度。今日之奧大利不爲埃及。今日之法蘭西。不爲疇昔之羅馬也。日本自明治元年以後。至今三十餘年無破壞。其所以然者。實自勤王討幕廢藩置縣之一度大破壞來也。使其憚破壞。則安知乎。今日之日本。不爲朝鮮也。夫吾所謂二百年來五十年來三十年來無破壞云者。不過斷自今日言之耳。其實則此諸國者。自今以往。雖數百年千年無破壞。吾所敢斷言也。何也。凡破壞必有破壞之根原。孟德斯鳩曰。『專制之國。其君相動曰輯和萬民。實則國中常隱然含有擾亂之種子。是苟安也。非輯和也。』故擾亂之種子不除。則蟬聯往復之破壞。終不可得免。而此諸國者。實以人力之一度大破壞。取此種子芟蕪蘊崇之。絕其本根。而勿使能殖也。故夫諸國者。自今以往。苟其有金革流血之事。則亦惟以國權之故。構兵於域外。容或有之耳。若夫國內相鬩糜爛鼎沸之慘劇。吾敢決其永絕而與天地長久也。今我國所號稱識時俊傑。莫不豔羨乎彼諸國者。其羣治之光華美滿也。如彼。其人民之和親康樂也。如彼。其政府之安富尊榮也。如彼。而烏知乎。皆由前此之仁人志士。揮破壞之淚。絞破壞之腦。敝破壞之舌。禿破壞之筆。瀝破壞之血。填破壞之屍。以易之者也。嗚呼。快矣哉。破壞。嗚呼。仁矣哉。破壞。

此猶僅就政治一端言之耳。實則人羣中一切事事物物。大而宗教學術思想人心風俗。小而文藝技術名物。何一不經過破壞之階級以上於進步之途也。故路得破壞舊宗教而新宗教乃興。倍根笛卡兒破壞舊哲學而新哲學乃興。斯密破壞舊生計學而新生計學乃興。盧梭破壞舊政治學而新政治學乃興。孟德斯鳩破壞舊法律學而新法律學乃興。歌白尼破壞舊曆學而新曆學乃興。推諸凡百諸學。莫不皆然。而路得倍根笛卡兒斯密盧梭孟德斯鳩歌白尼之後。復有破壞路得倍根笛卡兒斯密盧梭孟德斯鳩歌白尼者。其破壞者。復有踵起而破壞之者。隨破壞。隨建設。甲乙相引。而進化之運。乃遞衍於無窮。凡以鐵以血而行破壞者。則一度之後。不復再見矣。以腦以舌而行破壞者。雖屢摧棄舊觀。只受其利。而又如機器興而手民之利益。不得不破壞。輪舶興而帆檣之利益。不蒙其害。故破壞之事。無窮。進步之事。亦無窮。不得不破壞。鐵路電車興而車馬之利益。不得不破壞。公司興而小資本家之利益。不得不破壞。『托辣士特』Trust興而尋常小公司之利益。不得不破壞。當其過渡迭代之頃。非不釀婦歎童號之慘。極焚亂杌隉之觀也。及建設之新局既定。食其利者。乃在國家。乃在天下。乃在百年。而前此蒙破壞之損害者。亦往往於直接間接上。得意外之新益。善夫西人之恆言曰。『求文明者。非徒須償其價值而已。而又須忍其苦痛。』夫全國國民之生計。為根本上不輕搖動者。而當夫破壞之運之相代乎前也。猶且不能恤小害以擲大利。而況於害有百而利無一者耶。故夫歐洲各國自宗教改革後。而教會教士之利益被破壞也。自民主立議會後。而暴君豪族之利益被破壞也。英國改正選舉法。千八百三十二年而舊選舉區之特別利益被破壞也。美國布禁奴會。千八百六十五年而南部素封家之利益被破壞也。此與吾中國之廢八股。而八股家之利益被破壞。革胥吏而胥吏之利益被破壞。改官制而宦場之利益被破壞。其事正相等。彼其所謂利者。乃偏毗於最少數人之私利。而實則陷溺大多數人之公敵也。諺有之。『

一家哭何如一路哭。』於此而猶曰不破壞不破壞。吾謂其無人心矣。夫中國今日之事。何一非蠹大多數人而陷溺之者耶。而八股胥吏官制其小焉者也。

欲行遠者不可不棄其故步。欲登高者不可不離其初級。若終日沾滯呆立於一地。而徒望遠而歎。仰高而羨。吾知其終無濟也。若此者。其在毫無阻力之時。毫無阻力之地。而進步之公例。固既當如是矣。若夫有阻之者。則鑿榛莽以闢之。烈山澤而焚之。固非得已。苟不爾。則雖欲進而無其路也。諺曰。螫蛇在手。壯士斷腕。此語至矣。不觀乎善醫者乎。腸胃癥結。非投以劇烈吐瀉之劑。而決不能治也。瘡癰腫毒。非施以割割洗滌之功。而決不能療也。若是者。所謂破壞也。苟其憚之。而日日進參苓以謀滋補。塗珠珀以求消毒。病未有不日增而月劇者也。夫其所不敢下吐瀉者。慮其耗虧耳。所以不敢施割割者。畏其苦痛耳。而豈知不吐瀉而後此耗虧將益多。不割割而後此之苦痛將益劇。循是以往。非至死亡不止。夫孰與忍片刻而保百年。苦一部而養全體也。且等是耗虧也。等是苦痛也。早治一日。則其創夷必較輕。緩治一日。則其創夷必較重。此又理之至淺而易見者也。而謀國者乃昧焉。此吾之所不解也。大抵今日談維新者有兩種。其下焉者。則拾牙慧。蒙虎皮。借此以爲階進之路。西學一八股也。洋務一苞苴也。游歷一幕夜也。若是者。固不足道矣。其上焉者。則固嘗悴其容焉。焦其心焉。規規然思所以長國家而興樂利者。至叩其術。最初則外交也。練兵也。購械也。製械也。稍進焉。則商務也。開礦也。鐵路也。進而至於最近。則練將也。警察也。教育也。以犖犖諸大端者。是非當今文明國所最要不可缺之事耶。雖然。枝枝節節而行焉。步步趨趨而摹仿焉。其遂可以進於文明乎。其遂可以置國家於不敗之地乎。吾知其必不能也。何也。披綺羅於嫖母。只增其醜。施金鞍於駑駘。祇重其負。刻山龍於朽木。祇斲其腐。築高樓於鬆壤。祇速其傾。未有能濟者也。

今勿一一具論。請專言教育。夫一國之有公共教育也。所以養成將來之國民也。而今之言教育者何如。各省紛紛設學堂矣。而學堂之總辦提調。大率皆最工於鑽營奔競。能仰承長吏鼻息之候補人員也。學堂之教員。大率皆八股名家。弋竊甲第。武斷鄉曲之鉅紳也。其學生之往就學也。亦不過白此時世妝耳。此終南徑耳。與其從事於閉房退院之詩云。子曰。何如從事於當時得令之 A B C D 考選入校。則張紅然燦以示寵榮。吾粵近考取大學堂學生者皆如資派遊學。則苞苴請託以求中選。若此者。皆今日教育事業開宗明義第一章。而將來爲一國教育之源泉者也。試問循此以往。其所養成之人物。可以成一國國民之資格乎。可以任爲將來一國之主人翁乎。可以立於今日民族主義競爭之潮渦乎。吾有以知其必不能也。不能則有教育如無教育。而於中國前途何救也。請更徵諸商務。生計界之競爭。是今日地球上最大問題也。各國所以亡我者在此。我國之所以爭自存者亦當在此。商務之當整頓。夫人而知矣。雖然。振興商務。不可不保護本國工商業之權利。欲保護權利。不可不頒定商法。僅一商法不足以獨立也。則不可不頒定各種法律以相輔。有法而不行。與無法等。則不可不定司法官之權限。立法而不善。弊更甚於無法。則不可不定立法權之所屬。壞法者而無所懲。法旋立而旋廢。則不可不定行法官之責任。推其極也。非制憲法。開議會。立責任政府。而商務終不可得興。今之言商務者。漫然曰。吾興之吾興之而已。吾不知其所以興之者。持何術也。夫就一二端言之。既已如是矣。推諸凡百。莫不皆然。吾故有以知今日所謂新法者之必無效也。何也。不破壞之建設。未有能建設者也。夫今之朝野上下。所以汲汲然崇拜新法者。豈不以非如是則國將危亡乎哉。而新法之無救於危亡也。若此。有國家之責任者。當何擇矣。

然則救危亡求進步之道將奈何。曰。必取數千年橫暴混濁之政體。破碎而齏粉之。使數千萬如虎如狼如蝗如

蝻如蟻如蛆之官吏。失其社鼠城狐之憑藉。然後能滌盪腸胃。以上於進步之途也。必取數千年腐敗柔媚之學說。廓清而辭闢之。使數百萬如蠹魚如鸚鵡如水母如畜犬之學子。毋得搖筆弄舌。舞文嚼字。爲民賊之後援。然後能一新耳目。以行進步之實也。而其所以達此目的之方法有二。一曰無血之破壞。二曰有血之破壞。無血之破壞者。如日本之類是也。有血之破壞者。如法國之類是也。中國如能爲無血之破壞乎。吾馨香而祝之。中國如不得不爲有血之破壞乎。吾衰絰而哀之。雖然。哀則哀矣。然欲使吾於此二者之外。而別求一可以救國之途。吾苦無以爲對也。嗚呼。吾中國而果能行第一義也。則今日其行之矣。而竟不能。則吾所謂第二義者。遂終不可免。嗚呼。吾又安忍言哉。嗚呼。吾又安忍不言哉。

吾讀宗教改革之歷史。見夫二百年干戈雲擾。全歐無寧宇。吾未嘗不頷蹙。吾讀一千七百八十九年之歷史。見夫殺人如麻。一日死者以十數萬計。吾未嘗不股慄。雖然。吾思之。吾重思之。國中如無破壞之種子。則亦已耳。苟其有之。夫安可得避。中國數千年以來歷史。以天然之破壞相終始者也。遠者勿具論。請言百年以來之事。乾隆中葉。山東有所謂教匪者。王倫之徒起。三十九年平。同時有甘肅馬明心之亂。據河州蘭州。四十六年平。五十一年。臺灣林爽文起。諸將出征。皆不有功。歷二年。五年有福康安海蘭察督師乃平。而安南之役又起。五十三年乃平。廓爾喀又內犯。五十九年乃平。而五十八年。詔天下大索白蓮教首領不獲。官吏以搜捕教匪爲名。恣行暴虐。亂機滿天下。五十九年。貴州苗族之亂。遂作。嘉慶元年。白蓮教遂大起於湖北。蔓延河南四川陝西甘肅。而四川之徐天德王三槐等。又各擁衆數萬起事。至七年乃平。八年。浙江海盜蔡牽又起。九年。與粵之朱潰合。十三年乃平。十四年。粵之鄭乙又起。十五年乃平。同年。天理教徒李文成又起。十八年乃平。不數年。而回部之亂又起。凡歷

十餘年至道光十一年乃平。同時湖南之趙金龍又起。十二年平。天下彫敝之既極。始稍蘇息。而鴉片戰役又起矣。道光十九年。英艦始入廣東。二十年。旋逼乍浦。犯寧波。廿一年。取舟山。廈門。定海。寧波。乍浦。遂攻吳淞。下鎮江。廿二年。結南京條約。乃平。而兩廣之伏莽。已徧地出沒。無寧歲。至咸豐元年。洪楊遂乘之而起。蹂躪天下之半。而咸豐七年。復有英人入廣東。擄總督之事。九年。復有英法聯軍犯北京之事。而洪氏據金陵。凡十二年。至同治二年始平。而捻黨猶逼京畿。危在一髮。七年始平。而回部苗疆之亂。猶未已。復血刃者數載。及其全平。已光緒三年矣。自同治九年。天津教案起。爾後民教之鬩。連縣不絕。光緒八年。遂有法國安南之役。十一年始平。二十年。日本戰役起。廿一年始平。廿四年。廣西李立亭。四川余蠻子起。廿五年始平。同年。山東義和團起。蔓延直隸。幾至亡國。爲十一國所挾。廿七年始平。今者二十八年之過去者。不過一百五十日耳。而廣宗鉅鹿之難。以袁軍全力。歷兩月。乃始平之。廣西之難。至今猶蔓延三省。未知所屆。而四川又見告矣。由此言之。此百餘年間。我十八行省之公地。何處非以血爲染。我四百餘兆之同胞。何日非以肉爲糜。前此既有然。而況乎繼此以往。其劇烈將仟佰而未。有艾也。昔人云。一慚之不忍。而終身慚乎。吾亦欲曰。一破壞之不忍。而終古以破壞乎。我國民試矯首一望。見夫歐美日本之。以破壞治破壞。而永絕內亂之萌蘖也。不識亦曾有動於其心。而爲臨淵之羨焉否也。

且夫懼破壞者。抑豈不以愛惜民命哉。姑無論天然無意識之破壞。如前所歷舉內亂諸禍。必非煦煦孑孑之所。能弭也。即使弭矣。而以今日之國體。今日之政治。今日之官吏。其以直接間接殺人者。每歲之數。又豈讓法國大革命時代哉。十年前山西一旱。而死者百餘萬矣。鄭州一決。而死者十餘萬矣。冬春之交。北地之民。死於凍餒者。每歲以十萬計。近十年來。廣東人死於疫癘者。每歲以數十萬計。而死於盜賊。與迫於飢寒。自爲盜賊而死者。舉

國之大。每歲亦何啻十萬。夫此等雖大半關於天災乎。然人之樂有羣也。樂有政府也。豈不欲以人治勝天行哉。有政府而不能爲民捍災患。然則何取此政府爲也。天災之事關係政嗚呼。中國人之爲戮民久矣。天戮之人。戮人暴君戮之。奸吏戮之。異族戮之。其所以戮之之具。則飢戮之。寒戮之。天戮之。癘戮之。刑獄戮之。盜賊戮之。干戈戮之。文明國中有一人橫死者。無論爲冤慘爲當罪。而死者之名。必出現於新聞紙中。三數次乃至百數十次。所謂貴人道重民命者。不當如是耶。若中國則何有焉。草薶耳。禽獮耳。雖日死千人焉。萬人焉。其誰知之。其誰殮之。亦幸而此傳種學最精之國民。野火燒不盡。春風吹又生。其林林總總者如故也。使稍矜貴者。吾恐周餘子遺之詩。早實見於今日矣。然此猶在無外競之時代爲然耳。自今以往。十數國之飢鷹餓虎。張牙舞爪。吶喊蹴踏。以入我闔而擇我肉。數年數十年後。能使我如埃及然。將口中未下咽之飯。挖而獻之。猶不足以償債主。能使我如印度然。日日行三跪九叩首禮於他族之膝下。乃僅得半腹之飽。不知愛惜民命者。何以待之。何以救之。我國民一念及此。當能信吾所謂『破壞亦破壞。不破壞亦破壞』者之非過言矣。而二者吉凶去從之間。我國民其何擇焉。其何擇焉。昔日本維新主動力之第一人曰吉田松陰者。嘗語其徒曰。『今之號稱正義人。觀望持重者。比比皆是。是爲最大下策。何如輕快拙速。打破局面。然後徐圖占地布石之爲愈乎。』日本之所以有今日。皆恃此精神也。皆遵此方略也。吉田松陰日本長門藩士以抗幕府被逮死。維新元勳山縣伊藤井上等皆其門下士也。今日中國之弊。視四十年前之日本。又數倍焉。而國中號稱有志之士。舍松陰所謂最大下策者。無敢思之。無敢迫之。無敢行之。吾又烏知其前途所終極也。雖然。破壞亦豈易言哉。瑪志尼曰。『破壞也者。爲建設而破壞。非爲破壞而破壞。使爲破壞而破壞者。則何取乎。破壞。且亦將並破壞之業而不能就也。』吾請更下一解曰。非有不忍破壞之仁賢者。不可以言破壞之言。非有

能回破壞之手段者。不可以事破壞之事。而不然者。率其牢騷不平之氣。小有才而未聞道。取天下之事物。不論精粗美惡。欲一舉而碎之滅之。以供其快心一笑之具。尋至自起樓而自燒棄。自蒔花而自斬刈。囂囂然號於衆曰。吾能割捨也。吾能決斷也。若是者。直人妖耳。故夫破壞者。仁人君子不得已之所爲也。孔明揮淚於街亭。子胥泣血於關塞。彼豈忍死其友而遺其父哉。

第十二節 論自尊

日本大教育家福澤諭吉之訓學者也。標提『獨立自尊』一語。以爲德育最大綱領。夫自尊何以謂之德。自也者。國民之一分子也。自尊所以尊國民故。自也者。人道之一阿屯也。自尊所以尊人道故。

西哲有言。『人各立於自所欲立之地。』吉田松陰曰。『士生今日。欲爲蒲柳。斯蒲柳矣。欲爲松柏。斯松柏矣。』吾以爲欲爲松柏者。果能爲松柏與否。吾不敢言。若夫欲爲蒲柳者。而能進於松柏。吾未之聞也。孟子曰。有是四端。而自謂不能者。自賊者也。又曰。自暴者不可與有言也。自棄者不可以有爲也。夫自賊自暴自棄之反面。則自尊是也。是以君子貴自尊。

悲哉吾中國人。無自尊性質也。簪纓何物。以一鈎金塞其帽頂。則脚靴手版。磕頭請安。戢戢然矣。阿堵何物。以一貫銅晃其腰纏。則色肆指動。圍繞奔走。喁喁然矣。夫沐冠而喜者。戲猴之態也。投骨而嚙者。畜犬之情也。人之所以爲人者。其資格安在耶。顧乃自儕於猴犬。而恬不爲怪也。故夫自尊與不自尊。實天民奴隸之絕大關頭也。且吾見夫今世所謂識時俊傑者矣。天下之危急。彼非無所聞也。國民之義務。彼非無所知也。願口中有萬言之

沸騰。肩上無半銖之負荷。叩其故。則曰天下大矣。賢智多矣。某自顧何人。其敢語於此。推彼輩之意。以爲一國四百兆人。其三百九十九兆九億九萬九千九百九十九人中。其德慧術知。無一不優於我。其聰明才力。無一不強於我。我之一人。豈足輕重云耳。率斯道也。以往其必四百兆人。人人皆除出自己。而以國事望諸其餘之三百九十九兆九億九萬九千九百九十九人。統計而互消之。則是四百兆人卒至實無一人也。夫一二人之自賊自暴。自棄而不自尊。宜若於天下大局無與焉矣。然窮其弊。乃至若此。

不寧惟是。爲國民者而不自尊。其一人之資格。則斷未有能自尊其一國之資格焉者也。一國不自尊。而國未有能立焉者也。吾聞英國人自尊之言曰。太陽會無不照我英國國旗之時。英人屬地偏於五大洲。此地日方沒。彼地日已出。故曰太陽常照英國旗也。

曰無論何地。凡我英人有一人足跡踏於其土者。則其土必爲吾英之勢力範圍也。吾聞俄國人自尊之言曰。俄羅斯者。東羅馬之相續人也。相續者。繼襲之義。曰我俄人必成先帝彼得之志。爲東方之主人翁也。吾聞法國人自尊之

言曰。法蘭西者。歐洲文明之中心點也。全世界進步之原動力也。吾聞德國人自尊之言曰。自由主義者。日耳曼森林中之產物也。日耳曼人者。條頓民族之宗子。歐洲中原之主帥也。吾聞美國人自尊之言曰。舊世界者。腐敗

陳積之世界也。其有清新和淑之氣者。惟我新世界。舊世界指東半球。新世界指西半球。今日之天下。由政治界之爭競。而移於生計界之競爭。他日戰勝於生計界者。舍我美人莫屬也。吾聞日本人自尊之言曰。日本者東方之英國也。萬世一

系天下無雙也。亞洲之先進國也。東西兩文明之總匯流也。自餘各國。苟其能保一國之名譽於世界上者。則皆莫不各有其所以自尊之具。若不爾者。則其國必萎縮而無以自存也。其遠焉者。吾不能徧舉。請徵諸其近者。吾嘗見印度人。輒曰英國之政治。高美完滿。盛德巍巍。勝於吾印往昔遠甚。乃至英人之一顰一笑。一飲一啄。皆視

爲加己數十等也。吾嘗見朝鮮人輒曰：吾韓今日更無可望。惟望日本及世界文明各大國扶而掖之也。淺見者徒見夫英俄德法美日之強盛也如彼，而以其所以敢於自尊者有由。徒見夫印度朝鮮之積弱也如此，而以其所以自貶者出於不得已。此誤果爲因誤，因爲果之言也。而烏知夫自尊者即彼六國致強之原，而自貶者乃此二國取滅之道也。嗚呼！吾觀於此而不能不重爲中國恫矣。疇昔尙有一二侈然自大之客氣，乃挫敗不數度。至今日而消磨盡矣。聞他人之議瓜分我也，則噉然以啼。聞他人之議保全我也，則颯然以笑。君相官吏，伺外國人之顏色，先意承志。如孝子之事父母，士農工商，仰外國人之鼻息，趨承奔走，如游妓之媚情人。政府之意曰：中國不足恃矣。吾但求結納一大邦之奧援，爲附庸下邑之陪臣，以保富貴終餘年焉。民間之意曰：中國無可爲矣。吾但求託庇一強國之宇下，爲食毛踐土之蟻民，以逃喪亂長子孫焉。卽號稱有志之士者，亦曰：今日之中國，非可以自力自救。庶幾有仁義和親之國，恤我憐我，扶助我乎。嗟乎！恫哉！我國家今日之資格，其如斯而已乎。我國家將來之前途，竟如斯而已乎。嗟乎！恫哉！疇昔侈然自大之客氣，自居上國而藐人爲夷狄者，先覺之士，竊竊然憂之，以爲排外之謬想，不徒傷外交而更阻文明輸入之途云耳。夫孰知夫數十年來得延一線之殘喘者，尙賴有此若明若昧，無規則無意識之排外自尊思想以維持之。并此而斲喪焉，而立國之具，乃真絕矣。夫孰知夫以真守舊誤國，而國尙有可爲，以僞維新誤國，而國乃無可救也。孟子曰：未聞以千里畏人者也。誰爲爲之，而至於此。

夫國家本非有體也。藉人民以成體，故欲求國之自尊，必先自國民人人自尊始。伊尹曰：予天民之先覺者也。予將以斯道覺斯民也。非予覺之而誰也。顏淵曰：舜何人也。予何人也。有爲者亦若是。孟子曰：夫天未欲平治天下

也。如欲平治天下，當今之世，舍我其誰也。若此者，就尋常庸子視之，不以爲狂，必以爲泰矣。而聖賢之所以爲聖賢者，乃在於此。英將烏爾夫之將征加拿大也，於前一夜拔劍擊案，闕步室內，自誇其大業之必成，宰相鼈特見之，語人曰：『余深慶此行爲國家得人，奧相加富匿，掌奧國政權者五十年，嘗喟然長歎曰：『天爲國家生非常之才，雖然其孕育之也百年，其休息之也又百年，吾每念及我百歲之後，不禁爲奧帝國之前途危慄也。』鼈特當一千七百五十七年，語侯爵某曰：『君侯君侯，予確信惟予能救此國，而舍予之外無一人能當其任也。』加里波的曰：『余誓復我意大利，還我古羅馬。』加富爾失意躬耕之時，其友贈書弔之，乃戲答曰：『事未可知，天若假公以年，佇看他日加富爾爲全意大利宰相之時矣。』彼數子者，其所以高自位置，與夫世俗之多大言少成事者，皮相焉殆無以異，而不知其後此之建豐功揚偉烈，能留最高之名譽於歷史上，皆此不肯自賊自暴自棄之一念，驅遣而成就之也。嗟夫，國於天地，必有與立，歷覽古今中外之歷史，其所以能維繫國家於不敗之地者，何一非由人民之自尊而來，何一非由人民中之尤秀拔者，以自尊之大義倡率一世而來哉。

吾欲明自尊之義，請先言自尊之道。凡自尊者必自愛。『在山泉水清，出山泉水濁。侍婢賣珠回，牽蘿補茆屋。摘花不插鬢，采柏動盈掬。天寒翠袖薄，日暮倚修竹。』此杜老絕代佳人之詩也。不如此而謬託於絕代佳人，未有能稱者也。孔明之表後主也，一則曰：『臣本布衣，躬耕南陽，苟全性命於亂世，不求聞達於諸侯。再則曰：『臣於成都負郭，有桑八百株，沒後子孫，無憂飢寒。夫孔明非必如硜硜自守之匹夫，故爲狷介以鳴高也。彼其所以自處者，固別有所以特拔於流俗，而以淡泊爲明志之媒介，以寧靜爲致遠之表記也。故夫浮華輕薄之士，謬託曠達，而以不矜細行爲通才，犧牲名譽，而以

枉尺直尋爲手段者。其去豪傑遠矣。何也。先自菲薄。而所謂自尊者。更持何道也。故真能自尊者。有皚皚冰雪之志節。然後能顯其落落雲鶴之精神。有諛諛松風之德操。然後能載其嶽嶽千仞之氣概。自尊者。實使人進其品格之法門也。

凡自尊者必自治。人何以尊於禽獸。人有法律。而禽獸無之也。文明人何以尊於野蠻。文明人能與法律相浹。而野蠻不能也。十人能自治。則此十人者。在其鄉市。爲一最固結之團體。而可以尊於一鄉市。百人能自治。則此百人者。在其省郡。爲一最固結之團體。而可以尊於一省郡。千人萬人能自治。則此千人萬人者。在其國中。爲一最固結之團體。而可以尊於一國。數十百千萬人能自治。則此數十百千萬人者。在世界中。爲一最固結之團體。而可以尊於全世界。其在古代。斯巴達以不滿萬人之國。而獨尊於希臘。其在現世。英國人口不過中國十五分之一。而尊於五洲。何也。皆由其自治之力強。法律之觀念重耳。蓋人也者。必非能以一人而自尊者也。故必其羣尊。然後羣內之人。與之俱尊。而彼此自治力不足。則羣且不成。尊於何有。我中國人格。所以日趨於卑賤。其病源皆坐於是。

凡自尊者必自立。莊子曰。『有人者累。見有於人者憂。』故夫大同太平之極。必無一人焉。能有人。亦無一人焉。見有於人。泰西之治。今猶未至也。而中國則更甚焉。其人非有人者。則見有於人者。故君有民。民見有於君。父有子。子見有於父。夫有婦。婦見有於夫。一室之中。主有僕。僕見有於主。一鋪店之中。股東有伴傭。伴傭見有於股東。一黨派之中。黨魁有徒衆。徒衆見有於黨魁。通四百兆人而計之。大率有人者百之一。見有於人者百之九十九。而此所謂有人者。時又更有他人焉。從而有之。如婦見有於夫。其夫或見有於其夫之父。或又見有於其所屬之鋪店之主人。衙署之長官。而彼等又見有於一二民職。

之類若是者其級數無量不可思議。雖恆河沙世界中一蓮花一若是乎。吾國中雖有四百兆人而其見有於一花中一一佛一一佛身一口一口一舌說之猶不能盡。若是乎。秦西慣例婦人大率無選舉權。若是乎。則此四百兆人中能保存人格者復幾何哉。是安得不瞿然驚也。夫吾之爲此言非謂欲使人盡去其所尊所親者而倔強跋扈以爲高也。乃正所以爲合羣計也。凡一羣之中必其人皆有可以自立之道。然後以愛情自貫聯之。以法律自部勒之。斯其羣乃強有力。不然則羣雖衆而所倚賴者不過一二人。則仍只能謂之一二人。不能謂之羣也。有兩家於此。甲家則父母妻子兄弟皆能有所業以食力。餘粟餘布各盡其材。乙家則仰事俯畜皆責望於一人。則其家之孰榮孰悴豈待問也。有兩軍於此。甲軍則卒伍皆知兵。不待指揮而各人之意見既與主帥相針射。號令一下則人人如其心中所欲發。乙軍則惟恃一二勇悍之首領。而他如木雞然。則其軍之孰贏孰負豈待問也。夫家庭與軍伍其制裁之當嚴整。殆視他種社會爲尤要矣。而其自立力之萬不可缺也。猶如此。故凡有自尊思想不欲玷辱彼蒼所以予我之人格者。必以先求自立爲第一要義。自立之具不一端。其最顯要者則生計上之自勞自活。與學問上之自修自進也。力能養人者上也。卽不能而不可不求足以自養。學能濟人者上也。卽不能而不可不求足以自濟。苟不爾者欲不倚賴人烏可得也。專倚賴人而欲不見有於人烏可得也。夫倚賴人非必志士之所諱也。然我有所倚賴於他。他亦有所倚賴於我。互相倚而羣之形乃固焉。若一則專爲倚賴者。一則專爲被倚賴者。其羣未有能立。卽立未有能久者也。英人常自誇曰。『他國之學校可以教成許多博士學士。我英之學校則只能教成『人』而已。』人者何。人格之謂也。而求英人教育之特色。所以能養成此人格者。則惟受之實業而使之可以自活。受之常職而使之可以自謀。而盎格魯撒遜人種所人高掌遠矚於全世界。能有人而不見有

於人者。皆恃此焉矣。

凡自尊者必自牧。易曰。謙謙君子。卑以自牧。自牧與自尊。寧非反對之兩極端耶。雖然。有說焉。自尊云者。非尊其區區七尺也。尊其爲國民之一分子。人類之一阿屯也。故凡爲國民一分子。人類一阿屯者。皆必如其所尊以尊之。故惟自尊者爲能尊人。臨深以爲高。加少以爲多。其爲高與多也。亦僅矣。殺人以自生。亡人以自存。其爲生與存也。亦殆矣。故夫沾沾一得趾高氣揚者。其必器小易盈之細人也。甚或人之有技媚嫉以惡者。其必濁卑下流之鄙夫也。細人鄙夫。其去自尊之道。不亦遠乎。吾觀夫西人之所謂 Gentleman

此字中國語無確譯俾斯麥嘗謂此英語中最有意味之字也

若強譯之則君子二字庶乎近焉

者。其接人也。皆有特別一種溫良恭儉讓之德。雖對婢僕。其禮逾恭。有所命令。必曰 Please

含懇請之意

有所取求。必曰 Thank you

也

蓋重人者人恆重之。侮人者人恆侮之。勢必然矣。況夫人也者。參天兩地。

列爲三才。吾之能保存其高尚之資格也。不過適完其分際上應盡之義務。而何足以自炫耀也。是故欲立立人。先聖所以垂訓。貢高我慢。世尊所以設戒。

凡自尊者必自任。一羣之人芸芸也。而於其中有獨爲羣內之所崇拜者。此必非可以力爭而術取也。必其所負於本羣之責獨重。而其任之也獨勞。則衆人之所以酬之者。自不期然而然。莫之致而至。其自任也。非欲人之尊我。而以此爲釣也。彼實自認其天職之不可以不盡。苟不爾者。則爲自貶。爲自污。爲自棄。爲道義上之自鬻。爲精神上之自戕。是故逾自尊者。逾自任。逾自任者。逾自尊。自尊之極。乃有如伊尹所謂天民先覺。如孟子所謂舍我其誰。如佛所謂普度衆生。爲一大事出世。豈抹煞衆人以爲莫己若哉。蓋見夫己之責任。則已如是。而他人之能如是與否。且勿暇計也。抑吾嘗見夫老朽名士。與輕薄少年。之自尊矣。撫拾區區口耳四寸之學問。吐出訑訑氣。

焰萬丈之言詞。目無餘子。而我躬亦不知何存。口有千秋。而雙肩則不能容物。吾昔曾爲呵旁觀者文。內一條寫其形狀曰。

四曰笑罵派。(中略)既罵維新。亦罵守舊。既罵小人。亦罵君子。對老輩則罵其暮氣已深。對青年則罵其躁進喜事。事之成也。則曰豎子成名。事之敗也。則曰吾早料及。彼輩常自立於無可指摘之地。何也。不辦事故無可指摘。旁觀故無可指摘。己不辦事。而立於辦事者之後。引繩批根。以嘲諷掙擊。此最巧黠之術。而使勇者所以短氣。怯者所以灰心也。(中略)譬之孤舟遇風於大洋。彼輩罵風罵波。罵大洋罵孤舟。乃至徧罵同舟之人。若問此船當以何術可達彼岸乎。彼等瞠然無對也。何也。彼輩藉旁觀以行笑罵。失旁觀之地位。則無笑罵也。

嗟夫。自尊者本人道最不可缺之德。而在今日之中國。此二字幾成詬病之名詞者。皆此等僞自尊者之爲累也。諺曰。『濟人利物非吾事。自有周公孔聖人。』夫周公何人也。孔聖人何人也。顛同此員。趾同此方。官同此五。支同此四。而必曰此也者。彼之責任。非我之責任也。天下之不自愛。孰有過是也。而若之何。彼僞自尊者。竟奉此語爲不二法門也。

朱子曰。教學者如扶醉人。扶得東來西又倒。吾今者爲我國民陳自尊之義。吾安保無誤讀之以長其暴慢鄙倍之氣。增其驕盈予智之心。以爲公德累爲合羣蠱者。雖然。吾既略陳其界說。爲自尊二字下一定義。吾敢申言之。曰。凡不自愛。不自治。不自立。不自牧。不自任者。決非能自尊之人也。五者缺一。而猶施施然自尊者。則自尊主義之罪人也。嗟乎。因噎固不可以廢食。懲羹固不可以吹壺。吾深憂夫人人自尊之有流弊。吾尤憂乎人人不自尊。

而此四百兆人者。且自以奴隸牛馬爲受生於天之分內事。而此種自屈辱以倚賴他人之劣根性。今日施諸甲。明日卽可以施諸乙。今日施諸室內。明日卽可以施諸路人。施諸仇敵。嗚呼。吾每接見夫客之自燕來者。問以吾國民近日對外之情狀。未嘗不淚涔涔下也。嗚呼。吾又安能已於言哉。

第十二節 論合羣

自地球初有生物以迄今日。其間孳乳蕃殖。蠕者泳者飛者走者有覺者無覺者有情者無情者有魂者無魂者。其種類其數量何啻京垓億兆。問今存者幾何矣。自地球初有人類以迄今日。其間孳乳蕃殖。黃者白者黑者。椹者有族者無族者。有部者無部者。有國者無國者。其種類其數量何啻京垓億兆。問今存者幾何矣。等是軀殼也。等是血氣也。等是品彙結集也。而存焉者不過萬億中之一。餘則皆萎然落澌然滅矣。豈有他哉。自然淘汰之結果。劣者不得不敗。而讓優者以獨勝云爾。優劣之道不一端。而能羣與不能羣。實爲其總原。

合羣之義。今舉國中稍有知識者。皆能言之矣。問有能舉合羣之實者乎。無有也。非惟國民全體之大羣不能。卽一部分之小羣亦不能也。非惟頑固愚陋者不能。卽號稱賢達有志者亦不能也。嗚呼。苟此不羣之惡性而終不可以變也。則此蠕蠕芸芸之四百兆人。遂不能逃劣敗之數。遂必與前此之萎然落澌然滅者同一命運。夫安得不痛。夫安得不懼。吾推原不羣之故。有四因焉。

一曰公共觀念之缺乏。凡人之所以不得不羣者。以一身之所需求所欲望。非獨力所能給也。以一身之所苦痛所急難。非獨力所能捍也。於是乎必相引相倚。然後可以自存。若此者。謂之公共觀念。公共觀念者。不學而知。

不慮而能者也。而天演界之優劣，卽視此觀念之強弱以爲差。夫既曰不學而知不慮而能矣，然其間又有強弱者何也？則以公觀念與私觀念常不能無矛盾，而私益之小者近者，往往爲公益之大者遠者之蝨賊也。故真有公共觀念者，常不惜犧牲其私益之一部分，以擁護公益。其甚者或乃犧牲其現在私益之全部分，以擁護未來公益。非拂性也。蓋深知夫處此物競天擇界，欲以人治勝天行，舍此術末由也。昧者不察，反其道以行之，知私利之可歆，而不知公害之可懼。此楊朱哲學所以橫流於天壤，而邊沁之名理，所以爲時詭病也。此爲不能合羣之第一病。

二曰對外之界說不分明。凡羣之成，必以對待。苟對於外而無競爭，則羣之精神與形式皆無所著。此人類之常情，無所容諱者也。故羣也者，實以爲我兼愛之兩異性相和合而結構之。有我見而自私焉，非必羣之害也。雖然，一人與一人交涉，則內吾身而外他人，是之謂一身之我。此羣與彼羣交涉，則內吾羣而外他羣，是之謂一羣之我。同是我也，而有小我大我之別焉。有我則必有我之友與我之敵。既曰羣矣，則羣中皆吾友也。故善爲羣者，既認有一羣外之公敵，則必不認有一羣內之私敵。昔希臘列邦，干戈相尋，一遇波斯之來襲，則忽釋甲而相與歃血焉。對外之我見使然也。昔英國保守自由兩黨，傾軋衝突，曾無寧歲。及格里迷亞戰爭起，雖反對黨亦以全力助政府焉。對外之我見使然也。昔日本自由進步兩黨，政綱各異，角立對峙。遇藩閥內閣之解散，議會則忽相提攜，結爲一憲政黨以抗之。對外之我見使然也。故凡結集一羣者，必當先明其對外之界說。卽與吾羣競爭之公敵何在是也。今志士汲汲言合羣者，非以愛國乎？非以利民乎？既以愛國也，則其環伺我而憑陵我者，國仇也。吾公敵也。舍是則無所爲敵也。既以利民也，則其箝壓我而朘削我者，民賊也。吾公敵也。舍是則無所爲敵也。苟

其內相敵焉。則其羣未有不爲外敵所摧陷而夷滅者也。而志士顧昧此焉。往往舍公敵大敵於不問。而惟斷斷焉爭小意見於本團。無他。知小我而不知大我。用對外之手段以對內。所以鷸蚌相持。而使漁人竊笑其後也。此爲不能合羣之第二病。

三曰無規則。凡一羣之立也。少至二三人。多至千百兆。莫不賴有法律以維持之。其法律或起於命令。或生於契約。以學理言。則由契約出者謂之正謂之善。由命令出者謂之不正謂之不善。以事勢言。則能有正且善之法律尙也。若其不能。則不正不善之法律。猶勝於無法律。此羣學家政學家所同認也。今志士之倡合羣者。豈不以不正不善之法律之病民弱國。而思所以易之耶。乃夷考其實。或反自陷於無法律之域。幾何不爲彼輩所藉口以相鋤也。不寧惟是。而使本羣中亦無所可恃以相團結。已集者望望然去。未來者裹足不前。旁觀者引爲大戒。則羣力安得擴張。而目的何日能達也。吾觀文明國人之善爲羣者。小而一地一事之法團。大而一國之議會。莫不行少數服從多數之律。而百事資以取決。乃今之爲羣者。或以一二人之意見武斷焉。梗議焉。其無規則者一也。善爲羣者。必委立一首長。使之代表全羣。執行事務。授以全權。聽其指揮。乃今之爲羣者。只知有自由。不知有制裁。其無規則者二也。叩其故。則曰。以少數服從於多數。是爲多數之奴隸也。以黨員服從於代表人。是爲代表人之奴隸也。嘻。是豈奴隸之云乎。人不可以奴隸於人。顧不可以不奴隸於羣。不奴隸於本羣。勢必至奴隸於他羣。服從多數。服從職權。即代人正所以保護其羣而勿使墜也。而不然者。人人對抗。不肯相下。人人孤立。無所統一。其勢必相率爲野蠻之自由。與未爲羣之前相等。雖無公敵。猶不足以自立。而況夫日有反對者之乘其後也。此爲不能合羣之第三病。

四曰忌嫉。吾昔讀曾文正戒子書中伎求詩而悚然焉。其言曰：善莫大於恕，德莫凶於妬。妬者妾婦行，瑣瑣奚足數。已拙，忌人能已塞，忌人遇已若無事功，忌人得成務，已若無黨援，忌人得多助，勢位苟相敵，畏偪又相惡，已無好聞望，忌人文名著，已無賢子孫，忌人後嗣裕，爭名日夜奔，爭利東西驚，但期一身榮，不惜他人污，聞災或欣幸，聞禍或悅豫，問渠何以然，不自知其故。』嗚呼！此雖曰老生常談乎，然以今日之誤解邊沁學說者，實當頭一棒之言也。吾輩試夙夜一自省焉，其能悉免於如文正所訶乎？吾國人此等惡質，積之數千年，受諸種性之遺傳，染諸社會之習慣，幾深入於人人之腦中，而不能自拔，以是而欲求合羣，是何異磨甗以作鏡，蒸沙以求飯也。夫宗旨苟不同，則昌言以攻之可也，地位苟不同，則分功以赴之可也，乃若宗旨同，地位同，則戮力同心以共大業，善莫大焉。夫所謂戮力同心者，非必強甲之事業而使合於乙也，同歸而殊途，一致而百慮，目的既共，指於一處，其成也，則後此終必有握手一堂之日，即不然，或甲敗而乙成，或乙敗而甲成，而吾之所志固已達矣。事苟有濟，成之何必在我，仁人君子之用心，不當如是耶？又就令見不及此，而求競勝於一時，專美於一己，則亦光明磊落，自出其聰明才力以立於天演界中，苟其優也，雖千萬人與我競，亦何患不勝，苟其劣也，雖無一人與我競，亦何恃不敗。天下之事業多矣，豈必排倒他人而始容卿一席耶？嗚呼！思之思之，外有國難，內有民箝，同胞半在酣夢之中，前途已入泥犁之境，吾力而能及也，則自拯之，獨力不能也，則協力拯之，吾力而無濟也，則望他人拯之，其尙忍摧萌拉蘖，爲一國之仇讎，效死力耶？愚不肖者，吾無望焉，無責焉，願安得不爲號稱賢智者正告也。此爲不能合羣之第四病。

此其大略也。若詳語之，則如傲慢，如執拗，如放蕩，如迂愚，如嗜利，如寡情，皆足爲合羣之大蠹，有一於此，羣終不

成。吾聞孟德斯鳩之論政也。曰：專制之國，其元氣在威力；立憲之國，其元氣在名譽；共和之國，其元氣在道德。夫道德者，無所往而可以弁髦者也。然在前此之中國，一人爲剛，萬夫爲柔，其所以爲羣者，在強制而不在公意。則雖稍腐敗，稍渙散，而猶足以存其軀以迄今日。若今之君子，既明知此等現象，不足以戰勝於天擇，而別思所以易之，則非有完全之道德，其奚可哉？其奚可哉？吾聞彼頑固者流，既聒有辭矣，曰：今日之中國，必不可以言共和，必不可以言議院，必不可以言自治，以是畀之，徒使混雜紛擾，傾軋殘殺，以猶太我中華，不如因仍數千年專制之治，長此束縛焉，馳驟焉，猶可以免滔天之禍。吾惡其言，雖然，吾且悲其言，吾且慚其言，嗚呼！吾黨其猶不自省不自戒乎？彼輩不幸言中，猶小焉者也。而坐是之故，以致自由平等權利獨立進取等最美善高尚之主義，將永爲天下萬世所詬病。天下萬世相與談虎色變曰：當二十世紀之初，中國所謂有新思想新知識新學術之人，如是，是如是，亡中國之罪，皆在彼輩焉。嗚呼！嗚呼！則吾儕雖萬死，其何能贖也。

第十四節 論生利分利

謂中國而貧國耶？大學曰：有人此有土，有土此有財，未聞以數十萬里之地數十千萬之人而患貧者也。謂中國而富國耶？稽其官府，則羅掘而無所於得；行其閭閻，則憔悴而無以自存。雖有辯者，不能爲中國之貧諱也。貧之原因，不一端，請先專言民事。

大學曰：生之者衆，食之者寡，此言至矣。後世生計學家言殖產之術，未有能外者也。夫一國之歲殖者，國中人民歲殖之總計也。綜一國之民，無論或勞力或不勞力，勞力矣，或生利或不生利，而其待養於地之所產，民之所出。

則均。一國歲殖，只有此數。惟其養徒食者數寡，而後瞻能生者數多。瞻能生者數多，而後國之所殖乃歲進。反是則其未有不瘁焉者也。

生計家言財之所自出者有三。曰土地。曰資本。曰勞力。三者相需而貨乃成。願同一土地也。在野蠻民族之手則爲石田。在文明民族之手則爲奇貨。其故何也。文明人能利用資本勞力以擴充之。而野蠻人不能也。所謂利用資本與勞力者何也。用之而蘄其有所復也。何謂有所復。用吾力以力田焉。製造焉。被其功於物材。成器之後。其值遂長。其所成之物。歷時甚久。猶存人間。可以轉售交易。今日以功成物。他日由物又轉爲功。如是則勞力復焉矣。斥吾資以庀材焉。雇傭焉。材由生貨。轉爲熟貨。傭以人力。造出物力。已熟之貨。蓄力之物。其所值必餘於前。此所斥之資。吾財無損。而且有贏。如是則資本復焉矣。所復者多一次。則所值者進一級。何也。復者必不徒復也。而又附之以所贏。此富之所由起也。一人如是。一國亦然。

夫綜一國之資本勞力而歲計之。只有此數也。今年而投諸有所復之地。則明年而其率增若干焉。再明年而其率又增若干焉。歲而增之以至於極富。今年而投諸無所復之地。則明年而其率減若干焉。再明年而其率又減若干焉。歲而減之以至於極貧。故今年同一資本同一勞力也。一有所復。一無所復之間。其結果之相遠。在明年則爲一與四之比例矣。再明年則爲一與十六之比例矣。又再明年則爲一與六十四之比例矣。嗚呼。其可驚有如此者。何以明其增減之率然也。此其事於資本易見。而於勞力稍難明。一歲之所總殖。其所以用之者不外兩途。其卽享卽用而無所復者。命之曰消費。其斥以求贏而企其有所復者。命之曰母財。卽資本有人於此。今年以千金之母財。而所殖者得千五百焉。使其人一歲消費之率而適五百也。則適盡其所增殖者。而明年仍有千金爲

母財仍殖千五百。則其產不進亦不退。或遇時機。而所殖者忽逾常率。則母財亦隨增矣。然使偶一歲遇不利而

必至蝕母財矣。故曰羣治以進爲期中止則憂退。則爲病不必退也。即中止而已。岌然不終日矣。使其消費之率歲僅三百也。則明年以今年所殖之餘而合諸

母。其母財爲千二百。而所殖者千八百矣。再明年所殖之餘而合諸母。則其母財爲千五百。而所殖者二千二百餘矣。反是而使其消費之率歲而七百也。則今歲所殖不足供今歲。而不得不蝕及母財。明年之母財僅餘八百。

而所殖僅千二百矣。再明年而再蝕之。其母財僅餘五百。而所殖僅七百餘矣。蝕者其母。遂並其所生之子而亡之。不及三稔。而千金可以蕩然。此事之最易見者也。夫此等持籌握算之論。士君子每羞言焉。而其義實通於治

國。一國之產。而依前者之比例焉。國未有不榮者也。一國之產。而依後者之比例焉。國未有不悴者也。抑一國之浪費。與一人之浪費。理同而形異。一國之浪費有二。(其一)國中人人皆歲費過於歲殖。於是結集成國。而

一國之總歲費過於總歲殖是也。若是者。則其國不數年而遂可以滅亡。雖然。天下從無此國民也。羅馬之末路殆將近是故

史家謂羅馬之亡乃其自亡而非日耳曼人能亡之也。有善費之民。亦必有善殖之民。與之相救。國之所以維持於不敝。賴此而已。(其二)

國中之人。雖有善費者。有善殖者。而殖者之人數。不及費者之人數。費者一人所費之數。又過於殖者一人所殖之數。截長補短以統計之。而一國之總歲費過於總歲殖是也。今之孱國。比比然也。國之總費。既過總殖。則勢不

得不蝕及全國之總母財。總母能幾何。豈堪當此歲蝕也。此資本增減之比例率也。至勞力之增減。其事亦與資本相緣。夫母財之爲用也。大率庀材者居其半。給餼者居其半。所給之餼。即所以養勞力者也。惟母財豐然後百

業興。百業興然後給餼衆。給餼衆然後勞力者各得所養。而其力有所用力。被於物。復成母財。遞增遞進。而力乃盡其用。今使母財被蝕而無所餘。則民有力而無用之地。其力遂日以漸銷。生物學之公例。凡一能力久斯密

亞丹嘗言：「吾英今日之民，勤於昔者，緣今日國財，斥之爲母，以贍勞民者，多於三百年前也。三百年前之民，勞而無獲，乃多情游，其言曰：與其作苦而無獲，不若嬉戲而無餘。大抵工商業廣之區，其民皆母財所贍，履故其用力恆勤，而酣戲飲博，自以日銷，設其地爲都會，養民者不在母財而在支費，則皆皆蠶蠃生。」嚴譯原富部乙篇三是資本之增減，與勞力之增減成比例也。明矣。而況夫既奪善殖者之所食，以養善費者，則此善殖者雖不蠶情，而亦無以自存，或餓羸，或流亡，有妻不能迎，有子不能舉，勞力之損去者，不可以復續，此又其銳減之跡顯而易見者也。資本蝕矣，勞力萎矣，生財之三要素，既毀其二，雖有土地，其將何所緣以產百物耶？國之所以有廣土衆民，而免於貧蹙者，坐是而已。

申而言之，則國之興衰，一視其總資本總勞力之有所復無所復而已。有所復者，資母孳子，大學謂之生之者，生計學家名之曰生利，無所復者，蝕母亡子，大學謂之食之者，生計學家名之曰分利。吾將論生利分利之種別。吾聞生計學家言：生利之人有二種，一曰直接以生利者，若農若工之類是也。二曰間接以生利者，若商人若軍人若政治家若教育家之類是也。而其生利之力，亦有二種，一曰體力，二曰心力。心力復細別爲二，一曰智力，二曰德力。若以其生利之事業分之，則有六種。

第一 發見及發明。發見者新覓得天然物或新考出其物之利用也。如哥倫布發見亞美利加洲，又二三年前新考出菸草中有一種特質，足供人用者，皆是也。發明者將天產物加以新法，則能

廣其用而其法爲前人所未知者，如最近發明無線電報之類是也。

第二 先占。先占者探收未有主權之天產也。如伐木獵獸漁魚探礦之類是也。

第三 用於生貨之勞力。生貨謂物之未經製造者，如農業森林業牧畜業是也。各種製造品之材料，皆自此種勞力而來者也。

第四 用於熟貨之勞力。如製穀麥爲麵包製木材爲家具製土屬爲陶磁製金屬爲機械製綿絲爲布帛其餘各種關於製造者皆屬此類

第五 用於交通之勞力。變更貨物之位置以運輸交通便

第六 用於保助之勞力。若官吏若軍人若醫生皆所以保護生利者也雖不能直接以生利然其職若保險公司然故非分利若教育家若文學家所以助長生利者也雖不直接以生利然得

此令人智識增長性質改良於生利大有所補故亦不爲分利

此皆生利之事業也。其不在此數者。皆謂之分利。斯密亞丹云。『人以多雇工傭而富。以多畜便辟使令之人而貧。何也。使令者之功。固匪所寄。則莫可轉。事竟力消。而不可得復也。』斯密氏充類至義之盡。則以爲分利者不。僅便辟使令之賤者而已。自王侯君公。降至執法司理之官吏。稱戈擐甲之武夫。皆此屬也。故其言又曰。『品上者若官吏師儒若醫巫若文章之士。品下者若倡優侏儒鬪力走馬臧獲廝養。其用勞力也。雖貴賤迥殊。輕重各異。而皆投其力於不可復之地。當生即毀。皆與於分利致貧之數者也。』斯密此論。後賢聚訟紛然。吾今不具引。不具辯。吾請取我國中分利者之種類而細論之。

分利者之種類。大別有二。一曰不勞力而分利者。二曰勞力而仍分利者。

第一 不勞力而分利者。

(一) 乞丐。其人非老非幼非廢疾。以堂堂七尺之軀。乃至不能自養。而行乞於塗。是蕩與惰二者必居一也。人即憐而活之。而爲蝨於一羣。莫大焉。故此輩非可愍而可憎也。若君上失政。天災流行。干戈劫後。不以此論。

(二) 盜竊。盜者未嘗不用體力。竊者未嘗不用心力。然此不得以勞力論也。蓋其所用力。不敢以與人共見也。此其爲分利最易明。不待贅論。

(三)棍騙。棍騙者亦盜竊之一種也。然其操術稍精。其破裂稍難。故其毒害亦較深。而所分之利往往更鉅。棍騙之種額繁多。非可悉舉。如聚賭者。如巫覡。如堪輿星相卜筮之流。皆歸此類。不能醫而冒醫爲衣食者。亦歸此類。

(四)僧道。歐洲教會之牧師神父。識者以爲國之大蠹。前所引斯密亞丹之言。半爲彼輩而發也。至近世革命屢起。奪其特權以儕齊民。然後歐治乃平。雖然。歐之教會雖無實。然猶以覺民爲名也。中國之僧道。則名實兩無取矣。

(五)紈袴子弟。西人之養子也。育之使長成。教之以學業。令其足以自營自活。父母之責任。如是而已。及其既能自營矣。自活矣。則析而居之。他日父母遺產之能屬於己與否。非所知也。故其故家子弟。皆絕依賴根性。無敢託庇前人餘蔭以自暇逸。中國不然。家有數畝薄田。其子弟輒驕奢淫佚。一無生業。而豪宦豪商之裔。更不待論。又以同居不析產爲盛德。矯僞相效。往往有一家丁口至百數十人者。假使其家有萬金之產。則其百數十人之婦女子弟。皆囂囂然曰。吾之家乃萬金之素封家也。曾亦思此萬金者。析之爲數百十焉。各人所占。能有幾何。而此百數十人。皆以萬金之奉自奉。而於家中生計。絲毫不負其責任。吾見所謂故家名門。若此者。比比然矣。又未必故家名門也。卽以尋常論之。大率一家之中。其生利者不過一二人。而分利者動十數人。夫以一人之資本勞力而自養焉。雖中下之材。而猶不至於不給。以一人之資本勞力而養十數人。雖賢智未有能善其後者也。故不得不歲耗其母財以爲消費。而遂以陷於困窮。我國國民之總歲殖。所以不能多斥以爲母財之用者。其大原因未始不由家族制度之不適宜使然也。故俗語曰。『富不過三代。』夫使能善用富。則雖十代百代可也。而吾中

國率不能過三代者何也。生之者一人，而食之者百人。生之者一日，而食之者百日。雖有鉅母，其何足以再世也。西國法律，所以重保護富民者，爲其爲一國積母財，積之愈久，則其數愈鉅。斥母興業，人已交利，而國殖歲進。喬木世臣，所以爲貴也。中國則貧有世襲，而富無世襲。此亦母財消耗之明效大驗矣。而其咎實執袴子弟尸之執袴子弟者。真一國之大蠹賊也。雖然，追本窮原，則咎又不專在其子弟，而兼在其父兄。爲父兄者，既以自累，己所利爲子弟所分，故曰自累而復以累其子弟。令子弟不能爲生利，是誠愚不可及矣。

(六)浪子 浪子者，執袴子弟居其強半，亦有非執袴而亦浪子者。此類之人，尙未至爲乞丐，尙未至爲盜騙，其生涯也。飲酒看花，鬪雞走狗，馳馬角戲，六博踢鞠，吸鴉片，狎游妓，舍此之外，毫無所事，而衣必選色，食必選味。此類之人，其結局也。盜騙乞丐二者，必居一於是。

(七)兵勇及應武試者 生計家之論軍人，有以爲生利者，有以爲分利者。吾謂今世文明國之軍人，決不可謂之分利。何也？若無國防，則國難屢起，民將不得安其業。故軍人者，實生利之民之保險也。藉曰分利矣，然亦當屬於勞力而分利之一類。中國則不然。中國之兵勇，實兼浪子盜騙乞丐三者之長而有之者也。兵勇既皆分利，其應武試者，若武童武生武舉武進士之流，更不待論。

(八)官吏之一大半 中國之官吏，皆分利者也。然其勞力而分利者居小半，不勞力而分利者居大半。不勞力而分利者，其在京官中，則除軍機大臣章京及各部主稿司員外，自餘各官皆是也。其在外官中，則凡候補需次人員及道班同通班佐雜班實缺者之大半皆是也。此類人之性質位置，與下篇第三類略相似。至其勞力而分利者，及其分利之理由，下篇乃論之。

(九)緣附於官以爲養者。此等人所包甚廣。官親也。幕客也。胥吏也。僕役也。皂隸也。訟棍也。其性質大略相等。吾不暇徧論。但約括以此名。此類人。大率強而黠者則豺虎也。弱而笨者則蝗蝻也。其害羣一也。一州縣衙署而參養此輩動數百人。他可知矣。通計全國衣食於此間者。殆常數百餘萬人。此階級亦幾蔚成大國矣。

(十)土豪鄉紳。土豪鄉紳。大率皆紈袴子弟。讀書人。官吏及緣附於官者。之四類人所變相也。雖然。亦有不屬於此四類人。而不得不謂之土豪鄉紳者。即本屬於四類。而既已變相。則亦自別成爲一孽種。故不得不另立一門以總括之。而此等實分利中之最強有力者也。

(十一)婦女之一大半。論者或以婦女爲全屬分利者。斯不通之論也。婦人之生育子女。爲對於人羣第一義務。無論矣。即其主持家計。司闔以內之事。亦與生計學上分勞之理相合。蓋無婦女。則爲男子者不得不兼營室內之事業。不專而生利之效減矣。故加普通婦女以分利之名不可也。雖然。中國婦女。則分利者十六七。而不分利者僅十三四。何以言之。凡人當盡其才。婦人之能力。雖有劣於男子之點。亦有優於男子之點。誠使能發揮而利用之。則其於人羣生計。增益實鉅。觀西國之學校教師。商店會計。用婦女者強半。可以知其故矣。大抵總一國婦女。其當從事於室內生利事業者十而六。育兒女治家計即室內生利事業也其當從事於室外生利事業者十而四。泰西成年婦女。其當從事於室外生利事業者十而六。育兒女治家計即室內生利事業也其當從事於室外生利事業者十而四。泰西成年從事於室外生利事業者也。而中國婦女。但有前者而無後者焉。是分利者已居其四矣。而所謂室內生利事業者。又復不能盡其用。不讀書。不識字。不知會計之方。不識教子之法。蓮步天嬌。不能操作。凡此皆其不適於生利之原因也。故通一國總率而計。則分利者十六七。而不分利者僅十三四也。

(十二)廢疾。廢疾者之爲分利。不辨而明。雖然。苟在文明國。有訓盲訓啞等學校。雖有廢疾。而往往使之操作。

工藝足以自養。故其分利不多。中國苟遇此等無告。則皆有分而無生者也。是非好自爲之。而天然之缺憾。及政府之失職。使之不得不然也。

(十二) 罪人。人至犯公罪而繫縲刑。必其對於一羣之利益有所侵害明矣。故罪人之本屬分利者。殆十而八

九也。但今日文明未至法律未完則犯罪者或未必眞罪未必皆害一羣公益也雖然及其既犯罪之後。以一羣治安所繫。不得不置諸囹圄以示懲。

既入囹圄。惟受凌虐。一無所事。是使之重分利也。監之十年。則其分利者十年。監者百人。則其分利者百人。日損

公家之母財以畜之。其蠹羣抑更甚矣。故各文明國之懲累囚也。不以虐刑而以苦役。古者輸司空輸城且輸鬼薪卽是此意誠得

其道也。中國則獄囚充塞。而此輩既自苦。復無以自給。而不得不仰食於縣官或所親。是亦分利之一大族也。

兒童不勞力也。何以不爲分利。曰。彼未及生利之年。宜儲備其力以爲他日生利之用也。兒童者實一國將來之

眞母財也。生計學家言以人身之德慧術智爲生產力之一種亦謂之無形之資本故凡兒童皆可謂爲一國之無形資本也老人不勞力也。何以不爲分利。曰。彼已過生

利之年。其前此所生之利。既有所儲備。而今之所享。非分之於他人者也。記曰。十六以下。上所長也。六十以上。上

所養也。誠以其在一羣之地位當如是也。若夫少年時代。荒嬉學業。不思預備將來。所以報效國民之道。致使長

成百無一能。若此者。則雖未成年。已不得不謂之分利。又如壯年時代。無業游手。曾未嘗致絲毫之力。有所貢獻

於其羣。及老而廢焉。徒待養於公產。若是者。則雖及耄期。仍不得不謂之分利。我中國之兒童老人。若此者。蓋十

而六七焉。故我國兒童老人之分利者。亦十而六七也。

地主往往不自勞力。而生計家不謂之分利。亦有謂爲分利者何也。彼其前此之所以得此土地者。未有不從勞力而來。

今之所享。卽其前此勞力之所儲備。而用之未盡者也。與老人不爲分利者同例若夫藉父兄之業。其所以得此土地。一所有

權」者。既非經本身之勞力而復一無所事。惟衣租食稅以自豪者。斯不得不謂之分利。故我中國之地主。其分利者亦十而六七也。萬國皆同然此等皆可謂之紈袴子弟。故不爲另立一門。

以上說「不勞力之分利者」竟

第二 勞力而仍分利者

(一) 奴婢。奴婢之勞力。有視尋常人加數倍者。雖然。其所勞之力。只以伺主人之顰笑。供主人之使令。其力用之而無所復。故謂之分利。此分利種族之最易見者。

(二) 優妓。優妓固有所甚勞甚苦者存。然其勞力皆無所復。且能牽動他人。而使之並爲分利者。故其分利之毒亦頗甚。

以上兩者。其分利未必爲本人之所欲。而有迫之使不得不然者。故分利之罪。不在本人。而在迫之之人。凡有迫而分利者。皆屬此類。衙署之皂隸與奴婢同類者。彼好自爲之。非有迫之者也。故彼輩不可不自負其分利之責任。故謂之不勞力而分利者。

(三) 讀書人。士農工商。號稱國之四民。而讀書人。褒然居首焉。據斯密之論。則雖泰西之讀書人。彼且以爲分利矣。願吾平心論之。則西國之讀書人。其分利者。雖或十之一二。其生利者。猶十之七八。何也。彼其學成之後。非醫生。則法官也。則律師也。否則傳教也。學校教師也。若其學工商業。直接以生利者。更無論矣。故斯密之說。施諸彼。吾不敢袒焉。若在我國。則至當無以易矣。吾國讀書界之現象。最奇者有二。一曰無所謂卒業不卒業也。二曰藉令卒業矣。而不知其所學作何用也。其潦倒者。則八股八韻。風簷矮屋。磨至頭童齒豁之年。其騰達者。則夸耀妻妾。武斷鄉曲。以爲維桑與梓之蠹。謂其導民以知識耶。吾見讀書人多。而國日愚也。謂其誨民以道德耶。吾見

讀書人多而俗日偷也。四體不勤，五穀不分，偷懦憚事，無廉恥而嗜飲食，讀書人實一種寄生蟲也。在民爲蠹，在國爲蝨也。皆考據家若詞章家及近今輕薄之時勢家皆分利之尤者也。彼等或以爲吾雖無益於羣，亦無害於羣。而不知其提倡此謬種以消耗後進之腦力，腐敗國民之道德，害已重矣。藉云無益亦無害而坐蝕一國之母財，寧得謂非害耶？若講明道學，匡翼民德，以培國家元氣者，不在此論。而惜乎我國讀書界能若此者，萬億人中不得一二也。

(四) 教師 讀書人中爲教師者，宜若非分利然。雖然，所教成者爲一羣之公益，則謂之生利。所教成者爲一羣之公蠹，則謂之分利。彼今日之讀書人，實前此之教師所產也。他日之讀書人，又今此之教師所產也。日產公蠹，謂之不分利得乎？

(五) 官吏之一小半 斯密亞丹以官吏爲分利。後人糾之詳矣。雖然，若中國之官吏，則無論爲勞力者不勞力者，而皆不得不謂之分利。官吏之勞力者，若京官之軍機大臣、軍機章京、各部署之掌印主稿司員、外官之督撫，乃至實缺之提鎮、司道府廳州縣各要局之委員，以及出使大臣、領事等，皆是矣。其數度不過官吏中十之一二。此輩固自謂盡瘁於王事，執掌於賢勞也。至問其勞力所用者在何處，在脚躡手版耳，簿書期會耳。問其於國民公益，有絲毫關係乎？無有也。英人邊沁嘗言：政府者有害之物也。然所以設之者，以小害物制大害物而已。日人西村茂樹申其義曰：政府害民之事少，而能制止他之大害者，謂之良政府。害民之事多，而不能制止他之大害者，謂之惡政府。若是乎官吏之分利賊民，固已鐵案如山，不容爲諱矣。特視其所賊之率多少，何如耳。然苟能奉其職以爲民捍禦他種大災害，則其間接所生之利，足以償其直接所分者而有餘。故文明國之官吏，不得謂之分利。夫國民之所謂大災害者，何也？則水旱癘疫之流行也，豪強之欺凌也，爭鬪之枉屈也，盜賊之橫恣也，其尤甚者，則外侮之攘奪，喪我主權，失我公產也。若此者，皆不能不仰匡救於政府。政府而能捍衛是者，則民雖獻其

血汗所得之權利之一二以贍養之。亦不過如營業者之有保險而非可吝非可避者也。若中國則何有焉。民有災而不能恤也。民有枉而不能伸也。餓殍徧道而不能救也。羣盜滿山而不能監也。浸假而弄兵召戎。一遇挫敗。則割胸脅剝脂膏以爲償也。浸假而畏敵如虎。承伺顰笑。則壓同胞媚仇讎以自固也。由前之說。則有官吏如無官吏。由後之說。則有官吏反不如其無官吏。夫官吏而不能捍民之患。則固已害矣。況以官吏之故而民患益深且劇焉。是他種之分利分其一。而此輩之分利分其二也。勞力而分利之官吏其罪倍於不勞力而分利者。故中國之官吏實分利之罪魁。而他種之分利者大率由彼輩而生者也。

(六)商業中之分利者。既執業斯不可謂之分利。雖然亦有辨焉。吾以爲今日中國人所執之商業。其不分利者不過十六七。而其分利者尙十二三。如彼投機射利。俗所稱買空賣空者。其操術類於賭博。其用心等於棍騙。斯爲分利無論矣。至如劇園酒樓之類。導人於分利之途者。雖主者極勤勞而不得不謂之分利。又如售賣分利之事物。如鴉片。淡巴菰。酒。及一切有害衛生之物。脂粉首飾及一切婦女冶容之物。香燭楮爆及一切神祇供享之物。古董書畫及一切名士玩耍之物。印刷八股小說考據詞章等無用書籍。乃至文人墨客一切特別精緻之物。吾八年前曾與一友行京師琉璃廠數其商店不屬於分利者十不得一。諸凡業此者。皆分利者也。雖然其罪不在執此業者。而在用此物者。何以故。苟無人焉從而流通之。則其業不禁自絕。故此等實分利之果。而非分利之因也。


(七)農工業之分利者。農工業亦有分利者乎。曰有。如農之種罌粟。種菸葉。工之製造各種無益有害之物者。皆分利也。然科其罪。則亦與前所論之商業同。不可謂直接之分利。如種罌粟之分利。人知之矣。然以塞入口之漏卮。則又反似生利而非分利。雖然種者愈多。吸者亦愈多。是此業又轉爲分利之因矣。又如分功不細。成物遲鈍。則工雖勞而亦分利。如業針者。以一人始終其事。竊日之力。不

針之事日成其一以十八人分任之則日可得八萬六千針是日無用故曰分利一器械不具趨事拙久則工雖勞而亦分利。若有鐵路三日可達之貨物不需人馬之力不數日而可以致千里苟無之而恃車輪焉以十車載之走半月馬力人皆委之無用斯分利矣。若並車輪而無焉以數十人負戴之而推之凡百工作莫不皆然。夫更多斯益分利矣。又如開礦無機器而百人乃任此役有機器則數百人任之而有餘推之。此等若充類至盡則雖以人只有此數也。人之力只有此數也。用之於此則不能同時復用之於彼。故曰分利。一日此等若充類至盡則雖以可成之物而今乃需百人百日則此九十九人九十九日皆委之無用也。故曰分利。此等若充類至盡則雖以今日極文明國之工藝庸詎知後人視之不有以為分利之尤者乎。故以分利之罪罪我工傭不可也。雖然以今日我國之工與歐美諸國之工比較固不可不謂之分利。若此者非民之罪有司之罪也。非一人之罪團體之罪也。

以上說『勞力而仍分利者』竟。

吾今日欲取中國國民數而約計之以觀其生利分利之比較。就鄙見臆度而已。然諒所舉者有少無多也。

分利人數



乞丐約三百萬	三百萬
奴婢娼優約五十萬	五十萬
罪囚約四十萬	四十萬
廢疾約二十萬	二十萬
農工商業之分利者約三百萬	三百萬
其餘不便歸類者約百萬	一百萬

其以鈍拙遲曠而分利者不計

大約四萬萬人中分利者二萬萬一千萬有奇。自餘則爲生利者。

又分中國人爲五大族。稽其民業之大略而比較之。

一漢族。約分利者十之五。有奇。生利者十之四。有奇。

二滿洲族。其在關外者。生利分利之率。約與漢人等。其在內地者。皆分利者。無一生利者。因本朝定例禁滿洲人不許從事工

商業故其在內地者非官則兵非讀書人則執務子否則緣附於官以爲食終無可以生利之道

三苗族。約分利者十之二。生利者十之八。

四回族。約分利者十之三。生利者十之七。

五蒙古族。約分利者十之四。生利者十之六。

大抵分利之人。多出於上等社會。中等社會。而下等社會之人。殆稀。蓋惟挾持強權者。乃得取他人所生之利。而坐分之也。以上所舉分利諸種族。除乞丐奴婢罪囚廢疾等數種外。其餘大率皆以一人而分數人之利者也。竊嘗計之。非以三四人之所贏。決不足以償一人之所耗。吾中國四萬萬人。分利者既二萬萬有奇矣。而此之二萬

萬。又非徒盡蝕彼之二萬萬而遂足以給之也。必二倍焉四倍焉。嗚呼。若之何。民不窮且匱也。亦幸而吾土地之饒。物彙之衍。小民生產力之大且厚。猶足勉強支持彌縫以迄今日也。不然者。吁。無孑遺久矣。然此顧可久恃乎。彼生利之二萬萬人者。自生之而自食之。裕如也。今乃每人加以三倍四倍之負擔。雖強有力。何以堪此。窮之蹙之。至無復之。則不得不轉而入於乞丐盜賊棍騙罪囚之數途。於是分利者益增。而生利者益減。分利者愈加多。則其餘生利者之負擔愈加重。愈不得不折而入於分利。如是遞相爲因。遞相爲果。極其弊。可以使一羣之人。分利者七八。而生利者不得一二。高麗是已。夫至以八九人分一二人所生之利。則分之者亦寧有幸焉。涸轍之魚。相煦以沫。其斃直須時耳。夫以吾中國之民。勤儉善儲。吾固信其無下儕於高麗之懼。雖然。吾中國所處之地位。亦與高麗異。以五洲第一天府之國。擇肉者耽耽於其旁。吾國之總母財。既日減消。而他國之母財。且日輸入。彼利用吾土地。利用吾勞力。以運其母而殖其子。子之所殖。則彼之物。而非我之物也。如是彼盈一度。則我胸一度。吾之總母財。有歲減而無歲增。其事至易明矣。至於母財無復可斥。而一國之人不聊生矣。印度是也。彼印度之士。豈小於我。其人豈遠尠於我。而今竟若此。吾念及此。而不禁汗流浹背。淚潄潄其承睫也。我國人之處堂而嬉游。釜而戲者。其亦一動心焉否也。

夫以今不及二萬萬之生利者。於自養之外。復養彼二萬萬有奇之三四倍分利者。而其力猶可以勉支。則我國民之生產力。可以四五倍於自養。昭昭然也。使無彼二萬萬之分利者。以蝕之。則彼二萬萬生利者之所殖。必四五倍。是全國之總歲殖。視今日增四五倍也。使彼二萬萬分利者。更轉而生利焉。則全國之總歲殖。視今日必增八倍乃至十倍。又昭昭然也。吾中國土地第一。勞力第一。生產之三要素。既優占其二。所缺者獨資本耳。使傳以

八倍十倍於今日之母財。則與萬國爭商戰於地球。誰能禦之。此猶就分功未精器械未備時言之耳。使精矣備矣。而復加以人無不盡之力。地無不盡之利。則其富率之驟漲。豈復巧曆所能算也。國富矣。而猶弱於人。吾未之聞也。若是乎。二十世紀生計競爭之世界。果讓我執牛耳而莫與京也。雖然。飢人說食。終不能飽。吾奈此蒼生何哉。吾奈此蒼生何哉。

他省吾不深知。吾請言粵事。吾粵自前督南皮張公改闡姓爲正餉。合肥李公改番攤雜賭爲正餉以來。生計界日益蹙。其鄉市子弟相與語曰。吾與其力穡於田而日得百錢。何如傭役於博而日得數百。或且喝雉成盧。一擲巨萬也。於是闔省人趨之者十而五六。至於田功手技小販輿夫負戴等種種雜工。日乏一日。小民何知。謂轉移執事以爲吾利也。殊不知一省之總勞力。日擲於虛牝。一省之總母財。日耗於尾閭。曾幾何時。今則一金僅易斗粟餘矣。此最疇昔以分利爲利者。而究何利也。粵中近日之窘狀。其根原雖非一端。然官吏之開賭以增分利之率。以消蝕此有限之勞力有限之母財。實其原因之最要者也。故粵中盜賊之多。亦甲於天下。雖由其俗之偷。抑豈不以生利者之不堪負擔。迫而爲此也。使循此不變。十年之後。吾粵民之生利者。將不及二三。而分利者必至七八矣。此吾所謂遞相爲因。遞相爲果之例也。今也粵人之在諸省中。以最富聞者也。而其敝既若此。嗚呼。諸省可以鑒矣。

讀者勿以吾爲家人筐篋之言也。今日生計競爭之世界。一國之榮瘁升沈。皆係於是。君不見聯軍入京以後。豈嘗索我一坏土。而惟汲汲然擴張其商務權力範圍之爲務。彼豈必瀦吾宮。屋吾社。繫累吾子弟。然後謂之亡。然後謂之滅。剝吾膚焉。鹽吾腦焉。吮吾血焉。馴使我萎黃蕉萃。乾枯瘦死。而其所欲固已給矣。然則吾應之之道。奈

何曰政府當道固與有責焉。雖然此必非恃政府當道一二人之力所能拯救也。其最要之着不可不求一國中
生利人多分利人少其轉移之次第先求我躬勿爲分利者復闡明學理廣勸一國人使皆恥爲分利者復講求
政策務安插前此之分利者使有自新之道以變爲生利者天下事無中立不進則退此兩者消長之率若克一
變則吾國其庶幾有瘳乎雖然改革之業相因者也將欲變甲必先變乙及其變乙又當變丙語及政策則誰與
思之誰與行之嗚呼予欲無言。

第十五節 論毅力

曾子曰：『士不可以不弘毅任重而道遠仁以爲己任不亦重乎死而後已不亦遠乎。』聖哉斯言。聖哉斯言。欲
學爲「人」者苟非於此義篤信死守身體而力行之雖有高志雖有奇氣雖有異才終無所成。

人治者常與天行相搏爲不斷之競爭者也。天行之爲物往往與人類所期望相背故其反抗力至大且劇而人
類向上進步之美性又必非可以現在之地位而自安也。於是乎人之一生如以數十年行舟於逆水中無一日
而可以息又不徒一人爲然也。大而至於一民族更大而至於全世界皆循茲軌道而日孜孜者也。其希望愈遠
其志事愈大者其所遭拂戾之境遇必愈衆。譬猶泛濶沚者與行江河者與航洋海者之比例其艱難之程度恆
與其所歷境界之廣狹相應。事理固然無足怪者。

天下古今成敗之林若是其莽然不一途也。要其何以成何以敗曰有毅力者成反是者敗。蓋人生歷程大抵逆
境居十六七順境亦居十三四而順逆兩境又常相間以迭乘。無論事之大小而必有數次乃至十數次之阻力。

其阻力雖或大或小。而要之必無可逃避者也。其在志力薄弱之士。始固曰吾欲云云。吾欲云云。其意以爲天下事固易易也。及驟嘗焉。而阻力猝來。頽然喪矣。其次弱者。乘一時之客氣。透過此第一關。遇再挫而退。稍强者。遇三四挫而退。更稍强者。遇五六挫而退。其事愈大者。其遇挫愈多。其不退也愈難。非至強之人。未有能善於其終者也。夫苟其挫而不退矣。則小逆之後。必有小順。大逆之後。必有大順。盤根錯節之既破。而遂有應刃而解之一日。旁觀者徒艷羨其功之成。以爲是殆幸運兒。而天有以寵彼也。又以爲我蹇於遭逢。故所就不彼若也。庸詎知所謂蹇焉幸焉者。彼皆與我之所同。而其能征服此蹇焉。利用此幸焉與否。卽彼成我敗所由判也。更譬諸操舟。如以兼旬之期。行千里之地者。其間風潮之或順或逆。常相參伍。彼以堅苦忍耐之力。冒其逆而突過之。而後得從容以容度其順。我則或一日而返焉。或二三日而返焉。或五六日而返焉。故彼岸終不可得達也。孔子曰。『譬如爲山。未成一簣。止吾止也。譬如平地。雖覆一簣。進吾往也。』孟子曰。『有爲者。譬若掘井。掘井九仞。而不及泉。猶爲棄井也。』成敗之數。視此而已。

人不可無希望。然希望常與失望相倚。至於失望。而心蓋死矣。養其希望。勿使失者。厥惟毅力。故志不足。恃氣不足。恃才不足。恃惟毅力者。足恃。昔摩西古代之第一偉人也。彼憫猶太人受軛於埃及也。是其志之過人也。然其搆之以出埃及也。始焉猶太人不欲。經十餘年。乃能動焉。既動矣。而埃及人尼之截之。經十餘戰。乃能出焉。既出矣。而所欲至之目的。不得達。徬徨沙漠中者。又四十年焉。使摩西毅力稍不足。或於其初也。見猶太人之頑錮難動。而灰其心焉。於其中也。見埃及人之強悍難敵。而灰其心焉。於其終也。見迦南樂土之艱險不易達。而灰其心焉。苟有一者。則摩西必爲失敗之人。無可疑也。昔哥倫布新世界之開闢者也。彼信海西之必有大陸。是其識之

過人也。然其蚤年喪其愛妻，喪其愛子，喪其資財，窮餓無聊，行乞於市。既而游說於豪貴，豪貴笑之，建白於葡萄牙政府，政府斥之。及其承西班牙王之命初航海也，舟西指六十餘日，不見寸土，同行之人失望思歸，從而尼之。撓之者不下十數次，乃至共謀殺其身，飲其血，使哥侖布毅力稍不足，則初焉以窮困而沮，繼焉以不遇知己而沮，繼焉以艱難而沮，終焉以險禍而沮。苟有一者，則哥侖布必爲失敗之人，無可疑也。昔巴律西，法蘭西著名之美術家也，嘗憫法國磁器之粗拙，欲改良之，築竈以試驗者數年，家資盡罄，再築竈而益以薪，又復失敗，已無復三度築竈之資，猶復集土器三百餘，附審以試驗之。歷一日夜不交睫，會無尺寸功。如是者殆十年，卒爲第四度最後之大試驗，乃作竈於家，磚石築造，皆躬自任。閱七八月，竈始成，乃搏土製器，塗藥入竈，火熱一晝夜間，坐其旁以待旦，其妻持朝食供之，終不忍離。至第二日，質終未融，日沈西，又不去，待之。於是蓬首垢面，憔悴無人形。如是者越三日、四日、五日、六日，相續至七日，未一假寐，而功遂不就。自茲以往，調新質而擣煉之，坐守十餘日，二十日以爲常。最後一度，質既備，火既焚，熱既熾，功將成矣，薪忽告竭，而火又不能滅也。巴律西爽然自失，傷其功之將墮，乃拔園籬之本以代之，猶不足，碎其桌及椅投諸火，猶不足，碎其榻，猶不足，碎其門，妻子以爲狂，號於室而奔告其鄰，未幾所燒之質遂融，色光澤，儼然良器矣。於是巴律西送其至困極苦之生涯於此器者，已十八年。使巴律西毅力稍不足者，則必爲失敗之人，無可疑也。昔維爾德創設海底電線之人也，彼其擁巨萬之貲，傾心以創此業，欲自美至英，超海以通電信，請助於英政府，幾經哀求，始見許。而美國議院爲激烈之反對，其贊助僅以一票之之多數得通過，亦既困難極矣。及其始敷設也，第一次至五百里而失敗，第二次至二百里，以電流不通而失敗，第三次將告成矣，而所乘之軍艦，又以傾射不能轉運，線亦中斷，第四次以兩軍艦一向

愛爾蘭。一向尼科德蘭。相距三里。線仍斷。第五次再試。則兩艦距離八十里。電流始通。又突失敗。監督諸員皆絕望。資本家亦有悔志。第六次至海上七百里。地名利鞠者。電信始通。謂已成矣。既而電流忽突然停止。又復失敗。第七次更別購良線。建設至距尼科蘭六百里處。將近結果。線又斷。此大業遂閱一年有奇。而維爾德之家資已耗盡矣。猶復嘵音瘖口。勞魂瘁形。游說英美之有力者。別設一新公司。而功乃始就。至今全地球食其利。使維爾德毅力稍不足者。則雖歷一次二次乃至三四五六七八次。其終爲失敗之人無可疑也。此其最著者也。乃若的士黎禮。四度爭議員選舉不第。而卒爲英名相。加里波的。五度起革命軍不成。而卒建新意大利。士提反孫之作行動機器也。十五年始成。瓦德之作蒸氣機器也。三十年始成。孟德斯鳩之萬法精理。二十五年始成。斯密亞丹之原富。十年始成。達爾文之種源論。十六年成。吉朋之羅馬衰亡史。二十年始成。倭斯達之大辭典。三十六年始成。馬達加斯加之傳教師。十年始得一信徒。吉德林之傳教於緬甸。拿利林之傳教於中國。一則五年。一則七年。乃得一信徒。由此觀之。世無論古今。業無論大小。其卓然能成就以顯於世而傳於後者。豈有一不自堅忍沈毅而來哉。又不徒西國爲然也。請徵諸我先民。句踐之在會稽也。田單之在即墨也。漢高之滎陽成臯也。皆其敗也。卽其所以成也。使三子者毅力稍不足。則爲失敗之人也。張騫之使西域也。瀕於死者屢。往往不食數日。乃至十數日。前後歷十三年。而卒宣漢威於域外。使騫毅力稍不足。則爲失敗之人也。劉備初用徐州而蹶。次用豫州而蹶。次用荊州而蹶。年將垂暮。始得益州以定大業。使備毅力稍不足。則爲失敗之人也。元奘以唐國師之尊。橫葱嶺。適印度。猛獸困之。瘴癘困之。饑渴困之。語言之不通困之。卒經十七年。盡學其正法外道。歸而弘布於祖國。使元奘毅力稍不足。則爲失敗之人也。且勿徵諸遠。卽最近數十年來。威德巍巍。照耀寰宇。若曾文正其人者。

其初起時之困心衡慮。寧復可思議。餉需則羅掘不足。與李小泉書云。僕在衡極力勸捐。總無起色。所入皆錢。尙如何欲放手一辦。輒復以此阻敗。只惱人耳。又復路中。不書云。捐輸一事。所託之友。所發之書。蓋已不少。據稱待至歲暮。某處一千某處五百。俱可按籍而索。事雖同乎水中。月猶冀得乎十分之五。一經搖動。則全局皆空。云云。蓋當時以鄉紳辦團。只兵勇則調和兩難。免其文集。中書札卷二。與王璞山書。上吳甌甫制軍書。各篇苦情。如持捐輸。不仰帑藏。故也。不錄。將裨則駕馭匪易。覆路中丞書云。王璞山不諒我心。頗生猜嫉。侍所與之札。飭言撤勇。事者概不回答。既無公牘。又無私書。曾未同涉風波之險。已有不見一斑矣。類此者猶夥。衡州水師經營積年。甫出即敗於靖港。憤欲自沈。覆思乃止。直至咸豐十年。任江督。駐祁門。而蘇常新陷。徽州繼之。圍左右八百里。皆賊地。或勸移營江西。以保餉源。或勸遷磨江干。以通糧路。文正乃曰。『吾去此寸步無死所。』及同治元年。合圍金陵之際。疾疫忽行。上自蕪湖。下迄上海。無營不病。楊岳斌。曾國荃。鮑超。諸統將。皆呻吟牀蓐。堞無守望之兵。廚無炊爨之卒。而苦守力戰。閱四十六日。乃得拔。事後自言。此數月中心胆俱碎。觀其與邵位西書云。『軍事非權不威。非勢不行。弟處無權無勢之位。常冒爭權爭勢之嫌。年年依人。頑鈍寡效。』與劉霞仙書云。『虹貫荊卿之心。而見者以爲淫氛。碧化萋宏之血。而覽者以爲頑石。古今同慨。我豈伊殊。屈纍所以一沈而萬世不復者。良有以也。』又復郭筠仙書云。『國藩昔在湖南江西。幾於通國不能相容。六七年間。浩然不欲復聞世事。然造端過大。以不顧生死自命。寧當更問毀譽。以拙進而以巧退。以忠義勸人。而以苟且自全。即魂魄猶有餘羞。』蓋當時所處之困難。如此其甚也。功成業定之後。論者以爲乘時際會。天獨厚之。而豈知其停辛竚苦。銖積寸累。百折不回。而始有今日也。使曾文正毅力稍不足者。則其爲失敗之人。無可疑也。嗚呼。綜觀此中西十數君子。則我輩所以求自立於天地間者。可以思矣。可以興矣。拿破侖曰。『兵家勝敗。在最後之十五分鐘而已。蓋我困之時。人亦困之時也。我疲之時。人

亦疲之時也。際人之困疲而我一鼓勇氣以繼之，則勝利固不得不在我。』此言乎成功之術之非難也。古語曰：『行百里者半九十。』此言乎成功之道之非易也。難耶易耶？惟志士自擇之。

抑成敗云者，又非可以庸耳俗目而論定者也。凡人所志所事愈大，則其結果愈大，而成就亦愈遲。如彼志救一國者，而一國之進步，往往數十百年乃始得達；志救天下者，而天下之進步，往往數百千年乃始得達；而此眇眇

七尺之軀殼，雖豪傑，雖聖賢，曾不能保留之，使踰數十寒暑以外，然則事事而欲親觀其成，寧復有大事之可任

耶？是故當知馬丁路得固成也，而拉的馬列多黎格蘭瑪三人皆爲宗教革命而死者格蘭瑪縛於柱而焚殺亦不可謂不成，哥命布固成

也，而伋頓曲伋頓曲在夏威夷爲土人所殺亦不可謂不成，狄渥固成也，而噶蘇士亦不可謂不成，加富爾固成也，而瑪志尼亦

不可謂不成，大久保木戶固成也，而吉田松陰藤田東湖亦不可謂不成，曾國藩固成也，而江忠源羅澤南李續

賓亦不可謂不成，成敗云者，惟其精神，不惟其形式也。不然，若孔子于七十二君無所用，伐檀削跡，老於道路，若

耶穌受磔十字架，其亦可謂之敗耶？其亦可謂之敗耶？故真有毅力者，惟懷久遠之希望，而不計目前之成敗，非

不求成，知其成非在旦夕，故不求也。成且不求，而寧復有可敗之道乎？淺見者流，觀其軀殼之或竄或錮，或殺而

妄擬議之曰：是實敗焉，而豈知天下事固往往敗於今而成於後，敗於我而成於人，有既造之因，必有終結之果。

天下惟不辦事者，立於全敗之地，而真辦事者，固必立於不敗之地也。故吾嘗謂毅力有二種：一曰兢惕於成敗，

而竭全力以赴之，鼓餘勇以繼之者，剛毅之謂也；二曰解脫於成敗，而盡天職以任之，獻生命以殉之者，沈毅之

謂也。

若是者，豈惟一私人爲然耳？卽一民族亦有然。偉大之民族，其舉動常有一遠大之目的，汲汲焉向之以進行，歷

數十年數百年如一日。不觀英國乎。自克林威爾以來。以通商殖民爲國是。爾後數百年不一退轉。馴至世界大
地圖中。五大洋深綠色裏。斑斑作硃點者。皆北端眇眇三島之附從奴僕也。十字角之旗。翩翩五大陸萬島嶼之
上。乃至不與日同出入。而至今猶歉然若不足。殖民大臣漫游全世界。汲汲更講漲進之法。不見俄國乎。自彼得
大帝以來。以東向侵略爲國是。爾後數百年不一退轉。其於近東也。歐亞諸國合力沮之。其於遠東也。乃至歐亞
美諸國全力沮之。而銳氣不稍挫。近日確然益樹實力於滿州。而達達尼爾事件。此最近之國際問題。俄國蔑視
達達尼爾海峽。以出黑海也。又見告矣。計全球數十國中。其有朝氣方鼎盛者。不過十數。揆厥所由。未有不自彼國民之有毅
力來者也。豈無一二仗客氣趁風潮。隨雄國以學邯鄲步者。然曇花一瞥。頽落依然。今南美洲諸國。是其前車也。
孟子曰。『禍福無不自己求之者。』天之降鑒下民。豈有所私耶。嗚呼。國民國民。可以鑑矣。

吾觀我祖國民性之缺點。不下十百。其最可痛者。則未有若無毅力焉者也。其老輩者。有權力者。衆目之曰守舊。
夫守舊則何害。英國保守黨之名譽歷史。豈不赫赫在人耳目耶。現內閣亦保守黨然守則守矣。既守之。則當以身殉之。

顧何以戊戌新政一頒。而舉國無守舊黨者。竟三閱月也。義和團之起也。吾黨雖憐其愚。而猶驚其勇。以爲排外
義憤。有足多焉。而何以數月之力。不能下一區區使館也。而何以聯軍一至。其在下者。惟有順民旗。不復有一義
和團。其在上者。惟有二毛子。不復有一義和團也。各省鬧教之案。固野蠻之行也。雖然。吾聞日本三十年前。固常
有民間暴動。濫戕外人之事。及交涉起。其首事者。則自戕於外國官吏之前。不以義憤貽君父憂。而吾國民之爲
此者。何以一呼而蜂蟻集。一闕而鳥獸散。不顧大局。而徒以累國家也。若夫所謂新進者。稍知外事者。翹然揭櫟
一維新之徽章於額角。夫維新則豈非善事。然既新矣。則亦當以身殉之。顧何以見聲色而新者去。其十之三四。

語金錢而新者去其十之五六，觀宦達而新者且去其十之八九也。或曰：此蓋其心術敗壞使然，彼其在初固未嘗確有見於舊之宜守，確有見於新之不可以已也。不過伺朝廷之眼波，以爲顯官計，博時髦之虛名，以爲噉飯地耳。吾謂此等人固自不少，而吾終不敢以此陰險黠詐之惡名，盡概天下士也。要之其志力薄弱，知及而仁不能守，有初而鮮克有終者，比比然爾。彼守舊者不足道矣。至如號稱維新者流，論者或謂但有此輩，亦慰情勝無。嗚呼！吾竊以爲誤矣。天下事不知焉者，尙有可望；知而不行者，則無可望；知而不行，尙有可望；行而不能，終者最無可望。故得聰明而軟弱者，億萬不如得樸誠而沈毅者一二。今天下志士亦紛紛矣，其大多數者，果屬於此，抑屬於彼？吾每一念及，不能不爲我國前途疑且懼也。嗟乎！一國中朝野上下，人人皆有假日媮樂之心，有遑恤我後之想，翩翩年少，弱不禁風，皤皤老成，尸居餘氣，無三年能持續之國的，無百人能固結之法團。嗚呼！有國如此，不亡何待哉？不亡何待哉？

守舊者吾無責焉，僞維新者吾無責焉。吾請正告吾黨之真有志於天下事者曰：公等勿恃客氣也，勿徒悚動於一時之高論，以爲吾知此，吾言此，而吾事畢也。西哲有恆言：『知責任者大丈夫之始，行責任者大丈夫之終。』吾儕不認此責任，則已耳。苟既認之，則當如婦人之於所天，終身不二，矢死靡他。吾儕初知責任之日，卽此身初嫁與國民之日也。自頂至踵，夫豈復我所得私於此，而欲不疊疊焉？夫亦安得避也？然天下事順逆之常，相倚也。又如彼，吾黨乎？吾黨乎？當知古今天下無有無阻力之事，苟其畏阻力也，則勿如勿辦，竟放棄其責任，以與齊民伍。而不然者，則種種煩惱，皆爲我練心之助；種種危險，皆爲我練胆之助；種種艱大，皆爲我練智練力之助。隨處皆我之學校也。我何畏焉？我何怨焉？我何餒焉？我願無盡，我學無盡，我知無盡，我行無盡。孔子曰：『望其墮，學如

也。臬如也。君子息焉。小人休焉。』毅之至也。聖之至也。

第十六節 論義務思想

義務與權利對待者也。人人生而有應得之權利。即人人生而有應盡之義務。二者其量適相均。其在野蠻之世。彼有權利無義務。有義務無權利之人。蓋有焉矣。然此其不正者也。不正者固不可以久。苟世界漸趨於文明。則斷無無權利之義務。亦斷無無義務之權利。惟無無權利之義務也。故盡瘁焉者不必有所懼。惟無無義務之權利也。故自逸焉者不必有所歆。

夫不正之權利義務。而不可以久者何也。物競天擇之公理。不許爾爾也。權利何自起。起於勝而被擇。勝何自起。起於競而獲優。優者何。亦其所盡義務之分量。有以軼於常人耳。難者曰。天演力之行。匪獨今也。彼前此所謂有權利無義務。有義務無權利者。亦不可謂非優劣之結果也。彼其未嘗爲人羣盡絲毫義務。而靦然擁其優勝之資格。以睥睨一切者。方充塞於歷史。而子乃以義務爲優勝之因。不亦迂乎。應之曰。不然。凡天下無論正不正之權利。當其初得之之始。必其曾盡特別之義務。而乃以相償者也。即如世襲之君權。至不正者也。然其始烏乎得之。民初爲羣。散漫柔弱。於是時也。有能富於膂力。爲衆人捍禽獸之患。挫外敵之暴者。乃從而君之。又或紀綱混亂。無所統一。於是時也。有能運其心思才力。爲衆人制法立度。調和其爭者。乃從而君之。又或前朝不綱。海宇鼎沸。於是時也。有能以隻手削平大難。使民安其業者。乃從而君之。若是夫彼所盡於一羣之義務。固有以異於常人。故推原其朔。不得謂之不正。不正者在後。此之襲而受之者云爾。

篡弒得國者雖易姓而其威權實憑藉於前代故可視之與世襲者同例至外族奪

國之事下。彼憑藉此既得之權利而濫用之。因以反抗天演大例。使競爭力不能遵常軌。然後一切權利義務。乃文論之。不相應。故專制政體之國。必束縛其民之心思才力於無可爭之地。若中國之以科舉取士。以資格任官。皆是也。非此則其不正之權利無由保也。雖然。天演固非可久抗者。譬諸水然。爲隄以障之。固未嘗不可使之改其常度。移時則或溢而出焉。或決而潰焉。而水之性終必復舊。故夫權利義務。兩端平等而相應者。其本性也。故近今歐美諸國所謂不正之權利義務。殆既絕跡。而此後之中國。亦豈能久抗焉。豈能久障焉。新民子曰。自今以往。苟盡義務者。其勿患無權利焉。爾。苟不盡義務者。其勿妄希冀權利焉。爾。

（附記）或難吾權利初起皆得自義務之說。謂卽以君權論。若彼外族之奪我國土。而久享此無義務之權利者。其謂之何。應之曰。此有兩說。（其一）仍由於承襲者。蓋承數千年不正之君權積威約之漸。苟篡得此位。卽承襲其餘蔭也。（其二）則國民義務思想太淺薄。故人得乘虛而入也。夫朝綱紊亂。從而正之者。國民之義務也。國中有亂。從而戡之者。國民之義務也。而皆不能焉。是舉國中皆放棄其義務矣。既放棄其義務。自不能復有其權利。正天演之公例也。而彼外族者。反入而代我。還定安集之。彼雖非爲我盡義務。然與我比較。其所盡抑猶優於我矣。彼外族入主中夏。而能卜世稍久者。皆此之由也。彼雖不正。然我祇當自怨。寧能怨人。恫哉。吾國民義務思想之薄弱也。吾昔著論權利思想之切要。吾知聞者必將喜焉。則囂囂然起曰。我其爭權利。我其爭權利。雖然。吾所謂權利思想者。蓋深恨吾國數千年來有人焉。長擁此無義務之權利。而謀所以抗之也。而誤聽吾言者。乃或欲自求彼無義務之權利。且率一國人而胥求無義務之權利。是何異磨甄以求鏡。炊沙以求飯也。吾請申言權利與義務相待之義。父母之於子也。蚤年有養子之義務。故晚年有受養於子之權利。夫之

於妻也。有保護之之義務。故有使妻從我之權利。傭之於主也。有盡瘁執事之義務。故有要求薪俸之權利。此其最淺者也。爲子者必能自盡其爲人之義務。而無藉父母之代勞。然後得要求父母許以自由之權利。亦其義也。然此不過就一私人與一私人之交涉言耳。若夫相聚而成一羣。所以樂有羣者。爲羣既立。而我可藉羣之力。以得種種之權利也。然羣非漫然而能立者也。必循生計學上分勞任功之大例。一羣之人。咸各盡其力。我既補之。羣之急難。我既赴之。則羣之安富尊榮。我固得自享之。是謂無無權利之義務。使羣中之人。有一焉游手而無業者。則其羣之實力少一分。使羣中之人。而皆爾焉。則是羣之自殺也。故羣中之有業者。雖取彼無業者飲食之權利而並奪之。亦不得謂之非理。何也。是債主對於負債者所得行之手段也。食羣之毛。踐羣之士。乃道羣負而不償。則羣中之權利。豈復彼所得過問也。是謂無無義務之權利。

吾言中國人無義務思想。吾請舉其例。政治學者言國民義務有兩要件。曰納租稅也。曰服兵役也。夫國也非能自有恆產也。民不納租稅。則政費何所出。劃而命之曰一國。是必有他國與之對待也。民不服兵役。則國防何由立。而吾國民最畏此二事。若以得免之爲大幸者。此最志行薄弱之徵也。昔之頌君德者。皆以免征減賦爲第一仁政。若宋之改徵兵爲傭兵。本朝康熙間。下永不加賦之諭。皆民間所最謳歌而最感戴者也。而豈知兵由於傭者。則愛國心必不可得發現。而永如加賦者。苟欲爲民事。新有所興作。費無所出。而善舉亦不得不廢也。泰西諸國。則異是。凡成年者皆須服二三年之兵役。而民莫或避。租稅名目如鯽。其歲納之額。四五倍於我國。而民莫或怨。彼寧不自寶其血肉。自惜其脂膏也。顧若此者。彼自認此義務。而知有與義務相對待之權利。以爲之償也。匈牙利之被壓制於奧政府也。卒以奧法交戰。奧人不得不藉匈兵力。而遂以恢復自治憲法。千八百六西人有一

恆言曰：『不出代議士，不納租稅。』英之「大憲章」權利法典，皆挾租稅以爲要求者也。法之大革命，亦以反此公例而釀成者也。故歐西人民對國家之義務，不辭其重，而必要索相當之權利以爲之償。中國人民對國家之權利不患其輕，而惟欲逃應盡之義務以求自逸，是何異頑劣之童，不服庭訓，乃曰：吾不求父母之養我，而但求父母之勿勞我也。夫無父母之養，則不能自存，而既養則不能勿勞，此不可避之數也。惟養且勞，然後吾與父母之關係日益切密，而相愛之心乃起。故權利義務兩思想，實愛國心所由生也。人雖至愚，未有不願受父母之養者。頑童之所以寧棄此權利者，不過其畏勞之一念使然耳。今之論者，每以中國人無權利思想爲病，顧吾以爲無權利思想者，乃其惡果，而無義務思想者，實其惡因也。我國民與國家之關係日淺薄，馴至國之興廢存亡，若與己漠不相屬者，皆此之由。

今吾不急養義務思想，則雖日言權利思想，亦爲不完全之權利思想而已。是猶頑童欲勿勞而又貪父母之養也。是猶惰傭不力作而欲受給於主人也。吾見今之言權利者，頗有類於是焉矣。日歌羨他人之自由民權，而不考其所以得此之由，他人求之而獲之，而我則望其自來，他人以血以淚購之，而我欲以口以舌爲易，他人一國中無大無小無貴無賤無富無貧而皆各自認其相當之義務，返之吾國，若者爲官吏之義務，若者爲士君子之義務，若者爲農工商之義務，若者爲軍人之義務，若者爲保守黨之義務，若者爲維新黨之義務，若者爲溫和派之義務，若者爲急激派之義務，若者爲青年之義務，若者爲少年之義務，若者爲婦女之義務，問有一人焉，審諸自己之地位，按諸自己之才力，而敢自信爲已盡之而無所欠缺者乎？無有也。雖有七子之母，而無一人顧其養焉。雖謂之無子焉可也。雖有四萬萬人，而無一人以國家之義務爲義務，雖謂之無民焉可也。無民之國，何

以能國。

抑吾中國先哲之教，西人所指爲義務教育者也。孝也，弟也，忠也，節也，豈有一焉非以義務相責備者。然則以比較的言之，中國人義務思想之發達，宜若視權利思想爲遠優焉。雖然，此又不完全之義務思想也。無權利之義務，猶無報償之勞作也。其不完全一也。有私人對私人之義務，無個人對團體之義務，其不完全二也。吾今將論公義務。

第十七節 論尙武

世人之恆言曰：野蠻人尙力，文明人尙智。嗚呼！此知二五而不知一十之言，迂偏而不切於事勢者也。羅馬文化，燦燦大地，車轍馬跡，蹂躪全歐，乃一遇日耳曼森林中之蠻族，遂踣蹶而不能自立，而帝國於以解網。夫當日羅馬之智識程度，豈不高出於蠻族萬萬哉！然柔弱之文明，卒不能抵野蠻之武力。然則尙武者，國民之元氣，國家所恃以成立，而文明所賴以維持者也。卑斯麥之言曰：天下所可恃者，非公法，黑鐵而已；赤血而已。寧獨公法之無足恃，立國者苟無尙武之國民，鐵血之主義，則雖有文明，雖有智識，雖有衆民，雖有廣土，必無以自立於競爭劇烈之舞臺。

而獨不見斯巴達乎？斯巴達之教育，一干涉嚴酷之軍人教育也。嬰兒之生，必由官驗其體格，不及格者，撲滅之。生及七歲，即使入幼年軍隊，教以體育，跣足裸體，惡衣菲食，以養成其任受勞苦，凌犯寒暑，忍耐飢渴之習慣。飲食教誨，皆國家專司其事。成年結婚而後，亦不許私處家中。日則會食於公堂，夜則共寢於營幕。乃至婦人女子，

亦與男子同受嚴峻之訓練。雖老婦少女，亦皆有剽悍勇俠之風。其母之送子從軍也，命之曰：『祝汝負楯而歸。』否則以楯負汝而歸。』舉國之男女老少，莫不輕死好勝，習以成性。故其從征赴敵，如習體操，如赴宴會，冒死喋血，曾不知有畏怯退縮之一事。彼斯巴達一彈丸之國耳，舉國民族寥寥不及萬人，顧乃能內制數十萬之異族，外挫十餘萬之波軍，雄霸希臘，與雅典狎主齊盟也。曰：惟尙武故，而獨不見德意志乎？十九世紀之中葉，日耳曼民族分國散立，萎靡不振，受拿破侖之蹂躪，既不勝其屈辱，乃改革兵制，首創舉國皆兵之法。國民歲及二十，悉隸兵籍，是以舉國之人，無不受軍人之教育，具軍人之資格。卑斯麥復以鐵血之政略，達民族之主義，日討國人而訓之，剗滌其渙漫爾靡之舊習，養成其英銳不屈之精神。今皇續起，以雄武之英姿，力擴其民族帝國之主義。其視學之敕語曰：務當訓練一國之少年，使其資格可以輔朕雄飛於世界。故其國民勇健奮發，而德意志遂爲世界唯一之武國。彼德新造之邦，至今乃僅三十年，顧乃能摧奧仆法，偉然雄視於歐洲也。曰：惟尙武故，而獨不見俄羅斯乎？俄國國於絕北苦寒之地，擁曠漠礪确之平原，以農爲國，習於勞苦，故其民獷悍堅毅，富於野蠻之力，觸冒風暑，忍耐艱苦，堅樸雄鷲，習爲風氣，而又全體一致服從命令，其性質最宜於軍隊。且其先皇彼得遺訓，以侵略爲宗旨，其主義深入於國民心腦，人人皆有蹴踏全球蹂躪歐亞之雄心，彼其頑獷之蠻力，鷲忍之天性，雖有萬衆當前，必不足遏其鋒而懾其氣。夫俄羅斯半開之國耳，文化程度不及歐美之半，顧乃西馳東突，能寒歐人之膽，論者且謂斯拉夫民族勢力日盛，將奪條頓人之統緒，代爲世界之主人翁。若是者何也？曰：惟尙武故，且非獨歐洲諸國爲然也。我東隣之日本，其人數僅當我十分之一耳，然其人剽疾輕死，日取其所謂武士道大和魂者，發揮而光大之，故當其徵兵之始，尙有哭泣逃亡，曲求避免者，今則入隊之旗，祈其戰死，從軍之什，祝勿

生還。好武雄風。舉國一致。且庚子之役。其軍隊之勇銳。戰鬪之強力。且冠絕聯軍。使白人頹首。傾倒。近日汲汲於體育之事。務使國民皆具軍人之本領。皆蓄軍人之精神。彼日本區區三島。興立僅三十年耳。顧乃能一戰勝我。取威定霸。屹然雄立於東洋之上也。曰惟尙武故。乃至脫蘭士哇爾。獨立不成。而可謂失敗者矣。然方其隱謀獨立之初。已陰厚蓄其武力。兒童就學。授以獵鎗。使弋途過森林之飛鳥。至學則殿最其多少。以爲賞罰。預養挽強命中之才。使皆可以執干戈而衛社稷。是以戰事一起。精銳莫當。乃至少女婦人。亦且改易裝服。荷戟從戎。彼脫蘭士哇爾。彈丸黑子。不能當英之一縣。勝兵者數萬人耳。顧乃能抗天下莫強之英。英人糜此百萬之巨費。調三十萬之精兵。血戰數年。僅乃克服。若是者何也。亦曰惟尙武故。此數國者。其文化之淺深不一。轍其民族之多寡不一。途其國土之廣狹不一致。要其能馳騁中原。屹立地球者。無不恃此尙武之精神。搏搏大地。莽莽萬國。盛衰之數。胥視此矣。

恫夫中國民族之不武也。神明華胄。開化最先。然二千年來。出而與他族相遇。無不挫折敗北。受其窘屈。此實中國歷史之一大污點。而我國民百世彌天之大辱也。自周以來。卽被戎禍。一見迫於獫狁。再見辱於犬戎。秦漢而還。匈奴凶悍。以始皇之雄鷲。僅乃拒之於長城之外。以漢高之豪武。卒至圍窘於白登之間。漢武雄才大略。大張兵力於國外。衛霍之倫。絡繹出塞。然收定南粵。威震西域。卒不能犁庭掃穴。組繫單于。匈奴之患。遂與漢代相終始。降及魏晉。五胡煽亂。犬羊奔突於上國。豕蛇橫噬於中原。江山無界。宇宙腥膻。匈奴鮮卑。羌氏胡羯。迭興遞盛。縱橫於黃河以北者。二百五十有餘年。李唐定亂。兵氣方新。李靖敗突厥於陰山。遂俘頡利。此實爲漢族破敗外族之創舉。然屢征高麗。師卒無功。且突厥契丹。吐蕃回紇。迭爲西北之邊患。以終唐世。五季之間。石晉割燕雲十

六州以賂契丹。衣冠之淪於異類者數十年。且至稱臣稱男。稱姪稱孫。漢族之死命。遂爲異族所軛制。宋之興也。始受遼患。徽欽之世。女真跳梁。當是時也。謀臣如雲。猛將如雨。然極韓岳張吳諸武臣之力。卒不能制。么麼小醜。兀尢之橫行。金勢既衰。蒙古繼起。遂屋宋社而墟之。泱泱之神州。穰穰之貴種。頽首受軛於游牧異族威權之下。垂及百年。明興而後。勢更弱矣。一遇也。先而帝見虜。再遇滿洲而國遂亡。嗚呼。由秦迄今。二千餘歲耳。然黃帝之子孫。屈伏於他族者三百餘年。北方之同胞。屈伏於他族者且七百餘年。至於邊塞之患。烽燧之警。乃更無一寧歲。而卒不能赫怒震擊。以摧其凶燄。發憤撻伐。以戢其淫威。嗚呼。我神明之華胄。聰秀之人種。開明之文化。何一爲蠻族所敢望。顧乃踐蹴於鐵騎之下。不能一抑首伸眉。以與之抗者。豈不以武力脆弱。民氣懦怯。一動而輒爲力屈也。藐茲小醜。且不能抗。況今日迫我之白人。挾文明之利器。受完備之訓練。以帝國之主義。爲民族之運動。其雄武堅勁。絕非匈奴突厥女真蒙古之比。曷怪其一敗再敗。而卒無以自立也。中國以文弱聞於天下。柔懦之病。深入膏肓。乃至强悍性成。馳突無前之蠻族。及其同化於我。亦且傳染此病。筋弛力脆。盡失其强悍之本性。嗚呼。强者非一日而強也。弱者非一日而弱也。履霜堅冰。由來漸矣。吾嘗察其受病之源。約有四事。

一由於國勢之一統。人者多欲而好勝之動物也。衣服飲食貨物土地。皆生人所藉以自養。而爲人人所欲望之事。人人同此欲望。卽人人皆思多取。故人與人相處。必求伸張其權利。侵他人之界而無所鑿。國與國角立。亦必求伸張其權利。侵他人之界而無所鑿。然彼之欲望權利之心。固無以異於此也。則必竭力抗爭。奮腕力以自衛。稍一恇怯。稍一退讓。卽失敗而無以自存。是故列國並立。首重國防。人驚於勇力。士競於武功。苟求保此權利。雖流漂杵之血。枯萬人之骨。而不之悔。而其時人士。亦復習於武風。皆睚眦失歡。挺身而鬪。杯酒失意。白刃相仇。借軀

報讎恬不爲怪。尙氣任俠。靡國不然。遠觀之歐洲。往事亦可觀矣。若夫一統之世。則養欲給求而無所與競。閉關高枕而無所與爭。向者之勇力武功。無所復用。其心漸弛。其氣漸柔。其骨漸脆。其力漸弱。戰國尊武。一統右文。固事勢所必至。有不自知其然者矣。我中國自秦以來。久大一統。雖間有南北分割。不過二百年。則旋歸於統合。土地遼廣。物產豐饒。雖有異種他族環於其外。然謂得其地不足。郡縣得其人不足。臣民遂鄙爲蠻夷而不屑與爭。但使其羈縻勿絕。拒杜勿來而已。必不肯萃全力而與之競勝。太平歌舞。四海晏然。則習爲禮樂揖讓。而相尙以文雅。好爲文詞詩賦。訓詁考據。以奇耗其材力。卽有材武桀勇者。亦閒置而無所用武。且以麤魯莽悍。見屏於上流社會之外。重文輕武之習。旣成。於是武事廢墮。民氣柔靡。二千年之腐氣敗習。深入於國民之腦。遂使羣國之人。奄奄如病夫。冉冉如弱女。溫溫如菩薩。戢戢如馴羊。烏乎。人孰不惡爭亂而樂和平。而烏知和平之弱我。毒我。乃如是之酷也。

二由於儒教之流失。宗教家之言論。類皆偏於世界主義者也。彼本至仁之熱心。發高尚之哲理。故所持論。皆謀人類全體之幸福。故西方之教。曰太平天國。曰視敵如己。天竺之教。曰冤親平等。曰一切衆生。無不破蠻觸之爭。戰以黃金世界。爲歸墟。儒教者固切近於人事者也。然孔子之作春秋。則務使諸夏夷狄。遠近若一。以文致太平。禮運之述聖言。則力言不獨親親。不獨子子。以漸至大同。亦莫不破除國界。以至仁博愛爲宗旨。斯固皆懸至善以爲的。可爲理論而未能見之實行者也。然奉耶教之民。皆有堅悍好戰之風。奉佛教之民。亦有輕視生死之性。獨儒教之國。奄然怯弱者何也。中庸之言曰。寬柔以教。不報無道。孝經之言曰。身體髮膚。不敢毀傷。故儒教當戰國之時。已有儒儒緩之誚。然孔子固非專以儒緩爲教者也。見義不爲。謂之無勇。戰陣無勇。斥爲非孝。曷嘗不

以剛強剽勁聳發民氣哉。後世賤儒，便於藏身，撫拾其悲憫塗炭矯枉過正之言，以爲口實。不法其剛而法其柔，不法其陽而法其陰，陰取老氏雌柔無動之旨，奪孔學之正統而篡之，以莠亂苗，習非成是，以強勇爲喜事，以冒險爲輕躁，以任俠爲大戒，以柔弱爲善人，惟以『忍』爲無上法門。雖他人之凌逼欺脅，異族之蹴踐斬刈，攫其權利，侮其國家，乃至掠其財產，辱其妻女，亦能俯首順受，忍奴隸所不能忍之恥辱，忍牛馬所不能忍之痛苦，曾不敢怒目攘臂而一與之爭。嗚呼！犯而不校，誠昔賢盛德之事，然以此道處生存競爭弱肉強食之世，以此道對鷙悍剽疾虎視鷹擊之人，是猶強盜入室，加刃其頸，而猶與之高談道德，豈惟不適於生存，不亦更增其恥辱邪？法昔賢盛德之事，乃養成此柔脆無骨頹憊無氣，刀刺不傷，火熱不痛之民族，是豈昔賢所及料也。

三由霸者之摧盪，霸者之有天下也，定鼎之初，卽莫不以偃武修文爲第一要義。夫振興文學，寧非有國之急務，乃必先取其所謂武者而偃之，彼豈果謂馬上得之者，必不能馬上治之哉？又豈必欲銷兵甲，興禮樂，文致太平，以爲美觀也哉？霸者之取天下，類皆崛起草澤，間關汗馬，奮強悍之腕力，屈服羣雄而攫奪之，彼知天下之可以力征經營，我可以武力奪之他人者，他人亦將可以武力奪之我也。則日講滕緘局鑄之策，務使有力者不能負之而趨，故輦轂之下，有驍雄之士，強武有力之人，以睥睨其臥榻之側，則霸者有所不利。草澤之下，有游俠任氣之風，萃材桀不馴之徒，相與上指天下，畫地囂然以材武相競，則霸者尤有不利。既所不利，則不能不去之，以自安。去之之術有二，其先曰『鋤』。一人剛而萬夫皆柔，一人強而天下皆弱，此霸有天下者之恆情也。其敢不柔弱者殺無赦，雖昔日所視爲功狗，倚爲長城者，不惜翦薙芟蕘，以絕子孫之患。其敢有暗鳴叱咤慷慨悲歌於田間隴畔者，則尤觸犯忌諱，必當嚴刑重誅，無俾易種。秦皇之銷鑄鋒鏃，漢景之獮艾游俠，漢高明太之薶醢功臣，

殆皆用鋤之一術矣。然前者僵仆，後者憤踊，鋤之力亦將有所窮也。乃變計而用『柔』之一術。柔之以律令制策，柔之以詩賦詞章，柔之以帖括楷法，柔之以簿書期會，柔其材力，柔其筋骨，柔其言論，乃至柔其思想，柔其精神，盡天下之人士，雖間有桀、鰲、梟雄者，皆使之敝精疲神，纏綿歌泣於諷誦揣摩，患得患失之中，無復精神材力，以相競于材武，不必僂以斧鉞，威以刀鋸，而天下英雄盡入彀中，無復向者暗鳴叱咤，慷慨悲歌之豪氣。一霸者起，用此術以摧盪之，他霸者起，亦用此術以摧盪之。經二十四朝之摧陷廓清，士氣索矣，人心死矣，霸者之術售矣。嗚呼！又豈料承吾敝者，別有此獍猛梟鷲之異族也。

四由習俗之濡染。天下移人之力，未有大於習慣者也。西秦首功，而女子亦知敵愾，斯巴達重武，而婦人亦能輕死。夫秦與斯巴達之人，豈必生而人人有此美性哉？風氣之所薰，見聞之所染，日積月累，久之遂形爲第二之天性。我中國輕武之習，自古然矣。鄙諺有之曰：『好鐵不打釘，好人不當兵。』故其所謂軍人者，直不啻惡少無賴之代名詞。其號稱武士者，直視爲不足齒之僮父。夫東西諸國之待軍人也，尊之重之，敬之禮之，馨香尸祝之，一入軍籍，則父母以爲榮，鄰里以爲幸，宗族交遊以爲光寵，皆視此爲人生第一名譽之事。唯東西人之重視之也如此，故舉國人之精神，莫不萃於此點。一切文學、詩歌、劇戲、小說、音樂，無不激揚蹈厲，務激發國民之勇氣，以養爲國魂。惟我中國之輕視之也如彼，故舉國皆不屑措意。學人之議論，詞客所謳吟，且皆以好武喜功爲諷刺，拓邊開釁爲大戒。其所謂名篇佳什，類皆描荷戟從軍之苦況，詠戰爭流血之慘態，讀之令人垂首喪志，氣奪神沮。至其小說戲劇，則惟描寫才子佳人，旖旎冶獠之柔情，其管絃音樂，則惟譜演柔蕩靡曼亡國哀思之鄭聲。一羣之中，凡所接觸於耳目者，無一不頹損人之雄心，銷磨人之豪氣，惡風潮之所漂盪，無人不中此惡毒。如疫症之

傳染如肺病之遺種。雖有雄姿英發之青年。日摩而月刈之。不數年間。遂頹然如老翁。靡然如弱女。嗚呼。羣俗者。治鑄國民之爐火。安見頹廢腐敗之羣俗。而能鑄成雄鷲沈毅之國民也。

凡此數者之惡因。皆種之千年以前。至今日結此一大惡果者也。且夫人之所以爲生。國之所以能立。莫不視其自主之權。然其自主權之所以保全。則莫不恃自衛權爲之後盾。人以惡聲加我。我能以惡聲返之。人以強力凌我。我能以強力抗之。此所以能排禦外侮。屹然自立於羣虎眈眈萬鬼睽睽之場也。然返人惡聲。抗人強力。必非援據公法樽俎折衝之所能爲功。必內有堅強之武力。然後能行用自衛之實權。我以病夫聞於世界。手足癱瘓。已盡失防護之機能。東西諸國。莫不磨刀霍霍。內向而魚肉我矣。我不速拔文弱之惡根。一雪不武之積恥。二十世紀競爭之場。寧復有支那人種立足之地哉。然吾聞吾國之講求武事。數十年矣。購艦練兵。置廠製械。整軍經武。至勤且久。然卒一燬而盡者何也。曰。彼所謂武。形式也。吾所謂武。精神也。無精神而徒有形式。是蒙羊質以虎皮。驅而與猛獸相搏擊。適足供其攫啖而已。誠欲養尙武之精神。則不可不備具三力。

一曰心力。西儒有言曰。『女子弱也。而爲母則強。』夫弱女何以忽爲強母。蓋其精神愛戀。咸萃於子之一身子。而有急。則挺身赴之。雖極人生艱險畏怖之境。壯夫健男之所卻顧者。彼獨揮手直前。盡變其嬌怯孌弱不勝衣之故態。彼其目中心中。止見有子而已。不見有身。更安見所謂艱險。更安見所謂畏怖。蓋心力散渙。勇者亦怯。心力專凝。弱者亦強。是故報大仇。雪大恥。革大難。定大計。任大事。智士所不能謀。鬼神所不能通者。莫不成於至人之心力。張子房以文弱書生而椎秦。申包胥以漂泊逋臣而存楚。心力之驅迫而成之也。越之沼吳。楚之亡秦。希臘破波斯王之大軍。荷蘭卻西班牙之艦隊。亦莫非心力之驅迫而成之也。嗚呼。境不迫者心不奮。情不急者。

力不摯。曾文正之論兵也。曰：『官軍擊賊，條條皆是生路，惟向前一條是死路；賊禦官軍，條條皆是死路，惟向前一條是生路。官軍之不能敵賊者，以此。』今外人逼我，其圈日狹，其勢日促，直不啻以百萬鐵騎，蹙我孤軍於重圍之中矣。舍突圍向前之一策，更無所謂生路。虎逐於後，則懦夫可募絕澗，火發於室，則弱女可越重簷。吾望我同胞，激其熱誠，鼓其勇氣，無奄奄斂手以待斃也。

一曰膽力。天下無往非難境，惟有膽力者無難境。天下無往非畏途，惟有膽力者無畏途。天豈必除此難境畏途，以獨私之哉？人間世一切之境界，無非人心所自造。我自以為難以為畏，則其心先餒，其氣先懾。斯外境得乘其虛怯而窘之，若悍然不顧，其氣足以相勝，則置之死地而能生，置之亡地而能存。項羽沈舟破釜以擊秦，韓侯背水結陣以敗楚，彼其衆寡懸殊，豈無兵力不敵之危境哉？然奮其膽力，卒以成功。訥爾遜曰：『吾不識畏爲何物。』彼其平生閱歷，豈無危疑震撼之險象哉？然奮其膽力，卒以成功。自古英雄豪傑，立不世之奇功，成建國之偉業，何一非冒大險，夷大難，由此膽力而來者哉？然膽力者，由自信力而發生者也。孟子曰：『自反而不縮，雖褐寬博，吾不慄焉。自反而縮，雖千萬人，吾往矣。』國之興亡亦然。不信之人，而信之己，國民自信其興，則國興；國民自信其亡，則國亡。昔英將威士勒之言曰：『中國人有可以蹂躪全球之資格。』我負此資格而不能自信，不能奮其勇力，完此資格，以與列強相見於競爭之戰場，惟是日懼外人之分割，日畏外人之干涉，不思自奮，徒爲恇怯。彼獍猛梟鷲之異族，寧以我之恇怯而輟其分割干涉邪？嗚呼！怯者召侮之媒，畏戰者必受戰禍，懼死者卒蹈死機。恇怯豈有幸也？孟子曰：未聞以千里畏人，吾望我同胞奮其雄心，鼓其勇氣，無畏首畏尾以自餒也。

一曰體力。體魄者，與精神有切密之關係者也。有健康強固之體魄，然後有堅忍不屈之精神。是以古之偉人，其

能負荷艱鉅。開拓世界者。類皆負絕人之異質。耐非常之艱苦。陶侃之習勞。運甓不間朝夕。史可法之督師。七日不交睫。拿破侖之治軍。日睡僅四小時。格蘭斯頓之垂老。步行能逾百里。俾斯麥之體格。重至二百八十餘磅。其筋骸堅固。故能凌風雨。冒寒暑。撻患難。勞苦而貫澈。初終。彼韃靼之種人。斯拉夫之民族。亦皆恃此野蠻體力。而遂能鉗制他族者也。德皇威廉第二之視學於柏林小學校。其勅訓曰。『凡我德國臣民。皆當留意體育。苟體育不講。則男子不能負兵役。女子不能孕產魁梧雄偉之嬰兒。人種不強。國將何賴。』故歐洲諸國。靡不汲汲從事於體育。體操而外。凡擊劍。馳馬。蹴角。舐習。射擊。鎗游。泳。競。渡。諸戲。無不加以獎勵。務使舉國之人。皆具軍國民之資格。昔僅一斯巴達者。今且舉歐洲而為斯巴達矣。中人不講衛生。婚期太早。以是傳種種已孱弱。及其就傅之後。終日伏案。閉置一室。絕無運動。耗目力而昏眊。未黃耆而駘背。且復習為嬌惰。絕無自營自活之風。衣食舉動。一切需人。以文弱為美稱。以羸怯為嬌貴。翩翩年少。弱不禁風。名曰丈夫。弱於少女。弱冠而後。則又纏綿牀第。以耗其精力。吸食鴉片。以戕其身體。鬼躁鬼幽。蹠步欹跌。血不華色。面有死容。病體奄奄。氣息才屬。合四萬萬人。而不能得一完備之體格。嗚呼。其人皆為病夫。其國安得不為病國也。以此而出與獍猛梟鷲之異族遇。是猶驅侏儒以鬪巨無霸。彼雖不持一械。一揮手而我已傾跌矣。嗚呼。生存競爭。優勝劣敗。吾望我同胞。練其筋骨。習於勇力。無奄然頹憊。以坐廢也。

嗚呼。今日之世界。固所謂『武裝和平』之世界也。列強會議。日言弭兵。然左訂媾和修好之條約。右修擴張軍備之議案。蓋強權之世。惟能戰者乃能和。故美國獨立他洲。素不與聞外事者也。然近年以來。日增軍備。且盡易其門羅主義。一變而為帝國主義。蓋歐洲霸氣橫決四溢。苟渡大西洋而西注。則美國難保其和平。故不能不先

事預防。厚內力以禦之境外。夫歐洲諸國。勢均力敵。歐洲以內。既無用武之地矣。然內力膨脹。鬱勃磅礴。而必求一洩。挾其民族帝國主義。日求灌而洩之他洲。我以膏腴沃壤。適當其衝。於是萬馬齊足。萬流匯力。一洩其尾閭。於亞東大陸。今日羣盜入室。白刃環門。我不一易其文弱之舊習。奮其勇力。以固其國防。則立羸羊於羣虎之間。更何術以免其吞噬也。嗚呼。甲午以來。一敗再敗。形見勢絀。外人咸以無戰鬪力輕我矣。然語不云乎。一人救死。萬夫莫當。彼十九世紀之初期。法蘭西何嘗不以一國而受全歐之敵。然拿破侖率其剽悍之國民。東征西擊。卒能取威定霸。奮揚國威。彼四十餘萬之法人。乃能蹴踏全歐。我以十倍法人之民族。顧不能攘外而立國。何衰憊若斯之甚也。詩曰。天之方蹶。無爲夸毗。柔脆無骨之人。豈能一日立於天演之界。我國民縱闕於文明之智識。奈何并野蠻之武力而亦同此消乏也。嗚呼。噫嘻。

第十八節 論私德

吾自去年著新民說。其胸中所懷抱欲發表者。條目不下數十。而以公德篇託始焉。論德而別舉其公焉者。非謂私德之可以已。謂夫私德者。當久已爲盡人所能解悟能踐履。抑且先聖昔賢言之既已圓滿纖悉。而無待末學小子之嘵嘵詞費也。乃近年以來。舉國囂囂靡靡。所謂利國進羣之事業。一二未睹。而末流所趨。反貽頑鈍者以口實。而曰新理想之賊人子而毒天下。噫。余又可以無言乎。作論私德。

一 私德與公德之關係

私德與公德。非對待之名詞。而相屬之名詞也。斯賓塞之言曰。凡羣者皆一之積也。所以爲羣之德。自其一之德。

而已定。羣者謂之拓都。一者謂之么匿。拓都之性情形制，么匿爲之。么匿之所本無者，不能從拓都而成。有么匿之所同具者，不能以拓都而忽亡。按以上見侯官嚴氏所譯羣學肆言其云拓都者東譯所稱團體也云么匿者東譯所稱個人也諒哉言乎。夫所謂公德云者，

就其本體言之，謂一團體中人公共之德性也。就其構成此本體之作用言之，謂個人對於本團體公共觀念所發之德性也。夫聚羣不能成一離婁，羣聚不能成一師曠，聚羣不能成一烏獲，故一私人而無所私有之德性，則羣此百千萬億之私人，而必不能成公有之德性。其理至易明也。盲者不能以視於衆而忽明，聾者不能以聽於衆而忽聰，怯者不能以戰於衆而忽勇，故我對於我而不信，而欲其信於待人，一私人對於一私人之交涉而不忠，而欲其忠於團體，無有是處。此其理又至易明也。若是乎今之學者，日言公德，而公德之效弗覩者，亦曰國民之私德，有大缺點云爾。是故欲鑄國民，必以培養個人之私德爲第一義。欲從事於鑄國民者，必以自培養其個人之私德爲第一義。

且公德與私德，豈嘗有一界線焉。區劃之爲異物哉。德之所由起，起於人與人之有交涉。使如魯敏遜漂流記所稱以子身獨立於荒島

則無所謂德亦無所謂不德而對於少數之交涉，與對於多數之交涉，對於私人之交涉，與對於公人之交涉，其客體雖異，其

主體則同。故無論泰東泰西之所謂道德，皆謂其有贊於公安公益者云爾。其所謂不德，皆謂其有戕於公安公益者云爾。公云私云，不過假立之一名詞，以爲體驗踐履之法門。就汎義言之，則德一而已。無所謂公私。就析義言之，則容有私德醇美，而公德尙多未完者。斷無私德濁下，而公德可以襲取者。孟子曰：古之人所以大過人者，無他焉，善推其所爲而已矣。公德者私德之推也。知私德而不知公德，所缺者只在一推。蔑私德而謬託公德，則並所以推之具而不存也。故養成私德，而德育之事思過半焉矣。

二 私德墮落之原因

私德之墮落。至今日之中國而極。其所以致此之原因。甚複雜。不得悉數。當推論其大者得五端。


(一)由於專制政體之陶鑄也。孟德斯鳩曰：『凡專制之國。間或有賢明之主。而臣民之有德者則甚希。試徵諸歷史。乃君主之國。其號稱大臣近臣者。大率皆庸劣卑屈嫉妬陰險之人。此古今東西之所同也。不寧惟是。苟在上者多行不義。而居下者守正不阿。貴族專尚詐虞。而平民獨崇廉恥。則下民將益爲官長所欺詐所魚肉矣。故專制之國。無論上下貴賤。一皆以變詐傾巧相遇。蓋有迫之使不得不然者矣。若是乎專制政體之下。固無所用其德義。昭昭明甚也。』夫既競天擇之公例。惟適者乃能生存。吾民族數千年生息於專制空氣之下。苟欲進取。必以詐僞。苟欲自全。必以卑屈。其最富於此兩種性質之人。卽其在社會上占最優勝之位置者也。而其稍缺乏者。則以劣敗而澌滅。不復能傳其種於來裔者也。是故先天之遺傳。盤踞於社會中。而爲其公共性種子相熏。日盛一日。雖有豪傑。幾難自拔。蓋此之由。不寧惟是。彼踟躕於專制之下。而全軀希寵以自滿足者。不必道。卽有二達識熱誠之士。苟欲攘臂爲生民請命。則時或不得不用詭祕之道。時或不得不爲偏激之行。夫其人而果至誠也。猶可以不因此而磷緇也。然習用之。則德性之漓。固已多矣。若根性稍薄弱者。幾何不隨流而沈汨也。夫所謂達識熱誠欲爲生民請命者。豈非一國中不可多得之彥哉。使其在自由國。則大政治家。大教育家。大慈善家。以純全之德性。溫和之手段。以利其羣者也。而今乃迫之使不得不出於此途。而因是墮落者十八九焉。嘻。是殆不足盡以爲斯人咎也。

(二)由於近代霸者之摧鋤也。夫其所受於數千年之遺傳者。既如此矣。而此數千年間。亦時有小小之汗隆昇。

降則帝者主持而左右之。最有力焉。西哲之言曰：專制之國，君主萬能，非虛言也。顧亭林之論世風，謂東漢最美，炎宋次之，而歸功於光武。明章藝祖真仁。日知錄卷十三云：漢自孝武表章六經之後，師儒雖盛，而大義未明，故新莽居攝，頌德獻符者徧天下。光武有鑒於此，乃尊崇節義，敦厲名實。所舉用者，莫非經明行修之士，而風俗爲之一變。至其末造，朝政昏濁，國事日非，而黨錮之流，獨行之氣，至仁季義舍命不渝，風雨如晦，鷄鳴不已。三代以下，風俗之美，無尙於東京者。又云：宋史言士大夫忠義之氣，至仁季變化殆盡。藝祖首褒韓通，次表衛融，以示意嚮。真仁之世，田錫、王禹稱、范仲淹、歐陽修諸賢，以直言讜論倡于朝。於是中外薦紳，知以名節爲高，廉恥相尙，盡去五季之陋。故靖康之變，士投袂起而勤王，臨難不屈，所在有之。及宋之亡，忠節相望。且從而論之曰：『觀哀平之可以變而爲東京，五代之可以變而爲宋，則知天下無不可變之風俗。』此其言雖於民德汙隆之總因，或有所未盡乎。然不得不謂爲重要關係之一端矣。嘗次考三千年來風俗之差異，三代以前，邈矣弗可深考。春秋時猶有先王遺民，自戰國涉秦以逮西漢，而懿俗頓改者，集權專制之趨勢。時主所以芻狗其民者，別有術也。戰國雖混濁，而猶有任俠尙氣之風。及漢初而摧抑豪強，朱家郭解之流，漸爲時俗所姍笑。故新莽之世，獻符鬪媚者徧天下，則高惠文景之播其種也。至東漢而一進，則亭林所論深明其故矣。及魏武既有冀州，崇獎躡弛之士，於是權詐迭進，姦僞萌生。建安廿二年八月下令求負汙辱之名者，笑之行不仁不孝而有治國用兵之術者。光武明章之澤，掃地殆盡。每下愈況，至五季而極。千年間民俗之靡靡，亦由君主之淫亂，有以揚其波也。及宋乃一進，藝祖以檢點作天子，頗用專制力，挫名節以自固。君臣坐而論道之制，至宋始廢。蓋范質輩與藝祖並仕周，位在藝祖上，及入宋爲宰相，而遠嫌自下也。而真仁守文，頗知大體，提倡士氣，宋俗之美，其大原因固不在君主，而君主亦與有力焉。胡元之篡，衣冠塗炭，純以游牧水草之性，馳驟吾民，故九十年間，暗無天日。及明而一進，明之進也，則非君主之力也。明太祖以刻鷲之性，摧鋤民氣，戮辱臣僚，其定律至立，不爲君用之條，令士民毋得以名節自保。以此等專制力所挫抑，宜其惡果更烈於西漢。而東林復社，舍命不渝，鼎革以後，忠義相屬者，則其原因別有在也。詳下逮本朝順康間，首開博學鴻詞，以繫遺

逸。乃為貳臣傳以辱之。晚明士氣，斲喪漸盡。及夫雍乾，主權者以悍鷲陰險之奇才，行操縱馴擾之妙術，撫拾文字小故，以興冤獄，廷辱大臣，耆宿以蔑廉恥。乾隆六十年中大學士尙侍供奉諸大員無一人不曾遭黜辱者又大為四庫提要通鑑輯覽等書，排斥道學，貶絕節義。自魏武以後，未有敢明目張膽變亂黑白如斯其甚者也。然彼猶直師商韓六蠹之教，而人皆得喻其非。此乃陰託儒術，芻狗之言，而一代從而迷其信。嗚呼！何意百鍊鋼，化為繞指柔。百餘年前所播之惡果，今正榮滋稔熟，而我民族方刈之，其穢德之負千古而絕五洲，豈偶然哉！豈偶然哉！

(三)由於屢次戰敗之挫沮也。國家之戰亂與民族之品性最有關係，而因其戰亂之性質異，則其結果亦異。今先示其類別如下。



內亂者，最不祥物也。凡內亂頻仍之國，必無優美純潔之民。當內亂時，其民必生六種惡性：一曰僥倖性，才智之徒，不務利羣，而惟思用險鷲之心術，攫機會以自快一時也。二曰殘忍性，草薶禽獮之既久，司空見慣，而曾不足以動其心也。三曰傾軋性，彼此相鬪，各欲得而甘心，杯酒戈矛，頃刻倚伏也。此三者桀黠之民所含有性也。四曰

狡僞性。朝避猛虎。夕避長蛇。非營三窟。不能自全也。五曰涼薄性。一身不自保。何況戀妻子。於至親者。尙不暇愛。而遑能愛人。故仁質斲喪。漸滅以至於盡也。六曰苟且性。知我如此。不如無生。暮不保朝。假日媮樂。人人自危。無復遠計。馴至與野蠻人之不知將來者無以異也。此三者柔良之民所含有性也。當內亂後。其民亦生兩種惡性。一曰恐怖性。痛定思痛。夢魂猶噩。膽汁已破。勇氣全銷也。二曰浮動性。久失其業。無所依歸。秩序全破。難復故常也。故夫內亂者。最不祥物也。以法國大革命爲有史以來驚天動地之一大事業。而其結果乃至使全國之民。互相剗刃於其腹。其影響乃使數十年以後之國民。失其常度。史家波留謂法國至今不能成完全之民政。實由革命之役。斲喪元氣太過。殆非虛言也。

內亂之影響。則不論勝敗。何也。勝敗皆在本族也。故恢復平和之後。無論爲新政府舊政府。其亂後民德之差異。惟視其所以勞來還定。補救陶冶者何如。而暫亂偶亂者。影響希而補救易。久亂頻亂者。影響大而補救難。此其大較也。若夫對外之戰爭。則異是。其爲主動以伐人者。則運用全在軍隊。而境內安堵焉。惟發揚其尙武之魂。鼓舞其自尊之念。故西哲曰。戰爭者。國民教育之一條件也。是可喜而非可悲者也。其爲被動而伐於人者。其影響雖與內亂絕相類。而可以變僥倖性爲功名心。變殘忍性爲敵愾心。變傾軋性而爲自覺心。乃至變狡僞性而爲謀敵心。變涼薄性而爲敢死心。變苟且性而爲自保心。何也。內亂則已無所逃於國中。而惟冀亂後之還定。外爭則決生死於一髮。而怵於後時之無可回復也。故有利用敵國外患以爲國家之福者。雖可悲而非其至也。外爭而自爲征服者。則多戰一次。民德可高一級。德人經奧大利之役。而愛國心有加焉。經法蘭西之役。而愛國心益有加焉。日本人於朝鮮之役。中國之役亦然。皆其例也。若夫戰敗而爲被征服者。則其國民固有之性。可以驟變。

忽落而無復痕跡。夫以斯巴達強武之精神，照耀史乘，而何以屈服於波斯之後，竟永爲他族藩屬，而所謂軍國民之紀念，竟可不復覩也。波蘭當十八世紀前，泱泱幾霸全歐，何以一經瓜分後，而無復種民固有之特性也。燕趙古稱多慷慨悲歌之士，今則過於其市，順民旗飄颺焉，問昔時屠狗者，闕如矣，何也。自五胡元魏安史契丹女直蒙古滿洲以來，經數百年六七度之征服，而本能湮沒盡矣。夫在專制政體之下，既已以卑屈詐僞兩者爲全身進取之不二法門矣，而況乎專制者之復非我族類也。故夫內亂與被征服二者，有一於此，其國民之人格，皆可以日趨卑下，而中國乃積數千年內亂之慣局，以膿血充塞歷史，日伐於人而未嘗一伐人，屢被征服而不克一自征服，此累變累下種種遺傳之惡性，既已瀰漫於社會，而今日者又適承洪楊十餘年驚天動地大內亂之後，而自歐勢東漸以來，彼征服者又自有其征服者，且匪一而五六焉，日隣眈於我前，國民之失其人性，殆有由矣。

(四)由於生計憔悴之逼迫也。管子曰：『倉廩實而知禮節，衣食足而知榮辱。』孟子曰：『民無恆產，斯無恆心。』既無恆心，放僻邪侈，救死不贍，奚暇禮義。嗚呼，豈不然哉，豈不然哉，並世之中，其人格最完美之國民，首推英美，次則日耳曼之三國者，皆在全球生計界中，占最高之位置者也。西班牙葡萄牙人，在數百年前，深有強武活潑沈毅嚴整之氣度，今則一一相反，皆由生計之日蹙爲之也。其最劣下者，若泰東之朝鮮人，安南人，則生計最窮迫不堪之民也。俄維斯政府，以鷹隼虎視之勢，震懾五陸，而其人民稱罪惡之府，黑闇無復天日。日本人有露西亞亡國論窮形亦生計沈窘之影響也。彼虛無黨以積年游說煽動之力，而不能得多數之同情，乃不得已而出於孤往兇險之手段，亦爲此問題所困也。日本政術，幾匹歐美，而社會道德，百不逮一，亦由其富力之進步，與政治之進步

不相應也。夫世無論何代，地無論何國，固莫不有其少數畸異絕俗之士。既非專制魔力所能束縛，亦非恆產困乏所能銷磨。雖然，不可以律衆人也。多數之人民，必其於仰事俯蓄之外，而稍有所餘裕，乃能自重而惜名譽。汎愛而好慈善，其腦筋有餘力以從事於學問，以養其稍高尚之理想。其日力有餘暇以計及於身外，以發其願團體之精神，而不然者，朝饔甫畢，而憂夕殮，秋風未來，而泣無褐。雖有仁質，豈能自凍餒以念衆生。雖有遠慮，豈能舍現在以謀將來。西人羣學家言，謂文明人與野蠻人之別，在公共思想之有無，與未來觀念之豐缺。而此兩者所以差異之由，則生計之舒蹙，其尤著者也。故貪鄙之性，褊狹之性，涼薄之性，虛偽之性，諂阿之性，暴棄之性，偷苟之性，強半皆由生計憔悴造之。生計之關係於民德，如是其切密也。我國民數千年來，困於徭役，困於災癘，困於兵燹，其得安其居樂其業者，既已間代不一觀。所謂虛偽褊狹貪鄙涼薄諂阿暴棄偷苟之惡德，既已經數十世紀，受之於祖，若宗社會之教育，降及現世，國之母財，歲不增殖，而宮廷土木之費，官吏苞苴之費，恆數倍於政府之歲入。國民富力之統計，每人平均額不過七角一分有奇。據日本橫山雅男氏之統計，調查日幣七十錢有奇。而外債所負，已將十萬萬兩。利息在外。以至有限之物力，而率變爲不可復之母財。若之何民之可以聊其生也，而況乎世界生計競爭之風潮，席卷而來，而今乃始發軔也。民國之腐敗墮落，每下愈況，嗚呼，吾未知其所終極矣。

（五）由於學術匡救之無力也。彼四端者，養成國民大多數惡德之源泉也。然自古移風易俗之事，其目的雖在多數人，其主動恆在少數人。若缺於彼而有以補於此，則雖敝而猶未至其極也。東漢節義之盛，光武明章之功，雖十之三，而儒學之效，實十之七也。唐之與宋，其專制之能力相若，其君主之賢否亦不甚相遠，而士俗判若天淵者，唐儒以詞章浮薄相尙，宋儒以道學廉節爲坊也。魏晉六朝之腐敗原因，雖甚雜複，而老莊清談宗派，半尸

其咎也。明祖刻薄寡恩，挫抑廉隅，達於極點。而晚明士氣，冠絕前古者，王學之功，不在禹下也。然則近今二百年來，民德汙下之大原，從可觀矣。康熙博學鴻詞諸賢，率以耆宿爲海內宗仰，而皆自污貶。茲役以後，百年來支配人心之王學，掃盪靡存。船山、梨洲、夏峯三曲之徒，抱絕學老巖穴，統遂斬矣。而李光地、湯斌，乃以朱學聞。以李之忘親背交，職爲姦諛。李給鄭成功以覆明祀前，人無譏全謝山始訶之。湯之柔媚取容，欺罔流俗。湯斌雖貴而食不御炙雞帷帳，不過臬欺人語後爲聖祖所覺蓋公孫弘之流也。而以爲一代開國之大儒，配食素王。末流所鼓鑄，豈待問矣。後此則陸隴其、陸世儀、張履祥、方苞、徐乾學輩，以媵姍夸毗之學術，文致其奸。其人格殆猶在元許衡、吳澄之下。所謂「國朝宋學淵源記」者，殆盡於是矣。而乾嘉以降，閻王、段戴之流，乃標所謂漢學者，以相夸尙，排斥宋明，不遺餘力。夫宋明之學，曷嘗無缺點之可指摘。顧吾獨不許鹵莽滅裂之漢學家容其喙也。彼漢學則何所謂學。昔乾隆間內廷演劇，劇曲之大部分，則誨亂也，誨淫也，皆以觸忌諱，被呵譴，不敢進。乃專演神怪幽靈、牛鬼蛇神之事，既藉消遣，亦無愆尤。吾見夫本朝二百年來學者之所學，皆牛鬼蛇神類耳。而其用心亦正與彼相等。蓋王學之激揚蹈厲，時主所最惡也。乃改而就朱學，朱學之嚴正忠實，猶非時主之所甚喜也。乃更改而就漢學。若漢學者，則立於人間社會以外，而與二千年前地下之僵石爲伍。雖著述累百卷，而決無一傷時之語。雖辯論千萬言，而皆非出本心之談。藏身之固，莫此爲妙。才智之士，既得此以爲阿世盜名之一祕鑰，於是名節閑檢，蕩然無所復顧。故宋學之敝，猶有僞善者流。漢學之敝，則並其僞者而亦無之。何也。彼見夫盛名鼎鼎之先輩，明目張膽以爲鄉黨自好者，所不爲之事。而其受社會之崇拜，享學界之尸祝，自若也。則更何必自苦以強爲禹行舜趨之容也。昔王鳴盛著尚書後案十漢學家之嘗語人曰：吾貪賊之惡名，不過五十年。吾著書之盛名，可以五百年。此二語者，直代表全部漢學家之

用心矣。莊子曰：哀莫大於心死。漢學家者率天下而心死者也。此等認種與八股同毒，盤踞於二百餘年學界之中心。直至甲午乙未以後，而其氣燄始衰，而此不痛不癢之世界既已造成，而今正食其報，耗矣哀哉。五年以來，海外之新思想隨列強侵略之勢力以入中國，始為一二人倡之，繼焉千百人和之，彼其倡之者固非必盡蔑舊學也，以舊學之簡單而不適應於時勢也，而思所以補助之，且廣陳衆義，促思想自由之發達，以求學者之自擇，而不意此久經腐敗之社會，遂非文明學說所遽能移植，於是自由之說入，不以之增幸福，而以之破秩序，平等之說入，不以之荷義務，而以之蔑制裁，競爭之說入，不以之敵外界，而以之散內團，權利之說入，不以

附 表 降 升 德 民 代 歷 國 中

	漢東	宋	明	清	日今
級一第					
級二第					
級三第					
級四第	春秋	國戰	末漢西	國三唐	代五
級五第				朝北南及胡五	元
級六第					葉中清

之圖公益而以之文私見破壞之說入不以之箴膏肓而以之滅國粹斯賓塞有言「衰世雖有更張弊混於此者必發於彼害消於甲者將長於乙合通羣而覈之弊政害端常自若也是故民質不結禍害可以易端而無由禁絕」嗚呼吾觀近年來新學說之影響於我青年界者吾不得不服斯氏實際經驗之言而益為我國民增無窮之沈痛也夫豈不拔十得一能食新思想者之利者而所以償其弊殆僅矣記曰甘受和白受采忠信之人可與學禮又曰橘在江南為橘過江北則為枳夫孰意彼中最高尚醇美利羣進俗之學說一入中國遂被其偉大之同化力汨沒而去也要而論之魏晉間清談乾嘉間之考據與夫現今學子口頭之自由平等權利破壞其挾持絕異其性質則同而今之受痼愈深者則以最新最有力之學理緣附其所近受遠受之惡性惡習擁護而灌漑之故有清二百年間民德之變遷在朱學時代有偽善者猶知行惡之為可恥也在漢學時代並偽焉者而無之則以行惡為無可恥也及今不救恐後此歐學時代必將有以行惡為榮者今已萌芽於一小部分之青年矣夫至以行惡為榮則洪水猛獸足喻斯慘耶君子念此膚粟股栗矣

中國歷代民德升降原因表(附)

戰國	春秋	國勢	君主	戰爭	學術	生計	民德
列國並立集權專制漸鞏固	列國並立貴族專制	權不甚重影響頗少	雖多而不甚烈	各宗派雖萌芽而未甚發達多承先王遺風	交通初開競爭不甚劇	醇朴忠實	其長在任俠尚氣其短在僥倖詐偽破壞秩序
大率以尚武精神外交手段兩者獎厲巨下	甚烈	自由思想大發達儒墨道法縱橫諸派互角而法家縱橫家最握實權	起因苛稅及兵亂民困殊甚	商業漸興兼井大起因苛稅及兵亂民困殊甚	其長在任俠尚氣其短在僥倖詐偽破壞秩序		

清	明	元	宋	五季	唐	六朝	三國	東漢	西漢	秦
外族同化主權專制力甚強	本族恢復專制力甚強	外族主權專制力甚強	主權微弱外族頻侵	不成國	本族恢復中央集權旋復分裂	外族侵入	本族分裂	同	同	中央集權專制力甚強
雍正乾隆以谿刻陰險威羣下	太祖殘忍刻薄挫抑民氣	以游牧性蹴踏本族	真仁愛民崇禮	無主	驕汰	獎厲浮薄侈靡之風	魏武提倡惡風吳蜀亦獎厲權術	光武明章獎厲名節	高祖承用秦法專挫任俠刻薄寡恩	以塞民智挫民氣為主
戰敗後平和時代稍長	戰勝後平和時代稍長	本族全收戰爭與國民無與	戰敗于外族	戰敗于外族	上半期平和下半期大亂	甚多而本族率戰敗	烈	少	少	繼續
士以考据詞章自遁不復知學其黠者以腐敗矯偽之朱學文其奸	王學大興思想高尚	摭朱學末流而精神不存	道學發達最盛朱陸爲其中心點	無	儒者于詞章外無所事佛學稍發達	佛老並用詞章與清談極盛	缺乏	儒學最盛時代收孔教之良果	儒老并行	屏棄羣學稍任法家
頗蘇	稍蘇	困	稍蘇	民不聊生	上半期頗蘇下半期大困	憔悴	頗艱	復蘇	文景間家給人足武昭以後稍困	大窘
庸懦卑怯狡詐	發揚尙名節幾比東漢	卑屈寡廉恥	尙節義而稍文弱	最下	上半期柔靡卑屈下半期混濁	混濁柔靡	污下	尙氣節崇廉恥風俗稱最美	卑屈甚於秦時	卑屈浮動

現今

文明之外族侵入
主權無存

四十年來主權者
以壓制敷衍為事
近而益甚

內亂未已外患又
作數敗之後四海
騷然

舊學漸滅新學未
成青黃不接謬想
重疊

漏卮既甚而世界
生計競爭風潮侵
來全國憔悴

混濁達於極點諸
惡俱備

三 私德之必要

私德者。人人之糧。而不可須臾離者也。雖然。吾之論著。以語諸大多數不讀書不識字之人。莫予喻也。即以語諸少數讀舊書識舊字之人。亦莫予聞也。於是吾忠告之所得及。不得不限於少數國民中之最少數者。願吾信夫。此最少數者。其將來勢力所磅礴。足以左右彼大多數者而有餘也。吾為此喜。吾為此懼。吾不能已於言。

今日蹉跎俊發有骨鯁有血性之士。其所最目眩而心醉者。非破壞主義耶。破壞之必能行於今之中國與否。為別問題。姑勿具論。而今之走於極端者。一若惟建設為需道德。而破壞則無需道德。鄙人竊以為誤矣。古今建設之偉業。固莫不含有破壞之性質。古今破壞之偉人。亦靡不饒有建設之精神。實則破壞與建設。相倚而不可離。而其所需之能力。二者亦正相等。苟有所缺。則靡特建設不可得期。即破壞亦不可得望也。今之言破壞者。動引生計學上分勞之例。謂吾以眇眇之躬。終不能取天下事而悉任之。吾毋寧應於時勢而專任破壞焉。既破壞以後。則建設之責。以俟君子。無待吾過慮也。此其心豈不廓然而大公也耶。願吾以為不惟於破壞後當有建設。即破壞前亦當有建設。苟不爾者。則雖日言破壞。而破壞之目的終不得達。何也。羣學公例。必內固者乃能外競。一社會之與他社會競也。一國民之與他國民競也。苟其本社會本國之機體未立之營衛未完。則一與敵遇而必敗。或未與敵遇而先自敗。而破壞主義之性質。則以本社會本國新造力薄之少數者。而悍然與彼久據力厚之多數者為難也。故不患敵之強。而惟患我之弱。我之所恃以克敵者何在。在能團結一堅固有力之機體而已。然

在一社會一國家承累年積世之遺傳習慣其機體由天然發達故成之尙易在一黨派則反是前者無所憑藉並世無所利用其機體全由人爲發達故成之最難所謂破壞前之建設者建設此而已苟欲得之舍道德奚以哉。

今之言破壞者動曰一切破壞此謬言也吾輩曷爲言破壞曰去其病吾社會者云爾如曰一切破壞也是將並社會而亦破壞之也譬諸身然沈疴在躬固不得不施藥石若無論其受病不受病之部位而一切鍼灸之攻洩之則直自殺而已吾亦深知夫仁人志士之言破壞者其目的非在破壞社會而不知「一切破壞」之言既習於口而印於腦則道德之制裁已無可復施而社會必至於滅亡吾亦深知夫仁人志士之言破壞者實鑒於今日之全社會幾無一部分而無病態也憤慨之極必欲翻根柢而改造之斯固然也然療病者無論下若何猛劑必須恃有所謂「元神真火」者以爲驅病之原苟不爾者則一病未去他病復來而後病必更難治於前病故一切破壞之言流弊千百而收效卒不得一也何也苟有破壞者有不破壞者則其應破壞之部分尙可食破壞之利苟一切破壞則不惟將來宜成立者不能成立即目前宜破壞者亦卒不得破壞此吾所敢斷言也吾疇昔以爲中國之舊道德恐不足以範圍今後之人心也而渴望發明一新道德以補助之參觀第五節論公德篇由今以思此直理想之言而決非今日可以見諸實際者也夫言羣治者必曰德曰智曰力然智與力之成就甚易惟德最難今欲以一新道德易國民必非徒以區區泰西之學說所能爲力也即盡讀梭格拉底柏拉圖康德黑智兒之書謂其有「新道德學」也則可謂其有「新道德」也則不可何也道德者行也而非言也苟欲言道德也則其本原出於良心之自由無古無今無中無外無不同一是無有新舊之可云也苟欲行道德也則因於社會性質

之不同。而各有所受。其先哲之微言。祖宗之芳躅。隨此冥然之軀殼。以遺傳於我躬。斯乃一社會之所以爲養也。一旦突然欲以他社會之所養者養我。談何容易耶。竊嘗舉泰西道德之原質而析分之。則見其得自宗教之制裁者若干焉。得自法律之制裁者若干焉。而此三者。在今日之中國能有之乎。吾有以知其必不能也。不能而猶云欲以新道德易國民。是所謂磨甗爲鏡。炊沙求飯也。吾固知言德育者。終不可不求泰西新道德以相補助。雖然。此必俟諸國民教育大興之後。而斷非一朝一夕所能獲。而在今日青黃不接之頃。則雖日日聞人說食而已。終不能飽也。況今者無所挾持以爲過渡。則國民教育一語。亦不過託諸空言。而實行之日。終不可期。是新道德之輸入。因此遂絕望也。然則今日所恃以維持吾社會於一線者。何在乎。亦曰吾祖宗遺傳固有之舊道德而已。道德與倫理異。道德則放諸四海而皆準。俟諸百世而不惑者也。如要君之爲有罪多妻之非不德。此倫理之不宜於今者也。若夫忠之德。愛之德。則通古今中西而爲一。而一切破壞之論者也。諸如此類。不可枚舉。故謂中國言倫理有缺點。則可謂中國言道德有缺點。則不可。興勢必將並取舊道德而亦摧棄之。嗚呼。作始也簡。將畢也鉅。見披髮於伊川。知百年而爲戎。毋曰吾姑言之。以快一時云爾。汝之言而無力耶。則多言奚爲。汝之言而有力耶。遂將以毒天下。吾願有言責者一深長思也。讀者其毋曰。今日救國之不暇。而嘵嘵然談性說理。何爲也。諸君而非自認救國之責任也。則四萬萬人之腐敗。固已久矣。而豈爭區區少數之諸君。惟中國前途。懸於諸君。故諸君之重視道德與蔑視道德。乃國之存亡所由繫也。今卽以破壞事業論。諸君亦知二百年前英國革命之豪傑爲何如人乎。彼克林威爾實最純潔之清教徒也。亦知百年前美國革命之豪傑爲何如人乎。彼華盛頓所率者皆最質直善良之市民也。亦知三十年前日本革命之豪傑爲何如人乎。彼吉田松陰西鄉南洲輩皆朱學王學之大儒也。故非有大不忍人之心者。不可以言

破壞。非有高尙純潔之性者。不可以言破壞。雖然。若此者。言之甚易。行之實難矣。吾知其難。而日孜孜焉。兢業以自持。困勉以自勵。以忠信相見。而責善於友朋。庶幾有濟。若乃並其所挾持。以爲破壞之具者。而亦破壞之。吾不能爲破壞之前途賀也。吾見世之論者。以革命熱之太盛。乃至神聖洪秀全。而英雄張獻忠者有焉矣。吾亦知其爲有爲而發之言也。然此等孽因。可多造乎。造其因時甚痛快。茹其果時有不勝其苦辛者矣。夫張獻忠更不足道矣。卽如洪秀全。或以其所標旗幟。有合於民族主義也。而相與頌揚之。究竟洪秀全果爲民族主義而動否。雖論者亦不敢爲作保證人也。王莽何嘗不稱伊周。曹丕何嘗不法禹舜。亦視其人何如耳。大抵論人者。必於其心術之微。其人而小人也。不能以其與吾宗旨偶同也。而謂之君子。如韓侂胄之主伐金論。我輩所最贊者。然贊其論不能贊其人也。其人而君子也。不能以其與吾宗旨偶悟也。而竟斥爲小人。王猛之輔苻秦。我輩所最鄙者。然鄙其事不能抹煞其人也。尙論者如略心術而以爲無關重輕也。夫亦誰能尼之。但使其言而見重於社會也。吾不知於社會全體之心術。所影響何如耳。不寧惟是而已。夫鼓吹革命。非欲以救國耶。人之欲救國。誰不如我。而國終非以此「瞎鬧派」之革命所可得救。非惟不救。而又以速其亡。此不可不平心靜氣而深察也。論者之意。必又將曰。非有瞎鬧派。開其先。則實力派不能收其成。此論之是否。屬於別問題。茲不深辯。今但問論者之意。欲自爲瞎鬧派。且使聽受吾言者。悉爲瞎鬧派乎。恐君雖欲自貶損。而君之地位。固有所不能也。卽使能焉。而舉國中能瞎鬧之人正多。現在未來瞎鬧之舉動亦自不少。而豈待君之入其間而添一蛇足也。而更何待君之從旁勸駕也。況君之言。皆與彼無瞎鬧之資格者語。而其有瞎鬧之資格者。又非君之筆墨勢力範圍所能及也。然則吾儕今日。亦務爲真救國之事業。且養成可以真救國之人才而已。誠如是也。則吾以爲此等利口快心之言。可

以已矣。昔曹操下教，求不仁不孝而有治國用兵之術者，彼其意豈不亦曰：吾以救一時云爾，而不知流風所播，遂使典午以降，廉恥道喪，五胡迭侵，元魏憑陵，黃帝子孫勢力之墜地，卽自茲始。此中消息，殆如銅山西崩，洛鐘東應，感召之機，銖黍靡忒。嗚呼！可不深懼耶？可不深懼耶？其父攫金，其子必將殺人；高中高髻，四方必高一尺。今以一國最少數之先覺，號稱爲得風氣之先者，後進英豪，具爾瞻焉。苟所以爲提倡者，一誤其途，吾恐功之萬不足以償其罪也。古哲不云乎：兩軍相對，哀者勝矣。今日稍有知識，稍有血性之士，對於政府而有一重大敵，對於列強而復有一重大敵，其所以兢兢業業，蓄養勢力者，宜何如？實力安在？吾以爲學識之開通，運動之預備，皆其餘事，而惟道德爲之師。無道德觀念以相處，則兩人且不能爲羣，而更何事之可圖也？自起樓而自摧燒之，自蒔種而自踐踏之，以云能破壞，則誠有矣。獨惜其所破壞者，終在我而不在敵也。曾文正者，近日排滿家所最唾罵者也。而吾則愈更事而愈崇拜其人。吾以爲使曾文正生今日而猶壯年，則中國必由其手而獲救矣。彼惟以天性之極純厚也，故雖行破壞可也。惟以修行之極嚴謹也，故雖用權變可也。故其言曰：扎硬寨，打死仗。曰：多條理，少大言。曰：不爲聖賢，便爲禽獸。莫問收穫，但問耕耘。彼其事業之成，有所以自養者在也。彼其能率厲羣賢以共圖事業之成，有所以孚於人且善導人者在也。吾黨不欲澄清天下則已，苟有此志，則吾謂曾文正集不可不日三復也。夫以英美日本之豪傑證之，則如彼；以吾祖國之豪傑證之，則如此。認救國之責任者，其可以得師矣。吾謂破壞家所破壞者，往往在我而不在敵。聞者或不懌焉。蓋倡破壞者，自其始斷未有立意欲自破壞焉者也。然其勢之所趨多若是，此不徒在異黨派有然也。卽同黨派亦然。此其何故歟？竊嘗論之，共學之與共事，其道每相反。此有志合羣者所不可不兢兢也。當其共學也，境遇同，志趣同，思想同，言論同，耦俱無猜，謂相將攜手以易。

天下及一旦出而共事。則各人有各人之性質。各人有各人之地位。一到實際交涉。則意見必不能盡同。手段必不能盡同。始而相規。繼而相爭。繼而相怨。終而相仇者。往往然矣。此實中西歷史上所常見。而豪傑所不免也。諺亦有之。『相見好。同住難。』在家庭父子兄弟夫婦之間。尙且有然。而朋友又其尤甚者也。於斯時也。惟彼此道德之感情深者。可以有責善而無分離。觀曾文正與王璞山李次青二人交涉之歷史。可以知其故矣。讀者猶疑吾言乎。請懸之以待足下實際任事之日。必有不勝其感慨者。夫今之志士。必非可以個個分離孤立。而能救此瀕危之國。明也。其必協同運動。組成一分業精密團結鞏固之機體。庶幾有濟。吾思之。吾重思之。此機體之所以成立。舍道德之感情。將奚以哉。將奚以哉。

且任事者。最易滴汨人之德性。而破壞之事。又其尤甚者也。當今日人心腐敗。達於極點之時。機變之巧。迭出相嘗。太行孟門。豈云巉絕。曾文正與其弟書云。『吾自信亦篤實人。只爲閱歷世途。飽更事變。略參些機權作用。倒把自家學壞了。』以文正之賢。猶且不免。而他更何論也。故在學堂裏講道德尙易。在世途上講道德最難。若夫持破壞主義者。則更時時有大敵臨於其前。一舉手。一投足。動須以軍略出之。而所謂軍略者。又非如兩國之交綏云也。在敵則挾其無窮之威力以相臨。在我則偷期密約。此遷彼就。非極機巧。勢不能不歸於劣敗之數。故破壞家之地位之性質。嘗與道德最不能相容者也。是以躬親其役者。在初時或本爲一極樸實極光明之人。而因其所處之地位所習之性質。不知不覺。而漸與之俱化。不一二年。而變爲一刻薄寡恩。機械百出之人者有焉矣。此實最可畏之試驗場也。然語其究竟。則凡走入刻薄機詐一路者。固又斷未有能成一事者也。此非吾撫拾宋元學案上理窟之空談。實則於事故上證以所見者所歷者。而信其結果之必如是也。夫任事者修養道德之難。

既若彼而任事者必須道德之急。又若此。然則當茲衝者。可不慄慄耶。可不孳孳耶。詩曰。毋教猱升木。如塗塗附。息息自克。猶懼未能挽救於萬一。稍一自放。稍一自文。有一落千丈而已。

問者曰。今日國中種種老朽社會。其道德上之黑闇。不可思議。今子之所論。反乃偏責備於新學之青年。新學青年。雖或間有不德。不猶愈於彼等乎。答之曰。不然。彼等者無可望無可責者也。且又非吾筆墨之勢力範圍所能及也。中國已亡於彼等之手。而惟冀新學之青年。致死而之生之。若青年稍不慎。而至與彼等同科焉。則中國遂不可救也。此則吾曉音瘖口之微意也。

記曰。君子有諸己而后求諸人。無諸己而后非諸人。率斯義也。則以執德不宏。信道不篤。尤悔積躬。伎求成習。如鄙人者。舍自責之外。更何敢覩然與天下之士說道義。雖然。西方之教。亦有言己先自度。回向度他。是爲佛行。未能自度。而先度人。是爲菩薩發心。以吾之自審。道力薄弱。而渴思得良友善言。以相夾輔。而爲吾藥也。則人之欲此。誰不如我。上附攻錯輔仁之義。下惟書紳自助之訓。吾言雖慚。烏可以已。

竊嘗觀近今新學界中。其斷斷然提挈德育論者。未始無人。然效卒不睹者。無他焉。彼所謂德育。蓋始終不離乎智育之範圍也。夫其獮祭徧於汗牛充棟之宋元明儒學案。耳食飫乎入主出奴之英法德倫理學史。博則博矣。而於德何與也。若者爲理。若者爲氣。若者爲太極無極。若者爲已發未發。若者爲直覺主義。若者爲快樂主義。若者爲進化主義。若者爲功利主義。若者爲自由主義。涉其藩焉。抵其奧焉。辨則辨矣。而於德又何與也。夫吾固非謂此等學說之不必研究也。顧吾學之也。只當視之爲一科學。如學理化。學工程。學法律。學生計。以是爲增益吾智之一端而已。若曰德育而在是也。則所謂聞人談食。終不能飽。所謂貧子說金。無有是處。率斯道也。以往。豈惟

今日吾恐更閱數十年百年而效之不可睹如故也。嗚呼！泰西之民其智與德之進步爲正比例，泰東之民其智與德之進步爲反比例。今日中國之現象其月暈礎潤之幾既動矣。若是乎則智育將爲德育之蠹，而名德育而實智育者益且爲德育之障也。以智育蠹德育而天下將病智育，以『智育的德育』障德育而天下將並病德育。此寧細故耶？有志救世者於德育之界說不可不深長思矣。

爲學日益爲道日損斯語至矣。今吾儕於日益者尙或孳孳焉，而於日損者莫或厝意焉。此道之所以日喪也。吾以爲學者無求道之心則亦已耳。苟其有之則誠無取乎多言。但使擇古人一二語之足以針砭我而夾輔我者則終身由之不能盡而安身立命之大原在是矣。黃梨洲曰：『學問之道以各人自用得著者爲真。』又曰：『大凡學有宗旨是其人之得力處亦是學者之入門處。天下之義理無窮苟非定以一二字如何約之使其在我。』此誠示學者以求道不二法門哉。夫既曰各人自用得著則亦聽各人之自爲擇而吾寧容嘵嘵焉。雖然吾既欲以言責自效於國民則以吾願學焉而未能至者與同志一商榷之可乎。

一曰正本。吾嘗誦王子之拔本塞原論矣。曰：『聖人之學日遠日晦而功利之習愈趨愈下。其間雖嘗警惑於佛老而佛老之說卒亦未能有以勝其功利之心。雖又嘗折衷於羣儒而羣儒之論終亦未能有以破其功利之見。蓋至於今功利之毒淪浹於人之心髓而習以成性也。幾千年矣。記誦之廣適以長其敖也。智識之多適以行其惡也。聞見之博適以肆其辯也。辭章之富適以飾其僞也。其稱名借號未嘗不曰吾欲以共成天下之務而其誠心實意之所在以爲不如是則無以濟其私而滿其欲也。以若是之積染若是之心志而又講之以若是之學術宜其聞吾聖人之教而以爲贅疣枘鑿。』（下略）嗚呼！何其一字一句皆凜然若爲今日吾輩說法耶？夫

功利主義。在今且蔚成大國。昌之爲一學說。學者非惟不羞稱。且以爲名高矣。陽明之學在當時猶曰贅疣柄鑿。其在今日聞之而不却走不唾棄者幾何。雖然。吾今標一鵠於此。同一事也。有所爲而爲之。與無所爲而爲之。其外形雖同。而其性質及其結果乃大異。試以愛國一義論之。愛國者。絕對者也。純潔者也。若稱名借號於愛國。以濟其私而滿其欲。則誠不如不知愛國。不談愛國者之爲猶愈矣。王子所謂功利與非功利之辨。卽在於是。吾輩試於清夜平旦。返觀內照。其能免於子王子之所訶與否。此則非他人所能窺也。大抵吾輩當發心伊始。刺激於時局之事變。感受乎時賢之言論。其最初一念之愛國心。無不爲絕對的純潔的。此盡人所同也。乃浸假而或有分之者。浸假而或有奪之者。既已奪之。則謂猶有愛國心之存。不可得矣。而猶貪其名之嫩而足以炫人也。乃姑假焉。久假不歸。則亦烏自知其非有矣。夫其自始固真誠也。而後乃不免於虛僞。然則非性惡也。而學有未至也。亦於所謂拔本塞源者。未嘗一下刻苦工夫焉耳。王子又言。『殺人須在咽喉處下刀。爲學須從心髓入微處用力。我輩而甘自暴棄也。則亦已耳。苟不爾者。則於心髓入微處痛下自治力。其真不容已也。頃見某報有排斥鄙人奮道德之論者。謂『今日祇當求愛國忘身之英雄。不當求束身寡過之迂士。既爲英雄矣。卽稍有缺點。吾輩當恕其小節。而敬其熱心。』又曰。『欲驅發揚蹈厲龍拏虎擲之血性男子。而一一循規蹈矩粹面盎背。以入於奄奄無氣之途。吾不知亡國之慘禍。既在目前。安用此等腐敗迂闊之人格爲也。』吾以爲此言又與於自文之甚者也。夫果爲不拘小節之英雄。猶可言也。特恐英雄百不得一。而不拘小節者九十九焉。我躬之在此一人之內耶。抑在彼九十九人之內耶。則惟我乃能知之。如曰無須如王子所謂拔本塞源者。而亦可以爲英雄也。則不誠無物。吾未見有能成就者也。如曰吾之本原本已純美。而無所用其拔與塞之功也。則君雖或能之。而非所可

望於我輩習染深重根器淺薄之人。夫安得不於此兢兢也。況吾之所謂舊道德者。又非徒束身寡過循規蹈矩之云也。以束身寡過循規蹈矩爲道德之極則。此又吾子王子所謂斷潢絕港行焉而不能至者也。苟不以心髓入微處自爲課程。則束身寡過之虛僞。與愛國忘身之虛僞。循規蹈矩之虛僞。與龍拏虎擲之虛僞。正相等耳。何也。以其於本原之地。絲毫無與也。以愛國一義論之。既有然。其他之諸德。亦例是而已。

二曰慎獨。拔本塞原論者。學道之第一著也。苟無此志。苟無此勇。則是自暴自棄。其他更無可復言矣。然志既立。勇既鼓。而吾所受於數千年來社會之薰染。與夫吾未志道以前所自造之結習。猶盤伏於吾腦識中。而時時竊發。非持一簡易之法。以節制之涵養之。不能保其無中變也。若是者。其惟慎獨乎。慎獨之義。吾儕自束髮受大學中庸。誰不飫聞。顧受用者。萬不得一。固由志之未立。亦所以講求者有未瑩也。吾又聞諸子王子曰。謹獨卽是致良知。與黃勉之書然則王子良知之教。亦慎獨盡之矣。學者或問王子。『近來工夫。稍知頭腦。然難尋個穩當處。』子曰。『只是致知。』曰。『如何致。』子曰。『一點良知。是爾自家的準則。爾意志着處。他是便知。是非便知。非更瞞他一些不得。爾只不要欺他。實實落落。依着他做去。善便存。惡便去。何等穩當。』此真一針見血之言哉。實則大學

『所謂誠其意者。毋自欺也。』二語已直捷指點無餘蘊矣其門下錢緒山引申之曰。『識得良知。是一個頭腦。雖在千百人中。工夫只在一念微處。雖獨居冥坐。工夫亦只在一念微處。』故以良知爲本體。以慎獨爲致之之功。此在泰東之姚江。泰西之康德。前後百餘年間。桴鼓相應。若合符節。斯所謂東海西海有聖人。此心同。此理同。而求道之方。片言居要。徹上徹下。真我輩所終身由之而不能盡者也。顧我輩於此一義。猶往往欲從之而未由者何也。王子又言。『以道之變動不居。縱橫顛倒。皆可推之而通。世之儒者。各就其一偏之見。而又文飾之。其爲習熟。既足以自信。而條目又

足以自安。以是誑己誑人。終車沒溺而不悟。非誠有求爲聖人之志者。莫能得其受病之源。而發其神奸所攸伏也。』又言『以某之不肖。蓋亦嘗陷溺其間者有年。賴天之靈。偶悞良知。乃悔其向之所爲者。固包藏禍機。作僞於外。而心勞日拙者也。十餘年來。雖痛自洗剔。創艾而病根深痼。萌蘖時生。』夫以子王子之學。高尚純美。優入聖域。而自敝得力。猶曰包藏禍機。作僞於外。猶曰病根深痼。萌蘖時生。然則我輩之未嘗問道。未嘗學道者。其神奸之所由伏。寧有底極耶。此拔本塞原論。所以必當先有事也。王子既沒。微言漸湮。浙中一派。提挈本體過重。迨於晚明。不勝其敝。而劉戡山乃復單標慎獨。以救王學末流。實則不過以真王學矯僞王學。其拳拳服膺者。始終仍此一義。更無他也。今日學界之受毒。其原因與晚明不同。而猖狂且十倍。其在晚明。滿街皆是聖人。而酒色財氣不礙菩提路。其在今日。滿街皆是志士。而酒色財氣之外。更加以陰險反覆。奸黠涼薄。而視爲英雄所當然。晚明之所以猖狂者。以竊子王子直捷簡易之訓。以爲護符也。今日所以猖狂者。則竊通行之愛國忘身。自由平等諸口頭禪。以爲護符也。故有恥爲君子者。無恥爲小人者。明目張膽。以作小人。然且天下莫得而非之。且相率以互相崇拜。以爲天所賦與我之權。當如是也。夫寧知吾之所矜然自恣者。乃正爲攸伏之神奸。效死力耳。嗚呼。吾人而欲求爲人以立於天地間也。則亦誰能助我。誰能規我。舍息息慎獨之外。更何恃哉。昔吾常謂景教爲泰西德育之原泉。其作用何在。曰在祈禱。祈禱者。非希福之謂也。晨起而祈焉。晝餐而祈焉。夕寢而祈焉。來復乃合稠衆而祈焉。其祈也。則必收視返聽。清其心。以對越於神明。又必舉其本日中所行之事。所發之念。而一一紬繹之。其在平時。容或厭然揜其不善。而著其善。其在祈禱之頃。則以爲全知全能之上帝。無所售其欺也。故正直純潔之思想。不期而自來。於涵養省察克治三者之功。皆最有助力。此則普通之慎獨法也。日日

如是則個人之德漸進。人人如是則社會之德漸進。所謂泰西文明之精神者在是而已。詩曰：上帝臨汝，無貳爾心。又曰：相在爾室，尙不愧於屋漏。東西之教，寧有異耶？要之千聖萬哲之所以度人者，語上語下，雖有差別，頓法漸法，雖有異同。若夫本原之地，一以貫之，舍慎獨外，無他法門矣。此寧得曰某也欲爲英雄，某也欲爲迂士，而趨舍因之異路耶？諺曰：英雄欺人，欺人之英雄，容或有之。自欺之英雄，則吾未之前聞也。抑王子又曰：『去山中賊，易去心中賊難。』吾儕自命志士者，而皆有神奸伏於胸中而不能自克，則一國之神奸，永伏於國中而未由相克，其亦宜矣。

三曰謹小。大德不逾閑，小德可出入。此固先聖之遺訓哉。雖然，以我輩之根器本薄弱，而自治力常不足以自衛也。故常隨所薰習以爲遷流。小德出入既多，而大德之踰閑，遂將繼之矣。所謂涓涓不塞，將成江河，縣縣不絕，將尋斧柯也。錢緒山云：『學者工夫不得伶俐直截，只爲一虞字作祟。良知是非從違，何嘗不明，但不能一時決斷。如自虞度日，此或無害於理否？（一）或可苟同於俗否？（二）或可欺人於不知否？（三）或可因循一時以圖遷改否？（四）只此一虞便是致吝之端。』又曰：『平時一種姑容因循之念，常自以爲不足害道。由今觀之，一塵可以矇目，一指可以蔽天，良可懼也。』嗚呼！此又不啻一字一句，皆爲吾徒棒喝也。以鄙人之自驗，生平德業所以不進者，皆此四種虞法梗乎其間。蓋道心與人心交戰之頃，彼人心者，常能自聘請種種之辯護士，設無量巧說以爲之辭。昔嘗有詩曰：『聞道亦不遲，其奈志不立。優柔既養奸，便佞更縱敵。謂茲小節耳，操之何太急。謂是戒將來，今且月攘一。』此實區區志行薄弱之徵驗，不敢自諱，而吾黨中之與吾同病者，當亦不乏人。斯乃不可不共勉也。曩見曾文正自述戒烟蚤起日記三事，其實行之難也如彼。初蓋疑焉，及一自試驗，然後知茈茈者之果

不易也。而吾輩將來道行功業之不能及文正者，即可於此焉卜之。非謂此淺淺者足爲道行事業之源泉也。文正自治力之強，過於吾輩，卽小可以喻大也。蕺山先生曰：『吾輩習俗既深，平日所爲皆惡也。非過也。學者只有去惡可言，改過工夫，却用不著。』又曰：『爲不善卻自恕爲無害，不知宇宙儘寬，萬物可容，容我一人不得。』又曰：『吾輩偶呈一過，人以爲無傷，不知從此過而勘之，先尙有幾十層，從此過而究之，後尙有幾十層，故過而不已必惡，謂其出有源，其流無窮也。』此等語真所謂一棒一擱一掌血，欲覺晨鐘，稍有腦筋者讀之，皆宜發深省焉矣。夫使吾之所謂小過者，果獨立焉而無其因果，則區區一節誠或不足以爲病，而無如有前乎此者數十層，有後乎此者數十層，以相與爲緣，若是乎則亦何小之非大也。譬諸治國，一偏區之飢寒盜賊，其事甚小也，而推其何以致此之由，則必其政府施政之有失也。社會進步之不調也，極其流弊，一偏區如此，他偏區如此，其禍亂遂將蔓及全國也。譬諸治身，一二日之風寒疥癬，其事甚小也，而推其何以致此之由，則必其氣血稍虧之感召也，衛生不協之釀成也，極其流弊，一日如此，他日如此，其痼疾或乃入於膏肓也。今吾輩之以不矜細行自恕者，其用心果何居乎？細行之所以屢屢失檢，必其習氣之甚深者也，必其自治之脆薄而無力者也，其自恕之一念，卽不啻曰：吾身不能居仁由義，是並康德所謂良心之自由而放棄之也，必合此數原因，然後以不矜細行自安焉，是烏得更以小論也。而況乎以接爲構，而日與相移，純粹之德性，勢不能敵旦旦之伐也。孟子曰：能充無欲穿窬之心，而義不可勝用，以反比例觀之，則知充纖毫涼薄之心，可以弑父，充纖毫險黯之心，可以賣國也。所惡者不在其已發之跡象，而在其所從發之根原也，以不拘小節之英雄自命者，其亦可以思矣。

以上三者，述鄙人所欲自策厲之言也。天下之義理無窮，僅舉三義者，遵梨洲之教，以守約爲貴也。多述前賢訓

言者。末學謏陋。所發明不能如前賢也。專述子王子與其門下之言者。所願學在是。他雖有精論。未嘗能受也。抑古之講學者。必其心得也甚深。而身體力行也甚篤。雖無言焉。已足以式化天下。而言論不過其附庸耳。不知道如鄙人。寧當有言。願吾固云未能自度而先度人。竊自附於菩薩之發心矣。若問鄙人於此三者能自得力與否。固踧然無以爲對也。願讀者毋曰。彼固不能實行也。而遂吐棄之。苟其言有一二可採者。則雖無似如鄙人。猶勿以人廢言。則鄙人以此言貢獻於社會之微意也。至如某報謂鄙人責人無已時。則吾知罪矣。孟子曰。責善朋友之道。吾以言論友天下士。自附斯義。毋亦可乎。讀者亦毋吝相責。常夾輔我挾持我。使自愧自厲而冀一二成就於將來。則所以恩我者。無量也夫。無量也夫。

第十九節 論民氣

一國中大多數人對於國家之尊榮及公衆之權利爲嚴重之保障。常凜然有介冑不可犯之色。若是者謂之民氣。民氣者。國家所以自存之一要素也。雖然。僅以民氣而國家遂足以自存乎。曰。必不可。何以故。以民氣必有所待而始呈其效力故。

(一)民氣必與民力相待。無民力之民氣。則必無結果。有侵犯我者。我對之而宣言曰。『汝毋許爾爾。』是卽所謂氣也。夫我之所以能爲此宣言者何也。其內容必尙含有未盡之詞。若曰。『汝果爾爾者。則吾將……』『吾將……』云者。是使彼憚我而果不復敢爾爾也。故當吾將發此宣言之先。必預審夫所謂『吾將……』云者。果能實行與否。能實行矣。而遂足以憚彼否。審之既熟。然後乃昂然曰。『汝毋許爾爾。』夫如是而我之宣言非

戲言矣。於彼時也。彼則又謂我曰：『彼云將……能實行歟。苟實行。斯可憚歟。』彼若認我爲能實行而可憚也。則不得不屈於我。而我之目的達矣。彼若認我爲不能實行。即實行矣。而非可憚。則必將復於我曰：『吾固爾爾矣。汝如將……吾亦將……』於是乎吾之所謂「將……」者。遂果不得不實行。既實行。則視吾之所謂「將……」者。能否壓伏彼之所謂「將……」。而我目的之能達與不能達。從茲解決焉。夫彼之所謂「將……」云者。亦必其示我以甚可憚者也。彼固有所以憚我。而我亦有所以憚彼。是之謂力。我既有所以憚彼。而遂不憚彼之憚我。是之謂氣。氣者固所以成始而成終也。然非有力則不能始之。不能終之。氣實力之補助品耳。使我自始輒貿貿然宣言曰：汝毋許爾爾。然彼果爾爾者。我將何以待之。未始計及焉。即計及矣。而其事非我所能實行。即實行矣。而曾不足以損彼之豪末。甚或非徒無損於彼。而且有損於我。若是乎。則我之宣言。必毫無反響。彼之視我。直劇場中一科白耳。即彼或未審於我之內情。以爲我之敢爲此言。其必有盾乎此言之後者。而因屈而從我。雖然。此又未足爲喜也。何也。彼今雖不察。而終必有察之之時。及其察之。而我後此同類之宣言。壹歸於無效也。其不足喜者一也。我見此無實力之宣言之偶一制勝也。乃自狃焉。謂即此可以制挺撻人矣。乃益怠於實力之預備。此後若更遇同類之侵犯。或加等之侵犯。而我終無待之之道。其不足喜者二也。故夫無民力之民氣。其不可濫用也。有如此。問者曰：然則力不足者。雖牛馬奴隸。其受之矣。曰：然也。夫孰使汝無力也。既無力矣。雖欲不受。庸安能也。雖然。受之可也。安之不可也。不安之奈何。則亦歸而求所以增其力而已。力之未逮。其必非用氣之時也。問者疑吾言乎。請觀日本。日本之初與我通使也。領事裁判權未收回。我最初之橫濱領事范氏。以最敏活之手腕。主張我國民之權利。往往有使日人不能堪者。至今老橫濱者。猶舉其佚事以爲美談。彼日人豈其樂受也。

而忍之若干年。琉球事件交涉中。我北洋艦隊游弋長崎。爲示威運動。我水兵與彼警察鬩。其交涉之結果。乃至勒使長崎警察不得帶刀。日本恥之。乃自下令全國警察不帶刀以解嘲。自甲午戰勝後。全國警察始復帶刀。彼豈其樂受也。而忍之若干年。彼其忍之之時。正其汲汲焉於種種方面預備實力之時也。果也。甲午一役。而二十年來對於中國之恥辱。乃盡雪也。又其與俄交涉也。維新之始。以樺太與千島交換。彼日人豈其樂受也。而忍之若干年。甲午戰勝。割我遼壤。三國干涉。奪諸其懷。彼日人豈其樂受也。而忍之若干年。彼其忍之之時。又其汲汲焉於種種方面預備實力之時也。果也。甲辰一役。而三十年來對於俄國之恥辱。乃盡雪也。當其忍也。而曰日本無民氣可乎。必不可。彼蓋有之而不用也。尺蠖之屈。以求伸焉。鷲鳥將擊。而伏且累月也。而不然者。請觀朝鮮。彼朝鮮非民氣不振之國也。十餘年前。卽有富於革命思想之東學黨。振臂一呼。蔓延全國。推其起因。則政治問題也。以吾居日本七八年間。見其報紙所記朝鮮爆裂彈事件。以二三十計矣。其民之聚於鐘路。朝鮮地名。爲示威運動以對彼政府者。亦幾於無歲無之。其對內之民氣如此。卽彼之對於日本。因抵制銀行券事件。至於全國工商同盟實行。日本第一銀行在朝鮮發行紙幣。漸已通行。至明治三十六年春間。朝鮮人見利權外溢之可懼也。乃有一二有志者。倡抵制之議。令各行商簽名不用彼紙幣。舉國一致贊成。未幾日本以軍艦筑紫示威於仁川。復以數軍艦繼之。志士之運動遂成絕影。其對外之民氣如此。卽至最近日韓新協約成立之後。其元老大臣。以身殉之者。且踵相接。由此觀之。夫寧得曰韓民皆夸毘無骨者流也。而今日之韓。竟何如矣。夫三十年前。日與韓不相遠也。卽韓之民氣。吾亦未見其有與僿於日之確證也。而結局乃若此。此何以故。則韓人誤以其最可貴重之蓄力的時日。而濫費之以爲最無謂之競氣的舉動。韓人之氣。日洩而日瀉。日人之力。日積而日張。而最後之優勝劣敗。遂永定矣。吾故曰。民氣必待民力而後可用。對內有然。對外亦有然。

(一)民氣必與民智相待。無民智之民氣，則無價值。氣也者，用之以相競者也。故語及氣之一字，其中總含有戰爭的性質。無論爲廣義的戰爭，狹義的戰爭，其性質固不相遠。狹義的戰爭謂用兵廣義的戰爭謂其他互相抗敵之行爲以狹義的戰爭言之，則(第一)不可無宣戰的理由。苟我挾完滿之理由以從事戰爭，則以義戰的觀念，能使我之敵，憤力隨自信力而增加，其可以取勝者一。能使敵人自反不縮之故，餒而不支，其可以取勝者二。能使中立者表同情於我，間接以增我之力而殺敵之力，其可以即勝者三。(第二)不可無作戰的計畫。我之力固自信足以與敵戰矣。然以此戰之故，我之損失當幾何？敵之損失當幾何？我而不戰，其所損失當幾何？我而戰，其所損失當幾何？戰之所損失，以除以償不戰所損失，其贏得者幾何？不可不一一熟計之。又同一戰也，以若何之戰術，最足以使敵屈伏，而貫徹我之目的，以若何之戰術，而使不至於本戰之外，生出他種支障，又不可不一一熟計之。凡茲所舉，不獨於狹義之戰爭宜然，即廣義之戰爭亦皆有然。夫命物之名而謂之氣，則其性質之非永久的可知。傳曰：一鼓作氣，再而衰，三而竭。此最能說明氣之情狀者也。故氣之爲物，也不可挫。彼氣之愈挫而愈盛者，必其有所挾持焉。以運乎氣之外者也。苟惟氣也，則遇一度挫折而餒於其前，更遇一度之挫折而益餒於其前，則有後此遇常用氣之時，而不復能振者矣。夫以無理由而濫用其氣，幸而勝，則例外之事也。若其不勝，則事過境遷，終必有自悟其爲無理由之一日。遂自怨自艾，而因以減殺其自信力，而氣乃一落千丈強矣。以無計畫而誤用其氣，以取挫敗者，則減殺其冒險心也。亦正與此同。而何以能審其理由，能善其計畫，則非全體人民有水平線以上之常識不能也。民氣之爲物，往往以盲從者之多數而致盛大，亦往往以盲從者之多數而致挫跌。要之盲從之民，必非能對於外界而有堅牢之團結力，對於外界而有持久之抵抗力者也。吾故曰：民氣必待民智而後可用。對

內有然。對外亦有然。

(三)民氣必與民德相待。無民德之民氣。則不惟無利益而更有禍害。凡多數人相集而圖一事。則其中必有多

少之權力。其權力之大小及於其久暫姑勿論於是有覬覦此權力而加入團體者。又凡一事之成。則其後必有多少之名譽。於是

有歌謠此名譽而加入團體者。又凡一事件之起。其事件間接之影響。或可予一種人以特別之利益。於是

有私圖而加入團體者。如革命軍之起。本非為擄掠也。而會匪綠林乘此勢假此名以行擄掠實為一奸機會故革

命軍可以間接予會匪綠林以特別之利益也。又如一月前東京學界爭所謂取締問題者。本非為情學也。而其中有游蕩不事業者。或久客思家者。乘此勢假此名堂堂然自託於志士。又凡一事件之

起。其事件直接或間接之結果。常可以敗一人或一黨人之事業。於是有有憾於彼一人或彼一黨人。利用傾軋

而加入團體者。歐美言政黨之得失者。常懸此為厲禁。蓋以有一於此。則其團體自表面上視之。雖若甚大且堅。

實則其內容含有種種不同性質之分子。各向於其特別之目的而進行。無論事之成不成。而皆可以生出惡果。

此等敗類。無論何種團體。固萬難絕無。而民德高尚之國。其數寡。民德污下之國。其數衆。若一團體中而此種類

之人占多數。則其敝不可思議。即非占全團體之多數。而在團體主動者之中占多數。則其敝亦不可思議。夫此

種類之人。必其稍黠而稍悍者也。故衆人相集以圖一事。而彼輩往往得占主動之地位。勢則然也。而其敝遂不

可思議。以上所舉。皆假公濟私。以煽動民氣為一手段者也。不可謂之真民氣。故勿具論。即屬於真民氣矣。而猶

必須有諸德以綱維之。一曰堅忍之德。凡所抗爭之目的。不能一蹴而達。苟無此德。則一閔熱狂。若暴風疾雨。不

能終朝也。二曰親善之德。凡團體愈大。則其分子愈雜。雖同向於一大目的。其中小節。總不免意見參差。苟無此

德。則團體瞬息分裂也。三曰服從之德。凡團體必有指揮者。苟無此德。則人人欲為指揮者。不願為

受指揮者。羣龍無首。頃刻而潰也。四曰博愛之德。氣之方張。必繼之以破壞。破壞有時固非得已。然當有其程度。苟無此德。將並其不必破壞者而亦破壞之。而全局且不可收拾也。故由前所舉之四種。是與道德立於正反對之地位者也。以此等人而利用民氣。其爲害極深。由後所舉之四種。雖非立於正反對之地位。而於應有之道德。多所欠闕者也。以此等人而濫用民氣。其爲害亦不淺。吾於中國之義和團見之。吾於法國之大革命見之。吾故曰。民氣必待民德而後可用。對內有然。對外亦有然。吾於是研究民氣之爲物及其應用。得公例曰。

(一) 其物爲補助的性質。而非絕對獨立的性質。故不可以之爲唯一之手段。

(二) 其物屢用之。則易衰而竭。蓄之愈久。則其膨脹力愈大。故宜偶用而不宜常用。

(三) 其物善用之。可以收莫大之良果。誤用之。可以收莫大之惡果。故即偶用之。亦不可不慎。

(四) 其物之發生比較的易。故常未適用時。無取煽動之。

以上四例。其前三項則前文所論。足以證明之。而有餘。其第四項。今更附一言。謂民氣無須激厲。但放任之。而可以自由發生者。非篤論也。雖然。與民力民智民德三者相比較。則其發生也較易。(一)正當之民氣。生於自衛心。而自衛心爲盡人所同具。一提便醒。(二)民氣之爲物極簡單。不須有他種之預備修養。而始成立。故臨時可以猝辦。(三)民力民智民德三者既進。則其民自能自認其天職。自主張其權利。故民氣不期進而自進。以此諸理由。故吾輩無論對內對外。當先審今日爲可用民氣之時代與否。如其未也。與其洩之。毋寧蓄之。姑於其最難發生最難成立之民力民智民德。三致意焉。迨適用之時。以百數十少年號呼焉。以三數報館鼓吹焉。不一月而

舉國狂矣。謂余不信。蓋觀最近東京罷學事件與上海罷市事件也。故當未可用民氣之時。而專以煽動民氣爲事者。是濫費其日力與其才力而已。

問者曰。然則子認今日爲未可用民氣之時乎。曰。以全局論。無論對外對內。吾皆認爲未可用民氣之時。以一部分論。則因於其事件之性質如何。吾認爲有適用者。有不適用者。卽認爲適用之事件。其用之也。亦有度量分界。若日日以牛刀割雞。則亦吾之所不敢苟同。雖然。此非可以一言盡也。

第二十節 論政治能力

今之憂國者。每喟喟而悲哀。哀而號曰。嗚呼。中國人無政治思想。斯固然矣。雖然。吾以爲今後之中國。非無思想之爲患。而無能力之爲患。凡百皆然。而政治尤其重要者也。普通之思想。由言論聽受可以得之。實際之思想。由學問講求可以得之。言論聽受者。數月而其效可觀矣。學問講求者。數年而其效可觀矣。故欲進無思想者爲有思想者。其事猶易。欲進無能力者爲有能力者。其事實難。

十年前朝鮮之東學黨。與三十年前日本之尊攘家。何所異。願何以日本能改革。而朝鮮不能。則朝鮮人之能力。劣於日本之爲之也。十九世紀初。南美諸國之獨立。與十八世紀末。北美合衆國之獨立。何所異。願何以北美能秩序發達。而南美不能。則南美諸國民之能力。劣於北美之爲之也。路易十六時代。法國之革命。與查里第一時代。英國之革命。何以異。願何以英人能得完全立憲政體。而法人不能。則法人之能力。劣於英人之爲之也。如曰。徒恃思想而可以自立也。則古代波斯人之思想力。非有遜於阿刺伯人。中世羅馬人之思想力。非有遜於我特

狄人。即印度人之思想力。據心理學家所論。猶謂其足與英人相頡頏。或乃駕英而上之。法儒李顧何以一興一亡之數。竟若彼也。如曰。徒恃思想力而可以自立也。則歐美大學中。其黑人之受完全教育。獲博士學士之學位。成法醫理教之專家。與白人同馳騁於學界者。固不乏人。而猶太種族之著書發論。哀然成巨子者。尤多於鯽魚矣。顧何以黑人之建國。終不可期。而猶太一亡之後。竟萬劫不復也。故思想不足恃。惟能力爲足恃。

我中國自黃帝以來。立國數千年。而至今不能組織一合式有機完全秩序順理發達之政府者。其故安在。一言以蔽之。亦曰無政治能力而已。或曰。吾國民以久困專制政體之故。雖有政治能力不能發達。斯固然矣。雖然。亦有在專制政體不能及之時。不能及之地。不能及之事。而吾民不克自發揮其政治能力如故也。是乃大可痛者也。何謂專制力所不能及之時。如每朝當鼎革之交。中央政府權力墜地。羣雄並起。若秦末西漢末東漢末唐末元末明末之故事。彼時所謂中央政府者。其鞭箠所及。不能出邦畿千里外。民間若稍自樹立者。一舉而得自由自治之幸福。抑非難也。而拒虎迎狼。莽莽千載也。若彼。是其無政治能力之證驗一也。何謂專制力所不能及之地。稽諸我國歷史。其各省地方。固非無脫離中央政府別成一行政區域之時代。春秋戰國。不必論矣。後此如秦末之南越閩越。漢末之蜀吳。唐末之吳越。福建湖南蜀唐迄宋之西夏。皆於中原極勢亂之際。而屹然能自樹立。使其民稍富於自治力者。則別構成一種政體以光我歷史。抑非難也。而一丘之貉。又既若此。此猶得曰。行政區域雖別。然終爲豪強所脅迫。不能自拔也。若夫自明末以來。數百年間。我民自殖於南洋羣島者。以數百萬計。至今日。即以暹羅一國論。而隸華藉者已百餘萬。新嘉坡庇能噶羅巴等處。稱是。若此者。我中央政府視爲化外。其權力非直不能及。抑亦不屑加也。顧何以戢戢受羈。軛若牛若馬。其甚者。如荷蘭屬法屬之僑民。筭畜割割。曾羊

豕之不若也。抑海峽殖民地諸島，多由我民筆路藍縷，與天氣戰，與野獸戰，與土蠻戰，停辛貯苦，以啓其地，願不能自建設自約束，而必迎西方之強者以鎮撫我，則又何也。夫前事不必道矣。其在今日，臥榻已屬他人，座間寧容卿輩，吾民不能以政治團體自見於彼地，猶可言也。若夫今日美洲澳洲諸地，吾民散居者亦不下數十萬，其地之法律固自由也，平等也，而吾民又與彼之國民同受治於一法律之下者也。集會言論之自由，一無所禁者也。願何以英人不滿四千之上海，百廢具舉，純然爲一小政府之形，而華人逾三萬之舊金山，竟終歲干戈相尋，不能組成一稍有力之團體也。是其無政治能力之證驗二也。何謂專制力所不能及之事，夫所謂政治的組織者，非必爲關於政治上之專名也。其在歐美無論一市一區一村一公司一學校，凡一切公私之結集，無不爲政府之縮影。故欲驗一國民政治能力之強弱者，皆當於此焉察之。夫近代自由政體之發源，史家多以歸諸中世之意大利市府。俾尼士佛羅
梭諸市也而彼諸市府者，其始皆爲經濟上結集，而後乃變爲政治上結集者也。中國專制之毒雖劇烈，而以中央行政機關不整備之故，其能直接以干涉民間事業者殆稀。若吾民於商務上思結何等之團體，必非政府所懸以爲禁也。而數千年來欲求一如西人之有限公司及商業會議所者，何不一觀也。其尤淺而易見者，若教育事業，近數年來所屢下明詔獎厲者也。專制力卽及他事，而斷不至及此事，而試觀庚辛以來迄今日，各省教育之發達，竟何似也。雖有一二，而私立學校之成績，往往視官立者猶不逮焉。而吾民更何顏目以責備政府也。是其無政治能力之證驗三也。吾故曰：今後之中國，非無思想之爲患，而無能力之爲患。亞里士多德曰：人也者，政治之動物也。然則人類之必有政治能力，其天性矣。至其何以自有而之無，則不出兩途：一曰隱伏而不能發達，二曰發達而旋復摧夷。今試卽吾中國人所以致此之原因而析分之，則

其第一事。即由於專制政體也。專制政體爲直接以摧鋤政治能力之武器。此稍有識者所能知矣。進化學者論生物之公例。謂物體中無論何種官能。苟廢置不用之既久。則其本性遂日漸漸滅。如彼意大利洞中之盲魚。昔本有目。因洞居黑闇。目無所用。故爲今形。又如脊椎動物類。昔本有腮。人類亦有之。因空氣輕清。腮無所用。故爲今形。諸如此者。不可枚舉。經百數十代之遺傳。順應其本能之發達。毗於一端。而他端遂腭縮以至於盡。此其例通於生理心理兩部分而皆同者也。專制之國。其民無可以用政治能力之餘地。苟有用之者。則必將爲強者所蹂躪。使之歸於劣敗之數。而不復得傳其種於後者也。以故勾者不得出。萌者不得達。其天賦本能。隱伏不出。積之既久。遂爲第二之天性。就使一旦放任之。而其本能之回復。固非可以責效於一朝一夕。譬諸婦女纏足者。纏之既二三十年。雖一旦釋之。而不能如常足。明甚也。今有持論謂中國人既無立憲資格。即當以暴動破壞養成之者。是無異集纏足婦人驟赤其足。即驅之以競走。謂是可以養足力也。以故雖在專制力所不及之時之地之事。而其渙然不能自治也如故。皆此之由。或曰。歐西諸國。前此之呻吟於專制軛下。與我等耳。何以其政治能力之摧殘。不若我之甚。曰。專制同而所以專制之性質不同。彼蓋以封建專制。貴族專制爲主體。而我適與之相反者也。其詳迭見於拙著中國專制政體進化史論諸篇。質而言之。則彼乃少數之專制。而我則一人之專制也。少數專制者。即少數人自由。而多數人不自由之意也。夫由少數人之自由。以漸進於多數人之自由。其視全體人民悉無自由。而驟欲進於自由者。其難易固有分矣。故泰西之專制。常爲政治能力之媒。觀英國憲章與匈牙利金牛憲法之起原。可以證此說之不謬矣。他國亦大率類是。而中國之專制。全爲政治能力之賊也。此論理甚長。精細剖辨。俟諸異日。其第二事。則由於家族制度也。歐美各國統治之客體。以個人爲單位。曰。中國統治之客體。以家族爲單位。故歐美之人民。直接以隸於國。中國之人民。間接以隸於國。先聖曰。國之本在家。又曰。家齊而後國治。蓋在此種

社會之下。誠哉舍家族外無所以爲團也。細察中國過去種種制度。無不以族制爲之精神。言夫教育。則曰父兄

之教不肅而成。子弟之學不勞而能。凡庠序學校。皆以養國老庶老爲最重之典故。可謂之族制的教育。言夫賦

稅。上古井田之制。九家爲井。由井而通而成而終。全以家族爲綱。不俟言矣。即封建既廢以後。如漢有戶賦。以充郡國

行政也。唐有調。租庸調三者租課田庸課人調則課戶也唐制戶籍法有兩稅而以丁從戶也明後雖行一條鞭

法。然仍有收戶解戶馬戶竈戶陵戶園戶海戶諸名。故泰西料民只計口。而中國則戶口並計。參觀前號中國史

誠以戶也者。中國構成團體之一要素也。觀其統計之小節。而立法之根本觀念。於茲可徵矣。掌財賦及民事者謂之戶部亦根於

家族思想也故可謂之族制的財政。言夫刑法。則罪人及孥。甚者乃夷三族。此風直至本朝雍乾間。猶未能改。故可謂

之族制的法律。言夫兵役。則封建時代。丘乘與井田相屬。無論矣。自戰國至李唐。常爲三丁抽一之制。宋後行保

甲。每十家籍二丁。皆可謂之族制的軍政。其餘一切制度。大率類是。苟一一細按之。則其立法之源泉。皆有蛛絲

馬跡之可尋。此不能偏舉他日當著專篇研究之要之舍家族相維相繫之外。有司無以爲治也。即其地方自治之制。有若所謂甲

首所謂保正所謂里長所謂社長者。皆無不以一族之耆老充之。舍是則自治團體不能立也。故吾常謂中國有

族民資格。而無市民資格。參觀拙著新大陸游記第一百八十六葉蓋西語所謂市民 *Citizen* 一名詞。吾中國亘古未嘗有也。市民

與族民。其相異之點。安在。市民之長尙賢。其任之也。以投票選舉。族民之長尙齒。其任之也。以年資游升。投票選

舉。則物競行。而被選者自必立於有責任之地位。年資游升者。反是。夫是以泰西之自治制度。爲政治能力之濫

觴。中國之自治制度。爲政治能力之煬竈也。夫是以在一鄉一族間。尙或秩然有團體之形。一至城市。則有機體

之發達。永不可見也。

其第三事。則由於生計問題也。孟子曰：民之爲道也，有恆產者有恆心，無恆產者無恆心，豈不然哉？豈不然哉？地理學家言：完備政團之發生，必在溫帶。蓋熱帶浴天惠太厚，故其民媮窳，而生計不發達；寒帶蒙天行太酷，故其民瘠苦，而生計不發達。生計蹙而欲政治之進，其道無由。蓋人道之所以進步，皆起於有所欲望，而汲汲設法貫達之。欲望之種類甚多，恆應於其社會之程度高下爲等差，必先急其所最急者，乃及其所次急者，更及其所又次急者，如衣食住，最急者也，無之則一日不能自存也，稍進焉，乃更求間接以保生命財產之安全者，則政治之業是已。益進焉，乃更求其軀殼及靈魂之特別愉快者，則奢侈品物及學問之研究，道德之實行是已。凡生計學義第一章必論欲望，謂是爲根本的觀念也。惟諸家之論欲望，每分爲必要之欲望，度外之欲望等類。鄙人竊不謂然。夫貧瘠國民之求一粗糲一蓬蓽，其必要者也。富強國民之講衛生，的飲食修潔，的道路華美的宮室，亦其必要者也。野蠻國民之求一饒勇酋長，以禦猛獸禦外敵，其必要者也。文明國民之求一完備之政府，穩實之權利，以謀公私之進步，亦其必要者也。然則凡欲望皆生於必要而已，而其必要之事物愈多，則其欲望愈繁，而文明之程度愈高，此民族進化得失之林也。且使於其所最急者，猶終歲勤動不能獲焉，而欲民之有餘裕以謀其所次急者，此必不可得之數也。故政治道德學術一切之進步，悉與生計之進步成比例，皆此之由。吾中國數千年生計界之歷史何如？吾中國今日生計界之現狀何如？觀於此，則其政治能力缺乏之根原，從可想矣。正乃孟子所謂救死惟恐不贍者也。故其於最狹義的小我之外，不遑念及大我，於最狹義的現在之外，不遑念及將來，亦奚足怪。難者或曰：若漢之文景間，唐之開元天寶間，本朝之康熙乾隆間，號稱家給人足，比戶可封，今使兩者果爲切密之比例也，則彼時之政治能力，宜若發達，而事實顧相反何也？應之曰：是宜調之於遺傳之理。彼自祖若宗百數十代，既已汨沒其本能，而欲以數十年之短日月，遽還其原，烏可得也。而況乎他種原因之旦旦而伐者，尙不止一端也。而況乎所謂家給人足者，又不過歷史上一美談，而當時實狀，正未必爾爾也。故吾國數千年社會之

精力全銷磨焉以急其所最急者。欲求達下級直接之欲望而猶不給。而欲其進焉以懷間接高級之欲望。且有術焉以自達之。安可得耶。安可得耶。

其第四事。則由於喪亂頻仍也。凡有機體之發達。必經自然之順序。歷爾許之歲月。又無他種故障。以天摧之於中途。夫然後繼長增高。以底大成。吾有一弟。總角早慧。冠絕羣從。及八歲。得怪病。鄉居誤於庸醫。經年病瘥。而靈明若失。今謀補救。後效茫茫。吾觀於此。而忽有感於吾民族政治能力之喪失。亦類是焉矣。夫其伏於專制之羈軛。困於家族之範圍。役於生計之奴隸。蓋本能之斲喪者。既已十六七矣。而猶或潛滋暗長。萌蘖非無。無如更數十年。必經一次喪亂。輒取其前此所積累之根柢。而一掃之。法王路易十四言。朕死之後。有大洪水來。而中國歷史家亦往往知陶唐經洪水時代。將黃帝傳來之文明消失大半。曾亦思秦漢以來數千年間。我先民遭洪水厄者。不啻十餘度也。唐人詩曰。『經亂衰翁居破村。村中何事不傷魂。因供棗木無桑柘。爲著鄉兵絕子孫。』又曰。『君不聞漢家山東二百州。千村萬落生荆杞。』此等單語片詞。曾未能寫其慘狀億萬之一。然文明與喪亂俱盡。可概見矣。今之尤國民者。動曰其性卑屈。其心狡詐。其欲望劣下。其團體渙離。曾亦思民之生彼時代。處彼境遇者。非卑屈狡詐。何以自全。而『我躬不閱。遑恤我後。』之思想。既深入於人人腦識中。復更何心以愛同類。而計將來也。泰西史家言法蘭西當大革命時代。全國所產嬰兒。率多癩癩。蓋社會之現象。遺傳於其羣之心理中者。如是其可畏也。吾國當喪亂之際。惟彼卑屈狡詐劣下。渙離者流。差得避天行淘汰之酷。以遺其種於來禩。夫前輩之國民。既已死絕矣。後輩之國民。自其在胎中。已飽受恐怖憂鬱之教育。及其幼而處家庭。長而入社會。所習見習聞之嘉言懿行。則若何而可以全軀免禍也。若何而可以希寵取容也。就使天下復定之後。上而君相。下

而師儒竭全力以養其廉恥。陶其性情。而本能之回復。猶且待諸一二世以後也。乃霸者復陽植之而陰鋤之。使永無發生之期。未及一二世。而前度之喪亂。復繚演再見矣。喪亂之繚演。多一次。則毒害之遺傳。加一層。如之何其政治能力不澌滅以盡也。嗚呼。非一朝一夕之故。所從來遠矣。

吾既以思想能力兩者相比較。謂能力與思想不相應。爲中國前途最可憂危之事。然則今日談救國者。宜莫如養成國民能力之爲急矣。雖然。國民者其所養之客體也。而必更有其能養之主體。苟不爾者。漫言曰養之。養之其道無由。主體何在。不在強有力之當道。不在大多數之小民。而在既有思想之中等社會。此舉國所同認。無待詞費也。國民所以無能力。則由中等社會之無能力。實有以致之。故本論所研究之範圍。不曰吾輩當從何途始。可推能力以度諸人也。曰吾輩當從何途始。可積能力以有諸己而已。非有所歆於能力以自私。實則吾輩苟有能力者。則國民有能力。國民苟有能力者。則國家有能力。以此因緣。故養政治能力。必自我輩始。請陳數義。相策督焉。

一曰分業不遷。文明程度之高下。與分業之精粗成比例。此生計學之通義。而社會上一切現象。舉莫能外者也。西人恆言曰。『成功之要素有三。一天才。二機緣。三歷練。』夫天才不能事事而優也。有所長斯有所短。機緣不能事事而應也。有所適斯有所障。歷練不能事事而徧也。有所習斯有所疏。故善任事者。必自審其性之所近。地位之所宜。擇其一焉。日日而肆之。然後庶底於成。今日之中國。其無志國事者。視一切皆如秦越人之肥瘠。斯不必論矣。若乃有志者。見夫大局如此其危急也。應舉之事如此其繁多也。而聲氣相應之人。又如此其寥落也。乃抱雄心。厲苦節。欲取一切而悉荷。諸區區最少數人之雙肩。試觀數年以來。倡政治改革之人。非卽倡教育改革

之人乎。倡教育改革之人。非即倡實業改革之人乎。倡實業改革之人。非即倡社會改革之人乎。以實業論。則爭路權者此輩人。爭礦權者亦此輩人。提倡其他工商業者亦此輩人也。以教育論。則組織學校者此輩人。編教科書者此輩人。任教授者亦此輩人也。以政治論。則言革命者此輩人。言暗殺者此輩人。言地方自治者亦此輩人也。其他百端。大率類是。夫此諸事者。謂其一當辦。而其他可無辦焉。不得也。謂其一當急辦。而其他可緩辦焉。不得也。於是志士熱心之極點。恨不得取百事而一時悉舉之。恨不得取百事而一身悉任之。其遇可憐。其志可敬。雖然。謂其能力得緣此而獲進步。非吾所敢言也。若此者。美其名則曰總攬大綱。曰纖悉周備。若語其實際。其淺嘗而已。浮慕而已。孟子曰。人有不爲也。然後可以有爲。夫所謂不爲云者。非必其不可爲者也。可爲之事千萬。則爲之之人亦宜千萬。以一人而欲爲千萬人之所可爲。未見其能有功也。夫志士之欲有所爲也。無論其事或大或小。或徧或局。要之與政府所持主義。含反對之性質者也。政府反對。則不可不結國民之同情。以爲後援。然國民又大率可與樂成。難與慮始。自其初不肯遽表同情於地位脆弱之志士。勢使然也。故夫任事者。語於本原之地。不可有成敗之見存。固也。然發端伊始。與其徇心之所安而不恤敗。毋寧因勢之所導而必求成。昔人有言。帶鄉兵者。可以勝。不可以敗。今之任事。蓋有類於是矣。事之範圍雖小。苟有一二明效大驗。則可以起社會一般之信用。他日任他事。而阻力消其半矣。他人任他事。而阻力亦消其半矣。如是相引遞進。夫乃同情衆而能力强。如

近日粵漢鐵路案發起之者。在民間勢力綽薄之數人。漸以動全國之有力者。此爲國民號召。政府與外人爭權。利之嚆矢。使此事而能始終之。則政府知民力之不可侮。他事且將引爲後援。而吾民亦自信其力之果足以動政府。足以拒外人也。此後有他事。附和自衆。而能力日成。若此事失敗。國人共見。夫爭之累歲。而結果僅如是也。此後有他事。餒而已。故帶鄉兵者。取小不取大。攻瑕不攻堅。今欲

用脆弱之民力。萌茁之民氣。以與千年積威之政府宣戰者。舍此奚以哉。信如是也。則用志不紛。乃凝於神。不倡

一事則已。苟其倡之，則必有若干人焉。萃其聰明才力以專向於此一事，雖更有他事出焉，其重大過此數倍者，寧割棄之勿過問。何也？非此而此一事必不能就也。曾文正之治軍也，紮硬寨，打死仗，節節進取，得寸進寸。日軍之圍俄於旅順也，以全力陷一壘，乃次及他壘。今日吾黨之大患，在壘壘而撼之，欲百壘一時俱下，而終至於無一壘之能下也。其能力所以難進步者一也。今之志士有二蔽。甲曰：事多辦不了，奈何？乙曰：欲辦事，無事可辦，奈何？其論若甚相反，而受病乃同一源。人人自謂華拿，家家自況盧孟，實則我所欲辦之事，時或與我之地位不相應。故曰：辦不了，事與地位不相應，而於他無所屑焉。不復擇其相應者以自任，故曰：無事可辦。任舉一事，皆能言其概。若其層累曲折，批郤導窾，則未或習焉。未或究焉。故既曰辦不了，亦曰無事可辦。夫一國之中，不能人人而華拿，而盧孟，無待言也。且使一國之中，而果人人華拿，人人盧孟，則其國尙可以成國乎？吾有以知其必不能矣。嘗數日本之人物，不必西鄉木戶大久保伊藤大隈福澤，乃見重於其社會也。若前島密，所知者郵便耳。若澀澤榮一，所知者銀行會社耳。若井上勝，所知者鐵道耳。若大浦兼武，所知者警察耳。若伊澤修二，所知者音樂耳。若落合直文，所知者國文耳。若石黑忠德，所知者赤十字社耳。若市川團十郎，所知者演劇耳。試問彼諸人者，其功德之在日本，視西鄉輩又何多讓也？乃我國今日之志士，一若非言政治問題，不足云愛國，非投軍人社會，不足稱偉人，既乃不可藉手，則曰社會不我庸也。而因以自放。若此者，比比然也。其能力所以難進步者又一也。要而論之，立國之要素多端，缺一焉則國家無以自存。如人體然，分子弱斯全體弱，分子強斯全體強。官支藏府血脈，各自榮養，各自發達，而健全之衛生乃可期。今者中國之人格，譬諸猶初搏土也。我輩居其中，爲重要之一分子者，不務充其官能之所職以自效，而日冀全體之助長，其安能致哉？吾所謂以分業爲能力之大原。

者此也。

二曰互相協助。協助有積極消極兩義。積極的協助以相扶掖爲用。消極的協助以不相妨礙爲界。明乎此義則雖盈天下皆吾友焉可也。耗矣哀哉。吾國人之以排擠軋轢爲天性也。昔在晚明所謂士君子者。先意氣而後國家。訂闕未已而敵騎渡河。讀史者至今茹痛焉。還觀夫今日之志士。抑何其復相類也。他勿具論。卽如政治問題。所謂立憲革命兩主義之交闕。吾豈不知其惡感情之何自而生也。其僞託口頭禪以自營私者。微論矣。卽其根於血性。真懃懃焉盡瘁於此兩主義者。其相仇之跡。且日接而日厲也。推其相仇之故。殆有兩因。其一則謂彼主義成功而我主義將歸消滅也。其二則謂彼主義光大而我主義不能進行也。吾以爲由前之說誠哉然也。中國他日而亡國則已耳。苟不亡者。則結局於此兩主義必取一焉。而其他之一亦必歸劣敗之數。此所謂消滅者也。雖然。若因此而相仇也。則試問持一主義者。爲欲保存我國耶。抑欲保存我主義耶。如欲保存我主義者。苟其主義不適於國而不足以救國之亡。則國亡而主義亦安麗也。如欲保存我國者。則此國當由何主義以獲救。今方屬未定之問題。我而自信甲主義可以救此國也。我從而疊疊焉。固不必輕棄以徇人。彼而自信乙主義可以救此國也。彼從而疊疊焉。又何必其輕棄以徇我。若夫機會之既熟。適不適之形成。我與彼必有一焉。劣而敗者。固也。而我與彼又必有一焉。優而勝者。但使有一優勝。則吾國既已緣此而獲存。國存則我主義雖或消滅。而於吾保國之目的。不已達乎。乃必於始焉而相仇何爲者。由後之說。其意蓋謂苟吾主義而誠不適。則消滅固無所憾。願吾今者實信吾主義之最適。而無他主義焉。可以媿也。而吾主義之所以不發達。則由有他主義焉。持異論於其間。以淆天下之視聽也。吾愛吾國。故不得不愛吾主義。其有不利於吾主義者。吾得行吾主義之自衛權以

敵視之。此其說似也。雖然。惜其於利不利之界說。有所未瑩也。天下事固有極相反而適相成者。若君主專制與共和革命。兩極端也。而共和革命。每成就於君主專制極點之時。專制者種種積威。種種陰謀。皆不啻爲革命者作預備之資料。此泰西史上所習聞也。而況乎立憲革命之爭。乃與此異。立憲革命本不能爲對待之名詞。立憲者雖絕君統。然結局亦不過求立憲。故以對舉。其事本非相反。其效乃真相成。我而誠欲革命也。當思英國一六四六年何以能革命。非藉倫敦之國會軍乎。美國一七七五年何以能革命。非藉費城之十三州同盟會乎。法國一七九一年何以能革命。非藉巴黎之國民議會乎。夫使所立之憲而能副國民之願望也。則吾復何求。吾之革命主義。直拋棄焉可耳。或持極端之排滿主義。謂今之皇室雖使其憲政之完備。能如英如日。然以民族之惡者。必所不取。使其不能也。則經此一度之立憲。而民間之表同情於革命者。將益如傳染病。瀰漫而不可制。可斷言也。何也。向上之心。人性所同。譬諸處閹室者。終身未睹天日。謂世界除黑閹外。更無他物。則亦安焉。旁觀者語以光華糾縵之象。雖舌敝不能生其歌也。一旦穿壁爲闢戶牖焉。間日爲導出游焉。則光明線日縈其腦識。復囚梏之。安能受也。故朝廷一紙僞改革之詔書。以視民黨數十萬言之著書。數十百次之演說。其效力往往過之。他勿具論。卽今日持最極端之革命論者。試撫心自問。吾數年前之思想何如。今日何以能有此。則辛丑回鑾以後。所謂變科舉開學堂獎游學諸僞改革事業。其間接以助我發達者。豈淺渺也。比例以推。知立憲主義進一步。則革命主義必進一步。我而真信革命論之可以救國也。則正宜日夕禱祀。蘄立憲論之發達。以爲我助力。而其不得相仇之理由。果何在也。我而誠欲立憲也。當思日本之憲法。非以革命論極盛時始成立乎。意大利之憲法。非以革命論極盛時始成立乎。其他諸有憲法之國。豈有一焉不收功於革命前。革命後者。故夫憲法者。上下交

讓之結果也。交讓必先以交爭。譬諸兩交戰國。其究必出於和。願未有不能戰而能和者。不戰之和。屈服而已。卽戰後之和。其兩造從和約上所得之利益。又必視其戰鬪力之強弱以爲衝。憲法如和約然。民間對於政府而欲申其願望者。必其戰鬪力可以使政府屈服者也。戰鬪力能使人屈服者。則戰可也。無戰亦可也。今文明國家不憚戰。而莫不修戰備。革命者戰備也。輕言革命。譬猶贖武。贖武非計也。以主立憲故而仇革命。譬猶弛兵。弛兵尤非計也。抑曾思數年來政府所以屢有僞改革之舉者。其動機果何自乎。豈不以民羣可畏。姑爲一二以塞其望也。惜也。人民之戰鬪力。曾不足以生政府之嚴憚也。苟能之。則如十年前俄人之迫還遼東。不戰而屈日本焉可也。比例以推。知革命主義進一步。則立憲主義必進一步。我而真信立憲論之可以救國也。則正宜日夕禱祀。蘄革命論之發達。以爲我助力。而其不得相仇之理由。果又何在也。吾之爲此言。非謂欲使言立憲者舍己之所信。以從革命。或使言革命者舍己之所信。以從立憲也。更非爲模稜之言。與彼兩主義作調人也。吾見夫天地甚大。前途甚寬。實有容此兩主義並行不悖之餘地。各發表其所研究。各預備其所實行。不相菲薄。不相師。而豈必爲冷嘲熱罵。以快意。爲陰謀傾軋。以求勝也。彼諸文明國之有政黨也。各持主義。莫肯相下。願未有妬他黨之與己並立。而汲汲摧滅之者。不寧惟是。平居抗爭。寸黍不讓。一旦有敵國外患。則相與提攜。而黨界悉置度外矣。何也。內競者其對外之力。必不能強。使無公敵臨於其前。則內其黨而外他黨焉可也。苟有公敵。而甲乙兩黨猶自相外。則敵之利耳。而甲乙究皆何利焉。今日之中國。宜合全國上下。以對列強者也。藉曰未能。則亦宜合全國民以對政府。立憲革命兩者。其所遵之手段雖異。要其反對於現政府則一而已。政府方以千鈞之力相臨。而所謂立憲者。革命者。皆如方抽之萌孽。勢之強弱。與彼公敵固相萬也。莊生不云乎。魚處於陸。相啣以溼。相濡以沫。且

且而响焉。昔昔而濡焉。猶懼不醮。而乃互以摧殘狼藉爲事。相勝豈不甚易。獨敵我者則晏然以臥。竊竊焉以笑耳。吾實見夫數年來民黨能力之所以不進。其被壓抑於政府者不過十之一。其被摧夷於異黨者乃十之九也。是真可爲長慟者也。一言蔽之。則亦未明消極的協助之義而已。



飲冰室專集之五

張博望班定遠合傳

第一節 世界史上之人物

歐美日本人常言支那歷史不名譽之歷史也。何以故。以其與異種人相遇輒敗北故。嗚呼。吾恥其言。雖然。吾歷史其果如是而已乎。其亦有一二非常之人。非常之事。可以雪此言者乎。高山仰止。景行行止。讀張博望班定遠之軼事。吾歷史亦足以豪矣。

古今人物之與世界文明最有關係者何等乎。曰關新地之豪傑是已。哥倫布士之開亞美利加也。彼頓曲之開澳大利亞也。立溫斯敦之開阿非利加也。皆近世歐洲人種所以漲進之第一原因也。夫以文明國而統治野蠻國之土地。此天演上應享之權利也。以文明國而開通野蠻國之人民。又倫理上應盡之責任也。中國以文明鼻祖聞於天下。而數千年來。懷抱此思想者。僅有一二人。是中國之辱也。雖然。猶有一二人焉。斯亦中國之光也。凡世界之進步。必自諸地之文明相交互相接觸而生矣。彼歐洲所以有今日。實自上古時代安息文明埃及文明希臘文明所接構所和合而成也。而支那印度兩文明。直至近三四百年。而始與歐西相遇。殆東方諸國所以發達停滯之總因哉。雖然。當二千年前。而我中國豪傑。有櫛風沐雨。欲溝而通之者矣。惜乎繼其志者之無人耳。

苟其有之。則黃白兩貴種之揖讓於一堂。又豈俟今日也。

地勢之於人事也。海所以爲通。山所以爲阻。上世埃及希臘安息之發達。全藉地中海爲之媒介。近世五洲比鄰。其造此大業者。亦自航海來也。而吾中國古代豪傑之通絕域也。乃不於海而於陸。是哥倫布倂頓曲諸賢猶爲其易。而博望定遠實爲其難也。秦東發達之緩。實地理缺憾使然。而顧能以人事與天然爭。以造震古鑠今之大業。夫安得不使百世之下。聞其風而下拜也。嗟我愛國之同胞乎。盍載舞載蹈。以觀我先民之遠志大略何如矣。

第一節 西漢時代華族之實力及匈奴之強盛

我華族自四千年前。孳殖於黃河揚子江兩流域。各自發達。以趨於統一。至春秋戰國間。而羣力漸充實矣。交通頻數。斯有衝突。衝突劇烈。斯有調和。至秦而大一統之形以成。漢承其業。復休養而生息之者數十載。以至孝武之世。實上古時代一大結束也。而當其時也。穹北之野。有並轡而興者一蠻族焉。曰匈奴。匈奴之起。殆與我唐虞同時。山戎獫狁獯鬻。其與黃族小小衝突者。固已千餘年來。屢見不一見矣。戰國以還。我族日雄。彼亦日茁。衝突益劇。史記所謂冠帶戰國七。而三國邊於匈奴。於是秦燕皆築長城以拒胡。趙武靈王變俗胡服。習騎射。延高闕爲塞。凡以爲匈奴備也。時則有兩豪傑焉。曰趙將李牧。曰秦將蒙恬。終李牧之世。匈奴不敢入趙邊。蒙恬卻胡七百餘里。單于頭曼北徙者十有餘年。泱泱哉中國之威。書契以來未曾有也。及秦之亡。海宇鼎沸。而匈奴亦有一大豪傑起。曰冒頓。東滅東胡。虜其民。西擊走月氏。南并樓煩白羊。悉復蒙恬所奪故地。遂侵燕代。而南與諸夏爲敵國。華族全體對外之敵國。自茲始矣。

漢興以高帝之雄才大略能指揮羣豪削平海內而不能逞志於一冒頓三十萬衆困於平城白登之圍七日不食卒行曖昧反間之計僅乃得免及呂后時乃至遺書嫚辱謂兩主不樂無以自娛願以所有易其所無呂后以一國之代表遜詞卑禮以自解免爲中國羞甚矣至孝文時匈奴侵暴北邊候騎至雍甘泉京師大駭發三將軍屯細柳棘門霸上以爲備連歲不能罷事以金帛繇絮百物屈節和親乃稍蘇息此實愛國之士所茹痛積憤疾首而拊心者也孝武不忍華胄之凌夷與祖宗之積恥毅然欲一舉而雪之於是通西域制匈奴之議起亞洲各民族之相接觸其機起於中國與匈奴而實由我華族自強排外之一雄心來也揚雄疏云「夫前世豈樂傾無量之費役無罪之人快心於狼望之北哉以爲不壹勞者不久佚不暫費者不永寧是以忍百萬之師以摧餓虎之喙運府庫之財填廬山之壑而不悔也」偉哉此言此實民族主義之真精神而國家所恃以立於物競天擇之域者而豈後世迂儒退守畏葸疲輓苟且懷抱「無動爲大」之劣根性者所能夢也知此大義審此時勢則張博望班定遠之人物與其在數千年歷史上之價值可以識矣

西漢之所謂西域者當今世伊犁、新疆、青海、西藏之地直至葱嶺以西越帕米爾高原包土耳其斯坦、阿富汗斯坦、俾路芝斯坦、波斯、小亞細亞、迄地中海東岸古羅馬屬地之總名也秦皇雖攘卻戎狄築長城界中國而西不過臨洮冒頓時代匈奴大強西域諸國皆被服屬憑藉深厚爲中國憂故當時欲弱匈奴不可不有事西域而發此議而實行之者自張博望始。

第二節 張博望之略傳

張博望名騫。漢中人也。建元中爲郎。時匈奴降者言。匈奴破月氏王。以其頭爲飲器。月氏遁而怨匈奴。無與共擊之。漢方欲事滅胡。聞此言。欲通使道。然道經匈奴地。乃能達。於是募能使者。騫以郎應募。使月氏。與堂邑氏之奴名甘父者俱。出隴西。經匈奴。匈奴得之。傳詣單于。單于曰。月氏在吾北。漢何以得往使。吾欲使越。漢肯聽我乎。留騫十餘年。予妻有子。然騫持漢節不失也。既而與其屬亡。向月氏。西走數十日。至大宛。大宛聞漢之饒財。欲通不得。見騫喜。問欲何之。騫曰。爲漢使。月氏而爲匈奴所閉。道脫亡。惟王使入道送我。誠得至。反漢。漢之賂遺王財物。不可勝言。大宛以爲然。遣騫爲發譯道。抵康居。傳致大月氏。大月氏王已爲胡所殺。立其太子爲王。既臣大夏。而君之地肥饒。少寇。志安樂。又自以遠漢。殊無報胡心。騫從月氏至大夏。竟不能得月氏要領。留歲餘。還。並南山。欲從羌中歸。復爲匈奴所得。留歲餘。單于死。國內亂。騫與胡妻及堂邑父俱亡歸。漢拜騫大中大夫。堂邑父爲奉使君。自騫之出也。前後凡三十年。跋涉於冰天雪積之中。頓困於酪食毳衣之俗。往往數日。十數日。不得食。惟射禽獸以自給。初行時。與偕者百餘人。及歸。惟餘二人耳。雖其所歷艱險困苦之境。史不詳言。要之視立溫斯敦之開非洲。殆有過之無不及焉矣。史稱騫爲人彊力寬大。信人蠻夷愛之。嗟夫。非堅忍磊落不屈不撓之奇男子。其孰能排萬難。犯萬險。以卒達其所志者耶。

第四節 當時西域之形勢

當戰國之末。西曆紀元前三百三十六年頃馬基頓名王亞歷山大起。入亞細亞。滅波斯。征印度。建空前絕後一大帝國。未幾死於巴比倫。其部將士流喀立爲西里亞王。凡亞歷山大所征服亞洲之地。悉歸統轄。所謂條支國者是也。其後國

威漸衰。其屬地帕德利亞復自立爲一國。占阿謨河兩岸之地。中國稱爲大夏國。實在秦始皇統一天下之前四年。而帕其亞亦背條支自立。中國稱爲安息。及漢初。而安息破大夏。國勢大張。未幾大月氏東來。遂征大夏而王其地。

大月氏蓋圖伯特族。當漢秦之際。奄有河西地。其勢強大。陵轢匈奴。及冒頓單于起。屢敗之。於是月氏餘衆西走。占伊犁之大半。南攘塞種而據其地。當月氏之盛於河西也。其鄰國烏孫屢爲所苦。至是烏孫王昆莫藉匈奴力。破月氏。復建烏孫國。月氏遂南移於媯水之旁。臣服大夏。建大月氏國。時漢武元朔元年也。月氏既見逐於烏孫。塞種復見逐於月氏。遂遠徙於南。以略罽賓之地。罽賓卽北印度之迦西米兒也。

要之。當時葱嶺之西。大國凡四。條支在最西。其東爲安息。更東爲大月氏。大月氏之東南爲罽賓。大月氏之北爲大宛。當今費爾干地。更北爲康居。卽今之西比利亞。額里額思之荒原也。康居之東南。大宛之東。卽烏孫國。爲今伊犁。烏孫之東南。當匈奴之西邊。小國棋布。凡三十餘。其較大者爲疏勒。喀什附近于寘。和闐溫宿。阿克蘇龜茲。庫車附近者。喀喇沙姑師附近吐魯番。樓蘭羅卜淖。諸國自張博望以前。皆服屬於匈奴。匈奴置僮僕都尉以統監之。

第五節 張博望所通西域諸國

時中國人未知有印度也。博望既親至大宛。大月氏。大夏。康居。而傳聞其旁大國五六。具考其地形勢及所有產物。歸而報告之。且曰。臣在大夏時。見邛竹杖。蜀布。問安得此。大夏國人曰。吾賈人往市之。身毒國在大夏東南。可數千里。其俗土著。與大夏同。而卑溼暑熱。其民乘象以戰。其國臨大水焉。以竊度之。大夏去漢萬二千里。

居西南。今身毒又居大夏東南數千里。有蜀物。此其去蜀不遠矣。天子既聞大宛及大夏安息之屬。皆大國。多奇物。土著。頗與中國同俗。而兵弱。貴漢財物。其北則大月氏康居之屬。兵強。可以賂遺。設利朝也。誠得而以義屬之。則廣地萬里。重九譯。致殊俗。威德徧四海。天子欣然。以騫言為然。既而騫從大將軍衛青擊匈奴。以熟諳地形。知水草所在處。軍得以不乏。迺受封為博望侯。騫因獻結烏孫斷匈奴右臂之策。乃拜騫中郎將。使實行之。並西招大夏之屬為外臣。乃將三百人。馬各二匹。牛羊以萬數。齎金幣帛直數千鈞萬。道可便遣之。旁國。騫既至烏孫。致賜諭指。未能得其決。騫即分遣副使使大宛、康居、月氏、大夏。烏孫發譯道送騫。與烏孫使數十人。馬數十匹。報謝。因令窺漢。知其廣大。騫還。拜為大行。歲餘。騫卒。後歲餘。其所遣副使通大夏之屬。皆頗與其人俱來。於是西北諸國始通於漢矣。然騫鑿空。諸後使者皆稱博望侯。以為質於外國。外國由是信之。

計騫所通西域諸國如下。

國名	距中國里程	今地	張博望所經營
大宛	去長安萬二千五百五十里	俄屬土耳其斯坦	博望初使大月氏道經之。詳察其土俗。歸為伐宛之基。
康居	去長安萬二千三百里	同上	博望使大月氏。此
月氏	去長安萬一千六百里	同上	博望為漢使。欲與連盟。攻匈奴。未得要領。
大夏	……	阿富汗斯坦附近	時已為月氏所服。屬博望親至其地。後為通印度之嚆矢。
烏孫	去長安萬八千九百餘里	伊犁天山北路	博望始建議。結烏孫。以斷匈奴右臂。後卒成功。
烏弋山離	去長安萬二千二百里	阿富汗斯坦與波斯交界地	博望始知其國。後遣其部使通之。

安息

去長安萬一
千六百里

波斯及俾路芝斯坦

同上

罽賓

去長安萬二
千二百里

北印度

同上

奄蔡

俄羅斯

同上

身毒

印度

博望始聞其
地未能通

第六節 張博望功業之關係

博望通西域之役其功在漢種者有三

(一)殺匈奴猾夏之勢 自文景以來匈奴役屬西域結黨南羌地廣勢強蒸蒸日上候騎每至甘泉屯防及於細柳非有以挫之則小之為劉淵石勒之橫行河朔大之為金源蒙古之蹂躪神州左衽之痛豈俟數百年千年之後哉其時漢欲制匈奴則伐謀伐交之策遠交近攻之形不可不注意於西域張博望首倡通月氏結烏孫之議卒以斷匈奴右臂隔絕南羌斬其羽翼及孝武末世遂至匈奴遠遁而幕南無王庭元成以後卒俯首帖耳稱藩屬於我大國此數千年歷史上最大之名譽也而發之成之者實自張博望自今以往如有能繼博望之精神以對於外種者乎則世界之歷史安見為阿利安種人所專有也

(二)開亞歐交通之機 秦漢之間東西民族皆已成熟漲進務伸權力於域外羅馬帝國將興而阿利安族文明將馳驟於地中海之東西岸顧不能越葱嶺以求通於我國據近世史家所考據西域人呼希臘人曰伊耶安 Iakon 即耶宛 Yavan 之轉音故大宛國者即大希臘國之一部也蓋此地早為帕德利亞之希臘人所蔓延史記

載其俗與泰西古代多相類。其蒲萄苜蓿等名物，卽希臘語 *Botrus*, *Medikai* 等之譯音。蓋中國希臘兩文明種之相接實起於是。是黃種人與阿利安種交通之起源也。又史稱烏孫本塞地也。大月氏西破走塞王，塞王南越懸度。大月氏居其地，塞種者卽今日西人所謂沁謨種 *Semitic* 古代巴比倫人猶太人之所屬也。是黃種人與沁謨人交通之起源也。而溝而通之者，實始博望。博望實世界史開幕一大偉人也。

(三)完中國一統之業 當時滇黔諸國皆未內屬。漢武初雖嘗從事西南夷，然以費多罷之。其後感博望蜀布邛杖之言，卒再興作，使王然子、柏始昌、呂越人等十餘輩往求身毒國，遂開滇池，達交趾，卒使數千年爲國屏藩。雖其事不專成於博望，而創始之功實博望尸之。博望之有造於漢種者何如也。

第七節 班定遠之出現及其時勢

班定遠，名超，字仲升，扶風平陵人。生於後漢建武間。父彪爲徐令，兄固以文學聞。超少有大志，輕細節，然居常執勤苦，不恥勞辱。有口辯而涉獵書傳，幼隨兄至洛陽，傭書於官，以養母。久勞苦，嘗輟業投筆歎曰：大丈夫無他志略，猶當效傅介子、張騫立功異域，以取封侯。安能久事筆研間乎？久之，被除爲蘭臺令史，復坐事免官。永平十六年，奉車都尉竇固出擊匈奴，以超爲假司馬，將兵別擊伊吾。今哈密戰於蒲類海。今天山南路之巴爾庫勒多斬首虜而還。超之投身於軍事界外交界，實自茲始。

初，漢武旣通西域，斷匈奴右臂，虜勢寢衰。元成間，遂以五單于爭立，南向稽顙於我，求爲藩屬，以自庇。中國國威震於域外者，莫此爲盛。旣而新莽篡竊，輕侮遠夷，匈奴大怨，東連烏桓、鮮卑，西誘西域諸國，頻犯北塞。光武旣定

天下厭于戈不之討也。匈奴益驕，往往侵山陝邊鄙，爲士民患苦。未幾其國內亂，分爲南北，南匈奴通款內附，如元成間故事，乃居之於黃河南，而北匈奴方極盛，反覆無常，漸臣服西域諸國，脅以寇河西郡縣，邊警歲至，城門晝閉，於時漢與西域絕，既六十五年矣。其形勢恰如武帝時，漢廷亦知西域不定，則匈奴之患終不可得弭，於是乎一世之人傑班定遠，始得所藉手，以輝祖國名譽於天壤。

第八節 班定遠所定西域諸國

古今東西之豪傑，其勳名烜赫，駭耀於歷史上者，不一其人，不一其途。若以冒險無畏之精神，百折不撓之魄力，孤身去祖國數萬里外，撓四面之敵，而指揮若定，以建大功者，吾於英吉利滅印度之役，得兩人焉。曰克雷飛，曰哈士丁斯。克雷飛初爲東印度公司之書記，後被舉爲將，統英兵九百，士兵千五百，乘敵不意，攻孟加拉，走其王，據其地。英之有力於印，實自茲役始。克雷飛死，哈士丁斯襲其任，專以機謀，捭闔定大業，善撫納印人，善搆離印人，嗾其相鬪，因躡其後，以收其利。今英之有印度，皆此二傑之力爲之也。吾讀其傳記，愕焉，貽焉，崇拜焉，歌舞焉。竊歎吾祖國安得有若而人者，以爲國史光也。吾讀後漢書，吾乃知我二千年前之先民，有以一身而兼克哈二傑之所長，且其地位更危，其憑藉更薄，而所成就竟與彼等相埒者。於戲，斯真千古之快男兒，斯真世界之大英雄。斯何人斯，則班侯是已。今請案侯一生所經歷，以地爲經，以年爲緯，而略敘之。

(一)鄯善 超之立功，始於鄯善。時所部僅三十六人耳。初超既從竄，固擊匈奴有功，遂命以假司馬使西域。至鄯善，王廣禮敬甚備，後忽更疏懈。超謂其官屬曰：甯覺廣禮意薄乎？此必有北虜使來，狐疑未知所從也。明者睹

未萌。況已著耶。乃召侍胡詐之曰。匈奴使來數日。今安在。侍胡惶恐。具服其狀。超乃閉侍胡。悉會其所謂三十六人者。與共酣飲。因激怒之曰。卿曹與我。俱在絕域。欲立大功。以報國家。今虜使到。裁數日。而王廣禮敬。卽廢。如令鄯善收吾屬。送匈奴。骸骨長爲豺狼食矣。爲之奈何。官屬皆曰。死生從司馬。超曰。不入虎穴。不得虎子。於是乃約以初夜。將吏士往襲虜營。順風縱火。前後鼓噪。虜衆驚亂。超手格殺三人。吏兵斬其使及從士三十餘級。餘衆百許人悉燒死。翌晨。召王廣。以虜使首示之。一國震怖。超曉告撫慰。遂納子爲質。鄯善定。

(二)于闐 鄯善者。漢通西域第一孔道也。既定。則可以深入無狼顧憂。超報捷至京師。朝廷嘉其功。遂以爲軍司馬。欲益其兵。超辭焉。獨與本所從三十六人俱。時于闐王廣德新攻破莎車。雄霸南道。而匈奴遣使監護其國。超既西。先至于闐。廣德禮意甚疏。且其俗信巫。使巫請超所乘馬。以祠神。超佯許之。巫至。斬其首。以送廣德。因辭讓之。廣德素聞超在鄯善。誅滅虜使。大惶恐。卽攻殺匈奴使者而降。超重賜其王以下。因鎮撫焉。

(三)疏勒 班定遠之人格。可以爲國民模範者。不徒在其恬潑進取也。而尤在其堅忍沈毅。於疏勒一役。見之矣。時疏勒王兜題。本龜茲人。龜茲倚匈奴威。以凌疏勒。逐故王而王其地。超深察夫民族主義之關係。知疏勒人不甘爲龜茲役也。十七年^{平永}春。從間道至疏勒。遣吏往降兜題。勅之曰。兜題本非疏勒種。國人必不用命。若不卽降。便可執之。吏如命行事。超乃悉召疏勒將吏。說以龜茲無道之狀。因立其故王兄子忠爲王。國人大悅。皆請殺兜題。超不聽。欲示以威信。釋而遣之。疏勒由是與龜茲結怨。十八年。明帝崩。焉耆以中國大喪。攻沒都護陳陸。超孤立無援。而龜茲姑墨數發兵攻疏勒。超嬰守孤城。士吏單少。賭萬死以爭國威。卒不少挫。章帝卽位。恐超單危。不能自立。下詔徵還。超發疏勒。舉國憂恐。其都尉黎弇至。自刎以乞留。超至于闐。王侯以下。皆號泣抱馬脚。不使

東超亦欲遂本志。乃更還疏勒。疏勒兩城。自超去後。復降龜茲。超至。捕斬反者。而疏勒始復安。至是而超以三十
六人。用區區疏勒。當數國之衝。以嬰守者。既五年矣。嗚呼。自非天人。安得有此。

超之用疏勒也。以其居西域之中。立於四面大敵之衝。不定之而不足以示威信也。然疏勒初非欲爲漢用也。懾
於超之威與謀耳。非能爲漢用。而超必用之。則其眼光之銳遠。魄力之偉大。非尋常人所能及也。自茲役以後。而
疏勒之反叛尙三次。其一。則建初四年。其都尉番辰。結莎車以叛。超與徐幹擊破之。斬首千餘級也。其二。則元和
元年。疏勒王忠爲莎車所誘反。超乃更立其府丞成大爲疏勒王。攻忠。積半歲不能下。後定康居。而忠始降也。其
三。則章和元年。忠復說康居王借兵謀復國。詐降於超。超僞許。而密勒兵縛斬之也。蓋自超始至疏勒。以至大定。
中間凡十四年。超經營西域。其勢力之根據地。皆在於是。而心力抑已瘁矣。日人詩所謂「每經一難一倍來」。
吾於定遠之在疏勒見之矣。

(四) 尉頭 超被徵還時。尉頭與疏勒連兵叛漢。超復至。擊破之。殺六百餘人。尉頭定。

(五) 姑墨 姑墨亦龜茲屬國也。屢從龜茲攻疏勒。建初三年。超發疏勒康居于闐拘彌兵一萬餘。攻姑墨石城。
破之。斬首七百級。姑墨大衰。

自此役以前。班定遠所從漢兵。仍僅前此之三十六人耳。而手定者已五國。讐從者已十國。益以拘彌莎車月氏
烏孫康居也。見建初

三年超所上
請兵疏中 超因此遂欲平諸戎。爲國名譽。乃上疏陳「以夷狄攻夷狄之法」。以爲若平龜茲。則西域未服者

僅百之一耳。則匈奴右臂可復斷。而中國邊患可永弭。書奏。帝知其功可成。五年。建初以徐幹爲假司馬。將義勇千
人就超。超由是益有所藉。以行其志。

(六)烏孫 超欲進攻龜茲。以烏孫兵強。宜因其力。乃上言。烏孫大國。控弦十萬。故武帝妻以公主。至孝宣卒得
其用。今可遣使招慰。與共合力。帝納之。八年建初拜超爲將兵長史。假鼓吹幢麾。遂定烏孫。

(七)莎車 元和元年。超發疏勒于闐兵擊莎車。莎車陰嗾疏勒王忠叛。未克。章和元年。超斬王忠。疏勒大定。二
年。乃益發于闐諸國兵二萬五千人。復擊莎車。而龜茲王遣左將軍發溫宿姑墨尉頭兵合五萬人救之。超以衆
寡不敵。乃與于闐王佯遁。龜茲王以萬騎溫宿王以八千騎邀之。超知二虜已出。密召諸部勒兵。雞鳴馳赴莎車
營。胡大驚亂。追斬五千餘級。大獲其馬畜財物。莎車遂降。龜茲等因各退散。自是威震西域。

(八)月氏 初月氏嘗助漢擊車師有功。是歲貢奉珍寶符拔獅子。因求漢公主。超拒還其使。由是怨恨。永元二
年。月氏遣其副王謝將兵七萬攻超。超衆少。皆大恐。超誓軍士曰。月氏兵雖多。然數千里踰葱嶺來。非有運輸。何
足憂耶。但當收穀堅守。彼飢窮自降。不過數十日決矣。謝遂前攻超。不下。抄掠無所得。超度其糧將盡。必從龜茲
求救。乃遣兵數百於東界要之。謝果遣騎齎金銀珠玉以賂龜茲。超伏兵遮擊。盡殺之。持其使首以示謝。謝大驚。
遣使請罪。願得生歸。超縱遣之。月氏由是大震。

(九)龜茲 當時西域諸國。最倔強者爲龜茲。龜茲所以敢與漢爲難者。一由倚匈奴之聲援。二由恃諸小國之
從屬也。超既定諸國。龜茲通匈奴之路已絕。復無爪牙以相營衛。永元三年。龜茲遂率姑墨溫宿以降。乃以超爲
都護。徐幹爲長史。超脅龜茲廢其王尤利多。而立漢廷侍子白霸爲龜茲王。超自駐節龜茲。它乾城而使徐幹別
屯疏勒。至是西域諸國。唯焉耆危須尉犁。以前曾攻沒都尉陳睦。永元十年事懷二心。其餘悉定。

(十)焉耆及危須尉犁 六年秋。超遂發龜茲鄯善等八國兵。合七萬人。及吏士賈客千四百人。討焉耆。兵到尉

犁界遣使曉譬之曰都護來者爲鎮撫三國耳卽欲改過向善宜遣大人來迎當賞賜王侯以下焉耆王廣遣其左將北鞬支奉牛酒迎超賜而遣之焉耆國有葦橋之險廣乃絕橋不欲令漢軍入國超更從他道厲渡七月晦至焉耆去城二十里正營大澤中廣出不意大恐乃欲悉驅其人共入山保焉耆左侯元孟先嘗質京師密遣使以事告超超卽斬之示不信用乃期大會諸國王因揚言當重加賞賜於是焉耆王廣犁尉王汎及北鞬支等三十人相率詣超而其國相及危須王等不至坐定超怒詰廣數其罪遂叱吏士收廣汎等於陳陸故城斬之傳首京師所以雪國恥伸士憤也更立元孟爲焉耆王超留焉耆半歲慰撫之於是西域五十餘國悉皆納貢內屬

第九節 班定遠功業之結果

漢之通西域凡以弱匈奴也匈奴與漢不兩盛而皆以西域爲重前漢有然後漢亦有然自超既定西域北匈奴之勢頓衰諸國乘之南匈奴伐其前丁零寇其後鮮卑擊其左西域犄其右北虜憊困故和帝永元元年漢遂率大軍北伐降其二十餘萬人至燕然山泐石而還三年遂復再舉大破之單于率其餘衆遠遁於今裏海之北岸北匈奴之地遂空其衆之留故土者皆臣服鮮卑自是以往匈奴不復能爲吾患矣晉之劉淵劉曜不過受漢人者相類耳非復能用故掃除周秦以來千餘年之劇患一洒祖國之國恥論者或以歸功於衛青霍去病竇憲諸人而不知其皆賴張班之謀勇以坐收其成者也故黃族之威震於域外者以漢爲最而博望始之定遠成之二傑者實我民族帝國主義絕好模範之人格也

定遠功業之成專在以夷狄攻夷狄此實治野蠻國之不二法門也英之滅印度也政府未嘗動一旅之兵議會

未嘗籌一銖之餉。惟賦印度之財。以養印度之兵。用印度之兵。以墟印度之國。定遠之定西域。其先例也。定遠建初三年上疏云。『臣見莎車疏勒。田地肥廣。草牧饒衍。不比敦煌鄯善間也。兵可不費中國。而糧食自足。』至永元七年。封超爲定遠侯。詔書亦曰。『超安集于闐以西。踰葱嶺。迄縣度。出入二十二年。莫不賓從。改立其王。而綏其人。不動中國。不煩戎士。得遠夷之和。同異俗之心。而致天誅。蠲宿恥。以報將士之讎。』信哉定遠之能踐其言。而漢廷亦能審其功矣。今日西國之東方政策。卽以班定遠前此之所以待西域者待我。而惜乎我國中若定遠其人者。竟曠千載而不復一遇也。

是時羅馬方強。用兵於西亞細亞。屢破安息。中國日擴而西。羅馬日擴而東。上古世界兩大文明。幾相接觸。後漢書西域傳所謂大秦。卽羅馬也。超既定西域。迨永元九年。西域全定後四年又使部將甘英使大秦。抵條支。臨大海。欲度

而安息。西界船人謂英曰。海水廣大。往來者逢善風。三月乃得度。若逢遲風。亦有二歲者。故入海人皆齎三歲糧。海中善使人思土戀慕。數有死亡者。英聞之乃止。按泰西文明傳播廣速者。皆由海岸線多使然。此地理學者之

於陸地之豪傑。雖屢有其人。而海上不少。概見焉。此是時超年且七十矣。其妹曹大家上書。謂其『衰老被病。頭次甘英之不能通羅馬。實由不習海性使然耳。惜哉。』髮無黑。兩手不仁。耳目不聰明。扶杖乃能行。本語見蓋去卒前僅五年耳。超以永元十四年八月遷洛陽。九年使

假以歲年。予以精力。吾恐超之所成就。當不止此。或竟能躬赴大秦之役。布我黃帝子孫之聲明文物於歐土。爲全世界留一更大之紀念。未可知也。嗚呼。人傑矣哉。

第十節 結論

新史氏曰。今日阿利安民族所以殖民徧於大地。赫然爲全世界之主人翁者。遵何道乎。亦曰其人有冒險進取之精神而已。若哥倫布。若麥折倫。若伋頓廓。若立溫斯敦。皆以匹夫而闢一洲之基。開千古之利。彼中人道其往事。馨香之。尸祝之。千數百歲不衰。一若今日之樂利。半出於彼諸賢之賜者。吁。誠哉其然矣。然吾竊嘗求此等人物於我祖國。則如張博望班定遠者。亦何多讓焉。而後世崇拜之步趨之之人。何其稀也。抑吾爲張班傳。而忽有一最大之問題。橫湧於吾腦。夫博望定遠諸先輩。其遠識其毅力。不讓於泰西諸賢。彰彰明甚也。卽秦漢唐清諸君主。好邊功。關疆土。其兵力所及。威稜所播。亦不讓於近世所謂帝國主義諸大邦。又彰彰明甚也。然而「全世界主人翁」之名譽。顧在彼而不在我。不寧惟是。彼得一地。而一地卽永爲其所有。我得一地。會不足以保持之。至於再世。不寧惟是。彼多得一地。而母國日以繁榮。我多得一地。而宗邦反日加騷累。若是者何也。彼之主動力在國民。我之主動力自君主。關地同。而所以關地之目的不同。夫是以毫釐差而千里謬也。吾聞地學家言。拉丁條頓兩族性質之相異也。曰。「拉丁民族之殖民地好裝飾。條頓民族之殖民地貴營業。拉丁民族之殖民地由政府派軍隊以開之。條頓民族之殖民地由人民集公司以拓之。拉丁民族因得殖民地而勞費以爲國病。條頓民族因得殖民地而豐富以爲國榮。以故拉丁民族或放棄其殖民地而無所惜。條頓民族常保持其殖民地而不憚勞。」夫彼兩族者。同爲阿利安族。同事殖民之業。而因其所向之鵠所用之方略互異。其結果乃至大異若此。雖然。拉丁人之所以弱於條頓人者。彼則民之自殖。而此則政府之殖其民耳。而反諸爲民闢地之本意。尙非有所大謬。若中國前事。則正與彼等所執之主義成反比例者也。中國數千年來襲用之名詞。只有所謂「屬國」者。更無所謂「殖民地」者。夫闢地而以殖民。則雖勞費矣。而後此有倍蓰什伯之利益以爲之償。

故國不病而事可以久而不然者。民未有不勞。國未有不瘁者也。爾來歐美民族之各競於帝國主義也。彼其內力充實而膨脹於外。爲生存競爭之公例所迫。有不得已者存也。中國不然。人主好大喜功。快一時之意氣。以爲名高耳。故往往不顧其民力之如何。動罄之以從事於外。卽如漢武者。豈非不世之雄主哉。彼其憤於匈奴之屢辱。侵暴。賭全力以雪之。此民族排外之思想。固亦嘗有不得已者存。及其末流。乃不啻絞內地居庶之脂膏。以奉事小夷。利害之顛倒甚矣。漢書張騫傳云。『騫之位烏孫也。天子使齋牛羊萬數。金幣直數千鉅萬。而後此求宛馬者。相望於道。一輩大者數百人。小者百餘人。所齋操大。傲博望侯時。』云云。故漢武以開邊之故。舉文景數十年來官民之蓄積而盡空之。益以桑孔心計。猶且不足。卒至元元愁歎。海內騷然。嘻。何其悖乎。吾聞羣學家言曰。凡兩羣之相交通。相鬭奪也。未有不起於爭自存。蓋我勝彼而可以吸彼之利爲我有。故不惜一時之苦痛。以易之云爾。未聞有自損而啗彼以利以爲快者也。戰敗固損。而戰勝亦損。是以自損爲相爭之究竟目的。如之何其可也。又漢武之通西域。其亦有類於是焉矣。然此猶可曰。以匈奴鉅患之故。今欲制彼。不可不以小損易大害也。而後此匈奴旣衰之後。邊費且復不戢。則又何也。甘露以後。單于入朝。賞賜累巨萬。發車騎萬六千以送之。轉倉儲數萬斛以給之。每單于朝一次。則北方之民。失業失食。轉於溝壑者。不可勝數。永元間。司徒袁安上疏云。『漢故事。供給南單于費歲直一億九十餘萬。西域歲七千四百八十餘萬。』時北匈奴請款論者或謂宜以待南單于之禮待之故袁安引此統計嗚呼。幾何其不胥中國而空之也。不寧惟是。東漢之初。南單于內附。乃居之於河南。空吾民釣遊耕鑿之地。揖外族以使入。其後部族數十萬。孳乳寢多。布滿畿輔。桓帝時。又從遷許。及魏武始憂之。以其旣在內地。人衆猥多。懼必爲寇。乃分其衆爲五部。居太原祁縣太陵諸地。晉武時。塞外匈奴歸化者踵至。悉授土居之。與吾民雜居。於是平

陽西河太原新興上黨樂平諸郡。悉雜腥羶矣。後此江統雖爲徒戎論。終不見納。卒至劉淵石勒。起於肘腋。戎狄迭有中夏者數百年。爾後霸者。始終蹈其覆轍而不悟。雖以唐太宗之賢明。猶割神州以宅索虜。寵異胡將。卒召河朔之變。蓋數千年來。帝者對外之政略。莫不皆然。此誠古今萬國之所未聞。千種萬種不可思議之現象也。夫以古代亞歷山大該撒等之力征天下。雖非能如今日之民族帝國主義者。專拓之以爲民藪也。然要未嘗有疲國力以供奉外會。虛國土以容納異族者矣。而中國胡乃若此。無他。霸者快一己自大之私意。驚一時皮相之虛榮耳。以彼一念故。而此最壯快最名譽之美舉。反被誤用之以毒天下。不見夫乾隆間故事乎。數次大舉攻緬甸。不下。乃不惜重賂其酋。使貢象數匹。以博十全老人之一頭銜。要而論之。皆不惟其實惟其名耳。惟然。則雖屬國徧天下。而於我國民會無絲毫之益。而反蒙莫大之累。故歷朝好勤遠略之主。所以得地而不能守。開邊而輒致亂者。皆此之由。夫拉丁民族所闢之地。固猶有殖民也。徒以重虛榮輕實益之故。其新地猶且爲母國累。而況乎不殖一民於境外。而反自空其地。徠敵國之民而殖之者耶。然則迂儒鄙生之斷斷焉以遠征外競爲大戒者。蓋亦有詞矣。而此等議論。既習於人心。則如張博望班定遠其人者。遂益不爲世所重。而國民進取冒險之精神。且日摧滅以至於盡。吾甚惜以博望定遠之人格之事業。可以爲我黃族男兒之好模範者。乃竟爲一二霸者倒行逆施之政略所點污也。

雖然。我國民亦有罪焉矣。夫誰使汝不擇地以自殖。而惟俯首帖耳。一任霸者之振箠以驅繫之也。吾聞數百年前。英人之不堪虐政者。相率渡航新世界。遂開今日之美國。夫彼豈必視其政府之方針而始進行也。論者謂今日五大洲。無復可以容我民族膨脹之餘地。其然耶。豈其然耶。勿徵諸遠。卽張班二傑所留紀念之一大地。猶足

以當歐洲一強國而有餘也。抑吾又聞南洋新嘉坡檳榔嶼諸地。其刈蓬蒿戰士蠻而奠定之者。實惟我黃帝子孫。然則張班之芳躅。固未必遽絕於今日。而無自治之力以承其後。雖自得之。而終不免以餌條頓民族。而自爲其奴隸。若是乎。則雖有一二博望定遠其人者。又安足貴耶。又安足貴耶。



飲冰室專集之六

黃帝以後
第一偉人

趙武靈王傳

(一)敘論 痛哉恥哉。中國民族之外競史也。自商周以來四千餘年。北方賤種。世世爲中國患。而我與彼遇。劣敗者九而優勝者不及一。其稍足爲歷史之光者。一曰趙武靈。二曰秦始。三曰漢武。四曰宋武。(劉裕)如斯而已。如斯而已。而四役之中。其最足爲吾儕子孫矜式者。惟趙武靈。

(二)當時本族之形勢 黃帝以後。我族孳乳寢多。分布於中原。而其勢不相統合。雖夏后殷周之盛。其元后與羣后。皆南面分土而治。有不純臣之義。所謂大一統者。不過一虛名已耳。及春秋以降。五霸迭興。兼并盛行。降及戰國。繼以七雄。凡歷四五百年。逮嬴秦興。而中國始統於一。五霸七雄者。實我古代史之帝國主義過渡時代也。而其勢愈搏愈劇。如重學公例。所謂物墜空中。愈距地近。而其速率愈增。七雄時代者。實短兵相接。決勝負於一髮之時機也。

羣學公例。惟內方充實。乃能宣洩於外。亦惟外競劇烈。而內力乃以益充。故我民族活潑進取之氣象。惟七雄時代爲最盛。皆此之由。

(三)當時外族之形勢 北國之先。其所自出。不可深考。史家或以爲亦神祖黃帝之支裔。雖然。既竄於異域。與母國殊其語言。殊其風俗。殊其宗教。則已不得謂之爲同一民族。自周以來。所謂山戎獫狁者。已世爲中國患。騷

山之變爲歷史上第一次之國恥。此後雖齊晉繼霸，並力外攘，而聲威所訖，綦微末矣。卒乃白狄赤狄盤踞中原，爲患心腹。終春秋之世，吾族苦之。然彼族發達甚緩，且散漫不相統紀，猶甚於我。以故主客之勢，猶不相敵。降至戰國，而控弦之種，漸加強盛。所謂匈奴一種屬者，始崛起於北方。史記所謂冠帶之國七，而三國邊於匈奴，卽秦趙燕是也。故三國皆築長城以爲防。至是而匈奴與中國，殆有不兩立之勢。

(四)趙之地位。自晉悼公和諸戎後，戎翟皆朝於晉，不相侵犯。故中國不病，而狄亦得安堵以自強。至周安王時，晉卿趙襄子帥師踰句注，兼戎取代，以攘諸胡。此亦畏偪不得不爾也。而趙與胡之交涉，自茲益繁。三卿分晉，趙有代句注以北，而魏有西河上郡，皆與狄界邊。其後秦滅義渠，魏西河上郡入於秦。自此三晉之中，惟趙邊胡，而其所當之衝，視秦燕爲更劇。趙不創胡，胡必弱趙。趙之憂患在是，趙之所以盛強亦在是。

(五)武靈王伐胡之預備。

(戰國策)武靈王平晝閑居，肥義侍坐。曰：王慮世事之變，權甲兵之用，念簡襄之跡，計胡狄之利乎？王曰：嗣立不忘先德，君之道也。錯質務明主之長，臣之論也。(中略)今吾欲繼襄王之業，啓胡翟之鄉，而卒世不見也。敵弱者用力少而功多，可以無盡百姓之勞，而享往古之勳。夫有高世之功者，必負遺俗之累；有獨智之慮者，必被庶人之怨。今吾將胡服騎射，以教百姓，而世必議寡人矣。肥義曰：臣聞之，疑事無功，疑行無名。今王既定負遺俗之累，殆無顧天下之議矣。夫論至德者不和於俗，成大功者不謀於衆。愚者暗於成事，智者見於未萌。王其遂行之。王曰：寡人非疑胡服也，吾恐天下笑之。狂夫之樂，智者哀焉；愚者所笑，賢者戚焉。世有順我者，則胡服之功，未可知也。雖驅世以笑我，胡地中山，我必有之。王遂胡服。

欲使外競有力。非舉其國而爲軍國民不可。七雄中實行軍國主義者。惟秦與趙。趙之有武靈肥義。猶秦之有孝公商鞅也。而秦之主動力在臣。趙之主動力在君。商君者。秦之俾斯麥。而武靈王者。趙之大彼得也。王之變胡服也。凡以爲習騎射之地也。以騎射教百姓。所謂舉國民而皆兵之也。

(六)輿論之反抗及王之英斷。

(戰國策)王使王孫緹告公子成曰。寡人胡服。且將以朝。亦欲叔之服之也。家聽於親。國聽於君。古今之公行也。今寡人作教易服。而叔不服。恐天下之議之也。夫制國有常。而利民爲本。從政有經。而令行爲上。故明德在於論賤。行政在於信貴。今胡服之意。非以養欲而樂志也。事有所出。功有所止。事成功立。然後德可見也。且寡人聞之。事利國者行無邪。因貴戚者名不累。故寡人願慕公叔之義。以成胡服之功。使緹謁之。叔請服焉。公子成再拜曰。臣固聞王之胡服也。不佞寢疾。不能趨走。是以不先進。王今命之。臣固敢竭其愚忠。臣聞之。中國者。聰明睿智之所居也。(中略)遠方之所觀赴也。蠻夷之所義行也。今王釋此而襲遠方之服。變古之教。易古之道。逆人之心。畔學者。離中國。臣願大王圖之。

使者報王。王曰。吾固聞叔之病也。卽之。公叔成家自請之曰。夫服者所以便用也。禮者所以便事也。是以聖人觀其鄉而順宜。因其事而制禮。所以利其民而厚其國也。(中略)是故聖人苟可以利民。不一其用。果可以便事。不同其禮。儒者一師而禮異。中國同俗而教離。又況山谷之便乎。(中略)窮鄉多異。曲學多辨。不知而不疑。異於己而不非者。公於求善也。今卿之所言者俗也。吾之所言者所以制俗也。今吾國東有河薄洛之水。與齊中山同之。而無舟楫之用。自常山以至代上黨。東有燕東胡之境。西有樓煩秦韓之邊。而無騎射之備。故

寡人且聚舟楫之用。求水居之民。以守河薄洛之水。變服騎射。以備燕東胡樓煩秦韓之邊。且昔者簡主不塞晉陽。以及上黨。而襄主兼戎。取代以攘諸胡。此愚智之所明也。先時中山負齊之強。侵掠吾地。係累吾民。引水圍鄆。非社稷之神靈。卽鄙幾不守。先王忿之。其怨未能報也。今騎射之服。近可以備上黨之形。遠可以報中山之怨。而叔也順中國之俗。以逆簡襄之意。惡變服之名。而忘國事之恥。非寡人所望於子。公子成再拜稽首曰。臣愚不達於王之議。敢道世俗之聞。今欲繼簡襄之意。以順先王之志。臣敢不聽令。再拜。乃賜胡服。

凡改革之業最難。其利在後。愚者弗見。知者卽或見之。而疑慮其成。若夫目前之不便。則萬衆所共睹也。故非智勇兩備者。其不挫躓於中途希矣。武靈王之大計畫。非徒在陸軍也。而猶在水師。一面廣舟楫之利。一面採騎射之長。此其政策之全體也。彼所以語公子成者。於國勢敵情。洞見無餘蘊矣。而水居之民。可以用因。騎射之民。勢必用創。因尙易而創斯難。其必汲汲易胡服也。固以謀騎射之便利。抑亦借此以壹舉國之觀聽。而定民志也。日本變法時之易服。亦猶此意而已。故以騎射爲其目的。而以胡服爲其手段。彼其目的。已非庸衆所得喻。況於手段。其駭必更倍蓰矣。王固知之。而必厲行之。此所謂智勇俱備者也。商鞅爲輿論所反對。而以威力屈之。武靈爲輿論所反對。而以理勢服之。雖其所處地位各不同。而武靈之手段。固高鞅一籌矣。法行自貴。近始此兩君所同認也。乃鞅則罰太子而刑師傅。武靈則先施於公叔而禮下之。公叔變而舉國皆變。其政略豈不亦遠耶。史復載趙文趙造周紹趙燕。與王爭辯胡服。其論甚詳。周紹之言曰。『舉國未通於王之胡服。』觀此亦可見當時全國輿論譁囂之一斑也。文繁不復具引。

當時反對論。非徒在胡服也。而並在騎射。試以史文證之。

(戰國策)王破原陽以爲騎邑。牛贊諫曰：國有固籍，兵有常經。變籍則亂，失經則弱。今王破原陽以爲騎邑，是變籍而棄經也。且習其兵者，輕其敵，便其用者，易其難。今民便其用而王變之，是損君而弱國也。故利不百者，不變俗，功不什者，不易器。今王破卒散兵以奉騎射，臣恐攻獲之利，不如其所失之費也。王曰：古今異利，遠近易用，故賢人觀時而不觀于時，制兵而不制于兵。子知官府之籍，不知器械之利，知甲兵之用，不知陰陽之宜，故兵不當於用，何兵之不可易？教不便於事，何俗之不可變？今重甲循兵，不可以踰險，仁義道德，不可以來朝。吾聞信不棄功，智不遺時。今子以官府之籍，亂寡人之事，非子所知。牛贊再拜稽首曰：臣敢不聽令乎？遂胡服率騎入胡，出於遺遺之門，踰九限之固，絕五徑之險，至胡中辟地千里。

(七)武靈王之成功。王以其遠大之政策，英鷲之材略，冒萬險，犯萬難，以實行軍國民主主義，卒能使貴族服其教，黎元化其俗。十年之間，四征八討，使趙爲當時一等國，揚我民俗，聲威於域外。前乎此者，爲山甫方叔之所不能及；後乎此者，爲蒙恬衛青之所不能幾。本族歷史名譽之紀念，以此爲最。今據史記略次其年表如下。

武靈王卽位八年，五國相王趙獨否，曰：無其實，敢處其名乎？令國人謂己曰君。

十七年，王出九門，爲野臺，以望齊中山之境。

十九年正月，大朝信宮，召肥義與議天下五日而畢，遂下令易胡服，改兵制，習騎射。

同年，北略中山之地，至於房子，遂之代北，至無窮之門，西至河，登黃華之上。

二十年，王略中山地，至寧葭，西略胡地，至榆中，林胡王獻馬，歸使樓緩之秦，仇液之韓，王賁之楚，富丁之魏，趙爵之齊，代相趙固主胡，致其兵。

二十一年攻中山。趙祒爲右軍，許鈞爲左軍，公子章爲中軍，王并將之。牛翦將車騎，合軍曲陽，攻取丹丘、華陽、鴟之塞。王軍取鄗、石邑，封龍東垣。中山獻四邑，請和王，許之，罷兵。

二十三年復攻中山。

二十四年，牛贊胡服，率騎入胡，出於遺遺之門，踰九限之固，絕五徑之險，至胡中，辟地千里。

二十六年，復攻中山，攘地北至燕代，西至雲中、九原。

二十七年五月，大朝於東宮，傳國立王子何爲王，是爲惠文王。武靈王自號主父。惠文王二年，主父行新地，遂出代西，遇樓煩王於西河，而致其兵。

三年，主父滅中山，遷其王於膚施，起靈壽北地方，從代道大通還歸，行賞大赦，置酒酺五日。

吾述武靈王之偉業，有欲求讀者，注意深察者，一事曰：王之兵力所加，皆在異種而非同種是也。王所侵略者，曰中山，曰林胡，曰樓煩。樓煩在今代州北三十里，卽匈奴所居地。林胡在今陝西榆林鎮東北四百五十里，種以胡名。此兩者之爲異族，衆所共知也。若中山，卽春秋時之鮮虞，爲白狄別種。春秋末最強，晉屢伐之，不得志。武靈王以十餘年全國之兵力，僅乃滅之。於是今保定、大同、宣化諸地，始隸內版，使無趙武靈王，則冒頓平城之禍，或不得漢高之時而已見於中國，蓋未可知耳。唐人詩云：『若使龍城飛將在，不教胡馬度陰山。』弔古撫今，感慨係之矣。

武靈王舉動之尤奇特者，則棄萬乘之尊，而自從事於戰陣是也。

（史記趙世家）武靈王自號爲主父，欲令子主治國，而身胡服，將士大夫西北略胡地，而欲從雲中、九原直南。

襲秦於是詐自爲使者入秦。秦昭王不知，已而怪其狀甚偉，非人臣之度，使人逐之，而主父馳已脫關矣。審問之，乃主父也。秦人大驚。主父所以入秦者，欲自略地形，因觀秦王之爲人也。

於戲！此等舉動，豈不壯哉！豈不偉哉！使主父而永其年，則一統之業，其將不在秦而在趙，而白登之金縉，甘泉之烽火，或遂不至爲我國史污也。而乃亢龍有悔，遺恨於沙丘，鸚鵡能言，齋志於爵穀，大業之就，雖曰人事，豈非天命耶！嗚呼！

八）結論 國史氏曰：論者或以爲國民之性質，全由地理上遺傳上所限定，謂吾國民之文弱，其天性也。嘻！何爲其然！觀於武靈王時代之趙國，雖泰西之斯巴達，何以尙之？夫非猶是吾輩之祖宗也歟！朔方健兒，好身手，昔何勇銳，今何愚，故知黎民於變，放勳所以光被，遐不作人。周王所以壽考，齊桓好紫，一國易服，豐沛之間，羣兒椎埋，一二英雄，以右武精神鼓舞，而左右之舉國靡然，今猶昔耳。嗚呼！使武靈王而在今日者，德皇維廉第二，瞠乎後哉！武靈王卒後二十餘年，而趙將有李牧。

附 李牧傳

（史記李牧傳）李牧，趙北邊良將也。常居代雁門，備匈奴，以便宜置吏，市租皆輸入幕府，爲士卒費。日擊數牛饗士，習騎射，謹烽火，多間諜，厚遇戰士，爲約曰：匈奴卽入盜，急入收保，有敢捕虜者斬。匈奴每入，烽火謹，輒入收保，不敢戰。如是者數歲，亦不亡失。然匈奴以李牧爲怯，雖趙邊兵亦以爲吾將怯。趙王讓李牧，李牧如故。趙王怒，召之，使他人代將。歲餘，匈奴每來出戰，出戰數失利，失亡多，邊不得田畜，復請李牧。牧杜門不出，固稱疾。趙王乃復

強起使將兵。牧曰：王必用臣。臣如前，乃敢奉令。王許之。李牧至，如故約。匈奴數歲無所得，終以爲怯。邊士日得賞賜而不用，皆願一戰。於是乃具選車得三百乘，選騎得萬三千匹，百金之士五萬人。設者索隱云謂能射者也十萬人，悉勸習戰。大縱畜牧，人民滿野。匈奴小入，佯北不勝，以數千人委之。單于聞之，大率衆來入。李牧多爲奇陳，張左右翼擊之，大破殺匈奴十餘萬騎，滅襜褕，破東胡，降林胡。單于奔走，其後十餘歲，匈奴不敢近趙邊城。《史記馮唐傳》：「當是之時，趙幾霸，其後會趙王遷立，其母倡也，乃用郭開讒，卒誅李牧，令顏聚代之，是以兵破士北，爲秦所禽滅。」

國史氏曰：古稱兵法有守如處子，出如脫兔者，豈李牧之謂耶？漢文時，匈奴數爲邊患，苦烽騎至候甘泉，景帝乃納晁錯納粟拜爵徙民實邊，以屯爲兵之議，而匈奴勢乃少殺。殆今世所謂武裝的平和非耶？未幾而孝武卒用其力，命將出師，逐北千里，致漠南無王庭，呼韓邪以後，而冒頓之裔且俛首歸命於我大邦矣。漢世孝文孝景孝武三代之境遇之軍略，李牧以一身備之，茂陵之聞而拊髀也，宜哉！抑李牧之人格，武靈王之教育所產出也。李牧之功業，武靈王之經營所留貽也。一夫善射，百夫決拾，英雄之澤，數世未斬，盛矣夫！

飲冰室專集之七

明季第一
重要人物

袁崇煥傳

第一節 發端

有人焉。一言一動。一進一退。一生一死。而其影響直及於全國者。斯可謂一國之人物也已矣。吾粵崎嶇嶺表。數千年來。與中原之關係甚淺薄。於歷史上求足以當一國之人物者。渺不可覩。其在有唐。六祖慧能。大弘禪宗。作佛教之結束。其在有明。白沙陳子。昌明心學。導陽明之先河。若此者。於一國之思想界。蓋占一位置焉矣。若夫以一身之言動進退生死關係國家之安危民族之隆替者。於古未始有之。有之則袁督師其人也。

明史之傳督師也。一則曰。『我大清舉兵所向無不摧破。罔敢議戰守。議戰守自崇煥始。』再則曰。『自崇煥死。邊事益無人。明亡徵決矣。』嗚呼。何其言之有餘痛耶。吾聞萬季野明史稿。爲督師立傳。凡二巨冊。見魏默深古微堂外集度其於督師之雄材偉略。遠猷碩畫。必能纖悉詳盡。又督師當時所以對待敵軍。及敵之所以委曲行反間者。一切重要關目。必能甄載無遺。惜乎官修之本。忌諱滋多。原稿今雖流傳人間。而鄙人韋陋。未獲鈔讀。以此率爾論述。能無慙焉。雖然。以數千年來歷史上一大異動。重以鄉先正之記念。豪雖不文。烏可以已。作袁督師傳。

第二節 袁督師之時代

滿洲之初起東裔。自其始非必有併吞中原之大志也。而明季之君庸帥。復將疲卒。屢實有以啓之。故欲知當時明清遞嬗之歷史。當分三方面觀察焉。

一曰北京政府。當時北京政府之權力有四。一曰帝。二曰內監。三曰閣臣。四曰本兵。袁督師時代之政府。其帝則熹宗之昏弱而無能也。懷宗之下急而善疑寡斷也。其內監則與魏忠賢相終始也。其閣臣則皆闕冗伴食之輩也。而制閫外將帥之命者。尤在本兵。明末本兵之權至重也。今將天啓以來任兵部尙書者列表如下。

六年	五年	四年	三年	二年	天啓元年	萬曆四十四年 至四十八年
馮嘉會 永光	高第 王永光	彥彥	趙彥 漢儒	孫承宗 董漢儒	張鶴鳴 王象乾	黃嘉善
六年至八年	五年	四年	三年	二年	崇禎元年	七年
鳳翼	張鳳翼 明遇	熊明遇 廷棟	梁廷棟 申用懋	王在晉 王洽	王洽 鳴泰	嘉會 王之臣 霍維華 崔呈秀 閻鳴泰
十七年	十六年	十五年	十四年	十三年至	十二年	十年至十一年
縉彥	馮元殿 張縉彥	張國維 新甲	陳新甲	傅宗龍 嗣昌	嗣昌	鳳翼 楊嗣昌

(表之說明)崇禎二年以後之本兵於袁督師無關。並列之者。為末節敘督師逝後之時局須資參考也。

凡與東事最有關係者添符於其旁

二曰東北邊將 邊將之任免。政府主之。而邊將之得人失人。大局係之。豈惟袁督師。即如熊廷弼孫承宗之流。使能久於其位。東事之敗壞。尚不至此極也。今將當時任東北兵事之將帥列一表。次乃論其功罪。

人	官	年	摘要
楊鎬	巡撫遼東	萬曆三十八年	旋罷
楊鎬	經略遼東	萬曆四十六年	四十七年三月帥師出塞敗逮治罪
熊廷弼	宣慰經略遼東	至萬曆四十七年	四十七年三月代楊鎬四十八年八月罷
袁應泰	經略遼東	至天啓元年	代熊廷弼其年三月清兵入遼瀋死之
薛國用	經略遼東	同	
王化貞	巡撫廣寧	天啓元年	化貞以元年五月廷弼以六月受任其明年清兵
熊廷弼	經略遼東	同	取西平堡化貞棄廣寧與廷弼走入關俱被逮
王在晉	經略遼東	天啓二年	其年八月告歸孫承宗代之
王象乾	薊遼總督	同	
孫承宗	經略薊遼	天啓二年	五年十月為魏忠賢排去高第代之
袁崇煥	監關外軍	至天啓二年	時實官由僉事進按察使
高第	經略遼東	至天啓五年	六年七月以不救寧遠罷職

三曰滿洲之勢力。滿洲之勢力與明邊將之賢否為消長。今列一略表與前表參觀而大勢可知矣。

王之臣	經略遼東	天啓六年	尋罷經略不置 至是罷經略不置以關內外專任崇煥
袁崇煥	巡撫遼東	天啓六年	
王之臣	巡撫遼東	崇禎元年	
袁崇煥	督師薊遼	崇禎元年	
		崇禎元年	
		崇禎二年	

萬曆四十四年 清太祖始改元天命

四十六年 始伐明克撫順

四十七年 明以兵二十四萬伐清不克

天啓元年 清攻克瀋陽

二年 清攻克西平堡

六年 清兵大舉西渡遼河攻寧遠不克其年清太祖崩

七年 明清議和不成清來攻不克

崇禎元年 復議和不成

二年 清大舉入寇

合觀三表。然後當日之時局可得而論次焉。萬曆四十六年以前。清兵方有事於扈倫四國。哈達葉赫烏拉輝發也未有窺中原之志也。及天命建元。四年十四國已服其三。惟葉赫恃明援不下。欲圖之則狼顧。恐明之議其後也。故四十六

年以七大憾誓天伐明。是爲明清交兵之始。其年雖克撫順。然未嘗守也。時楊鎬始爲經略。鎬鎮朝鮮者十餘年。喪師數次。本無軍略。朝廷以其諳遼事。故畀以重任。而大學士方從哲。兵部尙書黃繼善等。日促鎬進兵。御史王象恆力言非策。引哥舒翰出潼關爲戒。不能用也。乃集瀋陽兵二十四萬。分四路深入。襲清都。清太祖以五萬人拒之。并力破其一路。閱五日而三路皆破。鎬遂以喪師逮罪。是爲清軍第一次得志。則楊鎬之溺職。與部臣之調度乖方爲之也。於是乃起熊廷弼代鎬。廷弼者。前於三十六年巡按遼東。興屯田。察軍實。遼人所神明視也。時遼灣大震。諸城堡軍民盡竄。數百里無人迹。中外謂必無遼。廷弼兼程冒雪。徧閱形勢。招流移。繕守具。簡士馬。肅軍令。主固守不浪戰。集兵十八萬。分布驍陽。清河。撫順。柴河。三岔。鎮江。諸口。小警自禦。大警互援。更選精銳爲游徼。乘間收零騎。擾耕牧。以俟竄會。清人憚之。爲之按兵不出者歲餘。而明臣忌廷弼者。爭劾其不戰。廷弼遂不安其位。憤憤抗疏乞罷斥。疏云。今朝堂議論。全不知兵。冬春之際。敵以冰雪稍緩。閏然言師老財匱。馬上促戰。及軍敗。始愀然不敢復言。比臣收拾甫定。而愀然者又復閏然責戰矣。自有遼難以來。用文將用武吏。何非臺省所建。白何嘗有一效。疆場事當聽疆吏。自爲之。何用拾帖括語。徒亂人意。一不從。輒怫然怒哉。以袁應泰代之。應泰吏事敏練。然非將才。會蒙古諸部大饑。多入塞乞食。應泰言不急收之。且爲敵有。招降數萬。分處遼瀋二城。降者多占民居。婦女遼人大怨。而清又陰撫之。於是降人與遼人皆爲敵耳目。敵覘廷弼之既去也。乃於天啓元年。引兵七萬攻瀋陽。明軍以萬餘衆拒敵。殊死戰。史家謂遼左用兵以來第一血戰云。然遂不支。遼陽隨陷。應泰與巡按御史張銓死焉。坐是遼河以東堡寨營驛及海蓋金復。耀諸州大小七十餘城俱陷。是爲清軍第二次得志。則政府妒嫉廷弼。而袁應泰用違其才之爲之也。遼瀋既失。朝廷大震。乃盡譴前劾廷弼諸臣。而起廷弼於家。乃建三方布置策。廣寧登萊。各設巡撫。而經略駐山海關。節制三方。初廷弼之未至也。廣寧巡撫王化貞。先部署軍事。沿遼河置六營。又分戍西平鎮。武柳。

河盤山諸要害。及廷弼至。言今日但宜固守廣寧。若駐兵河上。兵分則力弱。敵輕騎潛渡。破其一營。則諸營皆潰。河上止宜游徼兵。更番出入。示敵不測。而大兵悉屯廣寧。深濠高壘以俟。此實一時制勝第一義也。化貞素驍。不知兵。與廷弼議不合。徒爲大言。謂用毛文龍。用降將李永等。用蒙古插漢助兵四十萬。可以一舉蕩平。盡懈營壘。城濠不復設備。廷弼既屢與齟齬。乃相互劾。而兵部尙書張鶴鳴袒化貞。無言不從。化貞擁兵十四萬於廣寧。而廷弼關上無一卒。號稱經略。乃一匹夫。十月冰合。清兵復將渡河。邊民爭竄。鶴鳴方集廷議。以經撫不和。欲去廷弼。專任化貞。而清兵已圍西平矣。化貞稗將孫得功陰通敵。譎言敵騎已薄廣寧。化貞不知所爲。跣跟棄城單騎走。遇廷弼大凌河。乃相與盡焚積聚。護難民數十萬入關。廷弼數年來之心血全空。比清兵至廣寧。化貞竄已二日矣。錦州大小凌河松山杏山右屯前屯四十餘城堡皆陷。時天啓二年正月也。是爲清軍第三次得志。則鶴鳴化貞相狼狽以厄廷弼。罪不容於死也。然且化貞以輕罪末減。而廷弼被戮。傳首九邊。田產籍沒。家屬爲奴。明之政府。殆不可與處矣。至是而袁督師乃受命於敗軍之際。始漸預兵事。

第二節 袁督師之履歷及監軍時代

督師名崇煥。字元素。廣東東莞縣人。萬曆四十七年成進士。授邵武縣知縣。史稱其少年慷慨。負膽略。好談兵。遇老校退卒。輒與論塞上事。曉其阨塞情形。以邊才自許云。天啓二年正月。朝覲在都。御史侯恂請破格用之。遂擢兵部職方司主事。無何。廣寧師潰。即王化貞失事之役。廷議守山海關。崇煥卽單騎出關。關內外。部中失袁主事。訝之。家人亦莫知所往。已還朝。具言關上形勢。曰。予我軍馬錢穀。我一人足守此。廷臣益稱其才。遂超擢僉事。監關外軍。蓋

廷臣監軍。明制然也。乃發帑金二十萬。俾招募。時關外地悉爲哈喇慎諸部所據。崇煥乃駐守關內。未幾。諸部受款。經略王在晉命崇煥移駐中前所。監參將周守廉游擊左輔軍。經理前屯衛事。尋令赴前屯。安置遼人之失業者。崇煥卽夜行荆棘虎豹中。以四鼓入城。將士莫不壯其膽。以是在晉亦深倚重之。題爲寧前兵備僉事。守關外以捍關內。此袁督師畢生之方略。而亦兵家一定之形勢也。時王在晉以兵部尙書代熊廷弼。無遠略。徒作偷安計。以故崇煥不能盡其才。至是在晉議於距關八里築重城。崇煥力爭。以爲非策。爭不得。奏記首輔葉向高。亦不省。會在晉與薊督王象乾爭論不決。而十三山難民十餘萬。久困不能出。乃使大學士孫承宗行邊。崇煥自請將五千人駐寧遠。以壯十三山勢。別遣驍將救之。寧遠去山二百里。便則進據錦州。否則退守寧遠。奈何委十萬人置度外。承宗以謀象乾。象乾以關上軍方喪氣。議發插部護關者三千人往。承宗以爲然。告在晉。在晉竟不能救。衆遂沒。脫歸者僅六千人。嗚呼。崇煥一言之用否。十餘萬人之性命係之。此既可爲一長歎者也。承宗旣駁八里重城議。集諸將謀所守。閻鳴泰主覺華。崇煥主寧遠。在晉及張應吾。邢慎言皆持不可。承宗竟主崇煥議。已而承宗代在晉督師。崇煥之政略。乃得實行。時關以外寧遠以西諸城堡。悉爲蒙古所據。聲言助守邊。崇煥議盡驅之邊外。毋倚以爲累。九月。承宗乃使崇煥與副將滿桂屯軍寧遠。是爲袁督師領兵之始。

第四節 袁督師之守寧遠

寧遠在山海關外二百餘里。面遼東灣。與桃花島相對。今者榆營鐵路所經過之一要驛也。初承宗令祖大壽築寧遠城。大壽度中朝不能遠守。築僅十一。且疏薄不中程。三年九月。崇煥至。乃定規制。高三丈二尺。雉高六尺。址

廣三丈上二丈四尺使大壽與參將高見賀謙分督之明年工成遂屹然爲關外一重鎮崇煥與將卒共甘苦撫民庶如父兄人人皆樂爲盡力由是商旅輻輳流移駢集遠近望爲樂土旋遭父憂奪情視事時尙官僉事也

天啓四年九月偕大將馬世龍王世欽率水陸馬步兵萬二千東巡廣寧歷十三山按十三山即大凌河出海處也遂由

水道泛三岔河而還按三岔河入遼河匯遼河入海即今之營口也督師此行殆由遼東灣航海返鎮尋以五防敝勞進兵備副使再進右參政崇煥之

東巡也相度地勢策畫戰守爲恢復之計時承宗委任甚專言聽計從五年夏種種準備既具崇煥乃說承宗遣諸將分戍錦州松山杏山右屯及大小凌河諸要害擴地復二百里幾盡復遼河以西舊疆而寧遠且爲內地循此以進則敵軍欲越雷池一步蓋其難哉故自承宗崇煥之戮力而敵軍戢伏不敢犯明邊者四年

古未有奸臣在內而名將得立功於外者斯言諒哉時魏閹之勢炙手可熱其黨日排承宗遂至不安其位以高第代第恇怯柔媚之小人也既至謂關外不可守令盡撤錦右諸城守具移將士於關內崇煥諫曰兵法有進無退諸城已復安可輕撤錦右動搖則寧前震驚關門亦失保障今但擇良將守之必無他慮第不聽且欲並撤寧前二城崇煥曰我寧前道也官此當死此我必不去第無以難乃撤錦州右屯大小凌河及松山杏山塔山守具盡驅屯兵入關委棄米粟十餘萬死亡載途哭聲震野民怨而軍益不振崇煥憤悒三抗疏乞終制不許十二月進按察使視事如故然數年心血委於一旦敵志始驕矣

清軍知經略之易與也又窺崇煥之無援也天啓六年正月大舉渡遼河擣寧遠兵十三萬號二十萬越城五里橫山海關大路而軍邊將皆震恐無人色崇煥乃偕大將滿桂副將左輔朱梅參將祖大壽何可剛等集將士誓死守更刺血爲書激以忠義爲之下拜其書語多觸犯本朝故明史闕焉而將士誦書咸涕泣不可仰慷慨請與

將軍共生死。蓋至誠之感人深矣。於是盡焚城外民居。搆守具入城。堅壁清野以待。令同知程維模詰奸。通判金啓傑具守卒食。辟道上行人。檄前屯守將趙率教。山海守將楊麒。凡遇寧遠將卒逃至者悉斬。人心始定。

是時我軍僅萬餘人。而敵之強且十二三倍。經略第總兵麒。並擁兵關上不救。中朝聞警。兵部尙書王永光大集廷臣議戰守。無善策。盈廷皇皇。謂必無寧遠。越十日。崇煥以捷聞。朝野上下。罔不失色。擣舌額手以相慶者。先是清軍進攻。戴楯穴城。矢石雨下。不能退。城垣圯丈許。崇煥身先士卒。輦石塞缺口。身被再創。部將勸自重。崇煥厲聲曰。『區區寧遠。中國存亡係之。寧遠不守。則數年以後。父母兄弟。皆左衽矣。偷息以生。復何樂也。』自裂戰袍。裹左臂傷處。戰益力。將卒憤厲。奮爭先相翼蔽。城復合。嗚呼。若於吾先民中求完備之軍人。資格者。袁督師當之矣。明日復攻。崇煥乃令闖卒發巨炮。一發決血渠數里。傷數百人。凡三日。三攻三卻。圍遂解。崇煥復開壘襲擊。追北三十餘里。清軍大亂。死者逾萬人。乃分兵略覺華島。寧遠軍雖以城初完。方繕守備。不克救。然敵之銳氣大挫。故明史大書曰。『我大清舉兵。所向無不摧破。諸將罔敢議戰守。議戰守自崇煥始。』嗚呼。豈敵之果強。毋亦我之太弱而已。清太祖自起兵征尼堪外蘭以來。未嘗一遇勅敵。至是爲崇煥所破。悒悒不自得。不數月而殂落矣。

第五節 袁督師之初督師

捷報聞。擢崇煥右僉都御史。璽書獎厲。桂等進秩有差。初高第鎮關門。盡反承宗所爲。務折辱諸將。諸將咸解體。至是坐失援。褫職去。三月復設遼東巡撫。以崇煥任之。魏忠賢遣其黨劉應坤。紀用等出鎮。崇煥抗疏諫。不省。旋敘功加兵部右侍郎。賚銀幣。世廕錦衣千戶。時代高第者爲兵部尙書王之臣。之臣亦庸才。與崇煥不相協。中朝

乃命之臣專督關內。以關外屬崇煥。崇煥知廷臣忌己也。上書曰。

陛下以關內外分責二臣。用遼人守遼土。且守且戰。且築且屯。屯種所入。可漸減海運。大要堅壁清野。以爲體。乘間擊瑕。以爲用。戰雖不足。守則有餘。守既有餘。戰無不足。顧勇猛圖敵。敵必讎。奮迅立功。衆必忌。任勞則必召怨。蒙罪始可有功。怨不深則勞不著。罪不大則功不成。謗書盈篋。毀言日至。從古已然。惟聖明與廷臣終始之。

蓋崇煥保守進取之大計畫。皆略具於是。而此後死於敵之間。死於朝廷之疑。皆若先見之矣。書上。優旨褒答。其冬崇煥復巡歷錦州大小凌河。議大興屯田。漸復高第所棄舊土。蓋當時滿洲游牧水草之性。志不過鹵蕪。得土而不居。如廷弼承宗崇煥等之政策。實足以自固其圉。而無啓戎心。措珠厓之棄。視爲固然。一誤再誤。數年而繕之。一旦而墮之。復數年而後再繕之。復一旦而墮之。今日崇煥所擲心血。以欲易之地。皆其數年前擲心血而既得之者也。嗚呼。明之日蹙。其有以自召矣。於是崇煥益上書言遼左之壞。雖由人心不固。亦緣失有形之險。無以固人心。兵不利野戰。祇有憑堅城。用大炮一策。今山海四城既新。當更修松山諸城。班軍四萬人。缺一不可。帝報從之。

第六節 袁督師之和議及寧錦之捷

以和爲守。以守爲戰。此袁督師對滿洲之大政策也。李牧之所以破虜。羊祜之所以沼吳。名將之最上戰略。往往在此點。於是清太祖方殂落。崇煥乃遣都司傅有爵田成等同李喇嘛往弔喪賀新君。且覘虛實焉。清太宗遣方

吉納溫克什送之還。且來報聘。崇煥乃復書申和議。書云再尋將來所以漸息兵戈以休養部無量也此一事好生天

家抱爲長恨者不侯寧忍聽之漠漠但追思往事窮究所必知也今欲一辨晰恐難問之九原不佞非但欲我

寧止十人仇離者寧止一老女遼藩界內之苦戰皆爲不能保寧間田禾此極慘極痛之事我國家在遼河東西死者

愛人耳天怨固已滿人情快心者也非曲直原自昭然各有良心偏私不得一男婦作何送還是在窮劫運一明慈惠敬天

後來許多吉祥不候又願汗熟思之來書中所開諸物以我國家之財用廣大亦寧斬此然往牒不載多取違天

勿再往以明汗之盛德息止刀兵將前後事情講析明白往來書札無取動氣之言恐不便奏聞方略補錄堅太

宗復書詞甚倨然方欲有事朝鮮懼崇煥躡其後和議遂粗定。

七年正月朝議以崇煥與王之臣不相能召之臣還罷經略不設以關內外專屬崇煥與鎮守中官應坤用並便

宜從事崇煥銳意恢復乃乘清軍之出遣將繕錦州中左大凌三城而再使之持書議和會朝鮮及毛文龍同告

急朝命崇煥發兵援崇煥以水師援文龍又遣左輔趙率教朱梅等九將將精卒九千先後逼三岔河案即在田莊臺營口

之間今正日俄爲牽制之勢會朝鮮降乃還

初崇煥議和中朝不及知及奏報優旨許之後以爲非計頻旨戒諭崇煥持益力而朝鮮及文龍被兵言官因謂

和議所致四月崇煥上書云
關外四城雖延袤二百里北負山南阻海廣四十里爾今屯兵六萬商民數十萬地隘人稠安所得食錦州中
左大凌三城修築必不可已業移商民廣開屯種倘城不完而敵至勢必撤還是棄垂成功也故乘敵有事江
東姑以和之說緩之敵知則三城已完戰守又在關門四百里外金湯益固矣

崇煥議和之真相。蓋在於是。其時清太宗復移書相詰。有『今將軍遣使議和。又修葺城垣。潛圖侵逼。』等語。蓋崇煥議和之故。敵軍知之。而明之君臣懵焉。明之爲明。殆難言哉。奏上。帝優旨報聞。然非其意也。後崇煥莫須有之獄。遂伏於是。

時率教駐錦州護版築。朝命尤世祿來代。又以左輔爲前鋒總兵官。駐大凌河。世祿未至。輔未入大凌。五月十一日。清兵直抵錦州。四面合圍。率教偕中官用嬰城守。而遣使議和。欲緩師以待救。使三返不決。圍益急。崇煥以寧遠兵不可動。選精騎四千。令世祿大壽將。繞出清軍後決戰。別遣水師東出相牽制。且請發薊鎮宣大兵東護關門。朝廷已命山海滿桂移前屯三屯。孫祖壽移山海宣府。黑雲龍移一片石。薊遼總督閻鳴泰移關城。又發昌平天津保定兵馳赴上關。檄山西河南山東守臣整兵聽調。世祿等將行。清軍已於二十八日分兵趨寧遠。崇煥與副使畢自肅督將士登陴守。列營濠內。用炮距擊。而桂世祿大壽大戰城外。士多死。桂身被數矢。清軍亦旋引去。益兵攻錦州。以溥著不能克。士卒多損傷。六月五日亦引還。因毀大小凌河二城。時稱寧錦大捷。是爲明軍對清軍第二次血戰。皆袁督師節制調遣之成效也。惜大小凌防守未完。而敵軍奄至。未免有虧養之憾。觀此益信以和爲守以守爲戰之政策之不容已矣。使督師能久其位而行其志。則成就亦安止此。

時魏忠賢方專權。炙手可熱。中外爭頌功德。崇煥不附。銜之滋甚。敘寧錦戰捷功。文武增秩賜廕者數百。忠賢子亦封伯。而崇煥止增一秩。猶以爲未足。復使其黨劾罷之。七月。崇煥遂予告歸。

第七節 袁督師之再督師

熹宗崩。懷宗卽位。忠賢伏誅。削諸冒功者。廷臣爭請召崇煥。其年十一月。擢右都御史。視兵部。添注左侍郎事。崇禎元年四月。命以兵部尙書兼右副都御史督師薊遼。兼督登萊天津軍務。所司敦促上道。七月。崇煥入都。先奏陳兵事。帝召見平臺。慰勞甚至。咨以方略。對曰。方略已具疏中。臣受陛下特眷。願假以便宜。計五年全遼可復。帝曰。復遼朕不吝封侯賞。卿努力解天下倒懸。卿子孫亦受其福。崇煥頓首謝。且曰。陛下旣委臣。臣安敢辭難。但五年內。戶部轉軍餉。工部給器械。吏部用人。兵部調兵選將。須中外事事相應。方克有濟。帝爲飭四部。臣如其言。崇煥又言。以臣之力。制全遼有餘。調衆口不足。一出國門。便成萬里。忌能妬功。夫豈無人。卽不以權力掣臣肘。亦能以意見亂謀臣。帝起立傾聽。諭之曰。卿無疑慮。朕自有主持。大學士劉鴻訓等請收還王之臣。滿桂尙方劍。以賜崇煥。假之便宜。帝悉從之。賜崇煥酒饌而出。

崇煥以前此熊廷弼孫承宗皆爲人排搆。不得竟其志。乃再上疏曰。

恢復之計。不外臣昔年以遼人守遼土。以遼土養遼人。守爲正著。戰爲奇著。和爲旁著之說。法在漸不在驟。在實不在虛。此臣與諸邊臣所能爲。至用人之人。與爲人用之人。皆至尊司其鑰。何以任而勿貳。信而勿疑。蓋馭邊臣與廷臣異。軍中可驚可疑者殊多。但當論成敗之大局。不必摘一言一行之微瑕。事任旣重。爲怨實多。諸有利於封疆者。皆不利於此身者也。況圖敵之急。敵亦從而間之。是以爲邊臣甚難。陛下愛臣。知臣。臣何必過疑懼。但中有所危。不敢不告。

嗚呼。督師此言。字字血語。語淚矣。明所以亡者。不一端。而朝廷不能見信於其臣。則亡徵之尤劇而不可藥者也。不然。以磊落颯爽之袁督師。而何以自危至是。而明之所以待督師者。後此乃皆不幸而言中焉。嗚呼。雖曰天命。

豈非人事哉。書上。帝優詔答之。賜蟒玉銀幣。疏辭蟒玉不受。

是月。川湖兵戍寧遠者。以缺餉。四月。大譟。餘十三營。起應之。縛擊巡撫畢自肅。總兵官朱梅。通判張世榮。推官蘇涵淳。於譙樓上。自肅傷重。兵備副使郭廣初至。躬翼自肅。括撫賞及朋椿二萬金以散。不厭。貸商民足五萬。乃解。自肅疏引罪。走中左所。自經死。崇煥以八月初抵關。聞變。馳與廣密謀。宥首惡張正朝。張思順。今捕十五人。戮之。市斬知謀中軍吳國琦。責參將彭簪古。黜都司左良玉等四人。發正朝。思順。前鋒立功。世榮。涵淳。以貪虐致變。亦斥之。獨都司程大樂。一營不從變。特爲獎勵。一方乃靖。

時關外大將四五人。事多掣肘。後定設二人。以梅鎮寧遠。大壽仍駐錦州。至是梅將解任。崇煥請合寧錦爲一鎮。大壽仍駐錦州。加中軍副將何可剛。都督僉事代梅駐寧遠。而移薊鎮。率教於關門。關內外止設二大將。因極稱三人才。謂臣自期五年。專藉此三人。當與臣相終始。屆期不效。臣手戮三人。而身歸死於司敗。帝可之。崇煥遂留鎮寧遠。自肅既死。崇煥請停巡撫。及登萊巡撫孫國楨免。崇煥又請罷不設。帝亦報可。哈刺慎三十六家。向受撫賞。後爲插漢所迫。且歲饑。有叛志。崇煥召至於邊。親撫慰。皆聽命。二年閏四月。敕春秋兩防功。加太子太保。賜蟒衣銀幣。廕錦衣千戶。

第八節 袁督師之殺毛文龍

殺毛文龍一事。袁督師冤獄之近因。而其爲功爲罪。又當時輿論所最囂囂者也。文龍之應誅與否。讀明史本傳。自明而督師此等舉動。非有霹靂手段者。不能學也。今錄本傳全文如下。

毛文龍者。浙江仁和人。以都司援朝鮮。逗留遼東。遼東失。自海道遁回。乘虛擊殺清鎮江守將。報巡撫王化貞。而不及經略熊廷弼。兩人隙始開。用事者方主化貞。遂授文龍總兵。累加至左都督。掛將軍印。賜尙方劍。設軍鎮皮島。如內地。皮島亦謂之東江。在登萊大海中。綿亙八十里。不生艸木。遠南岸。近北岸。北岸海面八十里。卽抵清界。其東北海則朝鮮也。島上兵本河東民。自天啓元年。河東失。民多逃島中。文龍籠絡其民。爲分布哨船。聯接登州。以爲犄角計。中朝是之。島事由此起。四年五月。文龍遣將沿鴨綠江。越長白山。侵清國東偏。爲守將擊敗。衆盡殲。八月。遣兵從義州城西渡江。入島中屯田。大清守將覺。潛師襲擊。斬五百餘級。島中糧悉被焚。五年六月。遣兵襲耀州之官屯寨。敗歸。六年五月。遣兵襲鞍山驛。喪其卒千餘。越數日。又遣兵襲撤爾河。攻城南。爲清守將所却。七年正月。清兵征朝鮮。并規剿文龍。三月。清兵克義州。分兵夜擣文龍於鐵山。文龍敗。遁歸島中。時清惡文龍躡後。故致討朝鮮。以其助文龍爲兵端。願文龍所居東江。形勢雖足牽制。其人本無大略。往輒敗衄。而歲糜餉無算。且惟務廣招商買販。易禁物。名濟朝鮮。實闌出塞。無事則鬻參。販布爲業。有事亦罕得其用。工科給事中潘士聞劾文龍糜餉殺降。尙寶卿董茂忠請撤文龍治兵關寧。兵部議不可。而崇煥心弗善也。嘗疏請遣部臣理餉。文龍惡文臣監制。抗疏駁之。崇煥不悅。及文龍來謁。接以賓禮。文龍又不讓。崇煥謀益決。至是遂以閱兵爲名。泛海抵雙島。文龍來會。崇煥與相燕飲。每至夜分。文龍不覺也。崇煥議更營制。設監司。文龍怫然。崇煥以歸鄉。動之。文龍曰。向有此意。但惟我知東事。東事畢。朝鮮衰弱。可襲而有也。崇煥亦不悅。以六月五日。邀文龍觀將士射。先設幄山上。令參將謝尙政等伏甲士幄外。文龍至。其部卒不得入。崇煥曰。予詰朝行。公當海外重寄。受予一拜。交拜畢。登山。崇煥問從官姓名。多毛姓。文龍曰。此皆予孫。崇煥笑。因曰。爾等積勞。

海外月米止一斛。言之痛心。亦受予一拜。爲國家盡力。衆皆頓首謝。崇煥因詰文龍違令數事。文龍抗辯。崇煥厲色叱之。命去冠帶繫縛。文龍猶倔强。崇煥曰。爾有十二斬罪。知之乎。祖制大將在外必命文臣監。爾專制一方。軍馬錢糧不受核。一當斬。人臣之罪莫大欺君。爾奏報盡欺罔。殺降人難民冒功。二當斬。人臣無將。將則必誅。爾奏有牧馬登州取南京如反掌語。大逆不道。三當斬。每歲餉銀數十萬。不以給兵。月止散米三斗有半。侵盜軍糧。四當斬。擅開馬市於皮島。私通外番。五當斬。部將數千人。悉冒己姓。副將以下濫給札付千。走卒輿夫盡金緋。六當斬。自寧遠還。剽掠商船。自爲盜賊。七當斬。強取民間子女。不知紀極。部下效尤。人不安室。八當斬。驅難民遠竊人參。不從則餓死島上。白骨如莽。九當斬。輦金京師。拜魏忠賢爲父。塑晁旒像於島中。十當斬。鐵山之敗。喪師無算。掩敗爲功。十一當斬。開鎮八年。不能復寸土。觀望養敵。十二當斬。數畢。文龍喪魂魄。不能言。但叩頭乞免。崇煥召諭其部將曰。文龍罪狀當斬否。皆惶怖唯唯。中有稱文龍數年勞苦者。崇煥叱之曰。文龍一布衣爾。官極品。滿門封廕。足酬勞。何悖逆如是。乃頓首請旨曰。臣今誅文龍以肅軍。諸將中有若文龍者。悉誅。臣不能成功。皇上亦以誅文龍者誅臣。遂取尙方劍斬之帳前。乃出諭其將士曰。誅止文龍。餘無罪。當是時。文龍麾下健校悍卒數萬。憚崇煥威。無一敢動者。於是命官斂文龍。明日具牲醴拜奠。曰。昨斬爾朝廷大法。今祭爾僚友私情。爲下淚。乃分其卒二萬八千爲四協。以文龍子承祚副將陳繼盛參將徐敷奏遊擊劉興祚主之。收文龍敕印尙方劍。令繼盛代掌。犒軍士。檄撫諸島。盡除文龍虐政。還鎮。以其狀上聞。末言文龍大將。非臣得擅誅。謹席藁待罪。時崇禎二年五月也。帝驟聞。意殊駭。念旣死。且方倚崇煥。乃優旨褒答。俄傳諭暴文龍罪。以安崇煥心。其爪牙伏京師者。令所司捕。崇煥上言。文龍一匹夫。不法至此。以海外易爲亂也。其衆合老稚四

萬七千。妄稱十萬。且民多。兵不能二萬。妄設將領千。今不宜更置帥。卽以繼盛攝之。於計便。帝報可。崇煥雖誅文龍。慮其部下爲變。增餉銀至十八萬。然烏弁失主帥。心漸攜。益不可用。其後致有叛去者。崇煥言東江一鎮。牽制所必資。今定兩協馬軍十營。步軍五。歲餉銀四十二萬。米十三萬六千。帝頗以兵減餉增爲疑。以崇煥故。特如其請。崇煥在遼。與率教大壽可剛定兵制。漸及登萊天津。及定東江兵制。合四鎮兵十五萬三千有奇。馬八萬一千有奇。歲費度支四百八十餘萬。減舊一百二十餘萬。帝嘉獎之。

程本直漩聲記

本書始末詳下節

評文龍之案曰。『自武登撫相與爭而去。其欲得而甘心於文龍者。非一日也。非一人

也。辱白簡挂彈章。可數百計也。是左右諸大夫皆曰可殺。國人皆曰可殺也。其不殺也。非不殺也。不能殺也。不敢殺也。是以崇煥一殺之而通國快然。』觀此則當時輿論之所存。可以見矣。夫以舉國不能殺不敢殺之人。而督師毅然去之。若縛一雞而探一鷄也。指揮若定。聲色不驚。嗚呼。非天下之大勇。其孰能與於斯。自文龍之死。其部將孔有德耿仲明尙可喜。次第叛。後卒爲滿洲俔。掃定西南。或以是爲袁督師實有以致之。雖然。吾以爲此亦存乎其人耳。文龍不死。安知其不執挺爲諸降王長。而督師死後。其最得力之部將祖大壽。雖降而旋反正。而何可剛被執不屈。義烈炳千古。則又何說焉。彼不徒感激主將之私恩。而服從主將之公義者。蓋有素也。

第九節 袁督師之冤獄

子胥湛而吳沼。鄂王僂而宋夷。古來豪傑。以一身生死繫一國存亡者。歷史上前例。往往不乏。若袁督師者。其重要之一人哉。先是半年前。崇煥上疏通籌全局。略言臣身在遼。遼無足慮。惟薊門單弱。敵所竊窺。請嚴飭前督。峻

防固禦爲今日急著。時督薊者爲劉策，巽懦不知兵事。崇煥一疏不省，復再疏之。三疏之，得旨下部科會議。遷延不行。是年十月，崇禎二年清兵十餘萬人，以蒙古兵爲嚮導，大舉入犯。憚崇煥之威，乃改道入龍井關，大安口，喜峯口。所向披靡，如行無人境界。如崇煥言，崇煥於十月二十八日聞警，卽檄調諸遼將祖大壽、何可剛等入衛。所歷撫寧、永平、遷安、豐潤、玉田諸地，逐路置防。逐城設守，戴星犯雪。於十一月初十日，馳至薊州，欲背捍神州，面拒敵衆。十二、十三等日，與敵兵相持於馬昇橋諸要隘。清軍不意袁軍驟至，相視駭胎。乃宵遯，疾趨而西，直犯京師。崇煥心焚血注，憤不顧死。士不傳餐，馬不再秣。由間道飛抵郊外，兩晝夜疾行三百餘里。先清軍至三日，清軍初遇崇煥救薊，意欲避堅攻瑕，乃越薊西，蟠踞潞中。將中斷京師，使與崇煥首尾不相應。一面結營困潞，一面張勢撼京。謂潞困而京可不俟攻也。不知崇煥之舍薊而躡其後也。不知崇煥且舍潞而繞其外也。不知崇煥業據京而出其前也。時崇煥軍營於廣渠門外，敵軍初在高密店遇偵，咸大失色，詫以爲袁督師之兵從天而降。二十日，轉戰於廣渠門。自辰達申，卻敵十餘里，追北至運河。清將阿巴泰、阿濟格、思格德爾之軍皆潰。太宗及諸貝勒相語，謂十五年來未嘗有此勅敵。於是不復逼京師，惟出沒於海子、采叵之間，以觀變。先是崇煥以兼程赴援，僅以馬兵五千從，其步兵不能兼進，以九千而當十餘萬之大敵，勢力太相懸絕。故朝議雖日促戰，而崇煥猶持重不發。卽廣渠門之役，猶非其志也。而盈廷乃以逍遙城下擁兵縱敵，嗚嗚爲崇煥罪。計步兵全軍，十二月初三、四日間可至。而初一日遂有逮崇煥之旨。

先是崇煥至薊，奏報達，帝甚喜，溫旨褒勉，發帑重犒將士，及兼道入衛。帝立召見，深加慰勞，咨以戰守策，賜御饌及貂裘，倚重甚至。時清軍新挫，畏崇煥如虎。諸貝勒有請攻城者，太宗託以不欲損將卒。二十七日，乃退駐南海。

子適前獲明太監二人。以副將高鴻中、參將鮑承先、甯完我、巴克什、達海、監守之。至是鴻中、承先遵太宗所授密計。坐近二太監。故作耳語云。今日撤兵。乃上計也。頃見上單騎向敵。敵有二人來見上。語良久乃去。意袁巡撫有密約。此事可立就矣。時楊太監者佯臥竊聽。悉記其言。三十日命縱楊太監歸。具以所竊聽者上聞。獄遂起。

十二月初一日。崇煥再被召對。遽縛下詔獄。大壽在旁。戰栗失措。出即擁兵叛歸。帝取崇煥獄中手書往召。大壽

乃歸命。余大成剖肝錄云。前略。上欲得煥手書。遣閣部九卿皆往獄所。道意煥曰。壽所以聽煥者。督師也。今

成自謂也。因大言謂崇煥曰。公孤忠請組隻手。擊遼生。死惟命。捐之久矣。天下之人莫不服公之義。而諒公之

心。臣子之義。生殺惟君。苟利於國。不惜髮膚。且死於敵。與死於法。孰得耶。公其圖之。煥曰。公言是也。因手草蠟書

追兵也。壽命立馬待之。騎出一日矣。馳騎追及。一軍盡哭。遂踊躍即日入關。收復永平。遵化一帶。時輔臣溫體仁。毛

文龍鄉人也。銜崇煥殺文龍。每思有以報之。適兵部尚書梁廷棟。曾與崇煥共事於遼。亦有私隙。二人從中持其

事。崇煥由是得罪。又崇煥嘗與大學士錢龍錫友善。龍錫故主定逆案者。魏忠賢遺黨高捷、袁宏勛、史堃輩謀與

大獄。爲逆黨報仇。見崇煥下吏。遂以擅主和議。專戮大帥二事爲兩人罪。捷首疏力攻。堃宏勛繼之。又前者東江

歲餉百萬。大半入權宦橐中。自崇煥斬文龍。盡失其賂。咸相銜刺。至是清軍犯京師。中官勳戚在圍城中。思旦夕

解圍。咎崇煥不卽戰。會總兵滿桂。初與煥共守寧遠。丙寅之役。首主棄城。爲煥所叱。至是入援。令其部曲大掠近

郊。皆僞稱袁兵。以鼓衆怨。後因敗入甕城。浸潤中官。乘機譖之。合此諸原因。故崇煥遂不得不死。於是輔臣周延

儒成基命。吏部尚書王永光各疏救。不報。總兵祖大壽以官階贈廕。請贖。不報。兵科給事中錢家修請以身代。不

報。布衣程本直詣闕抗呼冤。與錢龍錫同論死。御史羅萬壽以申辯崇煥非叛逆。削職下獄。凡崇煥在獄中半年

餘。關外將吏士民日詣督輔孫承宗所號哭。雪冤願以身代者未嘗絕。承宗知內旨已定。不敢上聞。於是崇煥遂

死。會審之日。風霾晝閉。白日無光。崇禎三年八月十六日。遂棄市。兄弟妻子流三千里。籍其家。崇煥無子。家亦無餘貲。天下冤之。

明史本傳於督師冤獄記載甚略。本節據錢家修程本直之辯冤疏。及本直所著漩聲記。余大成所著剖肝錄。及皇朝開國方略等書。大率皆當時目擊徵實之談也。

著者附識

第十節 袁督師死後之東北邊事

督師下獄之明日。命大同總兵滿桂爲武經略。督步騎四萬陣永定門外。嚴濠柵。環以槍炮十重。清兵宵進。效明兵甲裳旗幟。黎明乘不意。衝突入其營。滿桂戰死。生禽總兵黑雲龍。麻登雲等。帝以庶吉士金聲之薦。擢游僧申甫爲總兵。造戰車。又擢庶吉士劉之綸爲兵部侍郎。募義兵。皆以倉卒未訓練。敗死。舉城皇皇。不可終日。會祖大壽何可剛得督師手書。引兵還救。初。清軍料崇煥下獄後。大壽輩非叛作賊。卽降從彼。至是見遼兵還爲明戰守。乃遽爲議和書。分置永定門德勝門外。移軍略薊而還。蓋督師一紙書。猶足以卻敵也如此。

清軍既還。沿途侵略。明年正月。克永平。克灤州。遂班師。留貝勒濟爾吟。朗統兵萬人守永平各城。三月。復命二貝勒阿敏益兵五千助鎮守。時明帝已復起。孫承宗鎮關門。而祖大壽統各路援軍。相爲犄角。五月。遂連復灤州。遷安。遵化。永平諸城。清軍殆盡覆。六月。阿敏逃還瀋陽。太宗震怒。議罪幽禁。皆祖大壽力也。皆袁督師教也。崇禎四年。清軍復攻大凌河。時孫承宗率由袁督師政策。已復關內四城。復理關外舊疆。欲并力先城大凌河爲屏蔽。巡撫邱禾嘉違其節制。中央政府復掣肘。遂敗衄。十一月。廷臣復劾罷承宗。而明益不可爲矣。今將此後明

清之交涉復列一略表。

崇禎七年 清兵四路來侵。一從尙方堡之宣府趨應州。至大同。一由龍門口入。會於宣府。一由獨石口入。會於應州。一由得勝堡入。歷大同。趨朔州。

八年 清多鐸攻錦州。多爾袞由朔州毀武寧關入。略代忻應惇。斬俘七萬餘。

九年 清阿濟格等分路逾獨石口入居庸。克昌平。徧燕京。過保定。克十二城。五十六戰皆捷。俘人畜十八萬。督師張鳳翼宣大總督梁廷棟皆按兵不敢戰。

十一年 清多爾袞岳託兩路來侵。一沿山。一沿運河。山河之間。六道並進。督師盧象昇拒戰於慶都。死之。清兵遂蹂躪真定廣平順德大名至山東臨清州。渡運河。破濟南。克城五十。俘人口四十六萬有奇。

十二年 春清太宗親攻錦州中後所。圍杏山。九月。略錦州寧遠。擾其秋穫。

十三年 遣兵屯義州城南。徧明關外諸城。擾其春耕。寧遠總兵金鳳戰死。

十四年 清多爾袞豪格攻錦州。圍之經年。餉道斷絕。祖大壽死守。

十五年 二月松山副將夏承德應敵。清軍遂入城。薊遼總督洪承疇生降。錦州亦陷。十月。清阿爾泰等復來侵。直抵山東兗州。克府三州十八縣六十七。俘人民三十六萬。

十七年 三月。以流寇內逼。盡棄關外四城。召寧遠總兵吳三桂統兵入關衛京師。途中聞燕京陷。適清多爾袞率師將收關外地。並經略中原。三桂迎降。清兵遂長驅入。明亡。

當十四五年間松山杏山之役。清太宗諭諸將以大軍屢入塞。不能得尺寸地。皆由山海關阻隔。而欲取關。非先

取關外四城不可云云。以故傾舉國之兵，竭兩年之力，以必克為期。及寧錦陷，而明清之興亡決矣。凡此皆袁督師所逆料之，而經營之於二十年前者也。祖氏兄弟大壽大弼大樂以督師裨將，遵其方略，猶能為睢陽之守者歲餘。非洪承疇之降，錦州固未易下也。嗚呼！使袁督師而在也，雷池一步，敵其能飛渡耶？督師始終一貫之方略，曰：守關外以捍關內，而此後明卒以棄關外而亡。甲申之事，督師其知之矣。抑督師以擅主和議為冤獄之一口實，而明亡以後，史家追惟覆轍，乃知當時竭天下兵餉大半以事關東，為直接引起中原盜賊之原因。卒至東西交鬩，馴即於亡，使循督師以和為守，以守為戰之策，則有餘力以靖內難，然後休養國力，從容以抵制外寇，亦何至自壞長城，引虎入衛也耶？嗚呼！人之云亡，邦國殄瘁，斯之謂矣。崇禎十五六年間，山海關內外僅千里間，有督臣四外，總督關內總督昌巡撫六一寧遠二永平三順天，兵總八寧遠山海中協西協，平總督保定總督事權愈分，大局愈壞。如可贖兮，人百其身，專閫十數能贖一袁督師乎？痛哉！

第十一節 結論

程更生名本直以布衣為袁督師訟冤數四卒與俱死者自言營三求見袁公而不予見予非為私情死不過為公義死且謂願死之後有好事者瘞其骨於袁公墓側題其上曰一對癡心人兩條潑胆漢則目暝九原矣云云此亦一奇士崇禎之為袁督師訟也。曰：『客亦聞敵人自發難以來，亦有攻而不下，戰而不克者否？曰：未也。客亦知乎有寧遠丙寅之圍，而後中國知所以守，有錦州丁卯之功，而後中國知所以戰否也？曰：然也。』（中略）今日灤之復，遵之復，永之復也。誰兵也？遼兵也。誰馬也？遼馬也。自崇煥未莅遼以前，遼亦有是兵，有是馬焉。否也。』又曰：『崇煥十載邊臣，屢經戰守，獨提一旅，挺出嚴關，迄今山海而外，一里之草萊，崇煥手闢之也。一城』

之壘。一堡之堞。崇煥手築之也。試問自有遼事以來。誰不望敵於數百里而逃。棄城於數十里而遁。敢與敵人盡地而守對壘而戰。翻使此敵望而逃。棄而遁者。舍崇煥其誰與歸。嗚呼。此豈阿好之言哉。使督師以前而有督師其人者。則滿洲軍將不能越遼河一步。使督師以後而有督師其人者。則滿洲軍猶不能越榆關一步。故袁督師一日不去。則滿洲萬不能得志於中國。清軍之處心積慮以謀督師。宜也。而獨怪乎明之朝廷。自壞長城爲敵復仇。以快羣小一日之意見。而與之俱盡。天下古今冤獄雖多。語其關係之重大。殊未有袁督師若者也。嗚呼。豈惟前代。今日之國難。急於明季數倍。而舉國中欲求一如袁督師其人者。願可得耶。願可得耶。但使龍城飛將在。不教胡馬度陰山。讀袁督師傳。二百年前事。其猶昨日也。

程氏又評袁督師之爲人曰。『舉世皆巧人。而袁公一大癡漢也。唯其癡。故舉世是愛者。錢。袁公不知愛也。唯其癡。故舉世最惜者。死。袁公不知惜也。於是乎舉世所不敢任之勞怨。袁公直任之而弗辭也。於是乎舉世所不得不避之嫌疑。袁公直不避之而獨行也。而且舉世所不能耐之飢寒。袁公直耐之以爲士卒先也。而且舉世所不肯破之體貌。袁公力破之以與諸將吏推心而置腹也。』(中略)予謂掀翻兩直隸踏遍一十三省。求其渾身擔荷徹裏承當如袁公者。正恐不可再得也。嗚呼。讀此言也。則袁督之爲人。雖百世以下。猶如見之矣。余大成氏復記袁督師之論曰。『予何人哉。十年以來。父母不得以爲子。妻孥不得以爲夫。手足不得以爲兄弟。交遊不得以爲朋友。予何人哉。直謂之曰。大明國裏一亡命之徒可也。』嗚呼。吾儕昔讀加富爾傳。稱彼無妻。以意大利爲妻。稍有熱血者。聞之罔不感歎焉。若袁督師者。豈所謂無家而以中國爲家者耶。鄉人有傳錄督師遺詩者。有云。慷慨同仇日。間關百戰時。功高明主眷。心苦後人知。南還別陳翼所總戎又云。欲知肺腑同生死。何用安危問去留。杖策必

因圖雪恥。橫戈原不爲封侯。邊中送別又云。榮華我已知莊夢。忠憤人將謂杞憂。借諸海鳥嗚呼。若袁督師者。真千古軍人之模範哉。真千古軍人之模範哉。



飲冰室專集之八

中國殖民八大偉人傳

一民族所崇拜之人物。各有其類。觀其類而其民族之精神可見也。吾友觀雲嘗著一論。題曰「幾多古人之復活」。吾喟思焉。我先民之畸行雄略。受壓於疇昔奄奄齷齪之時代精神以下枉死者何限。撥潛闡幽。非後起者之責而誰責也。作中國殖民八大偉人傳。

(一)三佛齊國王梁道明。王廣東南海人也。三佛齊在蘇門答臘島之南端。與爪哇島西端相接。今爲荷蘭屬地。自梁天監唐天祐宋太平興國間。屢通中國。洪武中葉。爪哇來侵。舊王朝亡。國大亂。時閩粵人旅於佛者已千數。王乃號召部勒之。保國之北境。與爪哇相距。爪哇終不能有也。不十年。閩粵軍民泛海從之者數萬人。永樂三年。明成祖以行人譚勝受與王同邑。命偕千戶楊信等齎勅招之。王乃與其臣鄭伯可入朝。貢方物。有陳祖義者。亦粵人。本海盜。王撫之。使爲舊港頭目。而祖義盜行未改。鄭和從好望角迴航歸國。祖義謀要之。事洩被戮。自此與上國絕。據明史

(二)三佛齊國王張璉。王廣東饒平人也。本劇盜。明嘉靖末作亂。蹂躪廣東江西福建三省。勢極猖獗。合三省會剿。調兵二十餘萬。凡三年乃平之。官軍報捷。謂已獲渠魁。就戮。萬曆五年。有商人詣舊港者。問其王。則璉也。蓋敗後潛逃。復以力據有此國云。舊港卽三佛齊。爪哇滅佛時。更此名。故外至者兩稱之。自梁王距張王凡百餘

年張氏果取諸梁氏歟抑梁張之間更有他姓歟不可考也。據明史及明通鑑

(三) 婆羅國王某。王福建人。佚其姓名。明萬曆間始王此地。即今之婆羅洲也。或言鄭和使婆羅。有閩人從之。因留居焉。後嗣遂據有其國。有金印一篆文。上作獸形。言永樂朝所賜。民間嫁娶必請此印。印背上以爲榮。後佛郎機舉兵來擊。王率國人走入山谷中。放藥水流出。毒殺其人無算。王得返國。佛郎機遂犯呂宋。據明史○案機者實西班牙明史誤也

(四) 爪哇順塔國王某。王廣東人。佚其姓名。國於爪哇島北端之海濱。有地方三百餘里。最饒富。中華及諸蕃商舶輻輳焉。永樂九年。自遣使貢方物。據明史

(五) 暹羅國王鄭昭。王廣東潮州人也。隨父流寓暹羅。仕焉。位至宰相。暹羅與緬甸密邇。世爲仇讎。前明永曆中。李定國嘗遣部將江國泰約暹攻緬。共分其地。會吳三桂弑永曆。事乃寢。以是緬人益憾暹。乾隆三十六年。緬王孟駁遂攻暹。滅之。前王遺族悉殲焉。王時已罷相。居南部。年五十餘矣。國變後。乃臥薪嘗膽。陰結國人圖光復。乾隆四十三年。遂起義。與緬人三戰。三破之。盡復故地。暹民戴爲王。明年復大舉征緬。破之時。緬方與中國交兵。前此一切餉源。半取諸暹。至是益窘蹙。乾隆征緬之役。所以卒獲奏凱者。王犄角之功最高云。乾隆五十年薨。傳位於其壻華策格里。華氏者。暹羅土人。王早年之養子。而復以女妻之者也。以驍勇著。建國時戰功第一。王無子。故襲位焉。五十一年。遣使北京告喪。表文稱鄭華。即華策格里。以子壻襲先王姓。而以本名之首字譯音爲名也。於是冊封華爲暹羅國王。傳至今未替焉。中國倫理。重父系不重母系。春秋書莒人滅鄆。謂以甥繼舅也。故近人皆稱現今暹羅王統爲非鄭氏後。人多知暹今王爲華策格里之後。因其不復姓鄭。故謂鄭氏已斬。不知華策格里即鄭華也。吾以西史參合中史。校其年代及事實。乃知之。雖然。

今英皇愛華德第七，非前皇維廉第四之子也。而史家猶謂之爲亨諾華朝王統，不曰易姓，然則謂暹羅今日非鄭氏王統，安可得也。鄭華之後，昭昭甚明。鄭華鳴呼，孰知我黃帝子孫在祖國，雖無復寸土，而猶有作蠻夷大長於海外，傳百餘歲而未艾者耶。太史公作越世家，稱禹之明德遠矣，吾觀於鄭王，吾不知悲喜之何從也。據魏源記日本北村三郎著暹羅史久保得二著東洋歷史大辭典著聖武

(六) 戴燕國王吳元盛。王廣東嘉應人也。戴燕在婆羅洲。乾隆末，王與土蠻戰，破之。王焉。事蹟無考。據口碑

(七) 昆甸國王羅大。王廣東嘉應人也。昆甸亦在婆羅洲。乾嘉間，王與土蠻戰，破之。王焉。事蹟無考。據口碑

(八) 英屬海峽殖民地開闢者葉來。葉君廣東嘉應人也。初嘉慶二十四年，英人始以貲購新嘉坡一港於

柔佛，是爲英國在南洋海峽初得勢力之始。然僅列塵海岸，未敢深入也。時我華人以采錫之利，相率營礦業於今新嘉坡檳榔嶼一帶。麇聚者日衆，與土蠻時有衝突。嘉慶末，柔佛王下令逐華人。時葉君之族在柔佛者三百人，乃議與之抗戰，推君爲統帥，初戰勝之，知其必將報復也，乃更遣子弟歸嘉應，購軍械，募義勇。葉氏舉族萬餘人，皆渡海助戰，而鄰近村落應之者亦多。他邑之流寓其地者皆從。凡血戰八年，卒定柔佛全境。已而檳榔嶼復與土蠻衝突，乞援於君。君復提師助之。三年，遂定檳榔嶼。凡所得者皆蠻王地，與英人通商口岸，不相屬也。而英勢駸駸東漸，旭日方升，忱我軍威，如鯁在喉，以威相恫喝，以利相誘脅，彼有強大之政府，以盾其後，而我方嚴海禁，出疆者以海賊論，安望其一爲援手也。君知不可敵，不得已，乃以領土主權歸諸英，而僅自保其土地所有權，納租稅於英政府。至今葉氏猶爲彼中望族云。其後同治末，葉粵人有至沙刺我國屬之吉甯鎮采礦者，沙王阻焉。光緒元年，粵人與戰，大勝之，俘其王。主動者姓名不可考。蓋亦籍嘉應云。沙刺我本自主部落，至是英人乘華人

之勝。遽置吏於吉甯。盡奪故王地。以法部勒我華人。華人亦安焉。據口碑

（附）菲律賓寓俠潘和五。和五閩人也。閩鄰菲律賓。元明之交。吾民負販其地者已數萬。置田園。長子孫焉。西班牙既據菲。慮華人衆爲變。多逐之歸。留者悉被侵辱。永樂二十一年。班酋卽雷氏侵滿刺加。役華人助戰。和五爲其哨官。班人日酣臥。令華人操舟。稍怠。輒鞭撻。有至死者。和五曰。叛死。箠死。等死耳。否亦戰死。曷若刺殺此酋以救死。勝則揚帆歸。不勝死未晚也。衆然之。乃夜刺殺卽雷。持其首大呼。諸蠻驚亂。不知所爲。悉被刃。或落水死。乃盡收其金寶甲仗。駕舟歸。據明史○原文西班牙作佛郎機菲律賓作呂宋滿刺加作美洛居今爲更正

新史氏曰。我國有不世出之英雄。鄭延平。憑藉無置錐之地。而能奪四萬方里之臺灣於當時。炙手可熱之荷蘭人之手。傳子孫三世。延將斬之。明祀四十餘年。而卒後迄今數世紀。稱道者絕希焉。直至最近數年間。其人物之價值。始漸發見。然則梁道明等八人。不見稱於後世。又何怪焉。日本有一山田長政。不過曾爲暹羅相耳。而日人尸祝之。歌舞之。記其行誼。繪其戰蹟。被以詩歌。演以說部。不可勝述。謂得一人足以光國史也。以之比我鄭昭。何如。以之比我梁道明。葉來何如。嗚呼。以吾所述八君子者。以泰西史上人物校之。非摩西則哥倫布。立溫斯敦也。否則亦克雷武維廉濱也。而試問四萬萬國民中。能言八君子之事業者幾人。豈惟事業。卽姓氏亦莫或聞知也。吾偶讀明史外國傳。見三佛齊婆羅爪哇之四王。吾驚喜歎歎。不知所云。始歎吾國有此偉大之人物。乃葬埋諸沈沈蠹簡之中。而其間二人者。乃至並不得以姓氏表見於後世也。吾滋憤。吾滋懼。吾滋慚。乃急益以所聞最近百年間四君子之事。著是篇焉。雖然。吾傳八人而寥寥不及二千言。吾不敢於所有資料之外。鋪張焉。以誣先民。而前史之成文與故老之口碑。乃於此區區者之外。而莫余畀。使我對於前賢滿胸膜拜之誠。竟不克自獻也。是

乃深可悲也。葉氏之事去今未遠鄉人當尙有能言之者若賜郵教豈勝大願『鬱鬱澗底松，離離山上苗。以彼徑寸莖，蔭此百尺條。世胄躡高位，英俊沈下僚。地勢使之然，由來非一朝。』豈惟利達，卽名譽其亦如是也。夫名譽何足以爲古人輕重，然國民失其崇拜英雄之性，而國遂不可問。國民誤其崇拜英雄之途，而國遂更不可問。八君子之見擯於中國歷史，其毋乃卽中國民族見擯於今日生存競爭界之表徵也。吾述此，吾有餘痛焉耳。潘和五不足語於殖民事業，抑其義俠智勇，有足多者焉。冀附於八君子後傳之。

新史氏又曰：吾草此傳已，吾於時代精神一感情之外，更有三種感情縈於吾腦。一曰海事思想與國民元氣之關係也。九人之中，並潘和五粵人七而閩人二也。自今以往，吾國若猶有能擴張其帝國主義以對外之一日，則彼兩省人，其猶可用也。而其他沿海諸省乃至腹地諸省，亦何遽多讓。在養之而已。以今日美國海權之發達，其所用者又豈專在兩洋岸也。二曰殖民事業與政府獎厲之關係也。列強殖民，莫不以政府之力直接間接獎厲之。我國則如秦越人之相視肥瘠，甚或極諸其所往焉。夫是以雖有健者，終以援絕而敗也。近數十年，美澳非洲諸華僑之慘狀，其惡因皆坐是也。三曰政治能力與國際競爭之關係也。我先民前此不藉政府之力，尙能手關諸國，或傳諸子孫。及一旦與文明強有力之國相遇，遂不得不帖服於其統治之下。葉氏之不王，以其所遇之敵，異於昔所云也。匪曰天命，人事爲之也。嗚呼！海以南百數十國，其民口之大部分，皆黃帝子孫。以地勢論，以歷史論，實天然我族之殖民地也。而今也託居彼宇者，僅得自比於牛馬。嗚呼！誰之罪歟！誰之罪歟！雖然，黃帝手定之山河，今且蹙蹙不自保，而海以南更何論哉！

飲冰室專集之九

祖國大航海家鄭和傳

西紀一千五六百年之交。全歐沿岸諸民族。各以航海業相競。時則有葡之王子亨利。Don Henry 獻身海事。既發大西洋附近砵仙圖羣島。Port Santo 挨莎士羣島。Azores 加拿里羣島。Canary 一三九四年至一四六三年。未幾哥倫布遂航大西洋。發見西印度羣島。前後四度。遂啓亞美利加大陸。一四〇六年至一五〇六年。同時葡人維哥達嘉馬。Vasco Da Gama 沿亞非利加南岸。逾好望角。達印度。迴航以歸歐洲。一四九七年至一五〇〇年。越十餘年。而葡人麥折倫。Magellan 橫渡太平洋。啓菲律賓羣島。繞世界一周。一五二一年至一五二二年。自是新舊兩陸。東西兩洋。交通大開。全球比鄰。備哉燦爛。有史以來。最光燄之時代也。而我泰東大帝國。與彼並時而興者。有一海上之巨人鄭和在。我國大陸國也。又其地廣漠。足以資移殖。人民無取騁於域外。故海運業自昔不甚發達。願沿海諸省。二千年前。既往往有涉海自殖者。史稱會稽海外有東鯤。又有夷州及澶州。秦始皇時。方士徐福將童男女數千人止焉。其地即今日本之長崎一帶是也。辰韓舊國。亦名秦韓。蓋秦時人民苦苛法者。遷焉。其地即今朝鮮之慶尙道。釜山浦所在與日本相望者也。凡此陳跡。皆爲吾航業發達已古之證。其後兩漢六朝。南海航路漸闢。我商船有達亞丁灣及米梭必達迷亞者。蓋與波斯人阿刺伯人代興云。詳見拙著世界史唐宋以還。遠略漸替。我航業不振者垂數百年。及明代而國民膨脹力。別向於一方面。

亞洲東南一大部分。即所謂印度支那及南洋羣島者。實中國民族唯一之尾閭也。又將來我中國民族唯一之勢力圈也。以今日論。其政治上之實力。白種人尸之。其生計上之實力。未或能與吾競也。今略取吾民自殖於彼地者。表其人數及其比較如下。

地	名	人	口	總	數	中	國	人	參	考
暹	羅	六、三二〇、〇〇〇	一、三〇〇、〇〇〇	與純粹中國人百三十萬尙有 與土民雜婚者約八十萬						
法	屬越南	七、八〇〇、〇〇〇	二六〇、〇〇〇							
英	海峽殖民地	二二八、五五五	一二〇、〇〇〇	現在每年渡航者約四五 萬人進步正未有艾						
	新加坡	二四八、二〇七	一〇〇、〇〇〇							
	檳榔嶼	九五、四八七	九〇、〇〇〇							
馬來保護國	六七八、五九五	一一〇、〇〇〇								
屬緬甸	一〇、四九〇、〇〇〇	一四〇、〇〇〇								
美屬菲律賓羣島	七、〇〇〇、〇〇〇	四三〇、〇〇〇	與土人雜婚者尙多不在此數							
荷	爪哇及馬德拉島	二八、七四六、六三八	七六〇、〇〇〇	與土人雜婚者甚多不在此 數						
	蘇門答刺	三、一六八、三一二	九〇〇、〇〇〇							
	其他諸島	一一、〇〇〇、〇〇〇	五〇〇、〇〇〇							

右表所列。雖未可稱確實之統計。然大端固不甚謬。即吾民自殖於彼者。當不下五百四五十萬人。加以與土人種雜婚者。當及七百萬。人間若羣島之礦業。暹羅越南緬甸之農業。羣島及暹羅之森林業。乃至全部之商業工業。其在我國人手者。十而八九。故此諸地於實際上。蓋吾外府也。吾國以何因緣而能致此。推原功首。吾思鄭和。

鄭和。雲南人。世所稱三保太監者也。初事明成祖於燕邸。從起兵。有功。累擢太監。成祖之在位。當西紀千四百三。年至千四百二十四年。正葡萄牙王子亨利獎勵航海時代。亨利生一三九四年卒一四六三年而西史所稱新紀元之過渡也。成祖以雄才大略。承高帝之後。天下初定。國力大充。乃思揚威德於域外。此其與漢孝武唐太宗之時代正相類。成祖既北定韃靼。耀兵於烏梁海以西。西關烏斯藏。以法號羈縻其酋。南戡越南。夷爲郡縣。陸運之盛。幾追漢唐。乃更進而樹威於新國。鄭和之業。其主動者。實絕世英主明成祖其人也。

舊史稱成祖疑惠帝亡海外。欲蹤跡之。且欲耀兵異域。示中國富強。於是有命和航海之舉。但其動機安屬。勿具論。吾徵諸史文。於鄭君首途之前。有深當注意者二事。

一曰其目的在通歐西也。本傳云。命和及其儕王景弘等通使西洋。又云。俗傳三保太監下西洋。爲明初盛事。據此則此行本志。非南渡而西征也。蓋自馬可波羅入仕以來。歐人讀其書而知中國有文明。始汲汲謀東航。此印度新航路之所由發見也。彼此皆未克達最終之目的地。而今日東西通道之鍵鑰。實胎孕於是。

二曰航海利器之發達也。本傳云。造大舶修四十四丈廣十八丈者六十二。容士卒二萬七千八百餘人。吾讀此文。而歎我大國民之氣魄。洵非他族所能幾也。考現在世界最大商船。稱美國大北公司之「彌奈梭達」。一今年

始開航日本議和全權小長六百三十英尺。廣七十三英尺。全世界色然驚之。謂大莫與京矣。英尺當我工部尺九寸八五七七。明尺當今工部尺。尺有一寸一二。然則鄭和所乘船。其袤殆與彌奈梭達等。其幅則倍彼有餘。以今日之美國。僅能造如彌奈梭達者二。以當時之中國。既能造倍彌奈梭達者六十二。雖曰專制君主有萬能力。而國民氣象之偉大。亦真不可思議矣。其時蒸氣機關。未經發明。乃能運用如此。厯碩之艤。艘。凌越萬里。則駕駛術亦必有過人者。

哥命布航海凡四次。倭頓廓航海凡五次。而鄭和航海則七次。今表其年代。

(首途時)

(迴航時)

(西紀)

(所歷地)

第一次 永樂三年六月

永樂五年九月

一四〇五……七年

起蘇州經福建逾占城三佛齊

第二次 六年九月

九年六月

一四〇八……一一年

至印度錫蘭島

第三次 十年十一月

十三年七月

一四一二……一五年

歷蘇門答刺滿刺加等十九國

第四次 十四年冬

十七年七月

一四一三……一九年

第五次 十九年春

二十年八月

一四二一……二二年

第六次 廿二年正月

同年 月

一四二四……年

第七次 宣德五年六月

宣德八年七月

一四三〇……三三年

忽魯謨斯十七國

據右表所示。則鄭和為海上生活者垂三十年。殆無歲不在驚濤駭浪之中。其間稍得息肩者。則成祖崩殂後六年間耳。迨宣宗中葉。復舉壯圖。闢地最遠。而和亦既老矣。其經略海外之事實。史文闕如。不能具詳。但紀其俘三

佛齊王錫蘭王定蘇門答刺之亂。其武功之偉。可見一斑。又史言自和死後。凡將命海表者。莫不盛稱和以夸外番。此則張博望之在西域。何以加諸。

其時紀行之作有二書。

(一) 瀛涯勝覽。馬歡著。永樂十四年出版。紀載十九國。

(二) 星槎勝覽。費信著。正統元年出版。紀載四十國。

馬費二氏。皆回教徒。以能解亞刺伯語言。被命爲通譯。故紀行文皆成於其手。馬著出版先。故國名少而紀載較詳。費著出版後。故國名多而紀載微簡。今參考兩書。釋以今地。以稽當時聲威之所被焉。

(一) 馬來半島以東諸國。凡十五。

(二) 滿刺加諸國。凡四。

(三) 蘇門答刺諸國。凡七。

(四) 印度諸國。凡六。

(五) 亞刺伯諸國。凡五。

(六) 亞非利加諸國。凡三。

(一) 馬來半島以東諸國。

(1) 占城 (Champa or Champā) 漢林邑地。唐時或稱占不勞。改稱占婆。今越南下交趾部西貢市所在地。其時爲一獨立國。不屬交趾。

(2) 靈山。星槎所記云與占城山地連接。其地今難確指。西人腓立氏謂今之伽南港(Cannanah)格蘭尼威氏謂爲今之那的里加山(Nutragan)未知孰是。要之在下交趾也。

(3) 真臘(Camboja) 今之柬埔寨爲法蘭西保護國者也。當時其國領有暹羅之一部分。西與我雲南接壤。
(4) 崑崙(Pulo Condore) 下交趾極南之一島。如我國之有瓊州島。然至今越南人仍呼爲崑崙山。西人則稱蒲盧康得羅。蓋馬可波羅紀行之舊名云。馬來語之蒲盧卽Island(島)之義也。今法人往往竄越國事犯於此。

(5) 賓童龍國(Cape Paduran) 今柬埔寨海岸之一岬角也。

(6) 暹羅國(Siam) 自明。

(7) 彭坑(Panang) 星槎云在暹羅之西。卽今馬來半島之南端。瀕東海岸。與新加坡接壤者也。

(8) 東西竺(Singapore) 明史外國傳柔佛條下云。『柔佛近彭亨。永樂中鄭和遍歷西洋。無柔佛名。或言和曾經東西竺山。今此山正在其地。疑卽東西竺。』今案柔佛卽今之新加坡。在馬來半島之極南端。當時名以東西竺者。殆猶哥倫布命北美新地爲西印度羣島歟。

(9) 龍牙門(Strait of Lingga) 馬來半島與蘇門答刺島中間之一小島。在海峽間。今大學堂審定地圖所稱龍加島者是也。

(10) 交爛山(Billiton Island) 大學堂地圖所稱比利敦島者也。在爪哇海中。位蘇門答刺島與婆羅洲之交。元時史弼征爪哇曾駐兵焉。

(11) 假馬里丁 (Carinata Island) 大學堂地圖所稱卡里馬塔羣島是也。在婆羅之西南。與蘇門答刺相對。元史史弼傳有假里馬答其位置正如星槎所記星槎之馬里可決爲里馬之譌

(12) 麻逸凍 (Pulo Bintang) 星槎記在交爛山之西南洋海中。其地今難確指。格蘭尼威氏以巽他羣島中之邊丹當之。今從焉。

(13) 爪哇 (Java) 自明。

(14) 重迦羅 (Mcdura) 大學堂地圖所稱馬都拉島者是也。在爪哇海中。與蘇拉巴雅港相對。

(15) 吉里地悶 其地今難確指。星槎云。在重迦羅之東。產檀香。按佛理嶼一名檀香嶼 (Santalwood) 或當屬此地。其地在爪哇海與班達海之間也。

(二) 滿刺加諸國

(1) 滿刺加國 (Malacca) 今官書或稱麻六甲。爲英屬地。在馬來半島南端西岸。

(2) 亞魯 (Arulands) 大學堂地圖譯爲亞羅。在蘇門答刺島北岸。臨滿刺加海峽。

(3) 九州山 (Pulo Sambilon) 滿刺加海峽中九島嶼。九州之名。乃譯義而非譯音。馬來語之 (Pulo) 此云島也。其 (Sambilon) 此云九也。

(三) 蘇門答刺諸國

(1) 舊港亦名浣淋邦 (Palembang) 明史稱三佛齊。六朝時稱于陀利。今荷屬蘇門答刺島之東北部。一大都會。大學堂地圖所譯爲巴鄰旁者是也。

(2) 蘇門答刺國 (Sumatra) 今以爲全島總名。但據瀛涯星槎所記。則僅爲其島西部之專名。卽今之亞齊 (Achin) 一隅之地也。

(3) 南淳里 (Lambri) 其地今難確指。馬可波羅紀行有廉淳里國者。當卽其地。蓋蘇門答刺島之西北部。亞齊之西鄰也。Lam 譯南。蓋廈門音。

(4) 那孤兒 (一名花面王國) 其地今難確指。殆亞齊之一部。

(5) 黎代 其地今難確指。殆亞齊之一部。

(6) 龍涎嶼 (Pulo Way) 距亞齊東北十三里一小島也。

(7) 翠藍嶼 (Andaman Island) 大學堂地圖所稱安達曼羣島是也。由馬來半島航印度。此其中站。今爲印度屬地。隸英版瀛涯記其地在大海中山有三四星。槎記在龍涎嶼西北五晝夜程。其必爲安達無疑。翠藍者狀風景以命名。非譯音也。

(四) 印度諸國

(1) 榜葛刺 (Bengal) 卽通行官書所譯之孟加拉。今印度首府加拉吉大所在地也。

(2) 柯枝 (Cochin) 大學堂地圖作可陳。此譯柯者廈門音也。其地在印度半島之西南端。臨亞刺伯海。

(3) 大小葛蘭 (Quilon) 大學堂地圖作固蘭。星槎記其地與都樵欄相近。都樵欄卽 (Trivandrum) 亦

印度第二等大會也。

(4) 古里國 (Calicut) 瀛涯記其位置。云西瀕海。南距柯枝國。北距狼奴兒國。遠東七百里許。距坎巴夷。案

柯枝即可陳坎巴夷卽 *Cambay* 大學堂地圖然則其地必今之哥里卡德孟買省瀕海一小都會也。

(5) 錫蘭 (*Ceylon*) 印度南端之大島古稱師子國今西航必經之地。

(6) 溜山洋國 (*Maldivé Island*) 大學堂地圖譯爲麻代父羣島錫蘭島西偏南之多數珊瑚島也瀛涯言有八大溜星槎言有三萬八千小溜其爲無數小嶼甚明與馬可波羅紀行麻代父條下記事正同。

(五) 阿刺伯諸國。

(1) 佐香兒星槎祖法兒瀛涯 (*Djéfer*) 阿刺伯海南岸一市。

(2) 阿丹國 (*Aden*) 舊譯雅典亦譯亞丁阿刺伯最南端一半島西航必經之要津也今爲英屬地屬印度孟買省行政區域。

(3) 忽魯謨斯 (*Hormuz or Ormuz*) 波斯灣內三大島之一今爲波斯領土。

(4) 天方 (*Arabia or Mecca*) 卽阿刺伯亦名麥加。

(5) 刺撒 其地今難確指蓋在米梭必達迷亞附近。

(六) 阿非利加沿岸諸國。

(1) 木骨都東 (*Magedexa or Magadoxo*) 大學堂地圖所譯馬加多朔者是也在阿非利加東海岸臨印度洋。

(2) 卜刺哇 (*Barava*) 大學堂地圖譯巴拉瓦在木骨都東迤南。

(3) 竹步 (*Juba*) 大學堂地圖譯周巴在卜刺哇迤南。

以上所列凡四十國，皆見於瀛涯勝覽星槎勝覽者，今略推定其航路線如下。

- (一) 航中國南海至印度支那半島之南端。(西貢)
- (二) 航暹羅灣(即曼谷灣)之東岸至曼谷(今暹京)
- (三) 航暹羅灣西岸循馬來半島南下至新加坡。
- (四) 繞航蘇門答刺島一周。
- (五) 繞航爪哇羣島一周。
- (六) 航孟加拉灣經安達曼羣島至東印度。(加拉吉大)
- (七) 循孟加拉灣東岸南航至錫蘭繞錫蘭島一周。
- (八) 循阿刺伯海東岸北航至西印度。(孟買)
- (九) 由孟買循波斯灣東岸北航至泰格里士河河口。(今德屬小亞細亞)
- (十) 循波斯灣西岸南航復沿阿刺伯海西岸一周至亞丁。
- (十一) 越亞丁灣循紅海東岸北航至麥加。
- (十二) 循紅海西岸南航出亞丁灣復循亞非利加東部海岸南航經摩森比克海峽。亦作莫三鼻給海峽掠馬達加斯加島之南端迴航。

此鄭和航路之大略也。據上所列，似詳於西而略於東，其足跡未及馬來西亞羣島之半，而爪哇海以東，未嘗至焉。然考明史外國傳雞籠條下，言鄭和惡其人家貽一銅鈴，是臺灣島和所曾履也。又文萊條下，言鄭和往使有

閩人從焉。因留居。後人因據其國而王之。是婆羅洲和所曾履也。西洋朝貢典錄稱呂宋於永樂八年。隨中官鄭和來朝。是菲律賓羣島亦和所曾履也。瀛涯星槎皆不能記載者。殆馬費二氏皆以能操阿剌伯語。從事通譯。其在馬來半島以西。爲阿剌伯語通行地。故二氏能紀之。其以東。則無取於二子之載筆歟。準此以談。則亞細亞之海岸線。和所經行者。十而八九矣。嘻。盛哉。


新史氏曰。班定遠既定西域。使甘英航海求大秦。而安息人^{波斯}遮之不得達。謬言海上之奇。新殊險。英遂氣沮。於是東西文明相接觸之一機會坐失。讀史者有無窮之憾焉。謂大陸人民不習海事。性或然也。及觀鄭君。則全世界歷史上所號稱航海偉人。能與並肩者。何其寡也。鄭君之初航海。當哥倫布發見亞美利加以前六十餘年。當維嘉達哥馬發見印度新航路以前七十餘年。顧何以哥氏維氏之績。能使全世界劃然開一新紀元。而鄭君之烈。隨鄭君之沒以俱逝。我國民雖稍食其賜。亦幾希焉。則哥倫布以後。有無量數之哥倫布。維嘉達哥馬以後。有無量數之維嘉達哥馬。而我則鄭和以後。竟無第二之鄭和。噫。嘻。是豈鄭君之罪也。

新史氏又曰。天下事失敗者不必論。其成功者亦不必與其所希望之性質相緣。或過或不及。而總不離本希望之性質。近是。此佛說所謂造業也。哥氏之航海。爲覓印度也。印度不得達。而開新大陸。是過其希望者也。維氏之航海。爲覓支那也。支那不得達。而僅通印度。是不及其希望者也。要之其希望之性質。咸以母國人滿。欲求新地。以自殖。故其所希望之定點。雖不達。而其最初最大之目的。固已達。若我國之馳域外觀者。其希望之性質。安在。則雄主之野心。欲博懷柔遠人。萬國來同等虛譽。聊以自娛耳。故其所成就者。亦適應於此希望而止。何也。其性質則然也。故鄭和之所成就。在明成祖既已躊躇滿志者。然則此後雖有無量數之鄭和。亦若是則已耳。嗚呼。此

我族之所以久爲人下也。吾昔爲張博望班定遠傳。既言之有餘慨矣。新史氏又曰。論人不可有階級之見存。刑餘界中。前有司馬遷。後有鄭和。皆國史之光也。



0007165



0007165

0007165